



A NAZ.

XVI

C

19

NAPOLI

X XIV

HC

14

BIBLIOTECA NAZ.


Vittorio Emanuele III

XXVI

C

19






XXVI.


C

19









# THEATRVM POLITICVM

*In quo*  
Quid agendum sit a  
Principe, & quid ca:  
vendum, accuratè  
prescribitur.

Auctore  
AMBROSIO MARLIANO  
*Papiensè Can. Reg. Later.  
Sac. Theologia Professore.*

DANTISCI.  
*Sump. Georgii Forsteri.*  
CIS IOC LV.



..  
CA  
C. 100  
th

..  
C. 100  
th



Eminentiss. ac Reverendiss.

PRINCIPI

ANTONIO

BARBERINO

S. R. E. CARDINALI

AMPLISSIMO,

S<sup>mi</sup>. D. N. URBANI VIII

EX FRATRE NEPOTI.



**T**HEATRUM hoc sacra-  
rum virtutum, quæ op-  
timum Principem tan-  
quam elementa consti-  
tuunt, Patronum te hu-  
militer deposcit, Emi-  
nentissime Princeps, siquidem jam te  
habuit exemplar, ut experimento  
bavere Principes potissimum I<sup>st</sup>æ,  
cum quibus de summa rerum ita pru-  
denter supra ætatem egisti, & indies  
agis, ut omnes intui amorem, & ad-  
mirationem rapiantur. Domesticæ  
quoque Apes, quæ cùm solæ ex ani-  
mantibus Regem habeant, Regendi

politiam hominibus tradidere , hoc  
idem suadent, ut ad Apes redeant præ-  
cepta Regnandi , quæ ab Apibus pro-  
cessere. Scio quidem , Isidoro teste ,  
Apes ut plurimum pasci rore cœlesti ,  
suavique florum odore apprime dele-  
ctari , & proinde nil tibi deberi , nisi  
opus ingenio elaboratum , omnibus  
numeris absolutum , & , ut nomen tuum  
Græcè sonat , floridissimum. Verum  
novi etiam , Fama undique personante ,  
Regiam benignitatem tuam , qua po-  
tius animi offerentis benignitatem re-  
spicis , quam rem ipsam. Satis enim  
dedit , qui seipsum donavit. Benigna igitur  
fronte , ut soles , conatulum hunc  
meum suscipe , meque ad tuam prote-  
ctionem , tanquam ad beneficum sidus ,  
prostrato corde , & corpore confugien-  
tem , protege , respice , fove. tunc mihi  
licebit dicere : Ex visu salus.

*Ambrosius Marlianus Papiensis Can. Reg.  
Lateranensis , Sacra Theologia Professor ,  
perpetuam optat felicitatem.*

BENI-

## BENIGNO LECTORI.

**C**OMMUNI commodo, quod vel unicum, vel præcipuum Scriptoris scopum esse debere, nemo dubitat, quomodo inserviam Theatrum hoc exhibendo, ipse judex esto. Certe hoc vel maxime studui, ut ibi virtutum præcepta inspergerem, unde ad omnes facile possent dimanare. Hoc autem proculdubio continget, dum Theatrum hoc meum Principibus spectandum proponam, cum eorum exempla apud cæteros vim legis obtineant. Erit fortasse, qui cultiorem desideret stylum, sed hoc mihi propositum non permisit argumentum, utpote qui tantum juvandi studio hunc laborem suscepi. Siquidem non me latet, Principum vitam sanctis moribus institutam, totum fere orbem ad ipsorum imitationem suaviter allicere, ac propemodum impellere, sic namque canit Claudianus,

Regis ad exemplum totus componi-  
tus orbis.

*Bene vale, & conatum hunc meum æqui,  
bonique consule.*

D. Polycarpus Capellus Casalensis Congregationis Canon-  
icorum Regularium Lateranen. Abbas Generalis. Dilecto  
Nobis in Christo Patri D. Ambrosio Marliano Papien.  
Canonico nostro professo, Sacerdoti, ac Concionatori.

**V**isa approbatione facta per R. P. D. Angelum Ga-  
brielem Placentinum, & R. P. D. Petrum Fran-  
ciscum Casalen. Sacrae Theologiae Professores, &  
Concionatores, Libri inscripti *Theatrum Politicum*, ex  
commessione nostra revisi, Tenore praesentium licen-  
tiam & facultatem tibi praedicto concedimus, & im-  
partimur, ut ipsum typis mandari, & imprimi facere  
possis, servatis tamen de jure servandis. In quorum  
fidem, &c. Datum Papiæ in Canonica nostra S. Petri  
sub Cælo aureo, die 2 Februarii 1631.

D. Polycarpus Abbas Generalis.

Loco † sigilli.

*Imprimatur, si videbitur Reverendiss. P. Mag. Sacri Pal.  
Apost.*

A. Episc. Bellicastren. Vicefg.

**E** Go Don Bartholomæus Gavantus Congreg. Cle-  
ricorum Regularium S. Pauli, & Sacrae Rituum  
Cong. Consultor, de mandato Reverendiss. P. F. Ni-  
colai Riccardi S. A. P. Magistri, praesens opus, cui  
titulus, *Theatrum Politicum*, auctore adm. Rev. P.  
Ambrosio Marliano Canon. Reg. Lateran. Theologo,  
re censui, & in eo nihil deprehendi Catholicae Religio-  
ni, aut bonis moribus adversans; imo variae eruditio-  
nis plenum est, & à Principibus viris ut legatur, quam  
dignissimum. In quorum fidem, &c. in Collegio nostro  
S. S. Blasii & Caroli, Romæ, die 18 Decembris 1630.

Don Bartholomæus Gavantus qui supra.

*Imprimatur.*

Fr. Nicolaus Riccardius Sacri Palatii Apostolici Magi-  
ster.

Ad



Ad Eminentiss. PRINCIPEM  
ANTONIUM BARBERINUM  
ANDREÆ BAIANI  
DOCT. THEOL.

EPIGRAMMA.

**E**xplicat Ambrosius vario dum flore Theatrum,  
Ambrosias querit, queis sacret, auctor, Apes.  
Antoni, sunt, magne, tue hæc, quæ cerula supra  
Prata volant, cæli & pascua leta petunt,  
Curarum cum spina premet minus, hosce per hortos  
Lumina florentes pascere blanda feras.  
Sic tandem areolis pretium immortale caducis,  
Veramque Ambrosiam fundere culta dabis.

In Laudem

AMBROSII MARLIANI  
CÆSARIS RASPONI

EPIGRAMMA.

**I**mperii claras artes, & jura potentum  
Regnorum, Ambrosio sparsa lepore refers.  
Nominis excelsi splendenti ANTONIUS umbra  
Hæc tegit, Ambrosium fida tuetur Apis.  
Artem regalem, regali ornare patrono,  
Ambrosiam & melli jungere nempe decet.

Ad Eminentiss. CARDINALEM  
ANTONIUM BARBERINUM

EPIGRAMMA.

**R**egnandi ô quales liber hic mundo explicat artes?  
Rite reget populos, qui finet inde regi.  
At tibi nil opus, ANTONI, his est artibus, ipsas  
Nam Regnandi artes, ipse docere potes.  
Hic igitur memoratus eris, ceu forma regentum,  
Quod monet hic calamus, præcipis ipse manu.

In Laudem Libri  
H E X A S T I C H O N .

**D** E foffe antiquum terræ qui credidit aurum ,  
Theſaurum arcanis condidit in tumulis.  
Aureus Ambroſiam ſed qui liber aſſat , & artem  
Regnandi , ingenua providus arte docet ;  
Divitias non condit iners , ſed divite cenſu  
Mentis opes auro nobiliore beat.

A M B R O S I I M A R L I A N I  
A N A G R A M M A .

*Antonius Barberinus.*

---

*An non eſt Urbis jubar ?*

D I S T I C H O N .

**E** Xultat mundus radiantis lumine Phœbi  
Urbis tu jubar es , perpetuumque decus.

THEA-

# THEATRUM POLITICUM,

In quo quid agendum sit à Principe,  
& quid cavendum, accuratè  
præscribitur.

## CAPUT I.

*Honestam vivendi rationem sibi præscribat  
Princeps, & sequetur eum Populus,  
sicut umbra corpus.*



Virtutem suapte natura amabilem, quamvis teneatur unusquisque omni studio complecti, & tale præbere exemplum, ut luceat coram hominibus, hoc tamen præcipua ac singulari ratione exigitur ab eo, quem ad summum dignitatis apicem e-

vexit virtus, comite fortuna. Is enim astringitur arctiori quodam vinculo, utpote inferiorum exemplar: qualis autem superior, tales & inferiores esse solent, ita acclamante sapientissimo Rege, qualis rector civitatis, tales & habitantes in ea. Quoniam sicut heliotropium Solis cursum imitatur, ita populi instituendę vitę regulam à Principis ingenio mutantur. hinc Poëta tragicus:

*Rex velit honesta, nemo non eadem volet.*

Primum mobile, ut tradunt Philosophi, ab orien-

A 5

te

Eccles.  
10.  
Plinius  
lib. 28.  
cap. 27.

Cicero  
lib. 3 de  
legib.

te in occidentem tendens, omnes sphaeras violento impetu secum trahit, & modo quodam rapit, ita Princeps in vitium declinans, multos simul ad delictum ducit, rupis ingentis instar, quæ à montis vertice decidens, plurimos secum cadendo pertrahit lapillos. Quapropter omni studio cavendum, ne viri primarii pravo exemplo alios inficiant, quoniam quales Principes in Republica, tales reliqui solent esse cives; & quod magis refert, non solum vitia concipiunt ipsi, sed ea infundunt in civitatem; plusque exemplo, quàm peccato nocent. Turpe quidem, non inficior, privatum hominem errare, at in Principe multo magis indecorum. Actio namque Principis cum in aperto ab omnibus conspiciatur, ad illum imitandum excitat subjectos. Ita Plutarchus docet, & quidem pulchre. ait enim, quemadmodum majore dedecore solent esse notæ in facie, quàm in reliquo corpore, sic etiam minima quæque Principum errata notantur. ô quam pulchre huic rei facit Isidorus, Crescit delicti cumulus juxta ordinem meritorum, & sæpe quod minoribus ignoscitur, majoribus imputatur. Nonne in Hierusalem plurimi erant cives vitiis addicti? nullum tamen arguit Ioannes, nisi Herodem: Arguebat Herodem Ioannes. Quorsum hoc? quia in ipso tanquam in Rege major culpa notatur. Proinde Plato scribens Dion Syracusarum Regi recens facto, hoc præcipuum præscripsit observandum, nempe quod ita se haberet tanquam speculum omnibus expositum. Siquidem Princeps solis instar omnium oculos in se convertit, propterea laudabile vivendi institutum amplectatur, quoniam ad ejus exemplum civium mores componuntur, & velut divinus magnes subditos ad se trahit. Notissimus est Claudiani

Isid. lib.  
2 de  
summo  
bono c.  
18.

Plato  
epist. 4.

diani verficulus, huic rei egregiè deserviens,

*In commune jubes si quid, censeve tenendum,*

*Primus jussa subi, tunc observantior æqui*

*Fit populus, nec ferre vetat, quod viderit ipsum*

*Authorem parere sibi. componitur orbis*

*Regis ad exemplum. nec sic inflectere sensus*

*Humanos edicta valent, quam vita regentis.*

Claud.

Paneg. 74

Hinc per Ezechielis animalia Principes intelliguntur, per currus, & rotas, populares viri; Sicut enim rotæ non habebant motum proprium, sed ad motum animalium movebantur, ita & subditi fere semper ad motum Principum moventur. Idcirco qui præsumunt, longe magis exemplo quam culpa nocent. Proinde Xenophon Cyrum Regem ad bonum regimen inducens, aiebat, præcipuum Principis opus est, sese virum bonum præbere, ac etiam pro virili operam dare, ut qui sub ejus imperio degunt, quam optimi evadant. Populi namque eorum vitam qui præsumunt, solent æmulari; si boni fuerint, ad honesta eos ducunt; si mali, ad turpia. Quocirca non liceat Principi, ne latum quidem unguem, à legis præscripto recedere, ne pravo exemplo civitas corrumpatur: hæc est enim Principis conditio, ut quod ipse facit, id aliis præcipere videatur; & hoc est plebis ingenium, ut magis oculis, quam auribus credat, & magis exemplis vivis, quam verbis mortuis excitetur. Hinc Livium Drusum Romanum summis laudibus celebravit antiquitas; is enim cum domum haberet ob fenestrarum multitudinem oculis vicinorum nimis patentem, fabro cuidam murrario promittenti quinque talentorum mercede huic incommodo occurrere, respondit, & quidem prudenter, decem potius dabo tibi, si totam domum meam conspicuam effeceris, ut cives omnes

Vellejus  
Paterculus Rom.  
hist. lib.  
ultim.

Apocal.  
cap. I.

Numer.  
c. 17.

omnes quemadmodum vitam instituo, cernere queant. voluit quippe vir egregius innuere, eum, qui cæteris præest, illud vivendi institutum sibi præscribere debere, ut sit omnibus tanquam exemplar, à quo cæteri ediscant, & speculum quoddam lucidissimum, in quod Populi insipientes viam virtutis assequantur. Quorsum Ioannes Apostolus stellarum nomine honestavit Principes? ut sub hoc velamine doceret, quod sicut stellæ in firmamento semper micant, & nunquam patiuntur eclipsim, quod nimis à terra remotæ sint, ejusque umbra ad eas usque nequeat pertingere, ita qui clavum tenet Imperii, vitæ honestate aliis prælucere debet, nec ulla tanquam macula licet minima deliquium pati. Cui doctrinæ egregie facit Basilii Imperatoris oraculum ad Leonem filium. Sicut cæteris prælatus es, ut omnibus imperares, ita contende, ut virtute quoque cæteris antecellas; virtus enim omni principatu præstantior est; si autem dignitate reliquis præstas omnibus, virtute autem ab aliis præcelleris, Imperator quidem es, sed in eo, quod minoris excellentiæ est, in eo verò, quod præclarius est, Imperator non es; imò sub alterius Imperio es. Nec defunt sacrarum litterarum testimonia: dixit enim Dominus ad Moysen, accipe virgas à Principibus tribuum, quem ex hiselegero, germinabit virga ejus: germinavit autem virga Aaron, & turgentibus gemmis erumpebant flores, qui foliis dilatatis in amygdalas formati sunt. Quid hinc? hoc nimirum, quod ille solus principatum gerere debet, qui germina virtutis profert; ô quam summa felicitas erat gentium in aureo sæculo degentium, in quo non poterat esse potentior, nisi melior. tunc enim penes sapientes fuit Regnum, quan-

quando officium erat imperare, non Regnum. At nostra hac tempestate, quod nimis deplorandum est, statim, cum quis promotus est ad honores, non curat prodesse, sed gloriatur tantum præesse, non quærit opus, sed opes; non libros, sed libras; non prece, sed tantum pretio juvat, & demum præsumit se meliorem, quia cernit se superiorem. at bonum facit, non gradus, sed virtus; non dignitas, sed honestas. scitè admodum Cyrus, qui dicebat, neminem debere imperare, qui subditis non esset melior. Pulchre quidem Bernardus ad Eugenium, audi canticum meum minus suave, Confid. lib. 3. cap. 13. sed salutare; monstruosa res, gradus summus, & animus infimus; sedes prima, vita ima; lingua verbosa, manus otiosa; sermo multus, fructus nullus; vultus gravis, actus levis; caput canum, cor vanum; ingens auctoritas, nutans stabilitas. Non sic, non sic, ô Principes, ait Ambrosius, sed stude, ut nomen congruat actioni, & actio respondeat nomini. Scio quidem, Principem esse hominem, nec ob dignitatem penitus exuere humanitatem, ut prudenter docuit quidam Philosophus; is enim flentem Imperatorem ob infausta quædam nuntia, cum à senatu, & à magistratibus increpari cerneret, in hæc verba prorupit: Sinite plorare, quia dignitas Imperatoris, non impedit illum esse hominem; negari tamen non potest, pravo Regis exemplo, plurimos perdi. Siquidem hoc in more positum est apud omnes, ut Principum actiones, aures & oculi populorum sequantur. Quod quidem divinarum, humanarumque litterarum monumentis, facili negotio comprobatur. Acclamavit Jonas, adhuc quadraginta dies, & Ninive subvertetur. Tunc Rex hac voce Jonæ 3. percussus sacco induitur, sedet in cinere, fundit lachry-

- lachrymarum imbres. Quid hinc? omnes illico  
 Dan.c.5. secuti sunt Regem. Vasa templi prophanavit Rex  
 Chaldæus, statim post illum, & optimates ejus.  
 2 Reg.4. arripuit Saul gladium suum, & irruit super eum,  
 hoc cum vidisset armiger ejus, irruit & ipse super  
 gladium suum & mortuus est cum eo. tantum va-  
 luit Principis exemplum in re omnium acerbissi-  
 3 Reg. ma. Cum esset Jeroboam idolorum cultor, ejus  
 cap. 12. exemplo plebs edocta idolis incensum adolere  
 Gen. 18. non dubitavit. Abraham pius in hospites erat,  
 famulum quoque habuit, qui celeriter ad gregem  
 curreret, & vitulum occideret, quem & Sara  
 2 Reg. uxor libentissime coxit. Absalon impius erat, fa-  
 cap. 13. mulos quoque habuit ejusdem farinae, qui ad ejus  
 nutum Ammon fratrem domini sui in ipso convi-  
 Luc.c.16 vio nefarie trucidarent. Dives ille cum Lazaro  
 crudelis erat, omnes etiam aulici impii, quia ne-  
 Matth.2. mo illi dabat. Turbatur Herodes, mox turbatur  
 omnis Hierosolyma cum illo. Unde Bernardus  
 exclamat, ô misera civitas in qua regnat Herodes,  
 quoniam Herodianæ procul dubio particeps erit  
 malitiæ. Nec desunt testimonia ex humanis lit-  
 Plutar. teris deprompta. Cum Dionysius Platone magi-  
 in suis stro Philosophiæ operam daret, tota regia pul-  
 morali- vere fuit repleta præ turba geometricas pingent-  
 bus, tium figuras, sed eodem ad sua pocula, & volup-  
 tates redeunte, vitæ mollities universos occupa-  
 vit. Alexander Macedonum Rex, cum interio-  
 Q. Cur- rem Perfidis regionem penetrasset, ventum est ad  
 tius l. 5. de gestis iter perpetuis obsitum nivibus, ubi solitudines in-  
 Alexand. viæ animos militum deterrebant, & detinebant,  
 tunc Rex ipse equo defiliit, pedesq; per nivem, &  
 concretam glaciem quasi reptans ingredi cœpit,  
 & dolabra glaciem perfringens, viam sibi felici-  
 ter aperuit. erubuerunt non sequi primum amici,  
 dein-



deinde copiarum duces, milites denique omnes. tantæ molis erat egregium Principis exemplum; viso in acie Imperatore animi militum accenduntur. Quid Julii Cæsaris exercitum, ad Cordubam contra Pompejum juniorem perterrefactum, & jam de fuga magis, quam de pugna meditantem, restituit, animavit, & ad bellandum impulit? pudor militum ad Principis exemplum. Cum enim milites omnes audivissent Cæsarem in concione exclamantem, hic dies mihi finis vitæ erit, & militiæ vestræ ultimus, & vidissent, quod his dictis mox arripuit obvii militis clypeum, solus hostes invasit, loco deturbavit, & ducenta circiter tela in se missa partim audacter evitavit, partim scuto excepit, tunc tanto pudore accensi fuere milites; moxque tanto impetu in hostes irruere, ut Pompejum cum universo exercitu in fugam compulerint, ducesque, capta Corduba, in quam confugerunt, magna ex parte cæsi sunt, & eorum capita ad Cæsarem perlata. En quanti ponderis strenui ducis exemplum. Neronis parricidium laudant centuriones, & tribuni, mox cæpto exemplo proxima Campaniæ municipia, victimis & legationibus lætitiâ testantur. En populares viri, quam facile illustrium virorum exemplis inficiuntur.

Livius  
lib. 2. de  
cade. 1.

Tac. l. 14.  
annal.

Clodoveus Gallorum Rex, cum fidem publice profiteretur, & ad sanctum convolaret lavacrum, à beato Remigio Episcopo baptizatur, mox ipsius exemplo tria hominum millia baptismum suscipere. Regnante Constantino optimo Principe Christiana fides in dies florebat. At regnante Constantio, quia Catholicę Ecclesię fuit hostis acerrimus, etiam populus Arriana labe fere omnis infectus. Sed quid plura? nonne nostris temporibus regnante in Anglia Henrico octavo, tunc fidei de-

Gregor.  
Turon.  
l. 2. hist.  
Franc.

fens-

fenfore, totum Regnum in fidei fervore florebat? at ipsomet Annæ Bolenę amore insaniente, & labe hæresis infecto, totum fere Regnum à fide defecit. regnante Maria totum Regnum ad Ecclesiastiam rediit, at regnante Elisabetha iterum regnare cœpit Calvinismus, & vera exulare religio. En quantum refert, vel bonum, vel malum Principis exemplum; tantum utique, ut etiam corporum notas, motus, ac gestus imitari in dominis subditi gestiant. Hinc Persæ pulchrum existimabant naso adunco esse, quia Cyrus eorum Rex talem habebat. Platonis contractos humeros familiares ejus exprimebant. Aristotelis gibbum discipuli pulchritudinis loco ducebant. ita cecinit Poëta:

*Claudum, cum claudo Principe, vulgus erit.*

Diodor.  
Siculus  
lib. 4. re-  
rum an-  
tiquar.  
cap. 1.

Psal. 54.

Apud Æthiopes habebantur inglorii, qui non imitabantur Principes in corporis etiam defectibus. si quando Rex aliqua corporis parte ex qua vis causa debilitabatur, domestici omnes sponte sua eandem partem debilitabant: turpe enim existimabant, Rege claudo non etiam amicos claudos esse. sed quod majoris admirationis est, non solum claudicabant cum claudo, sed mortuo Rege magis intimi & familiares morti se dabant; proinde subjunxit auctor, ferunt quoque consuetudinis esse amicos ultro in Regis morte vita defungi. Ad hanc rem satis appolite facit divini vatis oraculum, Vidi iniquitatem, & contradictionem in civitate, die ac nocte circumdabit eam super muros ejus iniquitas. pulchre advertit Augustinus, non in muris lapideis iniquitas, sed in viris qui sunt munimenta civitatum, hoc est in Principibus, qui à Deo constituti sunt propugnacula urbis. Quod autem hæc fuerit divini vatis intentio, liqui-

liquide constat ex alio ipsius oraculo, ubi vocat <sup>Psal. 46.</sup> Principes clypeos civitatum. quoniam dii fortes terræ vehementer elevati sunt. alia lectio habet, quoniam Principes sunt clypei terræ. nec inepte, quia Principes ad protectionem populorum constituti sunt. Cum autem in his appareat iniquitas, & re vera insit, quid mirum, si non defecit in plateis ejus usura, & dolus? qualis enim Rex talis quoque grex. Heu quam perniciosum Principis exemplum, sanguineis lachrymis deplorandum, & gravissimis suppliciis dignum. ita divino oraculo comminante, durissimum judicium fiet his qui præsent. Hoc probe noverat Rex vere catholicus Ferdinandus: hic enim cum post multa egregia facinora, morti jam proximus esset, ingemiscens dixit, O utinam divinæ Majestati placuisset, me monachum laicum fuisse; nunc enim tam exacte tot Regnorum ratio non esset reddenda. quasi jugiter maneret alta mente repostum <sup>Osee c. 4.</sup> prophetæ oraculum. Peccata populi comedetis. Quæ verba exponens Cyrillus dixit, peccata populi comedetis, hoc est, hostias pro peccatis oblatas, ad religiosos viros dirigens sermonem. Scriptura <sup>Levit. c. 10.</sup> enim ita loqui solet. Cur non comedistis hostiam pro peccato in loco sancto. in Hebræo est, cur non comedistis peccatum? decet enim ut sacerdotes qui laborant in altari, de altari vivant. Alexander Pontifex hujus nominis primus, hoc dictum intelligit de sacerdotibus, qui precibus suis peccata <sup>1. q. 1. cap. ipsi sacerdotes.</sup> populi delent. Comedere namque pro consumere multoties in divinis litteris solet accipi, Quia comederunt Jacob, & locum ejus desolaverunt. comederunt, hoc est, consumpserunt. Divus Hieronymus sic explicat, peccata populi comedunt, hoc est, ex eis vivunt: dissimulant enim peccata,

Homil.  
17 in  
Evang.

& laudant, sicque ad eorum quæstum afferuntur hostiæ, & populum spoliant ac comedunt; de quibus loquitur scriptura, Qui devorant plebem meam, sicut escam panis. quasi dicat, comedendo peccata populi, populum ipsum comedunt. Sic etiam exponit Gregorius, Cur peccata populi comedere dicuntur, nisi quia peccata delinquentium foveant, ne temporalia stipendia amittant? Sed afferamus explicationem nostro instituto magis consonam: Peccata populi comedetis, hoc est, pro peccatis populi pœnas luetis. hoc eodem modo explicandum venit oraculum illud, Si sustinueris, infernus domus mea est; si scelestos viros impunitos abire permiseris. Siquidem, ut ait Agapetus ad Justinianum Imperatorem, delinquere, & eos qui delinquant nullo obstaculo occupare, perinde esse reputa; si enim quispiam in republica vitam ipse degat ab omni iniquitate immunem, eos autem sustineat, qui impure vitam traducunt, malitiæ collega à Deo judicatur. Cui doctrinæ egregie favet Romanus orator, Si quid est in corpore quod reliquo corpori noceat, id uri, secarique patimur, ne totum corpus intereat; sic in reipublicæ corpore, ut totum saluum sit, quidquid pestiferum est, amputetur. dura vox, sed multo illa durior; salvi sint improbi, deleantur honesti. Ad bonum quippe Principem, cui bonum commune tuendum commissum est, pertinet, impedire proviribus, ne partes quæ sunt propter totum, illud corrumpant, & ideo si non potest omnes partes integras servare, potius debet unam partem amputare, quam sinere, ut bonum commune pereat, agricolarum exemplo edoctus, qui ramos amputant & sarmenta, quæ efficiunt viti; & medicorum, qui amputant membra

bra putrida, quæ totum corpus inficere possent. princeps namque integritate vitæ conspicuus, ad bonum publicum assidue anhelare debet, gerens pro stemmate illud insigne, nimirum, vas vitreum, in quo lumen inclusum, apposita notula, Intus, quò foris. quod regium plane institutum, ut menti tenacius hæreat, tibi amantissime Princeps hoc insigne appingo, alvearium nempe unâ cum apibus, & melle, adjecta inscriptione Virgiliana, Sic vos non vobis. siquidem apes argumentosæ non tam sibi ipsis, quam humano ului melificant, ita Principes alieno semper & publico bono insudare debent. Quod sane propositum egregio emblemate exprimit, & re ipsa comprobatur Barberina Familia, dum in gentilitio stemmate apes pingit mella ferentes, quia semper dulcissima publicæ utilitati mella irrorare pro virili contendit, & in dies magis experimento probatur præ lætitiâ gestiens universa Christi respublica, sub regio Urbani Octavi Pontificatu, qui mente quotidie perpendit, se exactam rationem redditurum pro Christiano grege, si sanctitatis exemplo illum ad meliorem frugem non reducit, quasi vox illa auribus ejus insonet, Sanguinem ejus de Ezech. manu tua requiro. Hoc stimulo vehementer an- C. 3.  
gebatur Rex David, proinde lachrymarum imbres quotidie ab oculis effundebat. Quoties in mentem requebat iniquitas, quam fecerat, toties exitus aquarum deducebant oculi ejus, nec unquam toto vitæ curriculo lachrymas intermisit, idcirco lachrymas appellabat panes; Fuerunt mihi lachrymæ meæ panes, dum dicitur mihi Psal. 41.  
quotidie, ubi est Deus tuus? nec abs re vocabatur panes. Quoniam sicut inter omnes cibos, nullus est pane frequentior, ita continuus peccatorum

dolor, cor ejus angebat. bene panes, quia quemadmodum panis reliquos cibos comitatur, ita fletus omnium ejus actionum individuus erat comes. bene ergo panes, quia sicut panis est cibus omnibus communis, ita Rex coram omnibus plorabat, quoniam publice deliquit; ut si forte aliquis secutus sit errantem, sequatur & pœnitentem. bene igitur panes. quia licet panis famem avertat, sitim tamen non extinguit, quin potius accendit. Ut igitur bonus Rex innueret, quod quo magis lachrymabatur, tanto magis in eo accendebatur lachrymarum sitis, propterea lachrymas appellabat, non aquas, sed panes, ac si diceret, plus ultra, Deum infinitum offendi, si ne fine plorabo, quia dolor de peccatis, nunquam fatis. quasi pro stemmate haberet Cœcrodilum, de quo refert Plinius, quod semper crescit, quamdiu vivit, apposita hac nota, Nostri simulachra doloris.

Amarantho hæc inest natura, ut si in aquam mittatur, virorem nunquam amittat, & ego, dicebat David, aquarum lachrymis inundatus, dolorem cordis pro offensa Dei conceptum, non dimittam. quasi illud academicum pronuncians, At lachrymis mea vita virescat. Quocirca lavabo per singulas noctes lectum meum, & lachrymis meis stratum meum rigabo. prudenter quidem lectum & stratum copulavit, quia in his præcipue locis divinum numen offenderat. lectum, in thori alieni violatio. stratum regium, in justitiæ corruptio. Nam ibi sententiam mortis contra innocentem Uriam promulgaverat, & manu regia firmaverat. sicut enim apud multas nationes mos inolevit, ut in eodem loco, ubi deliquit reus, ibi delicti pœnas luat. ita David in strato, & lecto, ubi

ubi deliquerat, de seipso vindictam sumebat, & quia in populis jam erat evulgatum delictum, ideo ut pœnitentiæ signum omnibus patefaceret, ubique amarè flebat. Flebat in aula regia. stratum meum rigabo. Flebat in lecto. Lavabo lectum meum. Flebat in mensa. Fuerunt lachrymę panes. Flēbat etiam in via. Exitus aquarum deduxerunt oculi mei. & nunquam finis. Euripidis sententia fuit, quod regi flere non licet: non enim bene cohærent fletus & majestas. cur igitur Rex David plorat? non plorat quod civitatem amiserit, quod in bello superatus fuerit, quod in captivitatē ductus; sed plorabat, quia bonorum spiritualium jacturam fecit. nam gratiam divini numinis amiserat, justitiæ decorem, animam denique suam turpiter fœdavit, & ideo regiæ dignitatis oblitus, lachrymis & fletibus vacabat, nec unquam intermisit toto vitæ curriculo. Quidam orator celebris laudes Ephestionis Alexandri regis amici decantans, hoc unum repetebat, De dilecto nunquam satis. At Rex pœnitens frequentibus suspiriis clamabat, Pro offensa Dei, & pro plebe exemplo meo corrupta, die ac nocte plorabo, & nunquam satis. Siquidem qui clavum tenent, & in excelsa puppi sedent cæteris præfecti, pro commissis populis exactam rationem reddent, pœnasque gravissimas dabunt, nisi ad meliorem frugem illos reducant. Optimos itaque mores summo studio complectatur Princeps, turpes vero radicitus evellat, & idem prorsus facient populi. Nam quales virgas figebat Jacob in canalibus, tales etiam partus edebant oves.

Huc facit apposite quod olim historiarum monumenta tradidere. Legitur, & multi doctores non sanè vulgares affirmant, speciosam quandam

D. Hieron. to. 3.  
epist.

Alvar de  
planctu  
Ecclesiæ  
lib. 1.

Isa. cap.  
13.  
Ioël cap.  
2.

Aulos  
Gell.  
Noct. At-  
tic. lib.  
12, c. 12  
Corn.  
Tac. lib.  
5 annal.

Salust.  
ad Cæ-  
sarem,

& candidam mulierem, prolem edidisse, instar Mauri, nigerrimam, quam calamitatem cum eadem foemina ad Albertum Magnum retulisset, scire cupiens tanticulus rationem aliquam, Albertus Magnus Mauri imaginem reperit in thalamo, quam mulier in extremo voluptatis æstu fuerat contemplata; dixitque illi, Inveni domina patrem filii tui. Idem prorsus populis contingit, qualia enim vident in Principe, talia pariunt & operantur. Nunquam vel raro in sacris litteris de solis obscuratione fit mentio, quin statim subsequatur lunæ & stellarum obtenebratio. Obscuratus est sol in ortu suo, & luna non splendebit in lumine suo. Sol & luna obtenebrati sunt, stellæ quoque retraxerunt lumen suum. & in fine capitis, Sol convertetur in tenebras, & luna in sanguinem. Nec credat Princeps cum turpiter vivat, vitia sua latere, & proinde pravo exemplo non inficere. aberrat toto cœlo. Fama enim penetrat abditos quosque Principum recessus, secreta quæque rimatur, occultiora introspectit, latebras omnes explorat. non tenebræ, non solitudo obstat, quo minus in vulgus dimanet quidquid egerit Princeps, nam lux principatus omnia reddit conspicua. Hinc veteres Poëtæ veritatē finxere temporis & memoriæ filiam, quia licet aliquando lateat, parvo tamen temporis processu emergit in lucem. Annales Taciti legantur, & omnes propemodum Romanæ aulæ angulos excussos reperiemus. Quid quæso, profuit Tiberio, seu potius Biberio, obscurum & subdolum fingendis virtutibus ingenium? Quid solitudines, ad inauditam, ac inexplabilem libidinem occultandam quæsitæ? Nonne monstrum illud dimotis parietibus, historia nobis ob oculos ponit? O quam pulchre Salustius; Aliis alia



alia licentia est, qui demissi in obscuro vitam agunt, si quid iracundia deliquere, pauci sciunt, fama, atque fortuna eorum pares sunt: at qui in excelso dignitatum culmine degunt, eorum facta cuncti mortales novere.

*Principis est vitium tanto conspectius in se,*

*Quanto aliis Princeps est magis conspicuus.*

Hoc enim habet magna fortuna, quod nihil tectum, nihilve occultum esse patiatur. privatus homo tegere improbitatem potest; principantium facta, dictaque omnia, ex edito prospectanda proponuntur. Quapropter maxime adnoscendum, ne duces suis ad impietatem fiant, trahantque exemplo in interitum, quos debebant in salutem. Hoc autem facile præstabunt, si Justitia, Pietate, Clementia, ac cæteris virtutibus comitati incedant, tanquam specula amplissimo totius orbis Theatro exposita. Siquidem domus regia Principis, debet esse Dei Templum, Prudentiæ oculus, libra Justitiæ, Fortitudinis sedes, regula Temperantiæ, Honestatis exemplar, Charitatis

Marfil.  
Picinus  
lib. 5.  
epist.

splendor, fons Gratiarum, Musarum chorus, Oratorum, Poëtarumque gymnasium, Philosophorum, Theologorumque sacrarium, Prudentum senatus, præmium litteratorum, pauperum mensa, bonorum spes, innocentium refugium, omnium miserorum tutissimum præsidium.

*Moribus ingenuis sint aurea sceptrum tenentes,*

*Moribus ingenuis sic erit & populus.*

*Mobilis ad primi motum volvuntur & astra,*

*Si currit corpus, currit & umbra simul.*

## CAPUT II.

*Principi justitia sit comes individua, & diu  
florebit Regnum ejus.*



Egis à latere nunquam recedat Justitia, omnium virtutum Regina, quæ regiam Majestatem foveat, dirigat, illustret, fulgentissimi solis inftar. Hic enim universis cœli luminibus dominatur, & præest. Hæc morales virtutes omnes facile antecellit, & subjeçti, & objecti, & effectuum dignitate. Subjeçti quidem, quoniam in nobilissima animæ potestate collocatur, in voluntate nimirum, quæ præcipit jus suum unicuique tribui. Præclarissima etiam ratione objecti, nam virtus circa difficile versatur. difficilius autem est, hominem esse recte affectum ad alienum bonum, ad quod natura non propendet, quam ad proprium, cui libentissime inclinatur. Præstantissima itidem, si præclaros effectus contemplemur, concordiam siquidem, pacem, & societatem inter homines parit, tuetur, & servat. Quid si dixerim ipso sole longe splendidior? non falso id quidem. Sol enim interdiu solum, hæc etiam noctu refulget. Sol oculis tantum corporis, hæc autem oculis mentis. Sol diuturna, & assidua præsentia plurimum obest, & absentia noctu prodest non parum. Justitiæ absentia semper obest, semper prodest præsentia. Pulchre quidem scripsit, qui Principis Justitiam, Regni animam nuncupavit. siquidem recedente anima, corpus statim dissolvitur; exulante justitia, in præceps ruit Regnum. Princeps itaque quasi jus animatum, commune commodum præ oculis

oculis habens, sapius mente revolvat, quod ut  
 profit, non ut præsit, in summo regimine est con-  
 stitutus. Rex enim propter Regnum, non Re-  
 gnum propter Regem; sicut non totum propter  
 partes, sed quælibet pars, etiam caput, propter  
 bonum totius condita sunt. Hinc dicebat Plinius  
 junior, Bonus Princeps post omnes est. Sed quo-  
 modo Paradoxum istud? Nonne caput præ aliis  
 membris in corpore? qui igitur Princeps præser-  
 tim optimus reipublicæ caput optimum, post alios  
 habendum? optime dixit, post omnes, non post  
 singulos, quia & ipse Princeps reipublicæ pars est,  
 sed præcipua, singulis comparatus, inter singulos  
 est, at omnibus, hoc est, universo reipublicæ cor-  
 pori, ut & alia quælibet pars, minor est toto, post  
 omnes simul acceptos, quia & Princeps ad bo-  
 num commune creatus est. Porro principes, qui  
 omnia in privatum commodum convertunt, ty-  
 ranni sunt, non Reges. Unde Bernardus lib. de  
 consideratione ad Eugenium docte & eleganter,  
 ut solet. Dejecti animi sunt Principes, qui subdito-  
 rum profectum non quærunt, sed quæstum pro-  
 prium: indecens est enim valde Principi, volun-  
 tate pro lege uti, & veluti rationis expertem, non  
 pro ratione, sed pro libito agere. hac enim rati-  
 one distinguitur potestas regia à tyrannica, quod  
 regia potestas commune bonum procurat, tyran-  
 nica vero privatum commodum. imo lex instituta  
 ad privatum commodum, non dicenda lex, sed  
 iniquitas. siquidem cessante boni communis ratio-  
 ne, cessat & ipsa lex, & vim obligandi non habet.  
 Nam lex est proprium opus publicæ potestatis, at  
 potestas publica de se in bonum publicum ordina-  
 ta est. Hinc merito laudatur Augustus Cæsar, qui  
 postquam multis ædificiis Romam decorasset, suis

Arist.  
politic.Paneg.  
in Tra-  
jan.D. Tho.  
in 1. 2.  
q. 90. a-  
2.

familiaribus dixit, Romam lateritiam accepi, marmoream relinquo. Proinde huic optimo Principi apprime convenit illud adagium, Dignus est obelisco. erat autem obeliscus columna pyramide minor, Soli sacra, quæ nulli erigebatur apud Ægyptios, nisi ei, cujus vita veluti quidam solis splendor, omnibus posset prodesse, etiam non poscentibus. Siquidem ille tenet justî Imperii clavum, qui nemini nocet, omnibus prodest, publico bono semper addictus, supremi Principis exemplo, qui produxit creaturas ex nihilo, non ut inde bonum reciperet, sed ut eis bonitatem, quam habebat, influeret; adeo ut finis productionis creaturarum, non sit necessitas indigentiae, sed abundantia divinæ bonitatis, quam Deus creando communicat: non enim Deus agit propter desiderium boni & finis, ut alia agentia, sed propter amorem. nam desiderium propriè est rei non habitæ, at Deus agit propter amorem boni & finis quem habet, & vult aliis communicare. Hoc igitur est proprium Principis munus, publicis commodis inhiare: ut enim sapientes affirmant, alienum bonum est justitia. Proinde Adrianus Imperator, veri Principis simulachrum, frequenter in senatu dicere solebat, se ita gesturum principatum, ut sciret rem populi esse, non suam privatam. Vox planè aurea, & res multo magis, cum præstatur. Hoc egregie testatum reliquit Pelopidas Imperator, nam in expeditionem proficiscenti, cum uxor ingemiscens sæpius exclamaret, ut propriam vitam tueretur, sibi que consuleret, Aliorum est respondit, vitam propriam tueri, at Imperatoris, ex suis incommodis omnia rei publicæ parare commoda. Huc appositè facit insigne illud academicum, nimirum, Apis ex floribus mel conficiens.

Ægid.  
2. d. 1.  
par. 2.

Florianus  
Nannius  
Episc.  
Scal. in  
sua Cat.  
arg.

ficiens, aliorum utilitati consulens, apposita notula, Sic vos non vobis. Quocirca bonus Princeps communis commodi gratia, tanquam verus pater, omnibus prospicit, nullum despicit, neminem respicit, sed unicuique quod suum est, fideliter tribuit, ut feliciter expressit doctissimus ille academicus, qui lucidissimum speculum appendens, brevem hanc sententiam apposuit, Cunctis æque fidum: Supremi Regis exemplo, qui reddit omnibus secundum opera sua. nec dicas quæso, quomodo jus suum unicuique tribuit, si ob temporalem, immo momentaneum lapsum perpetuas exigit pœnas? quomodo observatur illud, secundum mensuram delicti erit etiam plagarum modus? delictum enim est temporale, punitio autem delicti æterna. modica delectatione committitur, & pœna sine fine infligitur? hanc enim difficultatem egregie explicat Augustinus, In retributione, ait, iustitiæ, non semper consideratur æqualitas temporis inter culpam & pœnam. nam & in civili republica pro brevissima adulterii culpa, capite plectitur adulter, & sic perpetuò privatur vi-

Aug. lib. 21 de civ. Dei cap. 2.

ventium societate. D. Gregorius aliter exponit & quidem optime. Conveniens est, inquit, ut qui in suo æterno peccavit contra Deum, in æterno Dei puniatur. dicitur autem aliquem in suo æterno peccasse non solum secundum actus continuationem in tota hominis vita durantis, sed quia hoc ipso quod finem in peccato constituit, voluntatem habet in æternum peccandi. nam voluissent iniqui, ait Gregorius, sine fine vivere, ut potuissent sine fine peccare. ostendunt quippe, quod in peccatis semper vivere cupiunt, qui nunquam desinunt peccare, dum vivunt. ad magnam ergo iudicantis iustitiam pertinet, ut nunquam carcant

Greg. lib. 4 dial. c. 44.

sup-

D. Tho.  
lib. 3  
cont.  
gen. c.  
44.

supplicio, qui dum viverent, nunquam voluerunt carere peccato. Divus Thomas Gregorii explicat expositionem, Apud divinum judicium, ait, voluntas pro facto reputatur. qui autem propter temporale bonum averfus est ab ultimo fine, qui in æternum possidetur, præposuit illius fruitionem fruitioni ultimi finis. ex quo colligitur, quod multo magis voluisset in æternum illo bono temporali frui. mortaliter itaque peccans, sic puniri debet, ac si æternaliter peccasset. Et merito quidem, pœna infinita punitur peccator, quia culpa fuit infinita. in peccato quippe duo considerantur, averfio à bono incommutabili, & conversio ad bonum commutabile. ratione averfionis, peccatum est infinitum, quia privat bono infinito. Justus itaque Deus, qui ad neutram partem defleſcit, sed pro meritis retribuit: proinde medium semper locum elegit, ut ostendat Principes, utpote judices populi, in medio debere consistere, ad extrema non declinantes. Siquidem Justitia inter virtutes morales est veluti terra inter elementa. hæc enim, ut placet Philosophis, æque librata in medio propriis consistit ponderibus. Sola quippe elementorum est immobilis, & cardo virtutum omnium est justitia, quæ in medio virtutis locum occupans, ad neutram partem declinat, & est tanti ponderis inter alias virtutes morales, ut primum locum obtineat. Unde interrogatus Agesilaus Rex, utra esset perfectior, justitia, an fortitudo? respondit. Si omnes essemus justī, fortitudine non esset opus, nam ubi viget justitia, nunquam opus est viro forti: at ubi est fortitudo, ibi opus est justī viri præsidio. justitia enim est necessaria in omni tempore, in omni loco, & in omnibus hominibus; at fortitudo est necessaria tantum in bello & ad tuendam

dam justitiam. Quod & facile conjici potest, ex ipsomet nomine Principis, qua enim de causa dicitur Princeps à capite? quia sicuti ex capitis partibus per universum corpus nervi omnes, & sensus distribuuntur, ita ex Principe per universum Imperium æquo jure justitia administratur. Cavendum est Principi, ne major sit poena quam culpa, neve ex eisdem causis alii plectantur, alii vero impune dimittantur: nihil enim iniquius tulit Populus Romanus, quam ab Imperatore Domitiano in eodem crimine deprehensos, pauperes capitali supplicio damnari, divites autem pecunia mulctari & patrimoniis exutos absolvi. Hinc satis exploratum; nec amicorum, nec parentum, nec nobilitatis personam accipi debere, ubi justitiæ ratio habenda est. Sane ut sol non alius est pauperi, alius diviti, sed omnibus communis, ita Principes personam spectare non debent, sed causam. Nonne eadem trutina aurum ponderatur & plumbum? Sic eadem æquitate, parvis & magnis justitia administranda est. Hoc perbelle insinuavit Philosophus, cum principem centro comparavit, quoniam sicut centrum est punctum in medio globi existens, à quo lineæ ad circumferentiam ducuntur æquales, ita Princeps medium locum tenet in administratione justitiæ ad neutram partem deflectens. prima enim pars æquitatis, est æqualitas. Quorsum Ægyptii cupressum statuebant pro symbolo justitiæ? quoniam hæc arbor à radice ad fastigium recto surgit stipite, æquales ramos æquo ordine protendens, ita ut alius alium non excedat, sed pari æqualitate consurgant, ita Princeps boni & æqui cultos, à semita æquitatis non declinans, jus suum unicuique tribuit, utpote, qui neminem respiciens, ab omni affectu omnino est alienus.

Nam

Nam sicuti & lingua omni sapore est destituta, quò sensum habeat saporis universi, & acies oculorum expers est omnium colorum, quò possit colores omnes discernere; ita plane Princeps, ut queat de aliorum vitiis, & affectibus judicare, debet odio, amore, atque omni animi perturbatione carere. Quatuor liquidem animi perturbationibus judicium pervertitur, amore, timore, odio, & spe. Præ timore, Pilatus humani generis Salvatorem damnavit. primo enim agni innocentiam agnoscens, eruere cupiebat de luporum faucibus, postquam tamen in aure ei instillatum fuit

Joan. 29. verbum illud, Si hunc dimittis, non es amicus Cæsaris; ac si dicerent, à præfectura cades. audito hoc verbo timuit, & mox turpiter pronuntiavit, Accipite eum vos & secundum legem vestram judicate. Præ amore, uxor Tlepolimi Helenam ob viri zelotypiam jussit suspendi. Proinde antiqui pingebant amorem puerum, & oculis captum, ut significarent locum judicio non esse, ubi amor mentem occupat. Unde non inepte quidam ait, Amantes amentibus, ut nominum similitudine, ita re ipsa affines esse. Hinc Publius minimè dictitabat, amare & sapere vix Deo conceditur; idcirco nunquam debet fieri judicium in conspectu objecti delectabilis. Præ odio, Medea filios ex Jasone susceptos interfecit. Præ spe denique & cupiditate Pigmaleon Rex Tyri Sicheum sororis suæ Didonis maritum occidit, ut auro ejus potiretur.

Præclare Alexander Magnus in gyro rationis se continebat, is enim urgenti matri, ut occideret quendam infontem, & dictitanti se per novem menses portasse prægnantem, ita respondit prudenter, & pie, Aliam parens optima posce mercedem, hominis enim salus beneficio nullo compen-

Arist. 2.  
ethic.

Amian.  
Marc. l.  
14.



penfatur. O verba fane aurea, æternis sæculis commendanda. En bonus Princeps, qui nec materno affectu ab honesto defleſſi potuit, in hoc regem ſe potius quam filium præſtitit. Nec minus egregium facinus, quod der Ataxerxe Xerxis filio veteres produnt hiftoriæ. Cum enim quidam ex optimatibus Regni peteret ab ipſo quoddam minus juſtum, ſentiretque Rex hoc facere ſollicitatum triginta Daricorum millibus, ſtatim Quæſtori ærarii ſui mandavit, ut Daricorum triginta millia ad ſe referret, ea protinus dedit, dicens, Accipe, nam cum hæc tibi dederò, non ero pauperior; injuſtior quidem futurus, ſi illa quæ tu petebas, feciſſem. En Rex æquitatis amans, nec amicum contriſtavit, nec à juſto deſſexit, precibus illeſtus, quaſi referens Periclis oraculum, qui ab amico rogatus, ait, Oportet me amicis accommodare, ſed uſque ad aras. hoc eſt, amici cauſa minime violandam religionem. Nec amicus ille dicendus eſt, qui te ab honeſtate, divinaque amicitia ſejungit, nec juſtæ humanæ leges ſine divina, quia terrenum Regnum quod cæleſti non fulcitur, non regnum, ſed publicum latrocinium jure nominatur. amicus Socrates, amicus Plato, ſed magis amica veritas, vetus eſt adagium, quo docemur, nullum hominem tam charum nobis eſſe debere, ut in illius gratiam veritas ullo ſupprimatur modo. Ad hanc rem pulchre facit Tullianum illud oraculum: Hæc igitur prima lex in amicitia ſanciat, ut nec rogemus reſturpes, nec rogati faciamus. Hinc celebratur Vitellii Imperatoria ſententia, plane aurea. Cum enim amicus injuſtę petitioni importune iſſiſſet, nec orando exoraret, abiens indignabundus dixit, ecquid tua prodeſt amicitia, ſi non facis quod rogo? cui Imperator, Et mihi quid tua,

Aul. Gel.  
lib. 1.  
Noct.  
Attic.  
c. 3.

ſi.

*Aeneas  
Silvius  
lib. 3 in  
res ge-  
stas Al-  
phonfi.*

*Fulgof.  
l.6, c.4.*

*Niceph.  
3. hift.  
ecclef.  
cap. 23.*

*Plat. in  
Apoph.  
Roman.*

fi propter te aliquid contra honestum facturum? exiit homo personam amici, qui induit personam judicis. Princeps namque neque pro justis orandus, neque pro injustis exorandus. Fredericus Imperator cum Ladislaum Hungarię & Bohemię regem educaret, non defuerunt, qui perdendum suaderent puerum, cujus vita ingentes molestias Cæsari, mors regnum & opes allatura esset. ad quos ille, Ergo me, inquit, opulentum magis regem, quam pium & justum cupitis? at ego justitiam, bonumque nomen divitiis cunctis antepono. An silentio involvam aureum magni Themistoclis dictum? non ita plane nec rationi consonum. Simonidi petenti ut injustam causam diceret, prudenter respondit, Neque tu bonus Poëta fueris, si præter musicæ modulos caneres, neque ego Princeps bonus, si contra leges pronuntiem. Ita prorsus sentiebat Antiochus, tertius Asiæ Rex, qui omnibus regni sui civitatibus scripsit, si quid in litteris, quæ ejus nomine scriberentur, esset, quod legibus adversum videretur, crederent, se incio ejusmodi epistolas scriptas esse, & idcirco iis non obtemperarent. Egregie se gessit Trajanus Imperator, fertur enim dixisse, Imperatorem esse debere juris atque justitiæ cultorem, cujus ipse adeo studiosus fuit, ut cum Præfecto prætorii gladium traderet, quo accingi moris est Imperatori, in conspectu omnium illum stringens, nudatumque tenens, talia verba tanto Principe digna dixerit: Cape ferrum hoc, si recte imperium gesserō, pro me; si aliter, contra me utere. Simile quoddam legitur de Regibus Ægyptiorum: nam magistratibus præcipiebant, illos juramento devincientes, ne quid gererent contra leges, etiam si ab ipsismet regibus mandaretur, hoc

hoc monumento monentes, quod secundum leges omnino vivere volebant, licet legibus non essent adstricti. Non enim Rex imperando plus potest; Soms de justit. & jure l. 4. q. 4. a. 7. quam jus & ratio, cum nihil aliud sit Regis auctoritas, quam loquens justitia, & lex animata. Quid de Cleone dicemus? is ut primum Rempublicam attingere destinavit, vocatis amicis omnibus, solvere se velle dixit amicitiae vincula, subdiditque rationem, quia solent amicitiae recta subvertere: homines enim Rempublicam administrantes, utpote affectu quodam occupati, non raro deducuntur à via recti officii. videantur annales Anglici, & statim se offeret memorabile exemplum Henrici Quinti Anglorum Regis, is enim suos omnes, quibus cum vivente patre dissolute vixerat, ad se vocatos, & quibusdam muneribus affectos, sic à se ablegavit, ut sub poena capitis interdiceret, ne unquam, nisi mores in melius mutarent, ad aulam regiam accederent, ne eorum corrupta familiaritate, vel ipse corrumpetur, vel judicium, & justitiam saepe corrumpere. perit namque omne judicium, cum res transit in affectum. Pro tuenda justitia afferamus in medium Aristidis responsum. Themistocles advocato populo in concionem, magnum aliquid in animo se habere, agebat, quod Rempublicam concerneret, Plur. in vita Aristidis. efferre tamen id nolle, priusquam alicui id communicasset, quem populus deligeret. delectus est Aristides. re Aristidi per Themistoclem communicata, conscendens suggestum Philosophus, ut quid esset, populo referret; ait, Themistoclis consilio nihil reipublicae Atheniensi utilius, sed eodem nihil injustius. hoc audito, tacere eum populus jubet, nec vel auribus excipere consilium maxime utile voluerunt, quod ab honesto, & recto

Mut. in  
Polit.

discreparet. En surgent Ethnici in iudicio, & nostros politicos condemnabunt. Sed quid pluribus? nonne personam fratris accipere noluerunt ipsi Ethnici, ut candorem iustitiæ colerent? Timoleon Corinthius, ubi fratrem, quo tyrannide abstineret, monitis atque precibus monere, ac persuadere nequivit, his subinde navavit operam, qui illum interemerunt, non fratris odio, sed rei publicæ & iustitiæ amore. Non tamen in ferenda sententia cursu feratur præcipiti, sed gravi maturitate procedat, ne facti aliquando pœniteat, ad pœnitendum autem properat, qui cito iudicat. Hinc Cæsar consuevit dicere, omnia cavenda, prævidendaque, ne quandoque dicendum sit, Non putaram, quo nihil turpius ab Imperatoribus dici potest. Quot Principes ira perciti, ea efficiunt, quorum deinde pœnitentia ducti, ut infecta essent, magni emerent? Nonne Alexander Magnus ira insaniens, Clitum peremit paternæ militiæ, ac suæ fidissimum, ac tutissimum custodem? Nonne etiam ira commotus Dionysius Syracusanus dilectum pusionem, & in deliciis habitum, pugione transegit? quorum tamen utrumque adeo facti pœnituit, ut vix à seipso manus abstinuerit? Proinde Vespasianus Princeps laudatissimus pro insigni gestavit Delphinum anchoræ alligatum, adjuncto elogio, Festina lente, ac si dixisset illud Sallustii, Antequam incipias, consulto, ubi consulueris, mature facto opus est. Quod pulchre insinuarunt antiqui sapientes sub quadam elegantissimi Iustitiæ pictura, fingeant iustitiæ currum à duabus mulieribus trahi, quarum altera fractum enssem manu gestabat, altera vero conto innitebatur. Quid quæso, perfractum enssem, eumque retusum, qui nec cito, nec facile secat?

Quid

Quid per mulierem conto innixam, quæ lento gradu vix movetur ad gressum? tarditatem plane in dandis suppliciis, & magnam in deliberando maturitatem indicabant; non enim credendum est omnibus quæ audimus, siquidem certiora sunt quæ videmus; veteri adagio teste, Melior est testis unus oculus, quam decem auriti. hinc pulchre Poëta.

*Segnius irritant animos demissa per aurem,*

*Quam quæ sunt oculis subjecta fidelibus.*

Horat.  
de arte  
poëtica.

Non raro tamen decipit & visus, & non modo hebetiores, sed acutissimos quosque, quod uno hoc exemplo patebit. De pictura certamen aliquando fuit inter Zeuxim, & Parrhasium, Zeuxis itaque pictas à se uvas in scenam detulit, veris adeo similes, ut ad eas aves advolarent. Parrhasius autem pictum protulit linteum, tenuissimo velo contectum, illud tamen finxit adeo simile, ut omnino verum videretur. Tum Zeuxis iudicio avium elatior, rogavit, ut amoto velo picturam ostenderet, subrisit Parrhasius, qua ex re errorem suum intellexit Zeuxis, ingenuoque pudore suffusus, victori cessit dicens, Heri aves ego decepi, tu me hodie, licet artificem. Non itaque omnia credenda quæ audimus, sed quæ videmus, & vix quidem, quando etiam visu decipimur. Nonne, ut tradunt Philosophi, stellæ sunt majores tota terra? & tamen oculis nostris videntur rotula qualibet minores. Unde hoc? quia inter objectum & potentiam non est debita distantia. Cum videmus baculum, cujus medietas in aqua, & medietas in aëre, nonne judicamus illum fractum, & obliquum? & tamen re vera integer est, & rectus. Unde hoc? quoniam oculus videt rem per diversa media; videt enim

unam partem baculi per medium aëreum , & alteram per medium aqueum, & ideo male judicat, quod baculus sit contractus. nonne glacies videntur cryſtallum ? tamen re vera non eſt. nonne putamus littora recedere , & navem quieſcere ? quieſcunt tamen littora , & movetur navis. In Iride nonne judicant oculi veriſſimos eſſe colores ? non ſunt tamen niſi lumen reflexum. Non ſunt ergo temere judicanda , quæ non videntur , imo nec omnia quæ videntur ; ſæpe enim fallitur & viſus : proinde judex non facile credat , ſed prius optime diſcutiat , quia probationes debent eſſe luce meridiana clariores. Cujus aureæ doctrinæ præclarum habemus in ſacris litteris monumentum , Clamor Sodomorum venit ad me de terra. Quid facies ô Domine ? descendam , & videbo , utrum clamorem qui venit ad me , opere compleverint, an non ? Nunquid Deum omniscientem aliquid latere poteſt ? minime quidem. Cur igitur mittit Angelos , qui prius ſummam rei exacte explorent, antequam civitates evertat ? ut doceantur Principes , ait Philo , ne de abſentibus rebus, iſſque incertis, temere ſententiam proferant , niſi prius introſpecto negotio, cuncta ſedulo perluftrant. Vidit Moyſes rubum qui ardebat , non tamen conſumebatur : at hoc non ſatis eſſe duxit , ſed propius acceſſit , ut rem melius diſcuteret. Vadam , & videbo viſionem hanc magnam , quare rubus ardeat , & non comburatur. Quid hinc colligendum , ô Princeps ? quando de re aliqua judicandum eſt , adhibe prius oculos , quam linguam , & propius accede , ut rectius examines. cui alluſit Seneca in Medea ,

*Qui ſtatuit aliquid parte inaudita altera ,  
Æquum licet ſtatueris , baud æquus fuit.*

Nar-

Narrat Fulgofius, quod cum duo nobiles coram Ferdinando quarto, Rege Castellæ & Legionis, de proditione accusarentur, Rex præcipiti iudicio iussit eos præcipitari de altissima rupe: illi tamen sese innocentes afferebant. quare cum humanum deesset auxilium, ad divinum confugerunt, & propter injustam mortem Regem citarunt, ut intra triginta dies coram summo compareret tribunali, rationem de iniqua morte redditurus. adveniente igitur die citationis, cum Rex esset apud civitatem Gienensem post somnum meridianum, repertus est mortuus. Quid hinc? ex hoc monumento colligere debent Principes, non cæco casu, nec opinionis temeritate duci debere, sed vero iudicio judicare. Quamobrem Alexander Rex prudentissimus, cum in causis capitalibus federet iudex, accusatori aurem unam occludebat; rogatus autem, cur id faceret? Servo, ait, alteram integram reo. hoc quippe boni Principis munus est, ad neutram partem deflectere. dixit aliquando adversarius Cæsari, ecquis nocens esse poterit, si negare sufficit? tunc Cæsar, & quis innocens erit, si accusare sufficit? Hinc Robertus Princeps invictus, quia intelligebat nihil esse ita accommodatum ad conciliandos populorum animos, sicut æqualitas, pro insigni gerebat hircundinem, quæ pullis in nido æqualiter distribuit escam. apposita nota, Concordia regnorum. hoc autem nunquam continget, nisi Princeps jus suum unicuique tribuat, re prius mature discussa. Unde ad hoc innuendum existimat Seneca, inventam fuisse à Poëtis fabulam, qua fingeant, Jovem universum deorum senatum consulere solitum, cum de plectendis hominibus ageretur: cum autem de miserendo, neminem nisi se solum

Pier. Va.  
Ier. l. 30.  
Plin. l. 31  
c. 1.

Plur. in  
apoph.  
Roman.

adhibere. quo fane apologo admonentur Principes, ne in pœnis infligendis præcipites ruant; sed sano adhibito consilio delinquentes puniant. Quam apposite convenit Principi hac maturitate procedenti cognomen illud, quod impositum fuit cuidam Duci Muricæ nomine, qui cognominatus fuit remora salutaris, sumpta metaphora à pisce, de quo tradunt naturæ indagatores, quod licet quantitate molis sit parvulus, tantæ tamen est virtutis, ut navim velis, remisque volentem, diu sistere faciat. Ratio autem ob quam honorifico illo nomine ducem illum appellarunt, hæc fuit, quod cum missus esset à Rege in civitatem Guido ad juvenes omnes eunuchos reddendos; statuerat enim Rex, nimio furore percitus, gentem illam penitus extinguere, ipse quam potuit moram in itinere traxit, ut sufficiens eis suppetere-  
ret tempus ad placandum Regem, & sententiæ revocationem obtinendam. Quod quia successit ex votis, idcirco salutarem remoram illum salutabant, utpote, qui sua mora eorum vitæ, & salutis causa extitisset. Quorsum Senatus Romanus instituit, ut securibus, quæ præferebantur magistratibus, virgarum alligarentur fasces? nimirum, ut dum solverentur, spatium cogitandi daretur magistratui, ne iratus ea fieri imperaret, quorum postea frustra pœniteret. Quam maturitatem apprime consulebat Athenodorus philosophus; cum enim ab Augusto postulasset, ut senectutis causa sibi liceret ad domum propriam se conferre, annuit Augustus, rogans in postremo congressu, ut aliquod scitu dignum apud illum deponeret, tunc philosophus ait; o Cæsar, cum fueris iratus, nihil prius dicas, vel agas, quam Græcum alphabetum recitaveris. mox Cæsar phi-  
lo-



losophi dexteram apprehendens, Adhuc, inquit  
 te præsente mihi opus est, totumque etiam an-  
 num apud se detinuit, aureum illud documen-  
 tum observans, quippe qui intelligeret, maximum  
 iræ remedium dilationem esse. Proinde Ambro-  
 sius sanctarum legum observantissimus antistes,  
 Theodosio Imperatori præcepit, ut ante trigesi-  
 mum diem nullus damnaretur ad mortem. Nove-  
 rat enim vir sanctus, quantum judiciis obsit præ-  
 propera festinatio. Deinde illum objurgavit his  
 verbis, Quoniam furori judicium tuum commisi-  
 sti, & non ratio sententiam protulit, sed iracun-  
 dia, scribe legem, quæ decreta furoris evacuet, &  
 triginta diebus sententia necis in litteris maneat,  
 judicium rationis expectet, quibus transactis die-  
 bus, ira jam cessante, ratio causam judicans, quid  
 sit justum, disponat. quam admonitionem libenti  
 animo suscepit Imperator, & legem scribi jussit,  
 propriaque manu regia confirmavit. Quocirca  
 mos apud Romanos inolevit, isque laudabilis, ut  
 Judices ferendo sententiam sederent, adeo ut  
 jure esset cautum, sententiam à Judice stando,  
 non sedendo prolatam, nullius fere momenti esse,  
 ea propter statutum arbitror, ut externa corpo-  
 ris quies pacatum judicis animum præ se ferret,  
 pariterque indicaret, quod maturo, non præci-  
 piti consilio ad ferendam sententiam duceretur.  
 Hoc sane laudabile institutum si observasset Phi-  
 lippus Macedonum Rex, utique non fuisset opus  
 mutare judicium; is enim cum Machetæ causam,  
 pro tribunali sedens perperam judicasset, excla-  
 maretque Machetæ, & se provocare diceret,  
 iratus admodum Rex ait, Ad quem provocas?  
 ad te ipsum, inquit, cum attentius audieris, tunc  
 quidem Philippus quasi indignatus surrexit, &

Sen. l. 3.  
 de ira  
 c. 12.

Theod.  
 l. 5. hist.  
 ecclesi.

Aul. Gel.  
 l. 7. c. 1.

judicium distulit. Cæterum cum causam melius examinasset, intelligeretque Machetæ factam injuriam, judicata quidem non rescidit, sed pecuniam, qua damnatus fuerat, ipse persolvit, ut regia Majestas neminem læderet, jusque suum unicuique daret. Noverat quippe egregius Princeps, quam bene Principi conveniat Justitia, sine qua, neque Reges regnant, neque potentes justa decernunt. propterea Rex David illam sibi necessariam comitem advertens, exclamabat, Deus  
 Psal. 71. judicium tuum Regi da, & justitiam tuam filio Regis. Justitia namque in Principe debet esse accidens inseparabile, & individua comes; si enim Princeps non est justus, nec Princeps jure dicendus. hinc Saul duobus tantum annis regnasse dicitur, cum tamen quadraginta annis regnaverit: quia in reliquo tempore, cum non fuerit justus, nec inter Reges numerandus. quod divini oraculi testimonio facile comprobatur: nam Matthæus dicit, multi Prophetæ & Reges voluerunt videre quæ vos videtis. Lucas vero, multi Prophetæ & just. Quorsum hoc? quia non est Rex, qui non sit justus. Huc accedit apposite, quod de Ranutio Farnesio duce præstantissimo tradunt scriptores; matronæ enim cuidam importunius postulanti, pro filii flagitiosi libertate, & querenti quod orando non exoraret, objectanti etiam, Octavii Ducis clementiam, ita respondit, Octavius avus meus profitebatur se ducem gratiarum, Alexander pater meus ducem bellorum, ego autem profiteor me Justitiæ ducem. regium plane responsum, quasi quoddam oraculum ex arcanis philosophiæ penetralibus depromptum. princeps enim, si Philosopho credimus, est quidam publicus justitiæ minister.

Quo-

Quomodo autem Justitia rite administrari debeat, dialogus iste miro artificio elaboratus, usquequaque declarabit.

*Quæ Dea? justitia. ecquid torvo lumine? Flecti*

*Nescia sum, lachrymis, vel prece, vel pretio.*

*Quod genus? à superis. ex quo genitore? modo. qua*

*Matre? Fide. nutrix quæ tua? pauperies.*

*Quis gremio infantem fovit? prudentia. quonam*

*Freta-Duce agnoscis crimina? judicio.*

*Cur gladium tua dextra gerit? cur leva bilancem?*

*Ponderat hæc causas, percurit illa reos.*

*Aurium aperta tibi cur altera, & altera clausa?*

*Hæc surda injustis, panditur illa bonis.*

*Paupere cur semper cultu? justissimus esse*

*Qui cupit, exiguas semper habebit opes.*

Justitiam itaque veram regnorum custodiam, non inficior, colere debent Principes omni studio, sed illam mansuetudine, clementia, ac prudenti examinatione moderari, ne populis transeat in odium, & de illis non decantetur, quod de Dracone legislatore; huic enim, quia leges omnes instituit sub pœna capitali, dictum fuit, nec sine probro; Iste scripsit leges sanguine. Proinde Salomon Rex sapientissimus, Principi consulens dicebat, Noli esse nimium justus, sed clementiam comitem individuum adhibe. asperum quippe ac nimis grave esset, omnia ad calculos revocare.

Rex apum sine aculeo est, ait Seneca, Divus autem Basilus aculeum in Rege ponit, sed illo non utitur ad vindictam: quoniam præcipua pars Principis, est juvare, non nocere. sint ergo Principes apiani, non vespasiani, melliferi agminis Imperatorem æmulentur, non vespas, quæ non nisi ad nocendum exercere norunt aculeum. Vis ergo ô Princeps justè & feliciter Rempubli-

Eccles.  
c. 7.

Arist. l. 3.  
de hist.  
animal.  
c. 16.  
Hom. 8.  
in exam.

cam administrare? observa diligenter mandatum, quod dedit prudens pater Icaro filio ceratis pennis volaturo,

*Inter utrumque vola, medio tutissimus ibis.*

Hoc autem non præstabis, nisi virtutibus morali-  
bus tanquam fororibus, honorifice stipatus  
procedas, istæ namque mutuis nexibus inter se  
colligatæ, nullo unquam tempore debent disjungi.  
quippe, quod una sine aliis perfecta esse nequit,  
quin manca omnino languescit. ita sentit

Amb. l. 5  
in Luc.  
Hieron.  
super  
Isa. c. 1.  
Aug. l. 6  
de Trin.  
c. 4.

Ambrosius, Connexæ sibi sunt, & concatenatæ  
virtutes. ita scribit Hieronymus, Virtutes morales  
ita sibi coherant, ut qui unam habuerit, omnes  
habeat, & qui una caruerit, cunctis careat.  
ita confirmat Augustinus, Virtutes quæ in animo  
nostro sunt, nullo modo separantur ab invicem.

Clem.  
Alexan.  
strom. 1.

ita concludit Gregorius, Una virtus sine aliis,  
aut nulla est, aut imperfecta est. ita denique Clemens  
Alexandrinus, Virtus, quia ejus usus multiplex,  
multis nominibus nuncupatur. eo nimirum modo quo  
drachma, si detur nauclero, dicitur naulum, si  
publicano vectigal, si pro re empti, pretium, si  
operario, merces appellatur, ita virtus, ut ad  
varios sensus adhibetur, modo justitia, modo  
prudentia, modo aliis nominibus vocatur; dum enim  
considerat, quid sit agendum, vel non, prudentiæ  
nomen sortitur, dum moderatur cupiditates, temperantiæ,  
dum in perferendis rebus versatur, fortitudinis, dum  
æqualitatem constituit, in his quæ sunt ad alterum,  
justitiæ. Hinc Plato testatus est, virtutes omnes  
mutua invicem amicitia vinciri. Quid fortitudo  
sine prudentia? temeritas. Quid prudentia  
sine justitia? calliditas. Quid temperantia  
sine fortitudine? ignavia. Quid justitia sine

tem-

Arist. 6  
Ethic.

temperantia? crudelitas. Verum est enim illud Ennii adagium longo usu comprobatum, Summum jus, summa injuria. Et præcipue quidem cum summa legum auctoritas, non in omnes æquo jure animadvertat. Tunc enim non leges, sed araneorum telas appellabat Anacharsis, quas muscæ grandiores evolvendo perfringunt, at minus validæ irretiuntur inclusæ. De qua re eleganter Poëta.

*Dat veniam corvis, vexat censura columbas.*

Javen.

Hoc porro iniquum regimen, ipsene Regnum dixerim? non ita profecto. Remota enim Justitia, dicebat Augustinus, quid sunt Regna, nisi aperta latrocinia? Huc facit ad amussim, quod olim Alexandro Magno, totius orbis imperium sitienti, respondit pirata comprehensus. Siquidem cum Rex hominem interrogasset, Dic homo perditissime, quos scelere impulsus, mare habes infestum? ille intrepidus ait, eodem, quo tu orbem terræ, sed quia exiguo navigio ipse hoc facio, latro vocor, quia tu magna classe, Imperator.

Satyr. 7.

August.  
de civ.  
Dei l. 4.  
c. 4.

Marc.  
Tull. l. 3.  
de rep.

*Imperii quicumque sacras moderaris habenas,*

*Fus cunctis tribuas conditione pari.*

*Sic populis charus, fama super æthera clarus,*

*Sic verus Princeps, nomine, reque simul.*

## CAPUT III.

*Firmamentum Regni Clementia Principis.*

Prover.  
c. 30.



Miseri cordia, & veritas custodiunt Regem, & roboratur clementia thronus ejus. Divinum hoc sane oraculum apprime noverat Severus Imperator. Nam cum Memmia ejus uxor, animadverteret Seve-

rum non esse, ut nomē prae se ferebat, ac proinde objiceret, quod nimia facilitate regalem auctoritatem minueret, protulit dignam tanto viro sententiam: Imo, ait, regiam potestatem, & securiorem, & diuturniorem reddo. Pulchre quidem, & sapienter. Quoniam non sufficit Principi regna parere, sed summa debet adhiberi diligentia, ut parta servantur diu. Hoc autem non praestabitur, nisi justitia duce, & comite clementia. Proinde Augustum Cæsarem valde admiratum fuisse, refert Plutarchus, quod Alexander trigésimum secundum agens annum, post devictam Asiam, & Europam, subiectum prope orbem terrarum, dixisset, Quid in reliquo vitæ meæ cursu faciendum sit, nescio, cum jam nullum Regnum supersit acquirendum. hanc sententiam improbavit Cæsar his verbis, Majus opus est, ô Alexander, partum gubernare imperium, quàm magnum acquisivisse.

Plat. in  
apoph.  
Rom.

*Non minor est virtus, quàm querere, parta tueri.*

Hoc autem fuit praesidio clementiæ, quæ populorum animos in amorem Principis modo incredibili accendit. Proinde antiqui amorē pinxerunt armatum, & dormientem, ut significarent, tuto

tuto dormire posse dilectum, cum ad ejus custodiam amor assistit. Huc optime facit Antigoni regis responsum; hic enim interrogatus, quid causæ esset, quod cum initio regni durior fuisset, senex deinde factus, ita placide regnum gubernaret? Prius, inquit, opus erat Regno, nunc gloria & benevolentia. quibus verbis sapienter admodum indicavit, quod quamvis regnum armorum vi soleat sæpius comparari, non diu tamen conservetur, nisi animi mansuetudine, morum facilitate, & civium benevolentia. siquidem nihil ad mortalium animos vinciendos magis accommodatum, quam clementia. Auream hanc regnandi institutionem iterum comprobavit. Cum enim amici suaderent, ut si Athenas caperet, validis illam præfidiis communiret, egregie respondit, Ego fui semper in hac sententia, ut crederem nullum esse Regni præsidium firmitus benevolentia. Hæc est tutissima Regum custodia, dicebat Isocrates, quæ non turribus, non propugnaculis; non armis continetur, sed amicorum præfidiis, & amore populorum: quibus quidem opibus regna, & imperia, non modo servantur, verum in dies late propagantur. Pulchre Sallustius ad Cæsarem, Qui benignitate ac clementia imperium temperavere, his candida, & læta omnia fuere. Quoniam non exercitus, neque thesauri præsidia Regni sunt, sed amici; quos neque armis cogere, neque auro parare queas, officio, ac fide præstantur. Hac vivendi ratione tutus in Regno Princeps, tunc enim non erit opus construere in altum editas arces, non in excelsum arduos colles emunire, non latera montium abscindere, non se multiplicibus muris, turribusque sepire, salvum Regem in aperto clemen-

Sen. l. i.  
de clem.

mentia præstabit. Verum enim est inexpugnabile munimentum amor civium. Quid pulchrius, quam vivere optantibus cunctis? Quid optabilius, quam si paululum valetudo titubaverit, non spem hominum excitari, sed metum? at contra, quid miserius, quam ita vivere, ut neminem videas, qui te salvum velit? Nulla re Imperium pluribus firmabit præfidiis Princeps, quam si se præstabit Principem, hoc est, Dei vices gerentem, est autem mitis Deus, mitem quodque decet esse Principem. Ad hanc rem apposite faciunt aurea verba oratoris Demosthenis ad Alexandrum Regem, Nulla de virtutibus tuis, licet multæ sint, vel gloriosior misericordia, vel admirabilior clementia, nec per aliud propius ad Deos accedere potes, quam si salutem conferas hominibus, vel dando, si eguerint, vel parcendo, si deliquerint, vel indulgendo, si supplicaverint. Cum enim vincamur à Diis omni in munere, sola clementia est, quæ Deos nobis reddit æquales. Tale consilium dedit apud Claudianum Theodosius Honorio filio,

*Sis pius imprimis, nam cum vincamur in omni*

*Munere, sola Deos æquat clementia nobis.*

Hinc Philippus Macedo dicere solebat, Oportere Regem semper meminisse se hominem esse, & per clementiam similem se Deo fieri. Siquidem clementiæ nomen Deo maxime convenire, divina passim oracula testantur. Martinus Doyza Hispanus refert, quod Vespasiani Imperatoris tempore, Romæ in Senatu disceptatum fuit, Quis Deorum esset optimus? Et quonam nomine foret nuncupandus? censebant aliqui eum potentem esse nominandum, quod ejus virtus & potentia cuncta perfringat. Alii verò putarunt no-

men



men divitiarum ei tribuendum, quod pecuniæ obediunt omnia: nonnulli Deum scientiarum appellari debere affirmabant, quod norit omnia, & quem nullum lateat secretum. Porro nullum horum apte convenire visum est, atque ideo in varias sententias distracti, ancipites Senatores hærebant. Conferebant enim ad invicem, si Deus potentiae, armorum, bellorumque debet appellari, quem Deum timidi & pusilli habebunt? si Deum divitiarum, inopes & egeni ad quem confugiant, Deum non habebunt. Si Deum scientiarum, Oratores & Philosophi felices erunt, non vero ignari & rudes. Cum itaque hæerent anxii, ecce mox adstantem viderunt juvenem, qui Dei, quem cæteri adorarent, imaginem collo suspensam gerebat, quam unicuique demonstravit. Pictus autem erat quidam, extensis brachiis, in cuius dextera legebatur, Promitto, in sinistra, Expecto. latus quoque apertum habebat, adeo ut pateret, cui inscriptum erat, Remitto. circum latus veluti elogium insculptum erat, Deo clementiæ. Hanc cum Senatores imaginem considerassent, cœperunt singuli exclamare, hanc veram Dei imaginem esse, quem adorare vellent, firmiterque asseriebant nullum alium Deum agnoscere velle, quam qui probis felicitatem promitteret, improbos ad poenitentiam expectaret, cuique nomen foret, Deus clementiæ, nomen divinitati maxime proprium, quodque omnes ad se sine ullo discrimine alliciat. En clementia, nomen Dei proprium, quod & vobis convenit, ô Principes, quia Dei vicem gerentes estis, & divinitatis imagines. Hinc Philippus Macedonum Rex clementiam appellabat gloriæ suæ theatrum. Clementia enim hominibus est necessaria, maxi-  
me

me autem decora Imperatoribus. Proinde doctissimus Aristoteles inter multas institutiones, quas Alexandro Regi præscripsit observandas, hanc unam præcipue tradidit, Pateat omnibus clementia majestatis tuæ. Hinc Reges antiquitus ungebantur, ut hac observatione admonerentur, quod lenes, pii, ac clementes essent futuri. Debet quidem Princeps omni studio incumbere, ut populus ad rectam rationis formam instituitur, sed leniter ac leviter, non mordendo, sed ursæ instar lambendo. Hæc enim, ut ait Plinius, parit catulos informes, quos postea linguæ linctu conformat, & paulatim figurat. Decreverunt olim Athenienses in Areopago, ut civitatis dominium alicui deorum committeretur, qui eam protegeret. contendunt Neptunus & Minerva, quis potiatur dominio? tandem statuere Athenienses, adhibito prius consilio, ei dominium concedendum, qui insigne aliquod prodigium patra- ret. Extemplo Neptunus tridente aquas percutiens, duos equos repente prodire fecit. inauditum sane prodigium. At Minerva benignitatis amans, virga leviter humum tangit, & ecce ramus surgit virentis olivæ. hoc autem non tanta admiratione dignum censebat vulgus, re tamen apud sapientes maturius discussa, longe præstantius fuit judicatum. Equi enim quid portendunt? bella utique & seditiones. Oliva vero præ se fert clementiam. Non mirum igitur si præclarum illius civitatis dominium omnium votis, & vocibus soli Minervæ fuit dedicatum. Quorsum autem hic apologus? ut ediscant Principes imperii clavum sustinentes, magis studere benignitati, quam severitati, & magis clementiæ, quam sævitæ, quo Imperium firmiores agat radices, æternitæque de-  
man-

mandetur. Hinc in sacris litteris monarcha principum omnium, habet stellas in manu, gladium in ore, quia supplicia comminatur verbis, beneficia autem re ipsa confert, idcirco de ejus manibus dicitur, manus ejus tornatiles, virtus enim omnium rerum effectrix tornatilis est propter summam in benefaciendo celeritatem. Qui enim tuto & diu regnare appetit, summo studio niti debet, ut clementia, non armis stipatus regnet. Quotidiano namque experimento compertum habemus, quod Principes qui nimio tumore elati, quasi super cardines cæli perambulantes, inaccessible se exhibent, tantum abest, ut à subditis amentur, quod etiam capitali ab omnibus habentur odio. Quot enim sunt, hac nostra tempestate, Principes, qui propter nimiam eorum inhumanitatem, subditorum animos adeo perturbant, ut, eis debitum honorem præstare recusent, & cum præstant, inviti tamen ac reluctantes. Porro qui se humanos subditis exhibent, illorum animos facile conciliant, divino oraculo ita attestante, Fili in mansuetudine opera tua perfice, & super hominum gloriam diligeris. Loca munita, aggeres, valla, arces, tutum faciunt Principem, sed non omnino. Hæc siquidem proditiõibus, & arte, possunt alterius dominio subdi, aut armorum vi dissipari, at hominum corda ingenui amoris vinculo colligata, nullatenus possunt everti. hæc est custodia invincibilis, amor populi erga Principem. hoc est inexpugnabile munimentum, munimento non egere. Longe valentior amor ad obtinendum quod velis, quam timor, nulla major ad amorem invitatio, quam prævenire amando. amore Imperia durant, subvertuntur terrore; amore nectuntur, secantur metu.

Valer.

l. 4. c. 1.

Plut. in  
apoph.

folus amor ex invalido, validum imperium statuit. Peragit quandoque tranquilla potestas, quod violenta nequit, mandataque fortius urget imperiosa quies, quam acris nimium, & sæva auctoritas. Imperia enim crudelia magis acerba, quam diuturna sunt, & Princeps ad sævitiam natus, nunquam & nusquam tutus erit, semper autem, & ubique in metu. Illa, illa potentia tuta est, quæ viribus suis modum imponit, & cum punitione opus est, non tamen cum omni rigore, supremi Judicis exemplo, qui, cum posset de rigore justitiæ, peccatorem ad nihilum redigere, illi relinquit esse, quod bonum & pulchrum est: ita intelligitur illud axioma Theologicum, Deus punit citra condignum. Ideo dicitur Dominus, quasi dominus. Apologum huic instituto satis accommodatum affert Plutarchus, ait enim, Inter solem & ventum aquilonem non parvam ortam fuisse contentionem, quis prius altero viatorem vestibus expoliare posset. cœpit aquilo pedestrem viatorem vehementer impetere, ut fere galerus è capite, & pallium ex humeris decideret, quanto tamen ipse acrius flabat, tanto viator diligentius galerum capiti, & pallium scapulis aptabat, unde non ventus aquilo de viatore, sed viator de aquilone victor evasit. Sol vero potentiam suam ostentans, cœpit ardentes radios viatori immittere, quibus ille adeo cœpit incalescere, ut ad deponendum pallium cogeretur, deinde invalescente solis calore, & illum acrius premente, exteriori tunica se expoliavit, atque hoc modo Phœbus de aquilone triumphavit. Quid hinc? hoc nimirum, quod facilius vincuntur, & vinciuntur hominum ingenia clementiæ, & beneficiorum calore, quam nimis severitatis violentia.

Quod

Quod egregie comprobatur Augusti Cæsaris testimonio. Hic, cum jam quadragesimum excessisset annum, delatum est ad illum, Lucium Cinnam adolescentem nobilem, ac magni Pompeji nepotem, sed hominem turbulentum, insidias illi struere. dictum est, ubi, quando, & quomodo aggredi vellet, dictabatur proscriptionis sententia, sed Augustò interim varias edente voces, ingressa Livia uxor, Fac, inquit, quod medici solent, qui, ubi usitata remedia non profunt, tentant contraria, severitate nihil adhuc proficisci, ignosce, Cinna deprehensus vitæ tuæ nocere non potest, famæ prodesse potest. Protinus Imperator Liviae consilium secutus, Cinnam accersi jubet, tum demissis omnibus è cubiculo, sic eum allocutus est, Hoc Cinna primum abs te peto, ne me loquentem interpelles, dabitur & tibi loquendi tempus. hic, commemoratis pluribus in Cinnam beneficiis, enixe rogavit, quare putarit ipsum occidendum? sed perturbato Cinna, sic finiit objurgationem, Vitam tibi Cinna iterum do, prius hosti, nunc insidiatori, ac parricidæ. ex hodierno die inter nos incipiat amicitia. Contendamus utrum ego meliore fide vitam tibi dederim, an tu mihi debeas. Posthæc ultro detulit consulatum, questus quod non auderet petere. vis exitum? Cinnam habuit perpetuo amicissimum, & solus illi fuit hæres. Porro ex tanta clementia quem fructum cepit Augustus? non solum mens Cinnæ omnino mutata, sed omnes postea in eum conspirationes ita compressæ sunt, ut nemo unquam ejus vitæ deinceps insidiari ausus fuerit. Noverat quippe optimus Princeps, non paucas ex nimio rigore seditiones excitari, excitatas autem sedari clementiæ beneficio. Proinde

inde Isaias propheta sedulis votis exposculabat  
 Ifa. 26. hanc sane regiam dominandi institutionem, Emitte agnum Domine dominatorem terræ. non petit leonem, qui dilaniet; non taurum qui percutiat; non elephantem qui terreat, nec cervum qui fugiat: sed petit agnum, qui clementer imperet. Cur quæso, propheta non petit leonem, qui fortissimus animalium, & petit agnum ad omnia trepidantem? ut innuat quod qui constituendus est Rex terræ, debet habere clementiam agni. Hinc alia littera legit, Emitte ducem. quoniam qui feliciter, & diu regnare appetit, populos regere debet, non leonis sævitia, sed mansuetudine agni. Non enim Principi ideo datur potentia, ut damnum inferat, sed salutem; non ut destruat, sed ut construat; non ut obsit, sed ut profit, ut de apum Rege tradunt naturæ indagatores, qui licet habeat aculeum, non tamen ad vindictam. Huic rei satis apposite facit quod refert Plutarchus, Unus ex primariis, ait, laudavit Philippi potentiam, quia magnam urbem Olyntum solo æquavit: at quidam philosophus hoc audiens dixit, atqui non potuit tam bellam struere. Unde longe digniori encomio celebrandus Augustus Cæsar qui postquam superbis ædificiis Romam decorasset, dixit, Romam lateritiam accepi, marmoream relinquo. Magnanimi quippe Principis partes sunt, prodesse, non obesse; juvare, non perdere. hinc Juppiter quasi juvens pater. Athenis consilium contra Alcibiadis honorem, & fortunam convocatum fuit. ut autem id cum majori omnium assensu fieret, convocarunt etiam sacerdotes omnes, & virgines Vestales: interrogatæ autem de opinione, & sententia, una earum respondit, Ad nos supplicatio pertinet, non  
 exe-

execratio. Quorsum è Davidica turri pendebant clypei, arma ad defensionem, non ad offensam spectantia? quia Princeps verè pius, in salutem, non in perniciem potentia uti debet, & tamquam pater vitia quidem corrigere, at subditos servare, veluti alter Alco, qui cum esset peritissimus sagittarum jaculator, & videret ingentem colubrum, corpus filii sui cingentem undequaque cum magno vitæ illius discrimine, paterna pietate commotus arcum tetendit, impulsamque sagittam singulari arte temperavit, ut colubrum transfigens, filium indemnem omnino reliquerit. quod factum. admiratus Manilius dixit, Mirabile fuit hoc opus, sed ars erat esse patrem. ita Principes mittant sagittas suas, quibus vitia dissipent, subditos autem tanquam filios, si fieri potest, non perdant. ita se gerebat Rex David, proinde dicebat, Perfecto odio oderam illos, hoc est, vitia, non naturam persequer. Unde Augustinus agebat; Odeam in eis iniquitates eorum, diligebam conditionem tuam; hoc enim est perfecto odio odisse, ut nec propter vitia homines oderis, nec vitia propter homines diligas. cui doctrinæ subscribens Gregorius dicebat: Quid est inimicos Dei perfecto odio odisse? quod facti sunt diligere, & quod faciunt increpare.

Pf. 138.

Non tamen credas in Principe solam clementiam desiderari, quia etiam suo loco in administranda justitia severitate opus est. sic docuere optimi quique politici, & ita nimirum vivendum est Principi, ut nec severitas amorem diminuat, nec facilitas auctoritatem. Siquidem tam omnibus ignoscere crudelitas est, quàm nulli. Acutè olim Frontonius Consul in Nervam jam senem & energem nimis indulgentem, Malum quidem est

Senec.  
lib. 1 de  
clem.  
c. 2.  
Fulgof.  
li. 2, c. 2.

Lact. li.  
de ira c.  
18.

Petr.  
Dam.  
Card. li.  
7. epist.

Laërt. li.  
6. c. 11.

Senec.  
lib. 1. de  
clem.

Principem habere, sub quo nihil liceat, sed longè  
pejus, sub quo omnia omnibus liceant. Scitè ad-  
modum Lactantius, Princeps qui commovetur in-  
tempeſtiva lenitate, vel ſæpius quam eſt neceſſe,  
vel etiam ſemper ignoſcit, is planè & illorum vi-  
tam perdit, quorum audaciam nutrit ad facinora  
majora, & ſibi ipſi nunquam deficientem mole-  
ſtiarum materiam ſubminiſtrat. Nam qui mitior  
eſt, dum paucorum tolerat ſocordiam, multorum  
adverſus imperium invitat inſaniam. Hinc lauda-  
tur tertius Otho Imperator, hic enim, cum vici-  
nalis adoleſcentiæ vix adhuc exceſſiſſet ætatem, in-  
ter inſignia multa quæ geſſit, tribus regni proceri-  
bus Rempublicam perturbantibus oculos eruit,  
Rodulpho, Raimundo, & Arimundo, quo factò  
ita omnium aliena diripientium viſcera tremefe-  
cit, ita totum Regnum in pacis tranquillitate com-  
poſuit, ut nemo deinceps juris proprii terminos  
per inſolentiam tranſilire auderet, unde communi  
voce proclamabatur, In evulſione ſex oculorum  
unum pacatum eſt regnum. ſiquidem enervato  
rigore juſtitiae, ſtatuſevertitur diſciplinæ, & dum  
ultoriæ ſeveritatis cenſura reprimitur, temeraria  
delinquendi licentia relaxatur: inordinata ſanè  
pietas nutrit impietatem, & timida manus medi-  
ci, vulnus augeſt ægroti. Proinde ſolebat dicere  
Cato ſenior, Mallem mihi pro collato beneficio  
gratiam non haberi, quam pro maleſicio perpetra-  
to culpam non expiari ſupplicio. Hujus ſententiæ  
fuit Antifthenes, rogatus enim, quæ res portende-  
ret civitatibus exitium? Quando, inquit, non eſt  
bonorum ac malorum diſcrimen; ſentiens eam  
Rempublicam non poſſe conſiſtere, ubi nec eſſet  
honor virtuti, nec improbis pœna. Noverant  
quippe ſapientes viri, ſpem impunitatis magnam  
ille-



illecebram esse peccandi, & nihil in republica perniciosius esse impunitate, qua fontes ad deteriora semper invitantur. satis appositè pertinet ad Principem illud insigne Academicum, ciconia nimirum serpentes deglutiens, adjecta inscriptione, Conficere est animus. Quid quæso per serpentes? sicarios, sanguini inhiantes. hos debet Princeps omni conatu de terra viventium radicitus evellere, hæc verba pro stemmate gerens, Dabis improbe poenas. siquidem illud régimen præclarum censetur apud veros politicos, ubi in fontibus præmium, at fontibus poena. Hinc Democritus consuevit dicere, & quidem prudenter, Duo esse in sinu justitiæ Numina, quæ cuncta gubernant, poena nempe, & præmium; si enim crimina impunita, quis securas noctes habebit? quis innocuos dies? Quorsum in admirabili Transfigurationis mysterio, supremus Monarcha voluit inter Moysen & Heliam constitutus videri; ut colligant Principes, quorum exemplar Christus, inter Moysen mansuetum, & Heliam severum debere collocari, ne vel nimia mansuetudine languescant, vel nimia severitate excandescant, sed lenitatem cum majestate conjungant, ne regendi frangatur auctoritas: nam familiaritatem matrem esse contemptus, commune testatur adagium. Nemini itaque se tam familiarem exhibeat Princeps, quin possit, si opus fuerit, sine periculo succensere, aut sine rerum mutatione: deterrimi namque consilii est, amicos ad patrem usque potentiam efferre. Ama tanquam osurus, oderis tanquam amaturus. Pulchrè admodum Tragicus.

*Nullis te facias nimis sodalem,*

*Gaudebis minus, & minus dolebis.*

Nec erit absolum, imò valdè consonum, si proferamus

feramus aurea quædam verba, quæ Lupus Abbas Ferrariensis scripsit ad Carolum Calvum Imperatoris Ludovici filium, Pro regno optimè administrando inter cætera hoc sit aureum documentum, Videte, ne vos cuilibet ita subjiciatis, ut ad ejus arbitrium omnia faciatis: Cur enim regium nomen prætenditis, si regnare nescitis? certè non expedit vobis, & populo, ut aliquem vobis æquetis, nedum præponatis. non admittantur ergo à vobis in supremo culmine primarii, ne gloriam vestram ipsi inter se partiantur, & meliorem amorem alienent à vobis. Tandem, ut omnia uno verbo perstringamus, In summa rei administranda oraculum Solonis præ oculis tenendum, Ne quid nimis. Nam sicut nimia severitas nunquam prodest, sic nimia indulgentia sæpenumero obest. Quod egregiè nostris temporibus observavit Henricus hujus nominis quartus Rex Gallia, qui pro insigni regio suscepit malum granatum, nec penitus acre, nec dulce omnino, appositò hoc brevi titulo. Subacre. quo insinuare volebat, Principes in excelso regimine sedentes, partim mansuetudine & dulcedine, partim justitia & rigore uti debere. Egregium planè insigne, Leo sedens, regiam majestatem præ se ferens, apposita notula, Metuenda voluptas. in omni imperatorio munere ita se gerat, ut & amabilem, & formidabilem se præbeat. unde Gregorius, sit amor, sed non emolliens, sit rigor sed non exasperans, sit zelus, sed non immoderatè severus, sit pietas, sed non plusquam expediat parcens. pulchrè docet Seneca, pœnam si tutò potes, dohabis; sin minus, temperabis, Monarchæ cælestis exemplo, qui nunquam admittit misericordiam sine justitia comite, misericors Dominus, & justus.

Crinitus  
li. 1. hen.  
disp. c. 3.

De

De Tamberlano Scytharum Imperatore insignem historiam narrat Petrus Crinitus, Dux iste, ait, toto orbe celebris, ut majorem hostibus metum incuteret, triplici tentorio in bellis uti consuevit, ita tamen ut in unoquoque dispar color appareret, quo animi quoque mutatio intelligeretur. Prima igitur die tentorium exponebat, albo colore. Ex colore tentorii belli conditiones insinuebat, cum quibus ad certamen descendisset. prima itaque die tentorium colore albo explicabat, ut ostenderet, quod civitati nullam injuriam esset illaturus, modo sponte se traderet; at si alteram diem hostis expectasset, tunc coloris rubei tentorium educebat, quasi ad sanguinis effusionem vocaret. Quod si ad triduum res protraheretur, per colorem atrum, atra omnia futura portendebat, & extremam cunctis perniciem prænuntiabat. Quid hinc colligere debet Princeps? clementiam in regimine adhibendam, sed cum severitate conjunctam. Cujus etiam instituti normam manifestè præscribunt oracula divina: nam in Deuteronomio habentur hæc verba, Si quando accesseris ad inopugnandam civitatem, offeres ei primum pacem; si susceperit, & aperuerit tibi portas, cunctus populus qui in ea est, salvabitur, & serviet tibi sub tributo; si autem foedus inire noluerit, & ceperit contra te bellum, oppugnabis eam. Hoc itidem apud Romanos in more positum erat. Legati enim Romanorum ad Athenienses profecti, aurea hæc verba proferebant, Aut pacem, aut bellum eligit, mors & vita in manibus vestris sita est. Hanc regendi institutionem observabat Philippus Macedonum Rex. Nam filium Alexandrum frequenter admonere solebat, ut cum Macedonibus

Pet. Crinitus li.  
I. c. 1.  
de bon.  
disc.

Deut.  
10.

bus comiter haberet consuetudinem, quia intelligebat, nulla re melius constabiliri imperium, quàm civium benevolentia, ita tamen ut scelera suppliciis coërceantur. Regibus enim eatenus temperanda est humanitas erga cives, ut interim regiam tueantur auctoritatem. quoniam immodica benignitas sæpe contemptum parit. Qui enim videri volunt nimium civiles, sunt viles, & nimia conversatio gignit contemptum, raritas autem conciliat rebus admirationem. Legantur oracula divina, & videbimus Deum diversimodè armatum; modò enim gestat gladium in femore, Accingere gladio tuo super femur tuum potentissime; modò mucronem in ore, Ex ore ejus exibat gladius ex utraque parte acutus; modò gladium in manu, Gladium suum vibravit. Quid diversa hæc armorum gestatio designat? Varios Dei puniendi modos. arma quippe lateri accincta gerit, ut delinquenti metum incutiat, seque illi reddat formidabilem. in ore, ut minas intentet, at, ubi verba non proficiunt, ad verbera deveniendum, proinde in manu ensem, ut percutiat. ita planè se gerat Princeps, verbis prius mulceat, at si populus non resipiscit, ad pœnas prodeat. Mirabilis visio Danielis, Facies ejus sicut facies fulguris, oculi ejus ut lampas ardens, brachia ejus, & quæ deorsum sunt usque ad pedes, quasi species æris candentis, & ecce vir indutus lineis, & renes ejus accincti auro obrizo. Quidnam hæc sibi volunt? Facies fulgure, oculi flamma, brachia ære armantur, & tamen lineo vestitur. Quid linea vestis cum armis? thorace opus est in bello, non lineo amictu. Quid zona aurea cum vultu fulminante? En justitia & misericordia

Dan. 10.

dia simul, quibus orbis totus sustinetur. Duobus polis universam totius mundi machinam inniti dixerunt philosophi, quorum alterum arcticum, alterum antarcticum appellarunt, ita Theologi in duos polos, ut ita dicam, divisere divinæ essentiae operationes, quorum unum misericordiam, justitiam alterum nuncuparunt, ita canente divino Vate; Misericordiam & judicium cantabo tibi Domine. Hoc idem insinuare voluit dilectus, dum narrat se vidisse Angelum ponentem unum pedem supra mare, alterum super terram. omnium Patrum consensu, Angelus ille est Filius Dei, gemini pedes, misericordia & judicium. Proinde de eo dicitur, Data est mihi omnis potestas in cælo, & in terra. Licet in Deo sint quatuor attributa æqualia, potentia, sapientia, misericordia, & justitia; misericordia tamen primarium locum obtinet, Miserationes ejus super omnia opera ejus. Quod etiam indicare voluit Paulus, cum Deo hoc attributum quasi præcipuum tradit, dicens, Pater misericordiarum, & Deus totius consolationis, ac si diceret, quemadmodum Princeps variis decoratus insignibus, nobiliora sibi solet adscribere, ita Deus inter variâ divinitatis attributa, illud pro stemmate sibi assumit, quod suæ maximè convenit majestati, misericordiam nimirum, nunquam tamen sine justitia comite. Clementia quidem proprium opus Dei, sed quando & ratio, & tempus expostulant, severitatem induit. Hinc in arca testamenti erant duæ simul, virga, & manna, virga correctionis, & manna dulcedinis; virga propter malos, manna propter bonos, quo pertinet illud, Descendi in hortum nucum, ut viderem pomam

Ps. 100.

1 Cor. 1.

Cant. 6.

ma

Guliel-  
mus Pe-  
rardus  
lib. 4.  
4. Reg. 4.  
Isa. c. 2.  
4. Reg. 4.  
Petr.  
Dam.  
ep. 12.  
c. 28.

Nam.  
20.

Lib. 16.  
contra  
Faustum  
super  
nu. 26.

ma convallium. Per hortum figuratur Ecclesia; in qua sunt nuces, hoc est, mali, ad quos colligendos & excutiendos, opus est virga: sunt etiam poma, id est, boni, qui non percussione virgæ, sed levi manu carpendi sunt. Virga itaque sit in manu Principis, sed egrediatur de radice Jesse, hoc est amoris. Ab ore, & manu Principis debet quidem egredi virga justitiæ, sed de radice amoris. Discipulus Elisei, admovit baculum, sed nihil profecit; at Eliseus suavi spiritu, & tantum oscitando, viduæ filium ad vitam revocavit. Giezi posuit baculum super faciem pueri, sed non surrexit puer; Eliseus os suum super os ejus. quid hinc? calefacta est caro pueri. Ecce quem terroris virga suscitare non valuit, per amoris spiritum puer ad vitam redit. Quoniam non in spiritu Dominus, non in commotione Dominus, non in igne Dominus; sit sibilus auræ tenuis, ibi Dominus. Cur olim Deus adversus Moysen adeò indignatus, ut terram promissionis ingredi prohibuerit? Quid commiserat sanctus ille propheta, ut tam rigide à Domino puniretur? Dixerat Dominus, Loquere ad petram, & illa dabit aquas: at Moyses bis virga percussit filicem, & egressæ sunt aquæ. Indignatus Dominus dixit, Non introduces hos populos in terram quam ego dabo eis. sed quod, nam peccatum fuit? Augustinus ait, arguitur Moyses voce divina, quod ejus fides ad aquam de petra eliciendam titubaverit; ideo dixit, Quia non credidisti mihi. Lyranus credit, non dubitasse Moysen de Dei potentia, sed non credidit tam rebeli populo aquas Deum daturum. Alii dicunt Moysen peccasse, quia petram percussit, non verò ad eam locutus est, ut Domi-  
nus

nus præcepit, & sic verbum illud, non credidisti mihi, intelligendum est, non obedisti mihi. Ego autem si meam licet proferre sententiam, dicerem, Dominum indignatum esse, quia Moyses conatus est assequi virga, quod solo verbo poterat efficere. Hoc sanè monimento erudiens, Principes non debere uti virga, & verberibus, cum possunt verbis, & monitis æquè bene præstare, Herculis invicti consilium sequentes. hic enim contendebat hydræ caput abscindere, sed uno capite abscisso pullulabant septem, juxta illud, Uno avulso non deficit alter, nec unquam negotium perficere valuit, donec assumpto igne abscisso capiti applicaret. Quid hinc? quod gladio rigoris non potes, amoris igne perficies. Ezech. c. 1. Vidit olim propheta Cherubinum, qui hinc humanam, illinc leoninam faciem habebat. en Principis conditio; debet enim instar Cherubini, faciem hominis habere, ad clementiam erga subditos demonstrandam; aliquando leonis, quo justitiæ amatores se ostendant ad improborum delicta digno supplicio plectenda. Hinc Ægyptiorum Reges sceptrum gestabant, cujus summitati caput ciconiæ, clementiæ symbolum; extremitati caput equi marini, pro nota justitiæ adjunctum erat. Quorsum hoc? ut Principes intelligant, quod licet mansuetudine insignes esse debeant, justi tamen rigoris non debent oblivisci, mente sæpius revolventes, se Dei vice fungi. D. Th. 1. p. q. 2. a. 4. At Deus summa quidem clementia cuncta moderatur, non tamen absque justitia. Licet enim Deus voluntate antecedente omnes homines ordinet ad gloriam; voluntate tamen consequente illos tantum vult salvos esse, qui vivunt ex præscripto Legis: ita Princeps debet quidem omnes subditos incolumes ser-

servare, non autem omnino omnes, sed tantum rectè viventes. satis appositè huic spectat, quod de Cassio produnt historiæ. is, postquam unà cum sociis conjuratis Cæsarem interfecit, quod patriam libertatem proditum iret, cæde peracta, nummos signavit viola & gladio inter ramos olivarum interposito. Quid hoc insigne portendebat? viola Rempublicam; gladius justitiam, oliva clementiam designabat, quibus ipsa, veluti vinculo quodam continebatur, adeo, ut qui sine his dominari vellet, non Rex, aut Consul, sed tyrannus & prædo foret dicendus, utraque enim virtus ad Reipublicæ administrationem in primis necessaria est. Siquidem pura justitia, non comitè clementia, mera crudelitas est; sola clementia, altera socia destituta, parum, aut nihil proficit ad regimen. cui quadrat nota academica, Altera non sufficit. Non tamen pro qualibet re levi justitia à Principe exercenda, ne similis judicetur Pharaoni Regi non minus insipienti, quàm crudeli, de quo referunt peritissimi Hebræorum Rabbini, quod pistorem & pincer nam in carcerem conjecit, quia ille panem unico, eoque minutissimo terræ grano coxit, iste vero in vini calice ciniphem sibi propinaverat. sanè si pro rebus nullius ferè ponderis in populos ita defæviunt Principes, & pœnarum illos fulmine feriunt assiduè, quis poterit diu æquo animo sustinere? oporteret eos fulminum copia Jove locupletiores esse, nec satis esset. Hinc eleganter Poëta.

*Si, quoties peccant homines, sua fulmina mittat*

*Juppiter, exiguo tempore inermis erit.*

Ecquisnam Regum tutus evaderet, si statim delicta potentium illatis è cælo fulminibus Deus perderet? Placatur ille omnipotens, & uno gemitu

Gen. c.  
40.



gemitu placatur, & homo homini implacabilis erit?

*Sis pius, ô Princeps; nam, si clementia regnat,*

*Felix, atque diu regia sceptrâ feret.*

*Non tamen in pœnis languescat summa Potestas,*

*Ne nimis indulgens, Regia virga cadat.*

## CAPUT IV.

*Potius amari quam timeri studeat Princeps, & gloriosè dilatabitur Regnum ejus.*



MOR populorum custodia tuta Regnorum. Adagium sanè aureum, experimento probatum. Quod apprimè intelligebat Octavius Augustus Imperator, proinde nihil magis timebat, quàm quod vehementer à populis timeretur. Noverat quippe egregius Princeps, quod malus custos civitatis metus, at benevolentia custodia fidelis ad perpetuitatem. Quocirca imperii clavum sustinentes, fugiant, tanquam detestabilem Regni perniciem, vocem illam tyrannicam, quam frequenter jactare solebat Cæsar cognomento Caligula, Oderint, dum metuunt. totis autem viribus complectantur aurea illa verba, seu potius oracula ex ore Romani oratoris prolata, nempe, Laudari, diligì, coli, gloriosum est; at metui & odio haberi, invidiosum, detestabile, non diuturnum: quippe, quod amore populorum septum esse oportet Principem, non opulentia, aut armis. Optimum sanè Catonis senioris consilium, admonebat enim frequenter, ut qui potentes essent, parcè uterentur sua potestate, quò semper uti possent, sentiens potentiam clementia

Plat. in  
Apol.  
Rom.

- mentia fieri diuturnam, sævitia brevem. cui convenit Senecæ Tragicæ dictum.

*Qui vult amari, languida regnet manu,  
Iniqua imperia non retinentur diu.*

Cic. 2 de  
offic.

- Perinde ac si diceret, nulla contra hostes arx firmior, quàm populi erga Principem benevolentia. Siquidem ad incolumitatem imperii, nec aptius quidquam, quàm eum diligi, nec alienum magis, quam timeri. Nulla est enim tanta vis Imperii, quæ premente metu possit esse diuturna: quia quem metuunt populi oderunt, & quem quisque odit, periisse expetit.

*Iustitia & charitas valide sunt Principis arces,  
Nulla tyrannorum vis diuturna fuit.*

Ad hanc rem pulchrè Tragicus,

*Qui sceptrâ duro sævus imperio regit  
Timet, timentes, metus in authorem redit.*

- Aureum planè documentum, & quidem multo sale aspersum Alexandro Magno oblatum. Cum enim ad Alexandrum ducerentur nonnulli captivi insignes, natu majorem interrogavit Rex, Quidnam agendo diu tutus in Regno foret? Si nemini, respondit, te formidandum tradideris. quo audito Alexander eos dimitti iussit, & multis muneribus affectos quàm maximè laudavit. Opportunè huc facit, Agasicles Lacedæmoniorum Regis testimonium. Cum quidam ab eo sciscitaretur, quo pacto posset aliquis tutò imperare? hæc aurea verba deprompsit, quasi ex Aristotelis fonte potarit, Si imperet suis quemadmodum pater imperat liberis. Egregium plane insigne, nimirum, vitis parvula, quæ tenaci vinculo adhæret trunco, & truncus brachiis illam excipit, & amanter sustinet, adjecta nota, Vix nata sustentor. En Princeps vere politicus, qui plebem sibi

sibi commissam debet fulcire, fovere, & clementiæ brachiis benignè complecti. Pulchra sanè responsio. Ecquis unquam poterat plura dicere majore compendio? Hinc namque regium dominium distinguitur à tyrannico. Tyrannus quippe, sævitia & feritate cordibus subditorum odiosum ingenerat metum. At Rex amore populos regit, verbis favet, ac beneficiis fovet. Tyrannus efferrata immanitate regnum debilitat, & usque ad interitum prostrernit. At Rex clementia, & moderata justitia quasi quibusdam anchoris Regnum corroborat. tyrannus proprium commodum respicit, præterea nihil. Rex populis tanquam filiis prospicit, consulit, invigilat. tyrannus sanguini inhians ad pœnas infligendas cursu fertur præcipiti. Porro Rex ad supplicia procedit invitus, & gemens, ut pulchre monet Poëta:

Arist. l.  
8 de moribus c.  
10.

*Sit piger ad pœnas Princeps, ad præmia velox,*

*Et doleat quoties cogitur esse ferox.*

Ovid.  
lib. 1 de Ponto.

Sic Neronem aliquando fecisse, refert Seneca, initio Regni sui non sine magna admiratione. Cum enim de supplicio cujusdam capite damnati, ut ex more subscriberet, moneretur, suspirans exclamavit, Utinam litteras nescirem! Vox quidem generosa fuit parsimoniam sanguinis promittens, si ex animo prodiisset. de quo Trajanus solebat dicere, ut refert Sextus Aurelius, procul distare cunctos Principes à Neronis quinquennio. Hac pia regendi institutione florebat Pericles. hic enim in extremo vitæ termino dicebat gaudens, Nemo mea opera pullatus unquam incessit. O quam bene Alphonfus Rex Neapolis, admirantibus enim & quærentibus, cur erga omnes etiam malos ita lenis esset? sic respondit, Bonos justitia conciliat, malos clementia. Quid de Constantino verè Magno?

Sen. de Clem.  
lib. 2 c.  
1.

E

Cum

Cùm ad ultionem aliqui familiares illum concitarent, contra eos qui statuum ejus lapidibus appetiissent, dicerentque, Faciem Imperatoris à scelestis hominibus foedè vulneratam. tùm ille manu faciem, & caput palps, Ego verò, inquit, & os & caput sana mihi perſentio. Quid plura? nonne Adrianus eo ipſo die quo ad Imperium aſſumptus, cùm in quendam incidisset olim ſibi inſenſum, Evaſiſti, inquit, quia factus ſum Imperator. In ſumma enim poteſtate imminutam ille ſibi nocendi facultatem animo planè imperatorio cenſuit, quam viliffimus quiſpiam totam pleno impetu ad ultionem effudiſſet. Hanc regiam virtutem reſcripto egregiè probarunt Theodoſius, Arcadius, Honorius, cujus reſcripti hæc erat formula: Si opprobrium ex levitate proceſſerit, negligendum; ſi ex furore, & infania, condolendum; ſi ab injuria, remittendum. Hæc eſt aurea regendi ratio, quam frequenter docebat Divus Bernardus ad Principes terræ ſcribens, Erudimini, qui judicatis terram, diſcite vos ſubditorum patres eſſe debere, non dominos. ſtudeſte magis amari, quàm metui. & ſi interdum ſeveritate opus eſt, paterna ſit, non tyrannica. exhibeatis vos matres fovendo, patres corripiendo. manſueſcite, ſeritatem ponite, ſuspendite verbera, producite ubera, pectora lacte pingueſcant, non elatione turgeant. Patris tandem officio fungimini, & tunc Regnum veſtrum benedictionibus redundabit. Quid pater pro filiis? anxius eſt ſemper, ut nihil eis ad bene, beateque vivendum deſit, unus pro omnibus excubat, ratione cum illis agit, non poteſtate, mavult eos emendare, quàm punire. ita Rex quaſi pater communis ſuis civibus indulgere debet, medici prudentis inſtar,

Bern.  
ſuper  
Cant.  
ſerm.  
23.

star, qui oleum potius adhibere solet quàm fer-  
rum. Nec nisi tentatis omnibus ad sectionem de-  
scendit, non enim minus turpia sunt Principi multa  
supplicia, quàm medico plurima funera. Non est  
semper accepta potestate utendum, sed in tempore  
ea dissimulanda, multa quidem tolerando, in  
quæ statim animadvertere non expedit, Christi ve-  
stigia sequendo, qui abscondit se & exivit de tem-  
plo. Perdere illos poterat, noluit. sed expectavit,  
ut ipsi resipiscerent, quibus deinde misericordiam  
præstaret. Ad rem satis egregiè accommodatur, Plin. de  
animal.  
lib. 10. quod Aristoteles docuit de recto Principe; sit in  
ultione gravipes, in beneficio delphinus. Insignis  
est velocitate delphinus, illud verò animal quod  
gravipedem vocamus, ita tardo incedit gressu, ut  
testudinis tarditatem superet. per diem enim in-  
tegrum gradiens, unius palmi spatium conficit; ita  
sanè se habeant Principes, in benefaciendo velo-  
ces, in puniendo lenti, divinam institutionem  
pro viribus imitantes. Ecce ego stridebo super eos Amos c.  
2. sicut stridere solet plaustrum fœno onustum; hoc  
est Dei ingenium, ad puniendum pergit contra-  
cto ac brevi passu, ad juvandum ita expeditis gres-  
sibus properat, ut cervorum velocitatem longè  
superet. Hæc est virtus regia, quæ ad pietatem  
prona: at illa improba potestas, quæ valet ad no-  
cendum. Hinc apes illum sibi in regem consti-  
tuunt, qui sit inter cæteros mansuetudine clarior,  
nec aculeum habet; vel si habet, non ad vindictam.  
Utinam non pudeat Principes ab exiguis animan-  
tibus trahere mores. Rex apum sine feritate in  
medio ac tutissimo loco quiescit, amico grege sti-  
patus, nec tibi ô Princeps, erit opus armato ex-  
ercitu, qui latera undique custodiat, si ætatem  
agas clementiæ clypeo circumseptus. Proinde

Cæsarem primum Romanorum Imperatorem laudavit antiquitas, quod detectas conjurationes non ultra arguit, quam ut edicto ostenderet sibi notas. hujus etiam Imperio dejectæ Pompei statuæ, restitutæ. Litteræ in scriniis repertæ, igni traditæ. poterat intus cognoscere conspiratores, noluit. Nec minori elogio dignus Vespasianus, qui monitus, ut ab insidiis Metii caveret, consulem fecit, Erit, inquit, tanti beneficii aliquando memor. Augustus post Liviae monita, dixit, Ego judico plus clementia, quàm sævitia proficere. Dignum æternis præconiis illud Rudolphi Imperatoris oraculum; Severum, & immitem fuisse, me aliquando pœnituit; lenem ac placabilem, nunquam. Egregium sanè apophthegma Alphonsi Aragonum Regis, Malo multos mea clementia servare, quàm paucos mea sævitia perdere. Temperanda itaque clementiâ justitia est, ita præscribit optimum quoque regimen. sed ita, ut primum locum obtineat clementia, si fortunatum, si firmum, si diuturnum volumus Imperium. Certiora enim ab amore, quàm à terrore obsequia nascuntur. misera quippe veneratio, quæ metu paratur. Quorsum Lacedæmonii priusquam ad bellum moverentur, victimas amoris immolabant? cur non potius Marti bellorum duci? credebant victoriam in bello magis subditorum affectu, quàm ab armorum robore dependere. ô quam eleganter olim Claudianus,

Plin. lib.  
8. epist.

Alexan.  
ab Alex.  
lib. 4. c.  
7.

*Non sic excubiæ, nec circumstantia tela  
Quàm tutatur amor, peragit. tranquilla potestas  
Quod violenta nequit, mandataque fortius urget  
Imperiosa quies.*

Hanc regnandi institutionem probè noverat Philippus Macedonum Rex; is enim cum audisset aliquan-

aliquando Pithiam pugnatorem quendam strenuum, à se prorsus alienatum, quod filias tres inops vix aleret, nec à Rege adjuvaretur, hortantibus quibusdam, ut eum è medio tolleret, Dicite quæso, inquit, si partem corporis ægram habeam, abscindendamne, an curandam suadebitis? sanè curandam. Pithiam itaque tam præclaris donis ornatum à se demisit, ut summa fide Philippum deinceps coluerit. En gloriosus clementiæ fructus, qui Principem apud omnes amabilem reddit. Nam sicut hostes armis, ita subditi beneficio vincuntur, & vinciuntur. Beneficiis quippe qui afficitur, compedibus quibusdam adstringitur, qui non ferri retinent naturam, sed obsequii & obligationis. Quid enim aliud est Principis donum, nisi veluti quoddam servitutis vinculum? Nam beneficium accipere, libertatem vendere est. Toto cælo aberrat, qui existimat, tutum esse ibi Principem, ubi nihil à Principe tutum est. Multos metuat oportet, quem metuunt multi. Securitas securitate, mûtua fovetur, & amore conciliatur amor. magnes amoris amor. ita scribit Augustinus. Dogma naturæ est, ut amatus ames. Ita testatur Nazianzenus. Ostendam tibi potissimum remedium, ut ameris, ama. ita docet Seneca. Si vis amari, ama. notum est proverbium apud omnes receptum. Hinc est quod variæ amoris etymologiæ à probatissimis authoribus circumferuntur. omnes tamen in hoc conveniunt, quod amor amorem pariat, & mutuo quodam nexu amantes liget ad invicem. Plato existimabat hoc nomen deduci à verbo quodam, quod signat furari, eò quod amantis cor deprædetur, & in potestatem alterius traducat. Alii deducunt à verbo quod importat sequi, quod amans rem amatam vehementer sequatur.

tur. Alii deducunt ex verbo, quod fortitudinem designat, ut innuat amorem super omnia fortem esse, Omnia vincit amor. Alii dicunt amorem trahere originem à verbo quod significat dicere; amorem dicaces & eloquentes facit. Alii verò, & bene à verbo quod significat vincere, eò quod amantes vinciat, & in vincula trahat, & amatos quoque ad amandum alliciat. Scio quidem varias esse circa amoris causam doctorum opiniones.

2, 2. q. 28  
a. 2.

Angelicus doctor arbitratur causam amoris effectivam esse bonum, quoniam omnis amor ex bono gignitur, & in bonum tendit, nec aliquid diligitur, nisi in quantum habet rationem boni.

De div.  
nomin.  
c. 4.

Dionysius Areopagita sentit præcipuam causam amoris esse pulchrum, nam pulchrum idem est cum bono sola ratione differens.

Augustinus opinatur cognitionem esse causam amoris, nam voluntas non potest ferri nisi in bonum cognitum, proinde dicebat, Invisa amare possumus, incognita nequaquam.

Platonici volunt similitudinem esse causam amoris: omne enim simile diligit sibi simile. hinc Academici, Dissimilium infida societas. ea namque similitudo quæ inducit te, ut ames me, ipsa eadem inducit me, ad tui amorem.

Sed meo judicio sententia Philosophi moralis omnibus votis est complectenda, & nostro instituto magis consona; ipse enim asserit veram & propriam causam amoris, esse amorem. Si vis amari, ama. Huc pulchre facit apologus Porphyrii Græco idiomate conscriptus, à Celio Calcagnino in Latinum redactus. Quo tempore Venus Cupidinem peperit, venustus erat puer, & forma insignis, nec tantillum à matre pulcherrima degene-



degenerabat. Cæterum semper erat statura pusillus. anxia igitur eam ob rem, & inops consilii mater, affligebatur non parum, nec minus Gratiæ infantis nutrices; itaque oraculum Apollinis adeuntes orabant supplices, ut ad insolitam calamitatem remedium aliquod inveniret; at Apollo hujusmodi habuit responsum, Potest quidem, ô Venus, amor solus nasci, at crescere solus non potest. quod si cupis, ut adolescat, Anterotis opera opus est, hoc est mutui amoris, qui reciproca benevolentia respondeat, eritque conditio fratrum talis, ut alter alteri mutuetur incrementum, si se mutuo intueantur, æquali propagine germinabunt. Porro si alter deficiat, ambos pariter deficere oportebit. Hoc usa consilio Venus Anteroten parit, quo vix in lucem edito, statim Cupido adolescere cœpit, & jam procero corpore incedere, sed cum huic sorti obnoxius sit, multis plerumque conflictatur ærumnis; nam interdum pullulat, interdum deflorescit, rursus augetur, ita tamen, ut nunquam non præsencia fratris indigeat; quem si grandescere animadverterit, longè grandior ipse effici contendit; si verò pusillum esse deprehenderit, sæpe vel invitus elanguet. Sed quid hinc? egregiè utique docemur, nulla alia ratione amorem conciliari, & alios ad nostri amorem pellicere, quam si nos diligentes diligamus, & amantes redamemus. sic & divinæ docent Scripturæ, Ego diligentes me diligo. Pulchre quoque Martialis,

Martialis lib. 6.  
epigram.

*Vt præstem Pyladen, aliquis mihi præstet Orestem,*

*Hoc non fit verbis, Marce, ut ameris, ama.*

Tunc siquidem stabilis, tunc diuturna Potestas Principis, quando mutuo amore prosequitur populos, tanquam pater filios, quando communi com-

modo consulit, quando sermone est affabilis, accessu facilis, vultu amabilis, quem populi ad commune auxilium natum prædicant, quem excubare pro salute singulorum quotidie experiuntur. quo procedente non tanquam aliquod noxium animal è cubili prosiliret, diffugiunt, sed tanquam ad clarum, ac beneficum sydus certatim confugiunt. hic ab omnibus amatur, defenditur, colitur; hic tutus in Regno nullis præsiidiis eget, solus potest incedere in qualibet urbis parte, sine ullo prorsus timore, etiamsi nullus sequatur comes, nullus ad latus gladius. Tunc enim populi vicissim pro salute tanti Principis mucronibus se obijciunt, corpora sponte offerunt, & ad necem, incurrentibus periculis libenti animo se opponunt. At ubi animadvertunt Principem sævitix deditum, truci aspectu minitantem, sanguine gaudentem, sono catenarum delectantem, necibus inhiantem, & tandem ferina rabie agitatam, execrabile illud verbum jactantem, Oderint dum metuant; mox populorum animi concitantur, seditiones parantur, pullulant odia, nullibi quies, utrinque timores. Quoniam qui se metui volunt, & ipsi metuant necesse est. nec mirum, si ingenia principantium præcipuè improborum, prona sint ad formidinem; percurrendo enim historias passim inveniunt plurimorum Regum tragicos, ac miserabiles exitus. alios namque vident nudos & catenis victos ante victoris triumphum duci, alios tanquam feras cavea inclusos, ossa à mensa projecta corrodere, alios denique superbo ac barbaro Principi equum consensuro, pro scabello subservire. Et quis non horreret, audiens Reges, & Imperatores à vilissimis hominibus, quin & à suismet militibus trucidatos? Legantur annales.

&

& videbimus suorum gladiis cecidisse Cæsarem, Neronem, Claudium, Heliogabulum, Galbam, Caligulam, Vitellium; ferro autem suo, Catonem, Brutum, Antonium, Othonem, & alios propè innumeros, quos omnes enumerare super-  
 vacaneum esset. omnino illud Curtii verissimum Curt.  
lib. 7.  
 est; Nihil tam firmum; cui periculum non sit, etiam ab invalido. Huc facit opportunè, quod nostræ tempestatis scriptor insignis refert. Princeps quidam Italus, ait, cum gravi tyrannide suos premeret, jugumque intolerabile civibus imponeret, illi tyrannidem detestantes, quo eum ad benignitatem excitarent, Legatum miserunt virum rebus gerendis idoneum, summiq; ingenii arte medicum, qui diserta & gravi oratione civium calamitatem exponeret. hic mox ut in Principis conspectum venit, sertum è basilica herba contextum eidem obtulit dicens, non alia de causa se à populo legatum, quam ut herbam illam, verum reipublicæ afflictæ symbolum, Principi offerret. Princeps igitur cùm ænigmaticam legationem non intelligeret, Legatus sic exposuit. Huic herbæ subditos tuos persimiles crede, quæ cum leviter tractatur, suavem & jucundum sanè emittit odorem; si premitur, & violenter avellitur, non modo malè olet, sed scorpiones etiam, & viperas progignit. ita prorsus subditi tui; si enim placidè habeas, tibi omnem exhibebunt fidelitatem, sicque amorem, & gloriam apud omnes consequeris; si verò crudeliter opprimas, præterquam quod perperam de te sentient, & obloquentur, conspirationes viperis deteriores, in caput tuum excogitabunt. ô præclaram planè Legationem! Ecquid unquam poterat prudentius afferri? hinc discant Principes non sævos, & inexorabiles,

Boëth.  
de con-  
sol.  
Phil. 1. 2  
prosa 6.  
Plur.  
tom. 1  
opusc.  
Pausan.  
lib. 2.

Pausan.  
lib. 4.

3 Reg.  
22.

Exod. c.

1.

Jud. c. 1.

Lib. 2  
Machab.  
c. 5.

Niceph.  
lib. 1. c.  
20 hist.  
ecclef.

rabiles, sed mites & humanos, subditis se exhibere, memores illius adagii per omnium ora decantati, Ab alio expectes, alteri quod feceris. Quid est enim, ait Boëthius Romanus, quod quisquam in alium possit facere, quod sustinere ab alio ipse non possit? Nonne accepimus Busridem necare hospites solitum? ab Hercule hospite, & ipsum fuisse mactatum legimus. Regulus plures Pœnorum bellocaptos in vincula conjecerat, mox & ipse victorum catenis manus proprias præbuit invitus. In prima Isthmi fronte locus est, ubi Sinis latro curvatis ad terram diversarum arborum ramis, ad eos quos pugnando vicisset arctis utrinque vinculis alligabat, ut cum in suam naturam arbores rediissent, miserabilem in modum illi distraherentur. Eodem ipse postea supplicii genere à Theseo affectus est. Cùm ad Hercei Jovis aram Neoptolemus Priamum jugulasset, ipsi postea accidit, ut ad Apollinis Delphici aram interimeretur. Impius Achab & ejus uxor Regina Jezabel interfecerunt Nabot injustè, sed in eodem loco in quo linxerunt canes viri innocentis sanguinem, linxerunt etiam sanguinem Achab. Pharao tyrannus impius suffocabat in aquis Hebræos, ipse pariter in mari rubro obrutus aquis, cum curribus suis interiit. Adonibezzech dixit: Septuaginta Reges amputatis manuum ac pedum summitatibus, colligebant sub mensa mea ciborum reliquias; sed sicut feci, ita reddidit mihi Deus. Iason multos de patria sua expulerat, peregrè & ipse periit, & qui insepultos multos abjecerat, ipse quoque & illamentatus, & insepultus abjicitur, sepultura neque peregrina usus, neque patrio sepulchro participans. Herodias illa saltatrix, quæ ab impio Herode caput Joannis Baptistæ petiit amputari, & amputatum accepit,

cepit, postea fluvium quendam glacie constrictum pedes transiens, glacie rupta demergitur capite tenus, quod glacie statim à reliquo corpore resectum, talem ei vitæ finem dedit, qualem crudelis in alio expetiverat. De Duce Annibale historiarum produnt monimenta, quod tanta strage apud Cannas Romanum exercitum affecerat, ut equestrium annulorum tres modios cum dimidio Carthaginem miserit, at ipsemet coactus est venenum haurire, quod secum in annulo gestabat. Eutropius Arcadii Imperatoris cubicularius auctor legis fuit, nè quis ad ecclesiam confugeret alicujus criminis convictus, si autem contugisset, vi extraheretur: sed non longo temporis spatio interjecto, cum Imperatorem ipsemet offendisset, ad ecclesiam supplex confugit, sed inde extractus capitale tulit supplicium, iniquæ legis æquam ferans poenam. De quo, jure potest dici, Patere legem, quam tu ipse tuleris. Malum consilium consultori pessimum. Eadem mensura qua mensi fueritis, remetietur vobis. Apud Ludovicum XI, Francorum Regem, Episcopus quidam Verodunensis inventor fuit, carceres quosdam & cancellos ferreos, aspectu terribiles, horrore ac tenebris plenos, clausuris autem munitissimos construendi, sed ipse primus in eos coniectus fuit, & quatuordecim illic annis jacuit. Trasilus qui Busiridi tyranno persuasit, hospite immolato placandos esse Deos, immolatus statim ipse, quia hospes erat. Perillus qui taurum æneum fabricavit, in quo subiecto igne, qui poneretur, vocem bovinam ederet, ut Phalaridi Siculo tyranno crudelissimo obsequium præstaret, eodem jubente & cogente tyranno, primus ipse omnium, ut canit Claudianus, sensit opus, docuitque suum mugire juvencum. Thomas Cromvellus Henrico octavo Angliæ

Lucius  
Florus  
lib. 2.

Niceph.  
lib. 13.  
c. 4.

Philip.  
Comi-  
neus  
hist. suæ  
c. 126.

Ovid de  
trist. lib.  
5.

Angliæ regi, cui à consiliis erat, author fuit, ut legem ferret, qua caveretur; ne quisquam læsæ majestatis suspectus, aut delatus, ad colloquium Regis admitteretur, nisi causa prius in Senatu regio cognita: at ipse paulò post omnium primus, hujus legis rigorem sensit, & omni ad Regem, cui carissimus erat, aditu interdicto, capitalem sententiam accepit, & subiit. ecce quod incidit in foveam, quam fecit. Ioannes Andreas Genevæ homo primarius, ut aliquod spretæ Catholicæ religionis specimen daret, Senatui Genevensi author fuisse narratur, ut quæ in ara maxima extaret tabula marmorea, ad carnificinam deinceps adhiberetur. placuit perditis hominibus execrandum consilium, verum non multò post decretum ea de re factum, in consultoris caput recidit; nam sceleris convictus primus lapidem sacrum impurissimo sanguine cruentavit. Verissimum itaque adagium longo usu comprobatum, Ab alio expectes, alteri quod feceris. Hinc est quod tyranni sanguinem sitientes jugi timore percutiuntur, trepidant ad omnia, pallent semper, semper pavent. de quibus Job vaticinatur, Sonitus terroris semper in auribus illorum, & cum pax sit, semper insidias suspicantur. Hoc stimulo torquebatur Cains, qui Deo interroganti, cur concidit vultus tuus? respondit; Omnis qui viderit me, occidet me. ita mali Principes jugi timore affliguntur ob conscientiam malefactorum, quæ semper illos torquet. Quoniam, ut verbis utar Labentii equitis Romani, Necessè est, ut multos timeat, quem multi timent. Hanc verò doctrinam, ut omnibus pateat, multorum exemplis comprobare operæ pretium duco. Dionysium tyrannum proponamus in primis, cujus assiduum timorem quis ignorat? adeò dire agebatur

Toll. lib.  
5. de of-  
fic.

batur Rex impius, torquente conscientia, ut candente carbone sibi adureret capillum, ne col- lum, ac guttur tonsori committeret, & allocutu- rus populum, cum singulos quosque formidaret, ex alta turri concionaretur. Sed quid? nonne Valerius Maximus de hujus tyranni anxio timore loquens, scriptum reliquit, quod præ nimia for- midine, proprios etiam filios expavescebat? imò ut securius dormiret, ligneum pontem, quo transitus erat ad aulam regiam, nocturno tempo- re amoveri præcipiebat? Quid de Clearcho Pon- tico tyranno? nonne, ut quiesceret, in arcam se abdebat? Argivus Aristodemus, teste Plutarcho, in cœnaculum habebat portam pensilem, supra quam lectum locaverat. in eo autem dormiturus, utebatur scala qua lectulum conscenderet, quam postea mater cum ascendisset, mox auferabat, mane demum ut descenderet, afferebat. An silen- tio comprimam, quod de Alexandro Phereo tra- dunt scriptores? is non audebat ingredi uxoris cubiculum, quin prius unus de satellitibus distri- cto gladio ante iret. De Massinissa refert Valerius, quod quia timeri, non amari studebat, proinde anxius, & tremens salutem suam non hominum, sed canum custodia vallavit. O longe feliciores Principes, qui Regni præsidia, non in timore, & ferro, sed in populorum benevolentia, & in divini numinis præsidio firmant; his enim omnia cooperantur in bonum, & diu, & feliciter cun- cta succedunt ex votis. Quod facili negotio com- probabitur, si volumus memoriam refricare tem- porum. Constantinus Imperator, quia semper Christianam coluit religionem, ad eam amplifi- candam acri studio incubuit, ejusque splendorem ad summum perducere laboravit. proinde rerum omnium

Tull. lib.  
2 de of-  
fic.

Val.  
Max. lib.  
ult.

Histor.  
eccl. lib.  
2.

Aug. de  
civ. Dei  
lib. 5. c.  
25.

Aug. de  
civ. Dei  
lib. 5. c.  
26.

Fulgof.  
lib. 2.

omnium moderator. Deus tantis illum terrenis implevit muneribus, quanta optare nullus unquam auderet. Nam diu feliciterque imperavit, univ-  
sum orbem Romanum unus Augustus tenuit, ac defendit, in administrandis bellis gloriosus, in tyrannis opprimendis invictus, & grandævus senectute defunctus, filios imperantes reliquit. Theodosius Imperator strenuè ac fortiter pugnando, quot hostes prostravit? quot victorias obtinuit? quot triumphos celebravit? hoc autem an copiarum viribus? an ducis peritia? an Imperii auctoritate? non ita quidem. sed quia clementissimus, proinde amore populorum circumseptus, & quia piissimus, proinde divino præsidio stipatus. Hinc tela hostium, sic jubente Deo, in ipsos retorquebantur ad eorum exitium. Pro cuius rei elo-  
gio cecinit Claudianus,

*Te propter gelidis aquilo de monte procellis  
Obruit adversas acies, revolutaque tela  
Vertit in auctores, & turbine repulit ictus.  
Onimium dilecte Deo, cui militat aether,  
Et conjurati veniunt ad classica venti.*

Baron.  
in annal.  
an. Chri-  
sti 773.

Quid de Carolo Magno Francorum Rege? is cum bellum gereret adversus Saxones, quia oculi ejus erant ad Dominum, affuit ei cœlitus auxilium. Siquidem cum fanum vellet destruere, & oportere-  
ret ibi per triduum commorari, dum ingenti aquæ penuria laboraret, statim media die cuncto exercitu quiescente, apparuit ei torrens aquas salubres ebulli-  
ens, ut exercitus, & jumenta abunde reficerentur, & tamdiu aqua ebullit, donec fanum funditus eversum. Pro tam ingenti beneficio, divino Numini plurimæ gratiæ peractæ, ac omnia benedictionibus repleta. Sed quis unquam Trajano & potentior, & felicior? cur autem tam felici-  
citer



eiter omnia? quia in tractando Imperii clavo fuit ei clementia comes semper individua. quod ex hoc conjici potest, ut plura id genus omittamus, Is enim amicis aliquando incusantibus, quod parum memor imperatoriae majestatis, nimium esset omnibus expositus, prudenter & aptè respondit, Talem præstabo Imperatorem privatis, qualem optarem ipse privatus. aureum oraculum tanto Imperatore dignum. Alphonfus Aragoniæ Rex feliciter & ipse regnavit, quoniam omnibus prodesse, nulli obesse studuit. Is admonitus, ne nimia lenitas exiret in contemptum, & ex contemptu perniciēs; Magis, inquit, cavendum, ne severitas pariat invidiam, unde longè majus exitii periculum. O præclaros Principes, dignos sanè, ut omnibus sæculis divinis laudibus celebrentur. Sed quid de Regibus Galliæ, qui olim in toto Orbe victores floruerunt? quorum egregia facinora Homeri præconio dignissima, in omnem posteritatem personabunt? quorum nomina immortalitati consecranda, apud omnes gentes gloriosè prædicantur? Cur quæso tot victorias adepti? tot triumphos consecuti? tot coronis decorati? quia pietatis amatores, Apostolicæ Sedis propugnatores, Ecclesiastici principatus ditatores; adeò ut inter Reges sacro fonte renatos Christianissimum nomen meritò obtinuerint. Clodoveus in provinciis Gallicanis, nonne Christianæ fidei semina mandavit? Childebertus Arrianorum insecutor acerrimus, nonne Arrianam pestem è suis finibus exterminavit? Carolus re & cognomento Magnus, nonne nequissimum Saracenorum gregem prælio fortiter devastavit? nonne Saxones sævos veræ religionis hostes, tandiu armis fatigavit, donec perdomitis eorum cervicibus, fidem denuò amplecterentur?

Pipinus

Pipinus nonne Hunnorum Regem Romani Imperii fines longe lateque vastantem profligavit? Astulphum etiam, Summum Pontificem acriter infectantem, nonne penitus debilitavit? Pontificemque in pristinam dignitatem restituit? Ludovicus Pius Apostolicæ Sedis amplitudinem, perditorum nequitia deturbatam, nonne ad pristinum dignitatis splendorem erexit? Quid de illa penè incredibile Regum Galliæ liberalitate proferam? qua Ecclesiasticam hierarchiam ditaverunt, ditatam auxerunt, auctam sempiternis monimentis ornaverunt, ornatam victricibus armis defenderunt. nonne ipsi Romanæ Ecclesiæ largiti sunt Ducatum Spoletanum, Ravenatum Exarchiam, ac unicum toto orbe Pontificatus quondam domicilium Avenionem. Unde experimento comprobatum est, inclytam Galliæ Regum virtutem Romanæ Ecclesiæ fuisse secundis temporibus ornameto, turbulentis & asperioribus præsidio. Proinde sub divinis auspiciis florere, & semper florebunt Lilia. Si enim Deus pugnat pro eis, quis contra eos? pugnabit autem & quidem dextera potenti, ut protegat assiduè Christianæ fidei protectores, inter quos insignem locum obtinet Ludovicus XIII, Galliarum nunc Rex dignissimus; is namque tertium ante annum Bearniam Galliarum provinciam victor ingressus, cum sibi ab iis populis Umbella auro gemmisque contexta fuisset oblata, statim rejecit, eamque addixit Eucharisticæ hostiæ triumphali pompa eas per urbes circumferendæ. Quo in facinore quis non videt modestiam, & pietatem pari victoria regio in pectore triumphare? An loquendum de florentissimis Hispaniarum Regibus? Percurre annales, & illos videbis unius orbis monarchas, tot victoriis

CORO-

coronatos, tot coronis ornatos, tot triumphis decoratos; sed quia omnes penè innumeros enumerare nimis longum esset, nec sermo explicaret, ad Philippum Regem nostrum Augustum, & semper invictum convertamus sermonem, & dicamus adinvicem, cur ad hunc Principem potentissimum tot Regnorum coronæ devolutæ sunt, numero plures, quàm sint ejus anni? quia susceptum Catholicæ fidei patrociniū inviolata religione semper complexus est; quia ad Ecclesiæ tutelam natus, & ad Catholicæ sedis robur de cælo datus, omnia quæ in eo sunt auxilia, pro Ecclesiæ salute nunquam prætermisit; quia in summis angustiis Ecclesiasticam hierarchiam, tanquam alter Gedeon eximia pietate, & invicta virtute sublevavit; quia hierarchas suos semper præsidio munivit, & Apostolicam Sedem singulari quadam observantia veneratus est. Hunc igitur militantis Ecclesiæ clypeum imitami, ô Principes, & hujus præstantissimi Regis exemplo, etiam usque ad sanguinem ecclesiasticam observatæ libertatem. Hac enim, regnorum jurisdictio non infirmatur, sed confirmatur; Principatus dignitas, non dejicitur, sed erigitur. Imperii amplitudo non coarctatur, sed dilatatur; splendor Regius non obscuratur, sed illustratur. Et unde Austriaca familia ad tantum potentiæ culmen pervenit, ut ejus Imperio sol numquam occidat? Rudolphum clarissimum virum memoria repetite, & responsio in promptu erit. Ejus enim religioso, & jam omnibus noto facinori, cum sacerdoti occurrit in venatione sacram hostiam ad ægrotum ferenti, tam ampla Monarchiæ moles prædictione promissa, & ejus posteris unà cum religione commissa est.

Bene sit tibi, ô Rudolphe, & stemmati tuo; vi-

vent, vincent, & regnabunt, qui à te descendunt Reges, quamdiu fidem Catholicam tuebuntur; quia benedictio Domini firmat domos divina Numina colentium.

Videamus modò, si lubet, miserabiles exitus potentium, qui humano sanguini inhiantes, & Deum post terga habentes, sævitiam pro voluptate, & libidinem pro lege sibi præscribebant, qui intrarunt ut vulpes, regnarunt ut lupi, occubuerunt ut canes. Prodeat primo loco Sextus Nero Imperator impius, qui sibi illo die datum Imperium dictitabat, quo matrem iussit necari. quæ ut vidit Centurionem jussu tyranni ferrum in mortem distringentem, protinus ventrem manu ostendens, cum ejulatu, & lachrymis exclamavit; Hunc percutite, hic est ferro fodiendus qui portentum illud genuit. defuncta Agrippina, ad visendum interfectæ cadaver accurrit Nero, attrectavit, alia vituperavit, laudavit alia, sitique interim oborta bibit; parricidio matris junxit amitæ necem; sed nec populo, aut mœnibus patriæ pepercit. Verè in hoc scelesto, improbissimoque viro, tanquam in suo domicilio crudelitas ad suas vires ostentandas confedisse, suumque vexillum sustulisse videtur. Belluæ feritatem audivimus, respiciamus modò finem. Post occisum Claudium patrem, post interfectam Agrippinam matrem, post Britannicum fratrem veneno necatum, post Octaviam uxorem turpiter abdicatam, post Senecam præceptorem de medio sublatum, post innumera flagitia perpetrata, tandem omnibus & odio, & despectui habitus, rebus jam desperatis, cum fuisset hostis judicatus à Senatu, ne ab hostibus trucidaretur, adigens ipse jugulo ferrum, extremum clausit diem, tam horrendum sævitæ

Tac. l. 13  
annal.

ſævitæ portentum trigesimo ſecundo ætatis ſuæ anno.

Caligulæ feritatem ad cædes nati quis non perhorreſcat? impius iſte tyrannus humano ſanguini adeò inhiabât, ut aliquando dicere auderet; Utinam Populus Romanus unicam cervicem haberet, ut uno ictu omnes ſimul perderem: omnibus inſenſus, quid mirum ſi & omnibus inſuſus turpiter occubuit perditiffimus homo. In Tiberii principatu quam latè graſſata crudelitas, quandoquidem cum hiſ redibatur in gratiam, quorum cædes maturabatur; cùm enim cuſtodias recognoſceret, rogatus, ut ſupplicium maturaret, reſpondit, Nondum tecum redii in gratiam; humanitatis officium ducens, ſi damnatum citò occidiſſet. Ipſemet audivit quendam ex reis nomine Servilium ſibi mortem conſciviſſe, priuſquam eſſet damnatus, protinus exclamavit, Servilius me evaſit; adeò leve ſupplicium eſſe judicabat mortem. Quid ſi dixerim in principatu Tiberii ſub pœna capitali interdictum, mortuos deſlere? ô ferreum tunc ſæculum, quando ipſæ matres accuſabantur, quòd filios ultimo ſupplicio affectos cum ejulatu deſlerent, & convictæ juffu Senatûs necabantur. ô quam miſerum eſt lædi ab illo, de quo queri non eſt tutum. Horrendum dictu! Ecquis crederet? ſed percurrere annales, & videbis abominationes majores. Quis unquam barbarus, aut Scythia viperino ſanguine cretus, adeò crudelis, qui imperaverit ſilentium hiſ, in quos animadverti volebat; iſte Impius eò ſævitæ devenit, ut juberet os inſerta ſpongia includi, ne vocis emittendæ haberet facultatem. Cui unquam morituro non eſt relictum, quòd gemeret? timuit ne liberioſorem vocem extremûs dolor mitteret. ne quid audiret, quod nollet.

Fulgoſ.  
lib. 9, c.  
11.

Corn.  
Tac. li. 5.  
annal.

Sen. li. 3.  
de ira.

Errav.  
de var.  
hist. li. 4.

nollet. Sciebat autem innumerabilia esse, quæ ob-  
jicere illi nemo auderet, nisi periturus; sed audia-  
mus aliam immanitatem prorsus incredibilem, ve-  
ram tamen. Cùm vellet quidam tyrannus, nomine  
Thyrus, omnem viam præcludere ad fovendam  
conjunctionem contra se initam, publico edicto  
cavit, ne quisquam nec publicè, nec privatim col-  
loqui auderet, æquè tulit populus duram legem,  
loquelam tamen supplebant nutus, quibus internos  
animi conceptus quoquo modo exprimebant. hoc  
autem cum ad tyranni notitiam devenisset, mox  
signa, & nutus eis interdixit. Porro cives mole-  
stissimè ferinam hanc rabiem ferentes, cœperunt  
plerique publico foro tristes singultus profusis  
etiam lachrymis emittere, calamitatem Patriæ  
amare flentes. Hoc ad Principem illico relatum  
fuit. Ipse verò magis periculosam sibi judicans,  
lachrymarum quam verborum conjunctionem, &  
timens, ne vehementius fletibus, quam vocibus  
animi contra ipsum incitarentur, multis ipse militi-  
bus stipatus, ad forum perrexit, ejulatus, & la-  
chrymas prohibere contendens, ut non solum  
linguam constringeret, sed etiam oculis à natura  
tributam libertatem eriperet. At res non cessit ex  
votis, quia non ipse, sed lachrymantium fletus  
prævaluerunt. Siquidem repentè veluti leones  
summa rabie insurgentes, illum dilaniarunt, inter-  
fecerunt, trucidarunt. Eandem penè fortunæ mu-  
tationem expertus est Amasis Ægyptiorum Rex,  
cum enim plerosque ex suis extremo supplicio af-  
fecisset, alios fortunis spoliasset, imperium ejus  
aliquantò toleratum est, Actisanes tamen Æthio-  
pum Rex, vix in eum armis & potentia irrupit,  
& ecce statim odia occulta erupere, cumque mul-  
ti ab eo descivissent, Regno tandem pulsus est.

En

Diodor.  
ib. 4.

En miserabiles exitus Imperatorum sævientium, qui magis timeri, quàm amari appetunt, quorum colla propria virtute calcat Deus ad terram usque prosternens: sic divino attestante oraculo: Ecclef. c. 10.  
 Sedes ducum superborum destruxit Dominus, & federe fecit mites pro eis. Philippum Macedonum Regem ante oculos vestros proponite, ô Principes, & feliciter vobis omnia contingent; hic enim cum maledictis à Nicanore Macedone laceraretur, atque idcirco urgeretur ab amicis, ut in illum animadverteret, non solum non annuit Rex, sed ubi accepit Nicanorem magna inopia laborare, dono ei pecuniam misit; qua accepta, statim expetulant, & maledico, factus est Regis studiosus, & indefessus ejus gloriæ buccinator; tunc mirantibus, inquit Rex; Nonne videtis in manu nostra esse, ut quæ velimus à populo de nobis audiamus? Non est populi in Principem difficilis amor, modò adsit clementiæ umbra. Verum est enim vetus illud adagium; Ut hamo pisces, sic beneficio capiuntur homines. Noverat siquidem optimus Princeps, non paucas ex nimio rigore excitari seditiones. Quoniam quemadmodum arbores ferè omnes præcisæ, plurimis ramis repullulant, & multorum satorum genera, ut densiora resurgant, præscinduntur, ita regia crudelitas auget inimicorum numerum, tollendo præsentis. nam liberi eorum qui interfeciti sunt, & amici in locum singulorum succedunt. Discite à Fabio Maximo, Duce prudentissimo, & res vestræ componentur felicius; hic in tolerandis adversis hominum moribus feliciter populo imperavit; assererat enim, eum qui aliis imperaret, non verbis, aut verberibus lævire debere; sed tolerando, & mulcendo hominum corda in  
 F 3 suam

Gen.  
c. 19

Greg. in  
pastor. p.  
1. c. 6.

suam sententiam adducere. Absurdum quippe & à ratione prorsus alienum, feras belluas à nobis, cibo & blanditiis reddi mansuetiores, homines verò morum asperitate, & metu, ad nostri amorem compelli. Quod divini oraculi testimonio comprobatur. Nam Dominus benedicens Noë ejusque filiis, hisce verbis usus est, Crescite, multiplicamini, replete terram, & terror vester sit super cuncta animalia terræ. Gregorius allegoricum hujus loci sensum enodans dixit: Deum non aliam ob causam hæc verba locutum, quam ut ostenderet terrorem & severitatem nobis non esse, nisi ad animalia domanda exhibendam; verum ad homines regendos, lenitatem desiderari cum majestate conjunctam. Decet quidem timeri Cæsarem, at plus diligi, quoniam ita natura comparatum est, ut homo non vinculis, sed amore trahatur; taurus funibus ligatur, catenis leo, at amore homo. libere enim agit, proinde ejus voluntas in actibus internis nequit cogi, neque trahitur nisi amore mutuo & mutuis obsequiis. Hinc Thales unus ex septem sapientibus interrogatus, quodnam rarissimum rerum omnium foret? respondit; tyrannus senex, quia iniqua & violenta imperia, non retinentur diu. Nunquam enim & nullibi tanta crudelitas, & quò magis secura sibi videtur, eò magis præcipitio proxima est. Quis enim ignorat longo usu & experimento probatum, illos, qui rerum potentia confidentes, terræ cæloque miantur, quasi nullius egentes, omnia contemnentes, temere regentes, perperam judicantes, tandem & semetipsos, & Regnum in præcipitium traxisse, extremumque diem infeliciter clausisse? sic ed Phæthonte scribit eleganter anonymus quidam, sed egregius Poëta.

*Ausus*



*Ausus in aethereos juvenis conscendere currus,  
 Igneaque audaci sumere lora manu,  
 Oblitus pariterque sui, metæque paternæ,  
 Quos mundo sparsit, ignibus ipse perit.*

Temperatus timor cohibet animos, non inficior, Sen. li. 1  
de clem.  
 sed velim habeas persuasum, ô Princeps, quod as-  
 fiduus, improbus, & extrema admovens in auda-  
 ciam jacentes excitat, & omnia experiri suadet.  
 Ultima namque desperatio vomeres & ligones in  
 enses vertit, odia parat, ad sanguinem invitat, &  
 nihil crudelius timore, cùm induit odium; nulla-  
 que fitis implacabilior, metu excitata. Quisquis Sen. li. 4  
epistol.  
 enim vitam suam contempsit, tuæ Dominus est.  
 Siquidem patientia sæpius læsa fit furor, & tunc  
 acerrima virtus, quam ultima necessitas impellit.

*Augusti pietas Regnum firmavit, & auxit.*

*Funditus evertit improbitate Nero.*

*Si cupis, ô Princeps, in Regno tutus amari,*

*Dilige. sic namque conciliatur amor.*

*Hoc est præsidium, hæc Regni custodia tuta*

*Solus amor populi, non timor, atque metus.*

## CAPUT V.

*Principum status laboribus, ac periculis obno-  
 xius, proinde invigilandum.*



UANTIS laboribus, ac curis cir-  
 cumscripta sit Principantium vita,  
 adamussim expressit Dionysius ty-  
 rannus; is enim cum audiret quem-  
 dam nomine Damoclem, ad cæ-  
 lum usque extollere ejus opes im-  
 mensas, ædium regiarum magnificentiam, rerum  
 omnium abundantiam, acclamaretque, nullum  
 F 4 Diony-

Macrob.  
li. 1. c. 16.

Dionysio beatiorem. Tunc, ait Rex, Vis ô Damocles, fortunam experiri meam, illamque degustare? illico annuit ille, & se cupere dixit quàm maxime. mox jussit Rex collocari hominem in aureo lecto, abacosque complures ornavit argento, auroque cæato, ad mensam deinde eximia forma pueros delectos jussit circumstare, eosque ad nutum illius intuentes, diligenter ministrare: aderant unguenta, incendebantur odores, exquisitissimis epulis mensæ extruebantur. Tunc Damocles præ lætitia gestiens, fortunatum se prædicabat; sed in hoc medio apparatu, fulgentem gladium è laqueari secta equina appensum demitti imperavit, ut impenderet illius beatuli cervicibus; itaque mox in alium mutatus, nec pulchros illos amplius aspiciebat, nec plenum artis argentum considerabat, non amplius manum porrigebat ad mensam, jam ipsæ defluebant coronæ, odores non fragrant, & tandem profusis lachrymis exoravit tyrannum, ut abireliceret, quod jam beatus nollet esse, feliciorem judicans Damoclis fortunam. Quippe quod cernebat omnia periculis plena, & in Regnis administrandis, plus felis quàm mellis inesse. ô egregiam historiam veritatis plenam! Ita planè sentiebat Saturninus vir ingenuus; nam hortantibus amicis, ut Imperium susciperet, ait, Nescitis, ô milites, quantum mali sit imperare; gladii cervicibus imminet, hastæ undique & spicula, ipsi quoque custodes timentur, ipsi comites formidantur; non cibus pro voluntate, non iter pro auctoritate, non bella pro judicio, non arma pro studio. aurea planè verba Hieronis Siciliæ tyranni. Potus ac somnos non aliter quam insidias caveo, timeo cele-

Cic. li. 5.  
Tusculan. qu.

Brut. in  
lib. 3. c.  
13.

celebritatem omnium, timeo solitudinem, timeo incustoditos aditus, timeo ipsos custodes, neque inermes illos habere velim circa latus, neque armatis confido. Quid plura? varia Principum incommoda, & pericula vulgo incognita, experimento probat, qui imperat. Hoc optimè noverat Julianus Cæsar, qui cum initio Imperii sui, Gallico tumultu premeretur, dicere solebat, nihil se amplius affecutum esse propter Cæsaris dignitatem, nisi quod occupatus viveret. Antigonus itidem Rex Macedonum, cùm de majestate regia incidisset sermo, dixit filio heredi, an ignoras fili, regiam nostram potestatem nihil aliud esse, quàm splendidam servitutem? Ecquid cordatius unquam dici poterat? Nam Princeps non minus observare cogitur populo, quam populus Principi, nisi quod Princeps id facit cum dignitate, alioqui re vera mutua servitus est. Siquidem Rex, qui propriè rex est, non suam, sed populi utilitatem quærit, proinde minister & servus dicendus est, & hoc ad litteram significat illud evangelicum; Qui voluerit inter vos primus fieri, erit omnium servus. Hinc summus Pontifex servus servorum Dei se nominat. Adeo ut si ulla est servitus in politico principatu, magis propriè servus dici debeat, qui præest, quam qui subiectus est. Huc aptè accedit Senecæ moralis auctoritas; is enim alloquens Neronem, sic ait; Possum ego in qualibet urbis parte incedere solus, sine timore, quamvis nullus sequatur comes, nullus ad latus gladius, tibi in tua pace armato vivendum est, turba militum ubique te obsidet, & quocunque descendis magnus apparatus sequitur, hoc autem quid est? Nonne summæ magnitudinis servitus est? oblâum fuit olim, narrant divi-

Eliau.  
lib. 2. d.  
var. hist

Matr. 20.

Aug. lib.  
1 de civ.  
Dei, cap.  
14.

Sen. li. 1.  
de Clem.

Iſa. c. 3.

Policra-  
tus li. 4.  
c. 4.

næ hiftoriæ, cuidam viro inſigni Regium diadema. Legationis autem verba ſunt hæc : Veſtimentum tibi eſt, Princeps eſto noſter ; ille verò renuit dicens : Non ſum medicus, & in domo mea non eſt panis, neque veſtimentum, nolite conſtituere me Principem populi. Loco illius, non ſum medicus, verterunt Septuaginta, Non ero Princeps. Pagninus legit ; Non ero dominus: alia littera; Non ero ligatus. & quidem optime. Nam Princeps re vera ſervit vinculo cujuſdam ſplendidæ ſervitutis ligatus. Hinc antiquitus loco coronæ regiæ, vittam capiti Regis circumdatam apponebant ; bonus enim Princeps ſervus eſt publicus, nec ad ipſum ſumma deferretur poteſtas, ut delitiis diffluat, ſed ut pro omnibus vigilet, conſiderans regiam coronam crebris curarum aculeis eſſe cuſpidatam, & regiam purpuram quaſi roſam ſpiñoſo ſatellitio circumvallatam. Hanc miſeram Principum ſervitutem deridebat Plato, quandoquidem videns Dionyſium multis ſeptum cuſtodibus, joci gratia dicebat : Quidnam mali feciſti, ut à tam multis neceſſe habeas cuſtodiri ? Quid mirum ſi tot Principes prudentia, & probitate inſignes, ut tam grave ſervitutis jugum devitarent, vitamque beatiorẽ traducerent, ſponte imperio ſe abdicare ? non deſunt monimenta ex hiftoriis deprompta. Pericles inter Græcos multis nominibus celebrandus, cùm Athenienſibus imperaret, humanorum fluctuum inconstantiam conſiderans, & ingentes curas, quibus premitur Imperator, Athenienſium ducatum contempſit, & quaſi de quodam naufragio evaſiſſet, ad portum ſolitudinis ſe contulit, in remota & exigua domuncula vitam quietam ducens, in cujus primo limine hoc diſtichon inſcribi juſſit,

*Inveni*

*Inveni portum, spes, & fortuna valete,*

*Nil mihi vobiscum, ludite nunc alios.*

Scitè admodum quidam Aulicus cùm sero tandem sapiens ab aulæ tempestatibus, ad privatæ & proinde tranquillæ vitæ portum se recepisset, septimo post anno moriturus sepulchro inscribi voluit hoc epitaphium,

*Hic jacet septuagenarius, qui septem vixit annos.*

Diocletianus Romanorum Imperator mente volutans regni fastigia, nihil aliud esse, nisi pretiosa quædam pericula, aureos compedes, splendidas infelicitates, catenas adamantinas ad certam ruinam trahentes, post plurimas res præclare gestas, post multas victorias adeptas, post superbum illud Romæ ædificium peractum, quod thermas appellavit, ultronæus, & nullo cogente, imperio se abdicavit, & ad parvam villulam circa Solonam Liburniæ civitatem se contulit, ubi à mundi tumultu separatus, lætus aliquandiu vixit. Quin etiam dicere solebat, Nunquam solem tam jucundum & splendidum intuitum fuisse, quam post Imperii abdicationem. imò adjiciebat, quod Imperatori condolendum, agricolæ verò invidendum foret; sed quid pluribus immoror? Cùm aliquando Romani Legatos misissent, ut ei denuo imperii coronam afferrent, invenissentque eum in hortulo suo lactucas colligentem, nequaquam se eam accepturum respondit; quippe quod volebat ille lactucis cum tranquillitate vesci, quas ipsemet plantaverat; ac si diceret, hoc vivendi genus optandum, nempe, urbium tumultus vitare, curas curiæ aliis relinquere, nemorum umbras amare, pratis virentibus gaudere, paucis servis; sed multis comitatum libris, nunc querula in ripa sedere, nunc tenero in gramine quiescere. pulchre & appositè  
Steb

*Stet quicumque volet potens  
Aula culmine lubrico ,  
Me dulcis saturet quies ,  
Obscuro positus loco ,  
Leni persuar otio.*

Ovid. de  
tristib.  
lib. 3.

Quod & Ovidius eleganter docuit ,  
*Vsibus edocto si quidquam credis amico ,  
Vive tibi , & longè nomina magna fuge.*

Hoc idem Seneca scribens Lucilio ; Vaco mi Lucili , vaco , & ubicumque sum , meus sum ; rebus enim non me trado , sed commodo ; magnam potentiam ambit inexpers , sed odit expertus.

Senec.  
de brev.  
vitæ, c. 5.

Divus Augustus, cujus Imperium verè augmentum , enixè quietem sibi precabatur, vacationem à Republica instanter petebat omnis ejus sermo ad hoc semper revolutus erat , ut sibi pararet otium, hinc labores suos etiam si falso, dulci tamen oblectabat solatio, aliquando se victurum sibi. tanta res visa est otium, ut illam, qui usu non poterat, cogitatione præsumeret. Res sane miranda.

Ægesippus lib.  
4.

Qui omnia videbat ex se uno pendentia , qui omnibus gentibus fortunam dabat , qui alios voti compotes facere poterat , illum diem lætissimum putabat, quo magnitudinem suam exueret. Expertus quippe erat egregius Imperator , quantum illa bona per omnes terras fulgentia , sudoris exprimerent , proinde otium optabat , in cujus spe, & cogitatione labores ejus residebant. Ad rem nostram perbelle facit, quod de Vespasiano spectatæ probitatis viro , produnt historiæ. is cum esset in obsidione Hierosolymitana , & increbuisse rumor, Neronem fuisse occisum , & Galbam interfectum, tunc viri primarii veteris militiæ elegerunt Vespasianum, rogantes , ut susciperet Imperium. ille verò refugiebat , indignum se existimans.

mans. Instabant illi, renuebat ipse. Tandem ipsum reluctantem gladiis armati circumfistunt, mortem etiam minantes. In angustia positus, animadvertens vir egregius sibi ingens discrimen imminere, si diutius resisteret, at grave periculum si reciperet, cessit tandem potius imponentibus, quam accepit voluntarius. Urgebant milites, suadebant duces, curam potius, quàm honorem induit. De hoc præstantissimo Principe, memorandum illud, refert Valerius, Quo tempore militum applausu traditum fuit diadema, prius quàm capiti imponeret, diu manibus retentum consideravit, & protinus emissio suspirio dixit: ô nobilem magis, quàm felicem pannum, quem si quis penitus agnosceret, ne humi quidem jacentem dignaretur tollere.

*Si scires quanti plenum est diadema periculi,*

*Malles Sisyphii ponderis esse reus.*

Vide an sit felix imperandi genus, in ipso nomine felicitatis syllaba fel propinat. Quocirca Otho Romanorum Imperator sæpe ad suos dicere solebat, Nescitis amici, quid sit Romanum gubernare Imperium, mihi credite jam experto, qui jam mori malo, quàm imperare. Pompa quidem admiranda, & magnifica majestas; sed cruciatus, quibus angitur Princeps, acerbissimi. Foris tantum iustitiam, non introspicimus. Voluptates videmus foris apparentes, sed non angustias intus latentes, dæmonis fraude decepti, qui ostendit regna mundi, sed non vepres & spinas quibus torquentur Reges, & hoc in momento, ut ambientes fallat. Apelles tam singulari arte pinxit Bucephalum, ut alium equum ad hinnitum concitaret; Zeuxis uvas tam simili forma figuravit, ut aves certatim advolarent; Parrhasius linteum in tabella tam mira artis peritia formavit, ut verum prorsus appa-

Val. lib.  
7, c. 2.

Brascon.  
li. 3. cap.  
13.

Volaterran. lib.  
10.  
Ælian.  
lib. 4.

appareret; ita honores mundi decipiunt incautos, quia videntur veri, fucati tamen sunt. Orator Græcus Isocrates dictitabat de urbe Atheniensi, Pulchra quidem visu, & ad ambulandum amœna, ad habitandum verò periculis exposita. Demetrius quoque Lacedæmonum Rex non ignarus, quid sit Principis personam sustinere, sæpius dicebat; Si quis nosset, quam grave foret sceptrum manibus tractare, & quæ in regum tentoriis curæ, anxietates, & pericula versentur, vix esset in mundo aliquis, qui Regnum ambiret, Imperium acciperet, & à terra diadema sustolleret. Hinc notatur illius stultitia, qui dixit, Villam emi, & vado videre illam. Quid stolidius quam emere non visam? Si dignitatibus inhiantes, mundi villam viderent, priusquam emerent, non illam profectò tantis periculis emerent, sed cum Demosthene dicerent; Non emo tanti pœnitere. Ad rem egregiè facit, quod de Paulo Æmilio legitur apud Plutarchum. Nobilis Romanus nuntium remiserat uxori, sed amicis divortium dissuadentibus, quærentibusque nonne casta? nonne formosa? prolato calceo, mox, inquit, Nonne ornatus? nonne pulcher? at nemo vestrûm novit, ubi pedem meum urgeat. Ego quidem sentio. rident principantes, & sæpe, sed non verum risum; gaudent, sed non germanum gaudium; non hercle magis, quàm hi qui capitis damnati in carcere attinentur, & talis interdum, aut tesseriis fallere se conantur, nec fallunt; manet enim impressus imminentis supplicij terror, nec tollit se unquam ab oculis imago luridæ mortis. jactant felicitatem foris, sed intus torquentur cruciatibus. At quomodo felix qui timere non desinit? Num potentem censes, & felicem, qui satellite latus ambit, qui quos terret, ipse plus metuit?

Aul. Gel.  
lib. 1.  
noct. ar-  
tic. c. 8.

Plut. in  
vira P.  
Æmil.  
tom. 1.

Lipfius  
lib. 2 de  
const. c.  
14.

Boethius  
li. 3 pro-  
fa. 5.



tuit? Recte Aulus Gellius, Multis eget, qui multa habet. at quæso quæ potestas, quæ omnium curam gerit, & omnium ope indiget? quæ præest omnibus, & omnes timet? quæ quo in loco eminentiori, tanto in periculo majori versatur? Recumbunt quidem in purpureo strato, non tamen placidè quiescunt, quoniam assiduus timoribus anguntur. ut eleganter Tragicus,

*Aurea rumpunt tecta quietem,  
Vigilesque trahit purpura noctes.  
Pectora pauper securus gerit,  
Tenet è patula pocula fago,  
Sed non trepida tenet ipsa manu.  
Carpit felices, vigilesque cibos,  
Sed non stricto respicit ense.*

Qui ad coronam Regiam auro, & gemmis rutilantem lumina convertit, ad pauca respiciens, facilè beatos Principes pronuntiabit, porro qui curas assiduas, quibus tanguntur, qui pericula, quibus urgentur, qui onera, quibus premuntur, proculdubio inveniet miseros gigantes gemere sub aquis. Quid est autem gigantes gemere sub aquis? nisi quia potentiores hujus sæculi gemunt, & tremunt sub regimine dignitatum, & sæpe sub onere succumbunt. Greg. li. 17. c. 11. Job. cap. 20.

Unde Martialis,

*Queris omni magnum, magnum dum queris honorem.*  
Hinc est, quod Isaias loquens de Principe dicebat: Factus est principatus super humerum ejus. ut nimirum intelligatur, quantum ponderis sustineant, qui præsunt. Proinde Regi fuit appositus armus ad manducandum. Comede, quia de industria servatum est tibi. Siquidem qui regnum administrat, quasi Atlas suis mundum sustinet humeris, sub quo pondere gemit, nec rarò deprimitur. Ecquid mirum, si pauci Principes bene imperant, cum

Isa. c. 9.  
1 Reg. c. 9.

Corn.  
Tac. lib.  
1. hist.

cum bene regere, hoc est, rectè agere, sit multi ponderis, & exacti laboris. Est enim magnum quoddam, in summa fortuna non abripi licentiæ ventis, & in mari illo undoso cursum rectum semper tenere. O quam multis, & quam sæpe contingit, quod olim evenit Imperatori Galbæ, qui omnium iudicio dignus imperio, nisi imperasset. hoc idem de aliis multis, qui post multos exantlatos labores, adepti denique Imperium, ostendunt eo se minores. nec temere à Pittaco dictum, Magistratus ostendit virum. Quocirca non inepte mimus ille Claudii Neronis dictitare consueverat, bonorum Principum facies in unius annuli pala facile inscribi posse, sentiens magnum quidem numerum Imperatorum esse, sed perpaucos bonos. At unde quæso, tanta bonorum raritas, & virtutis inopia, ut verum sit dicere.

*Rara avis in terris, nigroque simillima cygno*

*Vir bonus, & sapiens, qualem vix repperit ullum*

*Millibus è multis hominum consultus Apollo.*

D. Th. 1.  
2. q. 63.  
a. 1.

Unde tanta virtutum penuria, cum virtutes sint nobis secundum inclinationem naturalem, ut optimè docet Angelicus doctor? Pro responsione plurimæ rationes solent adduci ex sacris Theologis excerptæ, quarum prima hæc est, quoniam bona sensibilia sunt magis nota nobis, & magis nos movent, & alliciunt. Altera ratio est, quoniam hæc bona sensibilia afferunt secum præmium suum, nimirum voluptatem: bona verò honesta promittunt in futurum; tertia causa est, quia voluptas carnis nobiscum crescit, nobiscum alitur. propterea difficile est istum affectum à nobis avellere; addamus, & sit quarta ratio, quoniam gerimus bellum contra hostes fortissimos, de quo bello dicit Paulus, Non est nobis colluctatio adversus carnem & fan-

sanguinem, sed adversus principatus & potestates. Ac demum fortissima causa est, quia virtus consistit in medio; medium verò, & scopum attingere, paucorum est; aberrare autem à scopo, multorum. Quam rationem pulchre insinuavit David, qui inquirens causam, unde tanta malorum colluvies, dixit, In circuitu impii ambulant. ac si diceret, cuique facillimum est circulum, & circumferentiam attingere; medium verò, difficile est, & paucorum; at virtus consistit in medio. Hinc est, quod paucissimi viam rectam percurrunt, & multi, præcipue potentiores, ab æquitatis tramite declinant. Proinde cognita virium humanarum exiguitate, & gravissima rerum gerendarum mole, ad auxilium divinum tanquam ad tutissimum asylum confugere debet Princeps, ut virtutem bene regendi conferat, Salomonis sapientissimi Regis vestigia sequens, qui in ipso primordio Regni cognita sui parvitate, pro tanto regimine, sic oravit <sup>3. Reg.</sup> ad Dominum; Domine Deus tu regnare fecisti <sup>c. 3.</sup> servum tuum pro David patre meo, ego autem sum puer parvulus, ignorans egressum & introitum meum, & servus tuus in medio est populi, quem elegisti, populi infiniti, qui numerari non potest. dabis igitur cor docile servo tuo, ut populum tuum judicare possit, & discernere inter bonum & malum. De Adriano, Pontifice optimo, referunt sacri annales, quod assiduis precibus & lachrymis exorabat Dominum, ut dexteram apponeret, quò tam grave onus, tamque infelicem felicitatem ferre posset; is enim nihil sibi infelicius in vita duxit, quam quod imperaret. Urbanus Septimus quoties lineam vestem superinduebat, ad purpuratos Principes conversus, hæc aurea verba depromebat, En tunica levis,

Niceph.  
lib. 11. c.  
37.

Pet. Ble-  
sensis  
epist.  
103.

tanti tamen ponderis. Gregorius Magnus cathedram Pontificiam appellabat spinosam, supremumque illud fastigium, acutissimis usquequaque confectum aculeis. Hinc est, quod tot heroës præclarissimi, sponte dignitates oblatas recusarunt. Cælestinus ad supremam apud mortales dignitatem assumptus, nonne sponte lætior deposuit, quàm quilibet alius suscepisset? Divus Ambrosius quem lapidem non movit, ut Episcopatum Mediolanensem refugeret? Superiorem locum in domo Dei non ambiebat Augustinus. Quas latebras non quæsit Gregorius, ut summi Pontificatus apicem declinaret? Quid? nonne legitur apud ecclesiasticæ historiæ Scriptores, quod cum beatus Amonius ad regimen populi traheretur invitus, aurem sinistram radicitus ferè sibi secuit, dicens; Lex divina neminem præcisa aure permittit fieri sacerdotem. Reversi sunt itaque populi ad Timotheum tunc temporis Patriarcham, qui Amonium non solum si auribus mutilatus, verum etiam si naribus truncatus esset, propter sanctitatem ipsius censuit promovendum. Revertentibus autem illis, & iterum trahentibus virum Dei, atque cogentibus; Linguam, inquit, meam, propter quam vobis placeo, si me ulterius cogitis, propriis dentibus amputabo; & sic tandem sibi relictus est. Nec silentio involvendum, quod narrat Petrus Blesensis de Galfrido, viro doctrina & sanctitate insigni; hic electus in Episcopum Tornacensem electioni nullatenus acquievit, qui postea defunctus, & apparens cuidam fratri inquirenti, quomodo ei esset? respondit; Revelavit mihi Trinitas sancta, quod si suscepissem Episcopatum, fuissem de numero reproborum. Sed quid pluribus immoror? Carolus Quintus Austriacus nostra ætate,

ætate, cum rerum in imperio præclarè gestarum gloria penè omnes mortales superasset, seipso major tunc extitit, cum amplissimis Regnis & Imperio se abdicavit, & non sine lachrymis, dixit: Misèret me, Proceres; filii carissimi Philippi, cujus humeris tam grave onus imponitur, quod dum gesturus est, vita ei in summis laboribus, & molestiis est transigenda. Non latebat hos viros sanctitate præclaros, quam magna secum trahat pericula, sublimis loci dignitas, quam sanè frustra premit invidia, cum potius miseratio debeatur.

Quorsum totius mundi monarcha in cruce pendens inclinavit caput? Et inclinato capite emisit spiritum. Divus Athanasius ita exponit, Cum mors, inquit, sit effectus peccati, & Salvator omnis peccati esset expers, non audebat mors illum invadere, ipse tamen quia mori cupiebat, nutu capitis, illam accersivit, ut veniret. verba Athanasii sunt hæc: Impletis omnibus quæ pati debuerat, sola mors adhuc restabat, atque hæc quidem sibi metuens, appropinquare non audebat, ideo Christus inclinato capite, eam vocavit: nam antequam caput inclinasset, propius accedere verebatur. Augustinus rationem adducens, ait, Christum Dominum inclinasse caput, ad osculum nobis præbendum. Verba Augustini ex ardenti divini amoris pharetra deprompta, sunt hæc, Inspicite vulnera pendentis; sanguinem morientis, pretium redimentis, caput habet inclinatum ad osculandum, cor apertum ad diligendum, brachia extensa ad amplexandum, totum corpus expositum ad redimendum. Chrysostomus docet; Christum inclinato capite tradidisse spiritum, ut non necessitate, sed voluntate, se mori ostenderet. quantum voluit; vixit; quando voluit, tradidit.

Ioan. c.  
19. D.  
Athan.  
li. 4 ad  
Antioch.

August.  
lib. de  
Virgine.

Chry-  
sost.  
hom.  
104.

spiritum. Alii morientes primò emittunt spiritum, deinde caput inclinant: in Christo autem contra accidit, quoniam prius caput inclinavit, postea spiritum emisit. cum igitur libere caput inclinaverit, utique inclinavit quando voluit, unde mortuus est, non quando inimici voluerunt, sed quando ipse voluit; proinde sapienter ait Matthæus; emisit spiritum; non amisit: quod enim emittitur, voluntarium est; quod amittitur, necessarium. Aliæ quamplures sunt Patrum explicationes, sed brevitati studens, unam tantum Danielis Mallonii adhibebo, utpote præsentī instituto magis appositam. Supra caput, ait, titulum habebat Christus, quo Rex dicebatur, ut igitur ostenderet, se Regnum temporale non ambire, caput avertit, & inclinavit, ut nos doceret, regios honores fugiendos, tanquam scopulos periculis plenos, & plurimo felle refertos. Proinde sapienter ille, qui coronam Imperialem super fimeto pinxit, adjuncta hac nota. Tollat te, qui te non novit; qui enim maturè perpendit, illam spinis undique circumdatam reperiet. Quod divinarum litterarum testimonio facile comprobatur. In libro Judicum legimus, quod cum arbores omnes ad Regem eligendum convenissent, neque vitis, neque oliva, neque ficus dignitatem regiam acceptare voluerunt, quod nativam quandam dulcedinem haberent, sola ramnus spinis onerata, oblatum honorem suscepit, dicens: Venite; & sub umbra mea requiescite. Quid hinc? ut discant Principes, dignitates Regias tribulis & spinis sociari. Cùm Deus Moysen decrevisset Ducem populi sui constituere, in medio ignis & rubi apparuit. Quorsum hoc? ad insinuandum dignitates omnes spinis, & igne circumdari. Populus Hebræus Christum Regem constituere optabant,

Mallon.  
20.

Coar-  
vias in  
emblem.

Judic. c.  
9.

Exod. c.  
3.

optabant, at ipse secedens in montem, se eis subduxit, cum verò spinis coronaretur, lætus sedit, & Regem se appellari permisit. Quid hoc? ut innueret, Coronam spineam dignitati regali debere conjungi. Rex Saul in angustia politus, dixit armigero; Sta super me, interfice me, quia tenent me angustia. Hebræus legit; quia tenent me coronæ; quasi angustia, & corona sint idem. Hoc apprime intelligebat Vespasianus Imperator, qui rogatus à medicis, ut pro salute recuperanda tantillum ab audientibus abstineret; An nescitis, inquit, Imperatorem stantem mori oportere? De Tiberio nonne produnt historiæ, Oratorem quendam in exordio sermonis proclamantem, inter sacras occupationes tuas, mox correxisse his verbis, O quam aptius diceres: inter laboriosas occupationes. Alexander Severus arguit Alexandrum Magnum dicentem, se velle post adeptam monarchiam in pace vitam transigere. Falleris Alexander, quia in Regno non est quies, sed assiduus & improbus labor. Philippus Rex Macedo, rogatus à vetula quadam, ut illam audiret, & dixisset, tunc temporis non habere otium, mox intulit mulier; Noli ergo regnare. En regia dignitas curis plena, quietis vacua, spinis undique circumsepta. Hinc Alphonsus Aragoniæ Rex dicebat: Principem esse jumentis deterioris conditionis; nam ista dum capiunt cibum, non vexantur, at nos etiam inter pocula. Cui rei appositè facit adagium illud, Nec ad aures quidem scalpendas otium est. Huc spectat Salvatoris nostri oraculum; Nescitis quid petatis. Petitis & appetitis præfecturam, & vocatis sedem? quasi in prælatione requies? Quis enim tam mentis inops,

qui cum ex longo itinere fuerit defatigatus, ad requiem captandam gravissimum opus humeris suis superimponat? non minori stultitia notandus, qui cum vitæ hujus laboribus gravatus fuerit, onus prælationis supra dorsum suum imponit, existimans in ipso onere tranquillam mentis quietem sitam esse. Stultus planè nauta, qui relicto portu, in altum vela facit, tranquillitatem quærens; tutò quippe calcantur plana, pericula in edito sunt; nulla præcipitia in vallibus timenda; in excelsis sunt.

*In brevibus nunquam sese probat Æolus undis,*

*Nec capit angustus Boreæ certamina collis.*

Quapropter dicebat Phocion Atheniensis, multò fatius esse humi cubantem, quieto animo esse, quàm perturbatum, in purpureo lecto; sicut enim arbores in montis cacumine positæ, procellis ac ventorum flatibus sunt subiectæ, ita homines in dignitatum fastigio constituti, curarum ventis concutiuntur. Nonne legistis Horatianum illud?

*Sæpius ventis agitur ingens*

*Pinus, & celsæ graviore lapsu*

*Decidunt turres, feriuntque summos*

*Fulmina montes.*

- 4 Reg. 2. Huc appositè facit, quod olim Eliseo dictum fuit; Optima habitatio, sed terra sterilis, & aquæ pessimæ. Foris purpura, sceptrum, thronus, en optima habitatio; sed aquæ pessimæ & terra sterilis, quia omnia periculis plena, & ubique luctus, & mortis imago. Hoc fortasse volebat innuere dux ille egregius, qui pro stemmate gerebat pharetram sagittis vacuum; cum inscriptione, Hærent sub corde sagittæ. hoc est, intus dolor, intus angor, intus spinæ & timores. Proinde apud Romanos hoc erat in more positum, ut triumphum agentes



agentes, tintinnabula, & verbera ante pompam triumphi gestarent; insinuare volentes eam felicitatem non esse doloris expertem. Quocirca verum scopum videntur attigisse, qui diadema regium spinosum vocitarunt; spina enim cuspidem habet adeo exiguam, ut visu foris vix percipi queat; at intus vehementer pungit. In culmine dignitatis aliquis foris emicat radius honoris, non inficior, at tantis tamen adversantium molibus obruitur, ut tam modica mella, tanto felle emi non debeant. Radius aliquis splendet gloriæ, sed tantis illa venenis intingitur, ut nemo prudens tanto natantia toxico fercula amaverit. Imperare magnum & dulce videtur, sed tanto absinthio miscentur hæc dulcia, ut caruisse dulcius sit. magnitudinis comes veneratio, sed tantis invidentium jaculis undequaque pungitur, ut insanix quoddam genus sit, Imperium amare. Quod probe intelligebat Bias Prienenfis: nam appellatus à Cræso Rege irrisorie, & minaciter; respondit: I, ô Cræse, cæpas ede. ac si diceret: ô miser, quid intumescis? nescis te hoc ipso, quod Rex es, ob infinitas Regnorum infelicitates, ab omnibus atque inprimis à te ipso complorandum? Cæpas qui edunt, lachrymantur; qui regunt, si bene sapiunt, lachrymas eliciunt. Unde non ab re exclamabat Gregorius Nazianzenus, vitam principantium considerans, tot laboribus & curis obnoxiam; Re vera mihi videtur ars artium, & disciplina disciplinarum regere hominem, qui inter omnes animantes, & moribus varius, & voluntate diversus, & quod periculosius est, insensus semper eis, qui sibi præsumunt, qui die noctuque insidias meditantur, fraudes molitur, novisque rebus studet. Leo in leonem non sævit, nec pardus in pardum;

Philo li.  
de Prob.  
liberta-  
te.

Franc.  
Sen. de  
Regno,  
& re-  
pub. li. 1.

Arist.  
lib. 1  
pol. c. 22.

Dan. c. 6.

Dan. c. 5.

sed quælibet animalia in suo genere congregantur, ipsaque dimicant communibus viribus contra dissimilia; homini verò insidiæ semper, & ab homine plurima mala, adeò ut solus ex omnibus animalibus in suo genere tutus esse non possit. Verum sanè est illud Aristotelis oraculum, ut optimum animalium est homo, cum ratione regitur, ita deterrimum, cum rationi non obsequitur. Tunc enim rabies hominis omnium ferarum excedit sævitiam. Nam feræ beneficiis aliquando mansuescunt, at homines, sunt leopardis crudeliore, quibus cum benefeceris, peiores fiunt. Quod ex oraculis divinis non erit difficile comprobare. Daniel Propheta cum ad satraparum petitionem, in lacum leonum coniectus esset, Darius Rex credens mitiores esse leones, quàm suos, ingenti saxo locum munivit, regioque sigillo obsignavit. Sed quid agis ô Rex? virum sanctum leonibus objicis, & ab hominibus caves? Nunquid homo crudelior leone? ita plane. Proinde prudenter egit, sciebat namque Rex nullum animal homine crudelius, qui nec agnatis parcat, modo appetitui satisfaciât, & optatum finem consequatur; homo homini lupus, dixit quispiam, sed multò aptius dixisset; homo homini homo. Huc spectat appositè insignis locus ille Danielis, ubi volens Deus ostendere Regi Chaldæo supplicii signum, quo eum affecturus erat, manum hominis scribentis immisit. Scripsit autem mortis suæ sententiam, & Regni ad Persas translationem sub ænigmate, Manè, Thecel, Phares. Quid? ad insinuandam mortis sententiam manus hominis ostenditur lenis, & levis? nonne magis opportunum, manum leonis, aut ursi porrigere, ut sub his ferarum manibus majorem incuteret timorem? manum hominis ostendit, quoniam non est manus super

super manum hominis irati, nec ulla rabies ita formidanda, sicut hominis ad sævitiam propensi. mirabile dictu. Vir bellator egregius, qui non in præliorum æstu, non inter pugnae clangores, non in urforum aprorumque venatione palluerat, ad solum manus humanæ conspectum expavescens, & exanguis in terram concidit. Hoc apprime intelligebat Serenissimus David. Proinde, cùm Deus trium plagarum optionem illi dedisset, pestem nimirum, famem, & bellum; pestem potius elegit, dicens, Coarctor nimis, sed melius est mihi, quod incidam in manus Domini, quoniam multæ sunt misericordiæ ejus. Sciebat quidem Rex, satius esse in Dei, quàm in hominum manus incidere. Hinc fit, ut magna res sit, & periculosa, hominibus imperare, cùm homo sit in custodem & rectorem suum ingrattissimus. Vetus est enim adagium, Lupum auri-  
 bus tenet, qui imperium agit. Propterea mille præconiis ad cælum extollendus, qui cum aliis imperat, meminerit se Principem esse, & ideo invidiæ, calumniisque multorum obnoxium, in quem cives omnes ora obvertunt, linguasque in Principes sic vibrant, ut trilingues serpentes esse videantur, & in ipsos omnia invidiæ spicula dirigunt, tanquam sagittarii in scopum intendent-  
 tes. Jure quidem Princeps potest exclamare, Positus sum, quasi signum ad sagittam. In maximis enim rebus administrandis, difficillimum factu omnino est, omnibus placere posse. nec Jupiter quidem omnibus placet, ait adagium. Siquidem cùm tot sint sententiæ, quot sunt capita, quid est difficilius, quàm multis placere? cùm vix quos invenias, quibus idem placeat. Fieri non potest, publica agentem omnibus placere.

2 Reg.  
24.

Perfius  
satyra 5.

*Mille hominum species, & rerum discolor usus,  
Velle suum cuique est, nec voto vivitur uno.*

Apoc.c.  
19.

Princeps itaque qui aliis imperat, sibi metuat, multos timeat, ab omnibus caveat, neminem negligat, sibi que persuadeat, non ad commoda & delicias, sed ad labores & pericula, ad summa fastigia elevatum esse. Hinc Joannes de supremo Rege loquens, divinis monumentis tradit, nomen ejus regium scriptum in femore, Rex regum, & Dominus dominantium. Sed cur in femore titulum regium habebat inscriptum? Nonne aptius esset in fronte, vel in pectore? jure quidem in femore, unde gladius pendet, ut ostendatur, quod quando Rex ad Regni apicem conscendit, tunc ad prælia se accingit; imò tot periculis anguntur imperantes, tanta curarum mole opprimuntur, ut nonnulli talem vitam sibi acerbam & odiosam putaverint. Julii Cæsaris testimonium proferam; is enim amicis obsecrantibus, ut in quodam imminenti periculo satellitum præsidio corpus suum tueretur, & ultrò ad eam rem operam suam pollicentibus, id omnino recusavit, affirmans, multò satius esse semel mori, quàm jugi timore, assidueque animi anxietate torqueri.

*Regia quàm dira lacerent diademata cure,*

*Appenso gladio barbarus ille docet.*

*Elogiis multis meritò tollendus ad astra*

*Qui pro lactucis, aurea fersa dedit.*

## CAPUT VI.

*Vigilantia Principis populorum salus.*

UORSUM apud Ægyptios pro symbolo vigilantiae, leo animalium imperator? quia populis invigilare, præcipuum Regis munus. Leo enim Græcè, Rex Latinè dicitur. & jure quidem. Nam leo Arist. l. de somno & vig. quieti non multum vacat, & si aliquando dormit, oculis tamen apertis. proinde in templorum foribus solent frequenter insculpi. ut pulchre & eleganter describit Alciatus in suis Emblematibus,

*Est leo, sed custos, oculis quia dormit apertis,*

*Templorum idcirco ponitur ante fores.*

Ita quoque Princeps pro summa rei ritè administranda semper invigilare debet. Quod præclaro divinæ Scripturæ testimonio perspicuè declaratur; Vitam enim Principis diem appellare consuevit, nulla noctis habita mentione. ita præscribitur in regum annalibus, Nonne hæc scripta sunt in libro sermonum dierum regum Juda? Deum immortalem, quid hoc? Nonne & Principibus noctes concedendæ? an ipsis solis interdictur, post laboriosas occupationes optata quiete frui? Cur ergo dierum & non noctium mentionem facit? Divina Scriptura nomine dierum comprehendit & noctem & diem simul; duplex namque est acceptio diei, ut egregiè scribit Florianus Nannius ex Canonico Regulari ad Episcopatum assumptus. una est, secundum quam dicimus diem naturalem, qui habet viginti quatuor

Florianus  
Nannius Bo-  
non. cat.  
arg. in  
Gen.

tuor horas, sic sumitur illud Gen. 1, Factum est vespere & mane dies unus; altera est secundum quam dicimus diem artificialem, tempus nimirum, quo sol nostrum hemisphaerium illuminat, & hoc modo sumitur, quando dicitur; Tenebras appellavit noctem, & lucem diem. Ego autem diccrem, si licet proferre quod sentio, nullam noctis mentionem factam fuisse in annalibus Regum, ut detur intelligi, quod Regis vita non quieti, aut somno, sed vigilantiae & labori debet esse mancipata. Pulchre Poëta,

*Excubias grus sola gerit, pars cetera dormit*

*Tuta, nec infido sperat ab hoste dolos.*

*Grus notat hæc Regem vigilantem pro grege, qui si*

*Dormiat, incantum vastat ovile lupus.*

Hinc doctus Homerus eleganter cecinit.

*Non decet integram noctem dormire regentem*

*Imperio populos, & agentem pectore curas.*

Vigilantiam in Principe maximè necessariam, præclaro exemplo docuit Alexander Magnus. Hic enim cum ad quiescendum se componeret, ne à somno deciperetur, extento brachio extra cubile dormiebat manu tenens globum quendam argenteum supposita ænea pelvi, eo consilio, ut cum nervorum rigorem sopor laxasset, lapsæ pilæ tinnitus somnum abrumperet, & ejus sonitu excitaretur. Sciebat namque vir egregius, Principi proprium, & præcipuum munus, invigilare. Quippe quod in corpore politico cordis gerat vices. Unde populus optimo jure illud sibi posset accommodare; Ego dormio, & cor meum vigilat. Juliani Imperatoris cognomento Apostatæ, mira laudatur vigilantia; scribit enim Amianus, quod noctes dividebat ad officia tripartita, quietis, publicæ rei, & Musarum. Idem fecit Alexander, sed multò hic fortius. ille  
namque

namque ænea concha supposita , brachio extra lectum portento , pilam tenebat argenteam , cujus lapsu evigilabat: hic verò absque instrumento, quoties voluit , evigilavit , & nocte dimidiata exurgebat. Noverat enim vir iste, hoc solo titulo laudandus , quod sicuti corpori somno torpenti , assiduo motu cor assistit , ita Princeps , ut communi commo consulat , non modò diurnas , sed nocturnas & perpetuas excubias agere debet : En Princeps cor populi , quo dormiente, vigilat; quo quiescente , sollicitat ; quo otiante , laborat ; adeò ut omnium domos illius vigilantia defendat; omnium otium illius labor, omnium delitias illius industria, omnium vacationem illius occupatio , & denique omnium actiones illius aspectus, quasi struthio, qui ova aspiciendo fovet , suoque intuitu Foetum ab ovishaurit ; quæ si intueri desinat , inania prorsus efficiuntur , & vacua ; cui appositè illud academicum , Ex visu salus. Nam sicuti struthio non incubando, sed intuendo animat ova, ita Principis oculi ad virtutes populum instruunt. hinc illius laudatur responsum multo sale aspersum. Cùm enim Rex interrogasset alendis equis præfectum, quodnam redderet equum pinguem, & celeriter? Oculi domini , respondit. sentiens equum optimè curari , si dominus frequenter adsit. ita planè Principum aspectus, subditis ne pereant, perquam necessarius. Huc spectant verba illa, Manè surgamus ad vineas , videamus si vinea nostra floruit ; quia qui vineæ præpositus est, summo manè debet surgere, somno non indulgens, sæpius mente revolvens, pastorem esse gregi , quod anima corpori. Hinc in Actis Apostolorum habemus , plurimos infirmos umbra Petri sanatos. Quorsum hoc ? ut inde manifestum fieret, quantum, vel sola pastoris umbra, Ecclesiæ

Sen.lib.  
de con-  
fil. c. 26.

Cant. 7.

A& A-  
post. c. 5.

clesiæ adferat emolumentum. Cur Salvator noster  
 Math. c. 8. permisit ipso in navi dormiente, tempestatem in-  
 surgere, ita ut navis operiretur fluctibus, ipso au-  
 tem experrecto mox sedari? ut discant pastores,  
 Apoc. c. 1. ipsis letargo oppressis, tempestates in Ecclesia  
 exoriri, easdem tamen sopiri, cum vigilias agunt  
 super gregem. Quid est quod Ioannes scribit, se  
 vidisse Angelum in medio candelabrorum aureo-  
 rum? ut doceret pastores in medio Ecclesiarum  
 Conc. Trid. de semper hære; ut Concilii Tridentini Patres  
 reform. apertissimo canone decrevere; sciebant enim ex  
 sess. 6. c. 1. pastoris absentia plurima damna evenire gregi.  
 Luna inter planetas minima quidem, sed quia  
 non procul distat, magis influit. Præsules quam-  
 vis minus docti, sæpius tamen visitantes gregem,  
 ovibus suis utiliores sunt, quam eruditi docto-  
 res in aulis versantes, procul ab ovibus errantes.  
 Quare in sacris litteris Præsules appellantur no-  
 Math. c. 5. mine salis? Sal non condit nisi præsens, & ex  
 Prælati præsentia multa commoda eveniunt Ec-  
 clesiæ, ex absentia plurima emergunt mala. Et  
 quæ mala non acciderunt, dum Moyses ab uni-  
 versa populi multitudine fuit separatus? statim  
 filii Israël vitulos aureos conflare, eisdem victi-  
 mas immolare, & proni omnes adorare cœperunt,  
 quamvis etiam Aaronem virum summa integri-  
 tate ornatum præsentem haberent, nullo ser-  
 mone explicari potest, quot damna in pastorum  
 absentia contingere soleant, etiam vigilantissi-  
 mis vicepastoribus constitutis. Damasus Roma-  
 nus Pontifex, de pastoribus sermonem habens,  
 qui substitutis vicegerentibus ab ecclesiis suis ab-  
 sunt, scitè admodum scripsit, Isti videntur mihi  
 similes matronis, quæ statim ut pariunt, infantes  
 suos nutricibus exponunt educandos, ut suam ci-  
 tius



tius valeant explere libidinem. at. istorum culpa , quot mala emergunt, animæ negliguntur, oves pereunt, morbi crescunt, schismata prodeunt, ecclesiæ destruuntur , sacerdotes vitiantur , & tandem innumera mala proveniunt. Non ita, non ita , docuit cælestis pastor, nam ipse ovem perditam diligenter quæsit, ipse invenit, ipse propriis humeris reportavit , nosque id ipsum facere perdocuit. hinc est, quod præfecturam administrantes, solent in manibus annulos gestare , ut innuant , se in munere obeundo tanquam sponso fideles esse debere. Ob quatuor præcipue causas annuli aurei solent deferri ; primò ad decorem, & nobilitatis insignem ; sic Divus Jacobus ait : Si introierit in conventum vestrum vir aureum anulum habens in veste candida, introierit autem & pauper in habitu sordido, intenditis in eum , qui indutus est veste præclara. secundo ob regiam magnificentiam, sic in libro Macchabæorum Antiochus Rex cum morti proximus esset , vocavit Philippum unum de amicis suis , præposuit illum super universum regnum, dedit ei diadema, stolam suam, & anulum. Deferuntur insuper annuli ad contestandam insignem sapientiam , proinde inolevit usus , ut doctoratus laurea insigniti, anulum in digitis deferant aureum. demum deferuntur ad fidelitatem protestandam , sic deferri solent à sponsis, pro mutua fide servanda : appposito titulo , Hos junxit amor. Hancque ob causam traduntur Episcopis in eorum consecratione , quando Ecclesiis desponsantur, quasi dicat Romana sedes, Sicut sponsi munus est, uxorem non dimittere, ita Prælatus animarum sponsus nunquam abesse debet, sed fideliter adesse, præesse, & prodesse. Idcirco Divus Petrus Apostolorum Princeps hortans pastores ad vigilantiam,

lantiam, dicebat: Facti forma gregis, pascite qui in vobis est gregem Dei. quid hinc? ut doceret, quod sicut materia sine forma nequit consistere, ita nec grex absque ductore. imò Doctor Angelicus unà cum pluribus, hisque probatissimis viris, arbitratur Deum non posse facere etiam de potentia absoluta, ut materia sit sine omni forma. ratio est, quoniam nihil implicans contradictionem subest divinæ potentiæ, at materiam esse sine omni forma actualiter in rerum natura, implicat contradictionem. Nam omne quod est actu, vel est ipse actus, vel est potentia participans actum. esse actum repugnat rationi materiæ, quæ secundum propriam rationem, est ens in potentia. participare actum repugnat materiæ sine forma, quoniam actus participatus à materia, nihil aliud est quàm forma.

D. Tho.  
quodlib.  
3. q. 1.

Flor.  
Nam. in  
sua car.  
arg.

Scio tamen Doctorem Subtilem opinari, Deum posse facere materiam sine omni forma, hac autem ratione nititur: si mediante forma Deus conservat materiam in esse, quare non poterit conservare sine illa? Stante Philosophorum placito, quidquid potest Deus mediante causa secunda, potest & immediatè, sine illa. Magis tamen placet opinio D. Thomæ, utpote veritati, & præsentì instituto magis consona; illa autem propositio, quam pro se adducit Subtilis, non est vera, nisi in genere causæ efficientis, fallit verò in genere causæ materialis & formalis; non enim potest facere album, sine albedine, nec animal sine corpore; & ratio in promptu est, quoniam materia & forma sunt intrinsecæ rebus, ideo ab ipsis excludi non possunt; at agens semper est extrinsecum, propter quod virtute divina à causalitate rei, absque contradictione excludi potest. Cùm itaque juxta opinionem Divi Thomæ communiter receptam, materia non

non subsistat sine forma, & prælatus sit forma gregis, necesse est, ut dicamus, gregem non posse subsistere sine pastore præsentia. Proinde dicebat Apostolus; Attendite vobis & universo gregi, in quo Spiritus sanctus posuit vos regere Ecclesiam Dei. Hoc autem implere nequaquam possunt, inquit sacrum Concilium, si greges sibi commissos deferant, & eorum curæ non incumbant. Hinc per os Salomonis Dominus dixit: Agnosce vultum pe-  
 coris tui. at quomodo cognoscet pastor gregem suum, nisi oculis suis cernat? suis autem oculis cernere nequit, nisi præsens sit. Et ideo Divus Athanasius comparat pastorem animæ, gregem corpori: Sciant, inquit, pastorem esse gregi, quod anima corpori, at quis ignorat corpus dissolvi sine anima comite? ita sine pastore præsentia dissipabitur ovis. Nec objicias Salvatoris oraculum; Si vos persecuti fuerint in una civitate, fugite in aliam. Quoniam egregiè nodum solvit Augustinus in suis epistolis, dicens: Fas est aliquando Episcopis fugere, & deferere gregem, quando ipse Episcopus personaliter à persecutoribus quæritur: tunc enim non fugit mercenarii more, sed sibi consulens fugit, commissâ aliis Ecclesiâ, in quos persecutoris rabies non fremit. Porro in persecutione non personali simpliciter, sed omnium ovium communiter, non debent lupis oves relinquere pastores, ne periclitentur, religionis causâ, & totum ruat ovile. Pülchre Aristoteles in Metaphysicis, absentia naucleri causa est periclitationis navis. sic in re nostra dicendum, Absentia pastore causa est, sine qua non, perditionis gregis. Prudens enim nauclerus, ad clavum sedens, futuras tempestates prævidet, & ne obruant, providet. Sic Ulysses, atque Argus, Regum symbola  
 H præcis

Gen c.  
31.

priscis fuere, quorum ille multifcius ab Homero appellatur, hic verò multioculus figuratur. Cur Deus pastores in duces populorum antiquitus præficiebat? Moyſes enim tunc dux populi cooptatus, quando paſcebat gregem in deſerto. Jacob non prius ad ſummi regiminis apicem evectus fuit, quàm in munere paſtorali jamdiu infudaverit, ipſo atteſtante, Die noctuque æſtu urgebar & gelu, fugiebatque ſomnus ab oculis meis. David tunc in Regem conſtitutus, cùm patris fui gregem cuſtodiebat. Sed quid? nonne Plato ille divinus more Homeroico loquens; Regem in optima politia dominantem, vocabat humani generis paſtorem? cur autem paſtorum nomen ad magnos reges tranſlatum? ut omnibus eſſet exploratum, tales erga populos debere eſſe Reges, quales paſtores erga greges. Paſtor gregem paſcit, nec ab illo diſcedit, Rex populum ſublevare debet, & præſens aſſeſſe. Cura paſtoralis die noctuque in cuſtodiebat gregibus intenta, & vita Principis ad vigilandum, non ad quieſcendum inſtituta. Quod optimè noverat Auguſtus, proinde equite Romano deſuncto, cùm res illius auſtioni ſubjicerentur, ut ex pecunia creditoribus ſatiſfieret: compertum enim fuit, tantum habuiſſe æris alieni, ut ſummam ducenties nummum excederet, tunc Auguſtus juſſit emi culcitram illius cubicularem, & cunctis mirantibus, hanc rationem reddidit, habenda eſt ad ſomnum conciliandum culcitra illa, in qua ille tanto ære alieno obſtriſtus, ſomnum capere potuit. Nam Auguſtus ob ingentes curas, maximam noctis partem sæpe ducebat inſomnem. Cur Homerus Agamemnonem, cùm cæteri dormiant, conſtituit vigilantem? ſic enim caneſcit.

Macrob.  
lib. 2. Sa-  
turn. c. 4.

At

*At reliqui Danaum procures noctem usque per omnem  
Dormibant, placido correpti membra sopore :*

*At non Atridem pastorem Agamemnona plebis  
Sonnus habet dulcis, versantem pectore multa.*

Quia Principatus tunc bonis omnibus abundat, cum inops est otii. Cæsaris accedit autoritas, cui nulla hora fuit labore & studio vacua; quique, ad eò tenax fuit temporis, ut duobus pluribusve scribis epistolas alienissimi argumenti eodem tempore frequenter dictaret. Nec minus fuit vigilantiae studiosus Pericles clarissimus Athenarum Princeps. Is enim quoties vestem prætextatam magistratui propriam induebat, eam aspiciens, his verbis seipsum alloquebatur, Attende tibi Pericles, liberis imperas, Græcis imperas, Atheniensibus imperas. Liberi sunt, proinde non mancipiorum more regendi sunt. Græci sunt, turbulenti, seditiosi, reluctantes. Athenienses sunt, omnium mortalium ingratisissimi. Quapropter tibi prospice, ne capiti tuo periculum accedat. Noverat quippe vir egregius, respublicas summa vigilantia tractandas, & ideo ad eas minime accedendum, quasi otii fallendi gratiâ, ac si legisset Platonem, cuius aurea verba sunt hæc: Principes, qui noctu vigilant in civitatibus, malis civibus sunt formidabiles pariter & hostibus. Huc spectat opportunè, quod Ricardus Brixius memoriæ prodidit. Fabius Cunctator, inter Romanos Duces maximus, tit ostenderet, quas virtutum dotes in bono, ac strenuo duce requireret, in annulo suo gemmam gestavit, cui hæc præcipue insculpta erant: Caput equi, facies hominis barbati, caput galli, & pedes gruis. Hæc simul annexa, Chimæram quandam constituere videntur; at si bene discutiantur, ex istis simul collectis, plurimarum virtutum consurgit

Platarc.  
in poli-  
tica.

Plato li.  
7 de le-  
gib.

hieroglyphicum, Imperatori mirificè conveniens. Caput equinum, strenuitatem innuit; vultus barbatus, prudentiam designat; caput galli, & pedes gruis, vigilantiam insinuant in populis regendis adhibendam. Cui sententiæ subscribit divinus Plato, Marfilio Ficino interprete, his verbis, Somnus multus, nec corporibus, nec animis, neque rebus gerendis conducit. nemo quidem dum dormit, alicujus pretii est, non magis, quàm si non viveret; quare quicumque vivere, & sapere cupit maximè, longo tempore vigilet, sola sanitatis commoditate servata. Ad hanc verò, non multo opus est somno si bene assueveris. Consentit & Ovidius hoc carmine.

*Infelix, tota quicumque quiescere nocte*

*Sustinet, & somnos premia magna vocat.*

*Stulte quid est somnus, gelide nisi mortis imago?*

*Longa quiescendi tempora fata dabunt.*

Plutarchus in libello adversus ducem imperitum, narrat, quoddam non indignum memoratu, huic rei valde accommodatum; nimirum Regi Persarum hunc fuisse morem, ut semper unum quempiam haberet cubicularium, cui hoc munus erat demandatum, ut mane regium thalamum ingressus, his verbis illum excitaret, Surge Rex, somnum ab oculis excute, negotia populi cura. Perinde ac si dixisset, maximè Principibus convenit vigilantia, utpote, qui tantam negotiorum molem sustinent humeris. Unde Virgilius Æneam ducem aliis dormientibus vigilantem facit, & fingit cogitabundum,

*At pius Æneas per noctem plurima volvens.*

Qui præest, debet assiduè orare, cum Eliseo, Oro, ut fiat in me duplex spiritus tuus, duplici namque spiritu indiget, qui sibi, & aliis invigilare debet. De Epaminonda Thebanorum duce, nonne produnt

dunt historiæ, facinus insigne huic rei valde appositum? Cùm Thebani cives festis quibusdam diebus, licentius voluptatibus fruerentur; ille solus vigil, ac sobrius arma lustrabat, & urbis obambulabat mœnia. rogatus cur id faceret? respondit, Se vigilare, quò reliquis liceret dormire. Rem planè notatu dignam, observat magnus Theologus Robertus Olchot, nimirum, cur Christus in tristi passionis nocte, cùm Petrum in orto somno sepultum cerneret, & ad eum excitandum accederet, honorabile illud Petri nomen subticuit, quod illi imposuerat, dum Ecclesiæ caput constitueret, & alio nomine compellavit? Simon dormis? Quia Principis & custodis Marth. c. 14. nomine indignus est, qui somno indulget. Quod non ignorans Philippus Macædonum Rex, seipsum excusavit, quasi censurâ esset dignus, quod tempore pugnæ, somno vacasset, experrectus enim, Tuto, inquit, dormivi. nam vigilavit Antipater; subindicans, non esse regium indulgere somno, in bello præsertim, sed tamen interdum absq; periculo fieri, si Rex habeat fidum, ac vigilantem Præfectum; ita cum laude amici suam excusavit somnolentiam, simulque docuit præfecturam administrantes vigilantes esse debere, & fideles. Sunt enim sorores, quæ mutuis amplexibus se prosequuntur. Hinc pro insigni, canis & anser. adjuncta nota, Neuter solus. Siquidem vigilantia, & fidelitas debent esse comites individuae, quarum una sine altera parum, ambæ simul plurimum profunt; altera non sufficit. Interrogatus olim Iphicrates Plur. in apoph. Regum. Atheniensium dux, cur tempore pacis excubias ageret, aciem explicaret, arma expediret, & milites paratos haberet, non secus, ac si hostis à tergo instaret, & res in summo discrimine versaretur;

Hierem.  
c. I.

respondit, Quia timeo ne obruar incautus, & tunc dicere cogar, Non putabam, quæ vox solet esse imprudentis, non hominis cordati, & publicæ salutis curam gerentis. Hinc divina oracula sceptrum Regium appellabant virgam, virgam vigilantem. Quid vides Hieremia? ait Dominus. Virgam vigilantem ego video, respondit Vates. Ubi advertendum, quod textus Hebræus legit; virgam amygdalinam ego video. Sed cur virgam, præcipuè amygdalinam? quia, ut scribit Procopius, cervicali dormientis supposita, quamprimum somnum abrumpt. At quid virga somni inimica? symbolum præfulis, qui semper invigilare debet pro communi populi salute. Hac ducti ratione Ægyptii ad exprimendum Principem, sceptrum quoddam pingebant; oculum apertum desuper habens, quod & virgam vigilantem appellabant. Sed quorsum hoc? ut vigilantiam Principis, nunquam deficientem insinuarent, quem oporteret esse Argum, centum oculos habentem; & hoc fortasse non sufficeret, de quo eleganter Poëta;

Ovid. li.  
1. Metam.

*Centum luminibus cinctum caput Argus habebat,  
Inde suis vicibus capiebant bina quietem,  
Cætera servabant, atque in statione manebant.  
Constiterat quocunque loco spectabat ad Io,  
Ante oculos Io, quamvis aversus habebat.*

Sed quare Argus à Junone ad custodiam constitutus? quia omni ex parte oculatus. Cur Draco adhibitus est custos pomis Hesperidum, & aureo velleri apud Colchos? quia solus inter cætera animalia non dormit, assidueque vigilat, ita Princeps, quoniam custos populi à Deo destinatus est, proinde plenus oculis, die noctuque invigilare debet. Cujus præclarum insigne apud Ægyptios, Oculus in scepro.

Excus-



*Excubat assidue pastor, custodia tuta,  
 Omnia prospiciens, ut bene pascat oves.  
 Quid faciet Princeps, orbem qui Atlantis ad instar  
 Sustinet, ut felix aurea sceptrā regat?  
 Invigilet populis, vigili vigilantior Argo,  
 Pascua grata paret, gaudia vera serat.*

## CAPUT VII.

*Anima regiminis, silentium Principis.*



UREUM sanè oraculum, aureis  
 litteris præ foribus inscribendum,  
 Fieri quid debeat, cum multis tra- Veget.  
de re  
milit.  
lib. 3.  
 ctato; quid facturus sis, cum paucif-  
 simis, vel potius ipse tecum. Quod  
 enim intendis facere, paucorum fi-

dei committendum. Siquidem, nihil est diffi-  
 cilius, quàm secreta tegere silentio, tanta est linguæ  
 volubilis incontinentia, Sapiente sic acclamante, Eccle. c. 6.  
 Omnis labor hominis in ore ejus. Quod bene ad-  
 vertens Philippides comicus Poëta, interpellatus  
 à Lyfimacho Rege, ut aliquid peteret; ô Rex, ait,  
 Aliud à te non peto, nisi ut reconditi consilii tui  
 nunquam me facias conscium. Proinde non omni-  
 bus passim animi nostri arcana aperienda sunt.

*Quod semel emissis, nunquam est revocabile verbum.*

*Cur, ubi, cui, quando, quidve loquere, vide.*

Arbores, quarum radices sunt nudæ, citò are-  
 scunt, ac pereunt; is quoque nescit vivere, cujus  
 cor temere omnibus patet. Prudentis Imperii re-  
 gula præcipua, est silentium, quo qui destituitur,  
 tanquam nauclerus gubernaculo destitutus, vento,  
 ac fluctibus ludibrium fiet, & qui non servata op-  
 portunitate totum spiritum profert, facilè deci-

Valer. li.  
2, c. 1.

Q. Cur-  
tius li. 4.

pietur, imò turpiter còrruet: nescit enim diu regnare, qui nescit res gerendas silentio involve-  
re. Quanti autem ponderis sit, consilia recondita silentio premere, Romanorum testimonio appri-  
me comprobatur. Siquidem cautum erat apud il-  
los, ne ullus Senator arcana consilia Patrum enun-  
ciaret. quam legem ita exactè observabant, ut non unum, sed neminem audisse crederes, quod tam multorum auribus fuerat commissum. Hoc idem apud Persas magna cum laude observaba-  
tur. Cùm enim Alexander, quam regionem Da-  
rius petiisset, omni cura vestigaret, nunquam ta-  
men explorare potuit, more quodam Persarum,  
arcana Regum mirà celantium fide. non metus,  
non spes elicit vocem, qua prodantur occulta.  
Lingua apud eos gravius castigatur, quam ullum probum; ob hanc causam Alexander omnium,  
quæ apud hostem agebantur; ignarus. Hoc ipsum apud Ægyptios docuit olim Harpocratis imago,  
quæ digito labiis impresso, silentii fidem com-  
mendabat. sed quid? Nonne etiam apud Philo-  
sophos magna fuit semper silentii veneratio? Si-  
monides, cùm servaret modestiam silendo, po-  
tius, quam dicendo, interrogatus cur id faceret?  
Nunquam, ait, tacuisse me pœnituit, pœnituit sæ-  
pe esse locutum. Solon ex sapientibus unus inter  
alios tacens, interrogatus, an id faceret ex stulti-  
tia, an ex sermonis inopia? respondit; At stultus  
tacere non potest: imò quidam voce liberiori di-  
xit; Hic, vel stultus, vel mutus est; cui Philoso-  
phus respondit, & quidem acutè, Non utique  
mutus sum, cùm loquar; nec stultus, cùm tacue-  
rim, quia stultus tacere non potest. Socrates quæ-  
renti, quomodo quis hominibus placere posset?  
Si gesserit, inquit, optima, & locutus fuerit pauca.  
Zeno

Zeno dictitare solebat, Cur binas habemus aures, & os unicum? ut plurima audiamus, loquamur paucissima. Eloquii Romani pater Catonem suum laudibus extollens, hoc illi in primis adscripsit elogium: Nunquam verbum emisit, quod emissum doleret. Pythagoras nunquam adduci potuit, ut pisces comederet, quod naturâ muti essent, & proinde silentii symbolum, quod divinum quoddam esse arbitrabatur, tanti faciebat venerandam silentii majestatem. Periander discipulum monens dicebat, Audito multa, loquere pauca. Quod sedulò observabat Thomas Aquinas, qui mente multa volvebat, ex ore pauca promebat; non ut canalis, qui statim reddit, quod accipit, sed instar conchæ, quæ nihil effundit, nisi plena fuerit: hinc cum à sodalibus bos mutus vocaretur, Albertus Magnus ejus tunc Sur. lib. vit. tom. magister, rem tacitus considerans, dixit: Bos iste mutus, talem mox edet mugitum, ut ipsius sonum 2. totus admiraturus sit mundus. Sed quid pluribus immoramur? Nonne apud præstantissimos etiam Principes magna semper fuit silentii observatio? Tiberius Cæsar, cum aliquando apud eum quispiam percunctaretur, quid causæ esset, quod sua consilia non committeret iis, quibus tutò fidere poterat, respondit; Aut nulli, aut paucis cognitum debet esse consilium Principis. Hoc etiam probè novit Metellus Macedonicus; Bruson. lib. 6, c. 10. is enim Tribuno percunctanti, quid postero die esset facturus? tunc ille, Si ipsam vestem scirem mentis meæ consciam, eam continuo cremarem: quippe, qui sciret Principis munus esse, plurima cogitare, summa operari, minimum autem loqui. Antigonus Rex Macedonum Philippo filio multis præsentibus percunctanti, Quando castra

H 5 move-

Q. Cur-  
tius li. 4.

Brafon.  
li. 6, c. 6.

Eccl. c. 9.

Val.  
Max. de  
discipl.  
milit.

movebimus? Quid, inquit Rex; num metuis, ne solustubam non audias? innueré volens, consilia Principum silentio tegenda. Perinde ac si diceret Rex prudentissimus, res magnæ, ô fili, sustineri non possunt ab eo, cui tacere grave est. Non enim secreta Regni detegenda, nisi prout ratio temporis expostulat: divino sic attestante oraculo, Tempus loquendi, tempus tacendi. Propterea Isocrates cuidam loquaculo erudiri volenti, sic respondit; Libenter operam dabo, sed duplicem mercedem mihi dari posco, alteram, ut loqui; alteram, ut tacere discas. Innuebat quippe Philosophus, non minoris esse artis, bene tacere, quam bene loqui. Hinc regia Ranutii Farnesii ducis Pythagoricum Gymnasium vocitabatur; quia in ejus aula cuncta sub silentio servabantur. hoc idem quoque servatur in curia supremi Regis. Quis unquam hominum novit qua hora moriturus? ratio divini status sic exigit, ne ignavia torpeamus. diceret forte lascivus, Fruamur voluptatibus usque ad tempus præscriptum, deinceps resipiscam. at nescit homo finem suum, ut simus semper parati. Quis unquam novit certitudine fidei, cui non potest subesse falsum, se in gratia Dei constitutum? Nescit homo utrum amore vel odio dignus sit, sed omnia in futurum reservantur incerta. hoc arcanum sacro silentio tegit divina Majestas, quia sic exigit ordo status, ne turpiter deficiamus, sed fortiter pugnando proficiamus, & per bona opera certam faciamus vocationem nostram. Silentium quippe, est rerum gerendarum clavis aurea, in Regni præsertim administratione, & potissimum in re militari; omnis enim error emendationem recipit; sed error, qui in bello committitur, emendationem non suscipit; sed errorem Martis statim sequitur

sequitur pœnitentia. Quocirca Rex David orabat: Pone Domine custodiam ori meo: subinde divino auxilio fretus statuit ori frena injicere, ut omnem viam vitiis præcludat; Dixi custodiam vias meas, ut non delinquam in lingua mea. hîc autem non erit absonum referre ex Cassiodoro, sequentem hanc historiam sanè egregiam. Pambus cum sine litteris esset, accessit ad quendam, ut edisceret psalimorum expositionem. qui cum audisset versum illum; Dixi custodiam vias meas, ut non delinquam in lingua mea: ad secundam lectionem accedere noluit, dicens; Si hoc opere implere potuero, hic versus tantummodo mihi sufficiet; cumque doctôr quæreret, cur per sex menses ad se minimè venisset, respondit; quia versum illum adhuc opere non implevi. Postea verò, cùm multos supervixisset annos, à quodam rogatus, an versum didicisset? Quadraginta, & novem, inquit, annis vix eum implere valui, tantæ molis est lubricam linguam cohibere. non tamen Principem facimus, tamquam aliquem Harpocratem, neque ut terminum, in hortis figimus, sed tantum suademus, opportuno tempore loquendum. Proinde David non silentium sibi indixit perpetuum, sed custodiam, ut sapienter docuit Poëta moralis,

*Proximus ille Deo, qui scit ratione tacere.*

Idcirco Theophrastus, cùm vidisset quendam in convivio nunquam loquentem, dixit: Si stultus es, rem facis sapientem; si sapiens, stultam, quia tempore, & loco loquendum. Prudenter tamen, ne lingua animum præcurrat, sed cogitandum prius, quid loquaris, quam lingua prorumpat in verba, ex quibus plerumque plurima emergunt mala. Hinc fit, ut nihil Principis dignitati sit magis con-

Psal. 38.  
Cassiodor. trip. hist. li. 8. c. 1.

Ambr. lib. 1 de offic. c. 2.

sentia-

sentaneum, quàm silentium opportuno tempore servatum,

*Eximia est virtus, præstare silentia rebus:*

*At contrà, gravis est culpa, tacendo loqui.*

Henri-  
cus Far-  
nes. li. I  
de simu-  
lac. reip.

Proinde antiqui, templum consilii subterfaneum esse voluerunt, ut docerent consilia, & arcana Principum, terra obrui, ac sepeliri debere, donec effectum sortiantur. Quorsum enim Aquila apud Romanos; aut Crocodilus apud Ægyptios, Principis hieroglyphicum constituebatur? nimirum, ut docerent, rem prorsus regiam esse silentium, atque agendo, non dicendo, administrari Imperium: illa namque sola inter alites volat sine clangore, hic autem lingua, & voce destituitur; ita Princeps, ac si esset elinguis, nunquam debet Regni secreta detegere, nisi prout ratio dicat, & temporis opportunitas postulaverit. Proinde Plinius duas linguæ venas tribuit, quarum una in cerebrum tendit; altera ad cor deflectit. Quid hinc? ut ostenderet, nil aliud esse loquendum, quàm, quod cor sentiat, neque semper loquendum; sed solum cùm ratio verba postulat, ne sermones nostri temere prolati, insipientiam redeant. Siquidem frequenti experimento comper- tum est, flumina ibi majori silentio profluere, ubi profundiores sinus habent; ubi autem magno fragore, quasi se præcipitantes aquæ defluunt, minor ibi adest aquarum copia, & profunditas; ita prorsus, ubi adest silentii majestas, ibi cordati sensus latet ubertas; sic acclamante sapientissimo Rege: Qui moderatur labia sua, prudentissimus est. Cui appositè accedit vetus illud adagium, apud omnes celebratissimum,

Prov.  
c. 20.

*Verbum prius ad limam, quàm ad linguam,*

In Principe præsertim, quem & aures, & oculi omnium

omnium semper sequuntur, & insequuntur; imò in quem solum, tanquam in solem, solent populi ora convertere, non ut præclara gesta aspicientes elogiis extollant, sed ut nebeculam, licet levissimam, in eo insipientes, despiciant. sic habet insigne academicum, addita nota, Nisi cùm defecerit, non habet inspectorem.

*Vis regnare diu? digito compesce labellum.*

*Hoc prudentis opus. qui tacet, ille sapit.*

*In rebus magnis, magna est doctrina Tacere,*

*Sermo tuus tecum, sic age, tutus eris.*

## CAPUT VIII.

*Continentia Principis, felicitas Regni.*

ULLUM Imperium durabile, ubi regnat Principis intemperantia. Hinc Romanum Imperium exhaustum est Nerone imperante, cuius gula omnia devoravit, maculavit avaritia, fregit ignavia, luxuria cum superbia exanimavit. Quod optimè intelligebat Cato, vir ille insignis. Proinde orans in Senatu verba hæc planè aurea, quasi oracula deprompsit, Nolite existimare majores nostros, armis rempublicam ex parva magnam fecisse; si enim ita esset, multò pulchriorem nos haberemus, quippe, quod armorum & equorum copia major nobis, quam illis, sed alia fuere, quæ illos magnos fecerunt, quæ tamen nobis nulla sunt; domi industria, foris justum imperium, animus in consulendo liber, & potissimum non delicto, neque libidini obnoxius. Eapropter Anacharsis inter barbaros natus, quale malum hoc esset, mente revolvens, statuis, ac ima-

Policr.  
lib. 6. c.  
12.<sup>o</sup>

Aug. de  
civi. Del.  
lib. 5, c.  
12.<sup>a</sup>

imaginibus illius inscripsit, Linguae, ventri, prudendis temperandum. hoc est enim maximum Imperium, imperare sibi; hic est verus principantium triumphus, carnis illecebras expugnare, quas qui contemnit, heroicam animi virtutem demonstrat. Hoc probè noverat Rēx ille inclytus, qui gigantes devicerat, leoni ora discerpserat, fortissimos hostium duces subjugaverat, qui tot triumphorum genere insignis erat, ad unius tamen mulieris intuitum prostermitur. Proinde rubore suffusus, quoties recordabatur, toties infinitis gemitibus omnia replebat, inclamando, Cur timebo in die mala? iniquitas calcanei mei circumdabit me. Scio quidem hujus loci varias esse Patrum explicationes; porrò illam tantum proferam, quæ nostro facit instituto. Quid, quæso, intelligit vates Regius per iniquitatem calcanei? voluptates habitas cum Bersabea; quam iniquitatem calcaneum appellat, nec ineptè; quia secundum medicorum placita, vena quædam à calce prodit, quæ libidinis fomitem excitat. Hinc Poëtæ finxerunt Achillem strenuum ducem, in fortilegis aquis in calce fuisse vulneratum, hoc commento inuuentes, eum qui cæteris in rebus, fortissimum se præbuerat, à sola fortilega, sensus voluptate fuisse prostratum. Fuit quidem Græcus miles providæ matris auxilio aquis stygiis intinctus, quæ membra obdurantes, contra omnia pericula muniebant, sed talum non tetigit aqua, & in talo, à Paride telo occiditur. En strenuus miles invictus ad omnia, libidinis ictibus succubuit, quia amore Polyxenæ inglorius occubuit, quoniam licèt hostes millies superasset, seipsum tamen superare non valuit. Porrò, hoc est verum triumphandi



phandi genus. Quod quidem nec paganos, latuit, siquidem Alexander Macedo oblectationis gratiâ à philosophis inquirens, quodnam maximum esset in rerum natura? varias à variis expositiones accepit, primus dixit, montem Olympum cætera omnia, quæ in mundo sunt, magnitudine superare: secundus autem asseribat aquam esse, cui virtutem ignis extinguendi potestas data esset: tertius verò arbitrabatur solem esse, qui radiis totum orbem illustrat. sed hi omnes à veritate aberrarunt; quartus autem meo iudicio scopum attigit, dicens; Nihil in orbe majus animo magna contemnente, & carnis illecebras conculcante. Propterea Diogenes Alexandro se orbis Dominum venditanti, audacter respondit; Nequaquam, ô Alexander, es dominus, sed servorum meorum es servus: illis enim cupiditatibus, quibus ego impero, tu mancipium es. ecquid turpius, quàm foedæ libidinis mancipium fieri? numquid ille princeps dicendus est, cui leges imponit impudica mulier? numquid ille dominus, qui imperanti mulieri nihil negare potest? numquid ille est liber? cui mulier turpiter imperat? poscit illa? dandum est; vocat? veniendum; ejicit? abeundum; minatur? extimescendum: istum ego non modò servum, sed etiam nequissimum servum appellandum puto, licet clarissimâ familiâ prognatus sit; bonus etiamsi serviat, liber est; malus etiamsi regnet, servus est, nec unius hominis; sed quod gravius est, tot minorum, quot vitiorum. Imperare itaque sibi, maximum imperium est. Nec dissimile, quod eidem Regi scripsit Bracmanus quidam; Quid tibi prodest totius orbis dominum fieri, cum infimæ rei interim servias? inimicos externos subvertis, ut internos foveas. Pulchre Poëta.

Laërt.  
lib. 6.

Ang. li.  
4 d: C.  
vit. Det.

Q. Car-  
tius in  
vita  
Alex.

Fortior

*Fortior est qui se, quàm qui fortissima vincit  
Mænia, nec virtus altius ire potest.*

Multò enim gloriosius est Principi, seipsum vincere, quàm hostes superare, eo quod illud semper sit virtutis, hoc sæpe fortunæ. Hinc dicebat sapientissimus ille inter Reges; Melior est vir patiens viro forti, & qui dominatur animo suo, expugnatore urbium. Fortior David, inquit Chrysostomus, dum à cæde Saul abstinuit, quàm cum gigantem prostravit; quia tunc seipsum victorem gigantis vicit. ô quàm egregiè sacer ille Vates,

Boëth.  
de consolat. li.  
2, mste-  
tro 5.

*Qui se volet esse potentem,  
Animos domet ille feroces,  
Ne victa libidine colla  
Fœdis submittat habenis:  
Etenim licet Indica longè  
Tellus tua jura tremiscat,  
Et seruiat ultima Thule,  
Tamen atras pellere curas,  
Miserasque fugare querelas  
Non posse, potentia non est.*

Hinc Carolo Quinto Imperatori semper invicto insigne elogium fuit adscriptum, litteris aurëis inscriptum. Cujus memoria semper erit in benedictione,

*Hostem, teque simul superas, sed major in ipso  
Est te vincendo laus, minor in hoste tuo.  
Namque quod ingentes populos evertis, & urbes,  
Non hæc debetur gloria tota tibi.  
Sors & miles habent, tormenta que bellica partem,  
Et partem virtus, consiliumque tuum.  
Hoste sed evicto, quod te quoque vincis & iram,  
Non est communis gloria, tota tua est.*

Princeps enim qui diu & feliciter regnare exoptat, debet instar Ulyssis, Sirenarum voces negligere,

gere, hoc est cupiditatum spernere voluptates : ille malo navis adhærebat, iste rationi debet esse alligatus, & ita sapienter se gerat, ut nullo Circeo poculo possit deformari, possit verò eo deformatos, non tam arte, quàm exemplo vitæ, ad pristinam formam revocare. Quod quidem feliciter eveniet, si Epicteti philosophi doctrinam verè auream corde retineat, dignam profectò, quæ omnibus parietibus inscribatur; duobus autem verbis comprehenditur, Sustine, & abstine. quorum altero monemur, ut adversa fortiter toleremus; altero, ut ab illicitis temperemus voluptatibus. Proinde dicebat Aristot. Considerandæ sunt voluptates, non advenientes, sed abeuntes; si enim cum labore honesti quidpiam egeris, abit labor, honestum manet; si cum voluptate turpe feceris quidpiam, quod suave est, abit; quod turpe est, manet. Adeo execranda Venerea voluptas, ut quidam doctores, coitus fœditatem considerantes, posuerint, quod in statu innocentiae non fuisset generatio per coitum. Unde Gregorius Nissenus in libro de homine scribit, quod in paradiso fuisset multiplicatum genus humanum, sicut multiplicati sunt Angeli absque concubitu, per operationem divinæ virtutis. at pace tanti viri; nullo modo potest sustineri hæc positio, quia Deus ante peccatum fecit masculum & fœminam, nihil autem est frustra in operibus Dei; ergo etiamsi homo non peccasset, adhuc fuisset coitus, ad quem distinctio sexuum ordinatur. Pro majori autem explicatione, duo sunt in coitu consideranda; actus nempe generationis, & hic fuisset in statu innocentiae, & quædam deformitas immoderatæ concupiscentiæ, porro hæc in statu innocentiae non fuisset, quando vires inferiōres omnino rationi subdebantur. Unde

D. Tho.

1 p. 9.

98, a. 2.

Florianus Nan.

Bon. cat.

arg. in

Gen.

Aug. lib.

14 de

civ. Dei.

Augustinus; Absit ut suspicemur, non potuisse prolem fieri sine libidinis morbo, sed eo voluntatis nutu moverentur illa membra, quo cætera, & sine ardore, cum tranquillitate animæ & corporis.

Prov. 29. O quam turpe Veneris cupiditatibus inservire! Quid enim fœda carnis voluptas, nisi ignis quidam, usque ad perditionem devorans, & omnia eradicans genimina? hoc est secundum Hieronymum, omnia bona devorans. Et quid non devorat insana libido? devorat bona fortunæ, quia qui nutrit scortum, perdit substantiam. ita cecinit Poëta,

*Dives eram dudum, fecerunt me tria nudum.*

*Alea, Vina, Venus, tribus his sum factus egenus.*

Aul. Gell. li. 1, c. 8. Omnibus titulis laudandus Demosthenes Græciæ primarius orator; hic enim cum ad Laïdem meretricem accessisset, & illa pro exiguo corporis usu mille drachmas Atticas postulasset, immenso hoc pretio deterritus philosophus, ait; Non emo tanti pœnitere. Ad hanc rem apprime facit, quod refert Athenæus, ait enim, Phrinem, insignē illud Græciæ scortum, tantas opes sui corporis evulgatione comparasse, ut civitatis Thebanæ muros jam ab Alexandro Magno dirutos, propriis sumptibus restaurare potuerit, quod à magistratu, ut sibi liceret, postulavit, modo hæc nota marmoris tabulis inscriberetur, Alexander destruxit, Phrine meretrix extruxit. O rem planè portentosam, ac penè incredibilem! Sed quot domos illam voraginem oportuit evertisse, quot familias expilasse, quot patrimonia exhausisse, tantas ut opes coacervaret, quo tantum ausa fuerit moliri? sed quid? nonne de eadem scribit Plutarchus, eò impudentiæ devenisse, ut in templo Apollinis Delphici, statuam Veneris ex auro solido dedicare non erubuerit? hac addita inscriptione, Ex Græcorum intemperantia. O quam

Laërt. lib. 6.

quam rectè scopum attigit secundus philosophus, qui interrogatus, quid esset mulier? Impudica præfertim, respondit, est naufragium viri, tempestas domûs, quietis impedimentum, vitæ captivitas, Maximus sermon. 39. damnum amabile, amor odibilis, hostis insatiabilis, pugna indeficiens, Nec ineptè, qui dixit mulierem melle esse molliorem, sed quò nitentior, eò nocentior; dum te fovet, sibi favet; dum tangit, tingit; dum ridet, rodit, ac radit; non est virgo, nec virago, sed vorago, quæ vires vorat; corpus carpit; aurum haurit, & amando mandit. Devorat quoque bonum famæ, quod infelici experimento comprobavit Salomon, cui decantatum fuit; Dedisti maculam in gloria tua. Hinc Regius vates enixè orabat; Amputa opprobrium meum. quid per opprobrium? utique vitium carnis intelligit Augustinus. Proinde dicunt Theologi, & est doctrina communiter recepta, quod peccata carnalia, licèt sint minoris culpæ, sunt tamen majoris infamiæ; minoris quidem culpæ, ratione motivi, quia quantò major impulsus, tantò minus delinquit peccator, at peccata carnalia habent majorem impulsum propter concupiscentiam carnis nobis innatam; majoris autem infamiæ, quia versantur circa illas delectationes, quæ sunt communes, & nobis & brutis. Hinc peccatum hominis reparabile, non autem Angeli, quoniam peccatum hominis à fragilitate naturæ habuit ortum; peccatum verò Angeli ex pura malitia processit; peccatum enim, quod urgente motivo committitur, dignius est veniâ, quàm illud, quod nulla ad id causa impellente; & hujus rationem adducit Incognitus explanans verba Psalm. 77, Recordatus est quia caro sunt. Peccatum, inquit, quanto majori fit fragilitate, tanto magis est remissibile, quia minus habet rationem voluntarii;

D. Tho.  
1. 2. q.  
73.

Greg. li  
4. moral.  
c. 9.

nam occasiones sunt aliquæ tam urgentes, quæ licet usum liberi arbitrii omnino non tollant, valde tamen sollicitant, & licet non cogant, fortiter tamen inclinant. Porro peccata quæ sic committuntur minoris sunt culpæ, quàm illa, quæ nulla occasione fiunt, quia minus habent malitiæ. Et huc facit appositè illud Eccles. 25, Tres species odit anima mea, pauperem superbum, divitem mendacem, senem fatuum; hæc namque nullam habent occasionem impellentem. quam quæso occasionem habet pauper superbiendi? quam dives mentiendi? quam senex insaniendi? Devorat etiam bonum propriæ salutis, quia qui fornicatur in corpus suum peccat. Siquidem capiti dolorem infert, oculos debilitat, nervos enervat, ac demum totum hominem exsiccat, exhaurit, ac penitus absumit. Unde Hippocrates medicorum princeps, voluptatem carnis appellabat, parvum morbum comitalem. Et cui non exploratum axioma illud Aristotelicum? Omne finitum per ablationem finiti, tandem finitur. Quare columba exiguo tempore vivit? quia rei Veneræ addicta, & ideo Veneri dicata, hinc dicitur columba, quasi colens lumbos. Pulchre Pythagoras, cùm enim interrogaretur, quando congregiendum esset cum fœmina? Quando, inquit, voles teipso fieri debilior. sed quid? devorat etiam bonum mentis, quia fornicatio, & ebrietas auferunt cor. Hinc Plato divinus scriptum reliquit, nomen Venus, ex duabus vocibus componi, quarum prima apud Græcos significat, sine; altera mentem, quasi vellet innuere, Venerem sine mente, ab effectu nimirum, quia auferunt mentem, cor, & iudicium. Et quomodo hoc vinculo irretitus, poterit Imperii habenas ritè moderari, cùm sit rationis præsidio destitutus?

Ad

Osee c.  
4.

Ad hanc rem facit statua illa Veneris, testudinem pede prementis. sed cur testudinem, non aliud animal premit? quia testudo inter animalia, sola corde caret. Quid est ergo Venerem habere sub pedibus testudinem? insinuare volebat antiquitas, amantes sub signo Veneris militantes, amentes omnino & excordes esse. Propterea dicebat Philosophus, Venus furatur intellectum sapientis. Adam primus parens, nonne perfectus fuit in statu innocentiae? ad Evæ tamen verbum concidit misellus. Fortissimus Sampson, Dalila mulier illum fregit. David strenuus miles, qui leones prosternebat, unica mulier Bersabæa, illum emaculat, & penitus enervat. Sed quis sapientior Salomone? aspectus scæminarum illum dementavit. Tria sunt præcipuè, quæ mentis aciem obtundunt, & arcem omnino evertunt. Ambitio, avaritia, voluptas. Sed nihil ita obruit rationis usum, quàm rei Venereæ abusus; proinde, non possum venire, dicebat quidam huic vitio adductus: cui appositè consonat Vatis oraculum; Non dabunt cogitationes suas, ut revertantur ad Dominum, quia spiritus fornicationum in medio eorum, & Dominum non cognoverunt. Hinc pictores Cupidinem effinxerunt cæcum, ab effectu, quia facit hominem cæcum, & ex amante reddit amentem. Quocirca optimo jure vitium carnis comparatur igni. Ignis est usque ad perditionem devorans, nam sicut ex igne fumus egreditur oculos excæcans, ita ex hoc vitio exeunt sceditates rationem obscurantes, quo fit, ut amans periculum non videat. Proinde Rex David amore Bersabææ insaniens, cum se corde & mente spoliatum animadverteret, conversus ad Dominum, enixè orabat, dicens: **C**or mundum crea in me Deus:

Aristot.  
de som-  
no &  
vig.

Arist. 7.  
Ethic.

Osee  
c. 5.

Job. c.

31.

Isa. c. 45.

& jure quidem divinum alloquens Numen, protulit hanc vocem. Siquidem creare soli Deo competit, & adeò propriè, ut non possit actus creationis creaturæ communicari. Verùm si habebat cor, cur dicit crea? Hujus loci varias invenio doctorum explicationes. Divus Basilius explicans verba illa Isaïæ: Ego Dominus creans malum, ait, tunc Deus malum creat, quando convertit illud in bonum, prout fecit in primi parentis peccato, ex eo occasionem sumens mittendi Filium: unde Ecclesia culpam illam appellat felicem. O felix culpa, quæ talem ac tantum meruit habere redemptorem. quando ergo David orabat; Cor mundum crea in me Deus, postulabat, ut impurum cor suum dignaretur convertere in cor purum; sic enim convertebat malum in bonum. Secunda explicatio vim facit in verbo creare, quod in rigore Theologico, est aliquid de nihilo producere. Cum igitur ex una parte peccatum sit nihil, & ex alia, peccans ad nihilum convertatur; hinc est, quod David bonæ Philosophiæ, & Theologiæ non ignarus, existimabat justificationem esse quandam spirituales creationem; in qua, sicut in illa, invenitur nihil, hoc est peccatum, quod velut terminus à quo expelli debet, & terminus ad quem, qui est puritas cordis, introduci: ideo sapienter dixit; Crea in me Deus. Sic namque postulabat expulsionem peccati, & introductionem gratiæ mundantis cor. Tertia explicatio docet, Davidem insinuasle, quod sicut in creatione, nihil præsupponitur, cui jure justitiæ debeatur; id quod creatur; ita ex parte cordis, cùm Spiritus sanctus illud per primam gratiam purificat, nihil præsupponitur; quantumcumque contritum sit, cui jure justitiæ, primæ gratiæ infusio debita sit, aliàs gratia non esset gratia. Vel dicamus,



camus, & est quarta expositio præsentis instituti valde consentanea, quod David quærebat cor suum, at non inveniebat, quia Bersabeæ pulchritudo rapuerat; ideo dicit, Cor mundum crea; perinde ac si dixisset, cor meum discessit à me, & ad illam se transtulit, peto Domine restitutionem cordis. Et prudenter quidem, quia insana libido aufert cor, rationis usum pervertit, & totum hominem dementat. Sed quid plura? non solum foetidus iste ignis mentem amentem reddit, sed devorat etiam ipsum lumen fidèi. Ad memoriam revocetur Henricus octavus Angliæ Rex, is ob res præclare gestas pro fidèi Catholicæ dignitate, & gladio, & calamo, à Leone decimo Summo Pontifice, insigni titulo defensoris fidèi decoratus fuit: at postmodum, infano Annæ Bolenæ amore turpiter insaniens, à fide catholica, quod turpius est, defecit, & proh dolor, Romanæ Ecclesiæ acerrimus hostis, & vixit, & mortuus est. Siquidem à foeda libidine, ad hæresis labem facilis est transitus, sic divino acclamante oraculo, Visum est Spiritui Sancto, & nobis, ut abstineatis à fornicatione, & idololatria. Cur quæso fornicatio idololatriæ conglutinatur, non mendacium? non homicidium? ut docerent Apostoli, quod ab insana libidine ad amissionem fidèi nimis facilis patet aditus. Caveant itaque Principes ab hoc igne devorante, quandoquidem præter innumera damna, quæ longum nimis esset recensere, bono etiam regimini adversatur. Pulchrum sanè dictum Romani oratoris huic instituto non absonum; nam cum Terentiam repudiasset, & suam Hirtius sororem in uxorem illi obtulisset, Divo Hieronymo referente, ita respondit: Non possum simul & philosophiæ, & uxori vacare. Hujus Philosophi

Hieron.  
li. I. epi.

Fulgof.  
li. 7. c. 3.

Valer.  
Max.  
lib. 4.

Veget.  
lib. 2.

Plot. in  
vita  
Alex.

respondum usurpans, dicam & ego; Non potest Princeps insanæ libidini simul, & bono regimini diu & feliciter vacare. Proinde Dionysius quamvis ad violentiam, & tyrannidem natus, cum audisset à proprio filio Syracusanæ mulieri vim fuisse illatam, his verbis eum increpavit, Unquamne vidisti me talia agentem? cui filius, Non quidem; sed tu Regis filius non fuisti. mox adjecit Dionysius, Neque tu; huic sceleri incumbens, filios tuos habebis Reges; & divinans dixit. Siquidem parvo interjecto tempore, post Dionysii mortem, pulsus Regno, nec ipse, nec filii Regno potiti sunt. En perniciēs ignis devorantis. Scipio major ab antiquis in cælum usque attollitur, hoc præcipue titulo, quia continentiae addictus fuit; quippe qui nunquam captivas mulieres ad se perducere permiserit, & cum semel casu adduceretur quædam virgo admirabilis formæ, eam honestè, integrèque custodiri iussit. at cum paulò post comperisset, eam desponsatam esse, statim integram, & penitus intactam sponso restituit, cujus rei fama ita hostium corda sollicitavit, ut ultro, & libenter in partes Romanorum concesserint, & quod armis Scipio assequi nequiverat, continentiae rumore assecutus est. Alexander Magnus admirandis præconiis celebratur ob res præclare gestas, sed præsertim Continentiæ nomine: Siquidem victo Dario, prælioque fractis Persis, uxor, & mater Persarum Regis ipsæ quoque captivæ fuerunt; uxor autem tam elegantis formæ erat, ut ei in tota Asia nulla posset comparari. in primo flore juventæ erat Alexander, Rex potentissimus, sub nullius potestate constitutus, adeò tamen fuit continentiae studiosus, ut rogatus illam videre, nunquam adduci potuerit; imò constanter negarit, dicens:

Com-

Committendum non esse, ut qui viros vicisset, à mulieribus vinceretur. quasi magis timeret mollem prospectum, quàm bene instructas & armatas acies. Nec enim Principi minus præclarum est, cupiditatibus, quàm hominibus imperare: nam imperare sibi, maximum Imperium est. Optimè noverat Alexander, incomparabilis formæ esse mulierem. fama ad Regem jam pervenerat, quæ in tota Asia celebris vagabatur, Leonatum tamen ejus familiarem misit ad Reginam consolandi gratiâ, atque ut mente voluit abstinere, ita nec oculis continentiam propriam voluit denigrare. Non multò post Eunuchustranfugit, quem enixè rogavit Darius, an uxoris pudicitiam violasset Alexander? deos testes invocans respondit: castè, sanctèque habitam esse Reginam. Tunc Darius capite velatò diu flevit, deinde ad cælum manus tendens; Dii patrii, inquit, primùm mihi stabilite Regnum; deinde si de me jam transactum est, precor, ne quis potius Asiæ Rex sit, quàm iste tam justus hostis, & misericors victor. En continentiae gratia, quàm magnus apud omnes conciliatur amor.

Plutarchus de eodem Alexandro dignam Alexandro refert historiam. Cùm milites mulierem quandam melioris formæ quàm famæ ad Principem de nocte adduxissent, ut cum Rege cubaret, & ille venientis strepitu, & motu excitatus, quia jam tertia noctis vigilia præterierat, rogasset, ubinam tamdiu hæsisset? illaque respondisset; expectavi, inquit, ô Rex, donec maritus somno sepultus sterteret, ne me exurgentem inaudiret; hoc audito, suos Rex advocat; jubetque mulierem, unde eam duxerant, reduci, dicens, Ergone me adulterum existimatis? & alterius me thorum

violare velle? apage, nihil enim est quod magis abhorream. Audiant quæso Principes, & discant ex hoc Ethnico, in gyro continentiae contineri.

Veget.  
lib. 2 de  
conti-  
nentia  
Alex.

De eodem refert Vegetius, quod cum ob-  
ta quadam victoria denuntiaretur ei foeminam  
omnium pulcherrimam esse captam, mox præce-  
pit, ut nemo ante ipsius oculos audeat illam addu-  
cere, ne captivæ suæ fieret ipse captivus.

D.Hie-  
ron.lib.  
1 ad He-  
liodor.

Nec minus memorabile, quod de Cyro refert  
Hieronymus; ipse enim nunquam adduci potuit,  
ut Reginam Pantheam bello captam, summæ  
venustatis foeminam intueretur.

Nec Macedone minor Africanus, qui Hispani-  
cas puellas nec conspiciere voluit, ne ab illis ex-  
pugnaretur, quarum parentes armata dextera im-  
perio subegerat, non timuit virile, non hostile fer-  
rum, oculos timuit debilioris sexus: & prudenter  
quidem, quia in hoc mari foemineo, qui omnes  
scopulos, licet parvulos timet, & fugit tuto navi-  
gio navigat, ut pulchre, & luculenter cecinit ille,

*Quid facies, facies Veneris cum veneris ante?*

*Ne sed eas, sed eas, ne pereas per eas.*

Hoc est enim potissimum remedium, Fuga. Sic  
docet Paulus veteranus, & strenuus miles, Fugite  
fornicationem. sed statim, ut allidamus parvulos  
ad petram; quia periculum est in mora, in aliis lu-  
ctis strenuè pugnandum, & fortiter obfistendum;  
at in hoc genere pugnae, unicum genus victoriæ,  
Parthica fuga est. Hanc viam regiam calcarunt  
strenui milites Christi. Hieronymus saxo tunde-  
bat pectus, vel ad sanguinem. Benedictus carnis  
illecebras vicit, inter spinas & vepres nudum cor-  
pus volutando. Franciscus, ut ignem extingueret,  
in glaciem se projecit. Thomas, quia cella inclu-  
sus, fugam arripere nequibat, impudicam  
titione

titione fugavit, & sic igne extinxit ignem. Nec  
 minus gloriosum victoriæ genus à Nicephoro re-  
 fertur. Decius, persecutor Ecclesiæ, quendam ju-  
 venili ætatē florentem in amœnissimos hortulos,  
 tarda ad mortem supplicia conquirens, & animas  
 cupiens jugulare, non corpora, præcepit abduci,  
 ibi inter lilia candentia, & rubentes rosas super le-  
 ctum plumis extructum resupinari, & ne inde se  
 posset excutere, blandis serico nexibus irretitum  
 relinqui: quo, cùm recedentibus cunctis, mere-  
 trix speciosa venisset, cœpit impudicis blanditiis  
 attrectare, ut corpore in libidinem concitato, sic  
 victrix impudica evaderet. Quid ageret miles  
 Christi, & quò se verteret, nesciebat. Quem tor-  
 menta non vicerant, de voluptate dubitabat. Tan-  
 dem cælitus inspiratus, præcisam morfu linguam  
 in osculantis se faciem expuit, ac sic libidinis sen-  
 sum succedens doloris magnitudo superavit. Du-  
 rum certamen, sed gloriosum victoriæ genus,  
 quod non ferro, sed fuga comparatur. Omnibus  
 exploratum Divi Augustini oraculum, Inter omnia  
 Christianorum certamina, duriora sunt prælia ca-  
 stitatis, ubi continua pugna, & rara victoria. vis  
 habere victoriam? apprehende fugam. hinc Joseph  
 castissimus quomodo victor evaluit? relicto pallio  
 aufugit. Doctrinam hanc auream apprime novit  
 adolescens ille, de quo tradit Ambrosius libro de  
 pœnitentia. Sæpius decreverat impudicæ mulieris  
 amplexus declinare, sed quoties in illam incide-  
 bat, toties turpiter ruebat; tandem, fuga duce,  
 resipuit, & victoriam obtinuit. Reversus ad patrios  
 lares, jam mutatus in virum alterum, cùm casu illi  
 obviam venisset mulier, dixissetque, Sum illa,  
 statim respondit generosus miles, Si tu es illa,  
 ego non sum ille. Hinc dicebat, & docebat So-  
 crates,

Nice-  
 phor.  
 histor.  
 eccl. lib.  
 7. c. 13.

Ambros.  
 lib. de  
 pœnit.

Bonav.  
lib. de  
puritate  
consc. c.  
14.

crates, voluptates carnis, non aliter, quàm Sirenas esse prætereundas, more Ulyssis, qui cerâ obturatis auribus præternavigavit. In hac pugna non contendendum, sed fugiendum, more Parthorum; isti enim equis insidentes fugiunt, insequentes tamen à tergo sagittis conficiunt. Sunt quædam vitia, quibus obviam strenuè eundum est, quæ ad certamen provocare possumus, & per contrarios actus debellare; at carnis pugna, potius fugienda, quàm provocanda. Ex hac re colligitur nodi illius explicatio, Melior est iniquitas viri, quàm mulier benefaciens. Exponunt enim doctores, quantum ad consortium. testis est Hieronymus, cujus oraculum est, Cum mulieribus habitare, & de mulieribus non cogitare, majus est quàm mortuos suscitare. Hinc est, quod humani generis acerrimus hostis, cupiens à fidèi firmitate Petrum dejicere, quia militari industria non profecit? ad mulierem confugit, cujus armis nihil fortius ad cordis humani arcem expugnandam. Quod Petrus Blesensis pulchre advertit, oracula Jobi exponens. Quærit enim, quare diabolus cum Jobum spoliasset omnibus, solam uxorem reliquit? acutè respondit, hoc non fuit ad solatium viri, sed ad majorem casus impulsus, ut nempe per scēminam vinceret, quem per flagella non poterat; & quod verberibus nequiverat, hoc verbis mulieris præstaret. hoc idem Gregorius de hac re agens, Hoc fuit antiqui serpentis consilium, ut quoniam non poterat in arcem omnibus virtutibus munitam aliqua ex parte irrumpere, neque mœnia, hoc est, incredibilem animi celsitudinem attingere, quasi artis bellicæ peritus, uxoris vocem, veluti scalam quandam adhibuit, per quam ascendens, rationis arcem occupare posset. Ex quo sequitur  
quanto

quanto studio invigilandum, ut carnis victoriam consequamur, quod neutiquam fiet, nisi fugæ præsidio. Quoniam licet, instar vini, ingrediatur blandè, in fine tamen mordebit, ut coluber. Proinde non ineptè comparatur igni, siquidem, sicut modica scintilla non statim extincta, magnum parit incendium; ita tentatio adveniens, nili statim repellatur, inextinguibile in anima parit detrimentum; primo in limine parvulus lapis videtur, at si negligitur, in montem magnum confurgit. Invigilet ergo Princeps, & tanquam alter Ulysses infida Sirenarum blandimenta effugiat; tunc enim evitabit multa Regni incommoda. Nihil enim populis gratius esse potest, quàm Principis Continentia, & nihil optabilius mulierum honestate. Quod egregio Virginii Romani testimonio comprobatur. hic licet infimo genere natus, filiam cujus Appius Claudius decemvir, potestatis viribus fretus, stuprum expetebat, in forum deductam, occidit, maluitque esse filiæ interfector, quàm corruptæ pater. Hoc idem ferè contigit Pontio Eufidiano equiti Romano. is namque cùm filiam, operâ cujusdam pædagogi castitatem amisisse comperisset, scelestum servum honoris proditorem, ultimis suppliciis affecit; deinde propriam etiam filiam jugulavit. maluit caro pignori exequias celebrare, quàm nuptias maculâ inhonestatis deturpare. Siquidem à mundi primordiis ad nostra usque tempora invaluit apud omne hujusmodi opinio, ut familiæ decus, & sanguinis ornamentum, in muliebri sexu esset collocatum. Quid mirum igitur, si aliquoties legimus populos in Principum necem conspirasse, ab illoque defecisse, ob violatam mulierum pudicitiam? Quis ignorat avaritiam & luxuriam pestes esse, quæ multoties  
magna

magna Imperia everterunt? Nonne raptus Helena Trojanorum ruinæ, Hectoris mortis, & totius populi calamitatis causa fuit? Vis Lucretiæ illata, quantum exitium attulerit, passim docent historici. Dina vi rapta, quot tumultus excitavit, quas neces pepererit, quanti mali causa fuerit, nullus est qui ambigat. Adsit itaque Potestati Continentia comes, & tutum erit Principis Imperium.

*Sit procul à vobis, Regni qui sceptrum tenetis,*

*Mente carens, fallax, blandula, vana Venus.*

*Corpus enim carpit, vires vorat ista vorago,*

*Enervat nervos impia, dira lues,*

*Obscurat famam, mentem quoque reddit inertem,*

*Destruit Imperium, construit exitium.*

## C A P U T IX.

*Ministros habeat Princeps integritate, & scientia ornatos. Et memoria illius in benedictione erit.*



**P** R I M U M sanè Regiminis institutum, si Princeps in summa rerum administranda viros illos præficiat, qui rationis moderamine uti sciant, ac velint, qui ex legis præscripto, sententias ferant, qui denique non solum crimine, sed etiam criminis suspitione vacent; tales enim Principes existimantur, quales sunt, qui illorum vices gerunt. Hinc Vespasianus Imperator avaritiæ labe notabatur, quia rapacissimos quosque ad amplissimos magistratus promovebat, ut locupletiores deinde factos, emungere, atque exhaurire posset. Proinde verum  
erat



erat in proverbium, Vespasianus amicis pro spongiis utitur, quippe qui siccos madefaceret, turgidos postea exprimeret. de quo luculenter Alciatus,

*Exprimit humentes, quos jam madefecerat ante*

*Spongiolas, cupidi Principis arcta manus.*

*Provehit ad summum fures, quos deinde coercet,*

*Vertat ut in fiscum, quæ male parva, suum.*

Et profectò, ut ingenuè fatear, cum magistratibus præficiuntur homines avari, & imperiti, qui officia capeffentes, ad auream messem se ire jactant, qui leges pro aranearum telis habentes; divites, & præpotentes, licet criminosos, impune abire sinunt; insontes autem, quia pauperes, vel indicta causa condemnant, qui per imperitiam jura omnia conturbant, sanctiones pervertunt, populos funditus evertunt, & demum qui, non quod lex sentit, sed quod mens cupit, non ut hoc libeat, quod licet, sed ut liceat, quod libet, non inclinant animum ad justitiam, sed justitiam ab animo declinant, & bene declinant, quasi plumbum ad profundam usque voragine. Superbi enim declinant in nominativo, de quibus Vates regius, vocaverunt nomina sua in terris suis. Parentes declinant in genitivo, divitias coacervantes per fas & nefas, ut potentes relinquant filios, dicentes cum matrona Hebræa; in me sit ista maledictio. Veneri servientes declinant in dativo, quia muneribus virgines corrumpunt; detractores & invidi, in accusativo, quia famam denigrantes injustè accusant; declinant in vocativo tyranni, quia temere audent se vocare deos, ut Domitianus; mali demum ministri declinant in ablativo, quia perperam judicantes, bona pauperum diripiunt; tunc verè Majestas Principis obscuratur, & nomen ejus redditur inglorium; verissimum est enim illud Tragici dictum,

Valer.  
Max.  
lib. 8.

*Qui*

*Qui non vetat peccare, cum possit, jubet.*

Cui aptissimè accommodatur illud Socratis apud Xenophontem, Si noceat equus, plerumque in sessorem crimen rejicimus. Quare cum apud omnes satis compertum sit, plurimos Reges, quamvis integræ, & sanæ mentis, ab iniquis tamen ministris multoties & deceptos, & obscuratos fuisse; ideo operæ pretium duco, ut illorum exempla tibi proponas, quibus summa rei infelicitè cessit, quò illorum periculis cautior evadas. sic docet vetus adagium, Optimum est, aliena insania frui. ita Plautus; Feliciter sapit, qui alieno periculo sapit. & pulchrè Poëta,

*Felix quem faciunt aliena pericula cautum.*

Corr.  
Tac. lib.  
1 hist.

In primis Galbam, & Tiberium ante oculos constitue, quorum unus sapientiæ fama clarissimus, miserandum tamen exitum fortitus est; hoc autem ex quo fonte prodiit? ex ministrorum avaritia, & luxu. Propterea seditiones in illum sæpius excitatæ, illius amissæ provinciæ, & illius penè obscuratum nomen. Ex quibus satis apertè monentur Principes, ne ingenio ministrorum cuncta venalia afferentium, temere credant. nulla siquidem capitalior pestis, in summa rerum administranda, quàm venale iudicium; non enim potest Respublica diu consistere, in qua fas est, jus nundinari. Quod probè noverat Alexander Severus, qui honores juris & gladii nunquam vendi passus est, dicens, Qui emit, ut vendat, necesse est. Alter verò, nimirum Tiberius, nonne à Sejano, quem unicè dilexerat, & cui totum se committebat, turpiter & iniquè deceptus est? quandoquidem, lucris inhians, & imperandi libidine incensus, propinquos tantum, quamvis improbos, extollebat honoribus cumulando, cæteros quosque, licèt virtute infi-

Brasón.  
li. 4, c. 5.

insignes, negligendo, deprimebat. Verba Taciti <sup>Corn. Tac. li. 5.</sup>  
 mores mali ministri exprimentia, sunt hæc. Sejani  
 propinqui & affines honoribus augebantur, ut  
 quisque Sejano intimus; ita ad Cæsaris amicitiam  
 validus. Contrà, quibus esset infensus, metu, ac  
 sordibus conflâbantur. Tu itaque, ô Princeps, <sup>Liv. li. 4.</sup>  
 cum istis non vis falli? interrompe honores, nec  
 patiaris potentes in magistratibus senescere. ha-  
 beasque pro constanti, magnam Principatus cu-  
 stodiam esse, si magna imperia diuturna esse  
 non finas. Siquidem longiora imperia multos  
 attollunt, & ad res novandas impellunt. hoc  
 viriliter præsta, ita infaustum Tiberii exitum <sup>Tac. li. 1. annal.</sup>  
 effugies, cui mos erat plerosque usque ad fi-  
 nem vitæ, in summis rerum habere, & inter  
 paucos coërcebat, quæ pluribus patêre debe-  
 bant. De ipso enim produnt historiæ, quod erat  
 in negotiis morosus nimis, vix aut nunquam mu-  
 tabat administratores, & quærentibus causam,  
 hoc erat responsum, Parco plebeculæ, quoniam,  
 cum ministri intelligunt, ad modicum tempus  
 se habere procurationem, emungunt populum  
 usque ad sanguinem, & tantò acrius domina-  
 tur, quantò brevius; & qui recentes veniunt,  
 dissipant quidquid inveniunt. Qui enim admini- <sup>Niceph. li. 1 ec- cles-hist. c. 17.</sup>  
 strationi præsumt, pecuniæ cupiditate alliciuntur,  
 porro si diutius in magistratu versentur, segnio-  
 res fiunt ad quæstum. Quam regendi rationem,  
 ut fortius comprobaret, satis apto utebatur apo-  
 logo, Jacebat quidam, inquit, ulceribus plenus,  
 nec amovebat muscas. alter superveniens, putans  
 quod has dimitteret ex imbecillitate, statim abegit  
 eas. ad quem ille, Malè egisti viator, quia muscæ  
 quas amovisti, sanguine jam erant repletæ, & me  
 vexabant parcius; quæ autem supervenient, acrius  
 pun-

Corn.  
Tac.  
lib. 4.

Hist.  
c. 19.

pungent. Ita ministri provinciarum, recenter instituti, acrius in subditos deserviunt. Quod autem hæc regiminis institutio sit Principibus valde periculosa, unus Sejanus edoceat, qui diuturnis, ac non interruptis honoribus elatus, Drusum unicum Tiberii filium veneno extinxit, parumque abfuit, quin ipsum Tiberium vita & imperio privaret. auctoritas quippe suprema ex Principis bonitate collata, corrumpit sæpenumero, & arrogantes facit hominum mentes, ita ut de facili agant contra justitiam. testis sit Aman, de cujus arrogantia, & impietate, satis superque liquet. Vix ab Assuero Rege sublimatus fuit, & constitutus secundus à Rege, ut ipsemet Rex testabatur his verbis, Aman filius Adamathi, animo & gente Macedo, alienusque à Persarum sanguine, & pietatem nostram sua crudelitate commaculans, peregrinus à nobis susceptus est, & tantam in se expertus humanitatem, ut pater noster vocaretur, & adoraretur ab omnibus post Regem secundus, qui in tantum arrogantiae tumorem sublevatus est, ut Regno nos privare niteretur, & spiritu. Nec parum facit ad rem nostram Cæsaris exemplum, cujus diuturnum & continuum Imperium, Romanæ reipublicæ libertatem abstulit. Ipse verò idem Cæsar experimento edoctus, ex bello Africano in urbem reversus, lege postmodum cavit, ne Prætores ultra annum, Consules verò ultra biennium continerent Imperium: quippe qui ad memoriam revocabat, se non alia re magis, quàm Imperio continuando, dominandi cupiditate incensum fuisse. Eiusdem sententiæ fuit etiam Mamercus dictator, qui assererat magnam Reipublicæ custodiam esse, honores interrompere, & prudenter quidem. Nam sicut arbores,

arbores, quæ diu humi inhæserunt, altasque radices egerunt, ægre admodum evelluntur, ita prorsus accidit ei, qui diutius imperavit, in quo honos altè radices fixerat, cùm enim aufertur administratio summa, tunc & cor ipsum aufertur è pectore. hinc tumultus, hinc seditiones, hinc pericula. Quomodo igitur tot incommodis occures? si venale ingenium suspectum semper habebis, & neminem permittes in magnis imperiis consensescere. Siquidem ob humani ingenii inconstantiam non omnibus omnino, nec omni tempore fidendum. Quis enim ignorat frequenti experimento jam apud omnes compertum, aliquos integre, sancteque provincias administrasse; non multo autem post, omnem pudorem exuentes, ad omne scelus turpiter esse prolapsos? quod L. Vitellii, & T. Junii testimonio perspicuè declaratur. Ille regendis provinciis prisca & insigni virtute egit: at regressus, & formidine C. Cæsaris, & familiaritate Claudii, turpe in servitium mutatus, exemplar apud posteros adulatorii dedecoris relinquitur, cesseruntque prima postremis; & bona juventæ flagitiosa senectus obliteravit. Hic autem pro consulatu Galliam Narbonensem, severè, integreque rexit; mox Galbæ amicitia in abruptum tractus, audax, calidus, & ad omnia vitiorum genera paratissimus evasit. Hinc alieno exemplo discant Principes, & diligenter caveant, ne nimia alicujus fiducia imperii partem alteri concedant, sed ita viris etiam egregiis exequenda committant, ut clavum ipsi teneant, nec à gubernaculo manum dimittant. Siquidem grave periculum est, ad nimiam potentiam subditos evehere, ut bene testatur antiquitas sub Cæsare, Augusto, Tiberio, Caligula,

Tac. li.  
1. hist.

Domitiano, in quorum capita familiarium primi solâ purpurâ inferiores surrexerunt. Nec minister in magna potentia se extollat, quoniam magnam potentiam magna etiam sequuntur præcipitia. Pulchre in hac re Stoicus, Segetem nimia sternit ubertas, onere franguntur rami. idem quoque contingit animis, quos immoderata felicitas rumpit. potentia ergo utatur, tanquam aliena veste, qua paulò post exuendus est, ne si quando fortuna mutaverit fidem, risum pro commiseratione referat. Exempla te moneant Sejani sub Tiberio, Severiani sub Severo, Asiatici liberti sub Vitellio, Theodori sub Isaëcio, Lentuli Getulici sub Caligula, Domitii Corbulonis sub Claudio, Parmenionis sub Alexandro. Sit igitur hæc summa rei, nec minister potentiâ intumescat, nec Princeps ad nimiam potentiam assumat, nec passim omnes ad magistratus promoveat, nisi quorum fidem multis in rebus probaverit, & tunc ex millibus eligat. Zeuxis inter pictores clarissimi exemplo, is enim Agrigentinis facturum tabulam in templo Junonis Laciniæ dicendam, ingenii sui viribus minimè confusus, penicillum inconsideratè non arripuit, sed eximiæ formæ virgines prius per totam civitatem inspexit, & ex quinque pulchrioribus, quas elegerat, quod in quaque laudatissimum fuit, pictura expressit: ita sanè Princeps non omnes inconsulto ad officia adsciscat, sed æquo prius perpendat iudicio, qua præclara animi dote sit ornatus, qui aulæ regiæ dignus sit adscribi. illos tamen ita promovebit, ut frena semper Imperii manu ipse teneat, nec gubernaculi sui clavum alteri committat, ne imperare incipiat, qui subesse debebat. nesci enim parère elata potentia. Superbire homines quandoque solent, etiam

etiam annua designatione. quid si honorem per longum tempus agitent? Credas mihi, nihil tam Tac. l. 5.  
utile reipublicæ, quàm brevem potestatem tradere, ubi magna. Sejanus ad summam dignitatem evectus, invadere factionibus Imperium tentavit. Cleander cùm domus Imperatoriæ servitio esset Herodot. li. 1.  
traditus, & cum ipso Commodò accrevisset, ad tantum honoris fastigium provectus est, ut & corporis custodiam, & cubiculi curam, præterea militum præfecturam solus obtineret: sed magnitudo rerum ad Imperii spem illum instigabat. Inter præcipua mandata, quæ Octavianus dedit moriens Tiberio, erat, ut multorum consiliis uteretur, rempublicam non uni tantum traderet. Non vis itaque, ô Princeps, ministrorum incuriâ, seu potius perfidiâ decipi? ipsemet ad tribunalia interdum descendas, ipsemet miseris hominibus patulas aures præbeas, ipsemet causas exactè cognoscas. Nam sæpe inauditi, atque indefensi, licet innocentes pereunt. In Ranutium Farnesium Ducem prudentissimum mentis oculos converte, hinc hauries regiam veri Regiminis rationem. hic enim, non ut Caligula pronuntianti, canentive tragœdo gestum, vocemve accommodabat, sed Reipublicæ lyram ad pacem, & civium concordiam temperabat. Non cum Domitiano, muscâ; sed sicarios, latrones, viros nefarios captabat, ut in ejus ditione, ne musca quidem, quæ alienum raperet, reperiretur. Non cum Nerone, libratæ funambulorum spectaculis vacabat, sed utramque justitiæ lancem æquibrabat. Non cum Vespasiano, scurrili mimorum dicacitate capiebatur, sed sapientissimorum responsa exquirebat, & studiosè observabat. Non cum Cæsare, lusoriis chartis operam navabat,

sed supplices miserorum libellos manu versabat. Intelligebat enim quod quamvis præfectos substituerit, quorum humeris universam negotiorum molem imponeret, non propterea penitus curâ vacabat. Ad Principem namque spectat, quid agant delegati, interdum investigare, rationes examinare, omnia explorare, ne populi sine causa pœnas luant. Id fecisse constat Hebræorum ducem, qui licet collegas ad regimen assumpserat, ipse tamen præesse, & summa cum auctoritate præsidere voluit. sic divina narrat historia, Moyses autem constituit Sapientes, qui judicarent plebem Domini omni tempore; quidquid autem gravius erat, referebant ad eum. Hoc itidem erat egregium, & sanè regium institutum Augusti Cæsaris, Trajani, Adriani, Severi, Philippi, Alexandri, ad quos facilis patebat accessus. Proinde apud omnes gentes honorabile nomen eorum. Hos igitur imitare, hos tibi magistros constitue: sed instar omnium sit tibi tanquam lucidissimum speculum Rudolphus Austriacus Imperator. hic satellites suos, à quibus tenuiores homines, aditum Principis cupientes, rejiciebantur, & ipse rejecit, dicens; Per Deum, finite homines ad me venire, non enim ideo Imperator sum, ut in arcula includar. & prudenter quidem: Nam qui existimant morum facilitatem obscurare Imperii majestatem, & propterea miseris hominibus ad suas aures aditum præcludunt, nec veri, nec justî Principes ullo unquam jure dicendi sunt.

Equidem non me latet, arduum prorsus, & Principi nimis durum, omnibus causis aures accommodare. Quippe nec majestati consonum, debet enim solis, & imbris instar, latere aliquando, & aliquando etiam conspectui se tradere. Si-  
quidem



quidem majestati major ex longinquo reverentia. Lacides accersitus ab Attalo Rege, respondit, Imagines eminus esse spectandas: innuens assiduam, arctamque familiaritatem sæpe minuere virtutis admirationem. Continuus namque aspectus magnos homines minus verendos ipsa satietate facit. Ad hanc rem appositè facit, quod scribit Paradinus, ait enim cives quosdam Mediolanenses, qui in necem Sfortiæ Ducis conspiraverant, ita vultum ejus & auctoritatem formidasse, ut aliquoties rem aggressi, sola vultus majestate perculsi, à cœpto desisterent, sicut spiculator ad Marium occidendum missus, constanti ejus vultu perterritus, re infecta rediit. curarunt igitur imaginem ducis ad vivum in tabella depingi, ad hanc imaginem pugionibus suis confodiendam, & deformandam, ubi se per aliquot dies exercuissent, tandem ad ducem ipsum in ipso templo publicè occidendum, intrepidi accesserunt, & audacissimè occiderunt. ecce quod aliquando debet latere Princeps, ne majestatis veneratio minuat, hominibus namque omne ignotum semper pro magnifico est.

Quærit Rupertus Abbas, cur erat antiquitus tanta difficultas adeundi Regem? ut patet de Rege Asuero, qui sæpe per spatium triginta dierum non se exhibebat, respondit; hoc venerat ex nimia ventositate miseræ vanitatis, ne vilior fieret ex usu publicæ visionis. modus tamen servandus est, ne Calistrati sequamur præceptum, qui Principes consulebat, ne populis se præberent faciles, quasi essent res quædam, quæ non solum usu, sed & visu consumerentur. Quid igitur? graviora ipse tractet, minora ministris committat, sapientibus tamen & timentibus Deum, in quibus sit veritas, & qui oderint avaritiam. Proinde apud The-

Tac. lib.  
1 annal.  
Laërt. li.  
4 c. 8.  
Livius  
li. 15.

Rupert.  
abbas li.  
8 de vi-  
tore  
verbi  
c. 10.

1. obser-  
vandam  
de offic.  
Præsid.  
Exodi  
18.

banos statua Judicis erat expressa sine manibus. ut insinuarent judicem à muneribus alienum esse debere. capitur enim, si capit. Ad quam rem facit egregiè M. Curii testimonium, qui contra jus neque capere, neque capi unquam potuit: propterea legatos Samnitum cum suis pecuniis remisit, inquiens, Malo dominari aurum habentibus, quam auro; nam qui capitur auro, non est sui juris, sed aurum largientis. hinc Alcamenes à quodam rogatus, cur à Messeniis oblata munera recusasset? Quoniam, inquit, si recepissem, cum legibus pacem habere non poteram. ô mentem Imperio dignam, quæ obvio ingentique lucro legum auctoritatem anteposuit.

Egregius Ovidii apologus huic rei concinnè accommodatur. Fingit Atalantam Iasii Regis filiam, cum singulari corporis velocitate præstaret, cursus certamen proposuisse, in quo victus mortis pœnam, victor verò conjugii sui præmium obtineret. Pluribus jam devictis, Hippomenes tandem ad certamen venit, qui ut eam superaret, hac admirabili usus est industria; dum enim cursu certarent, mala quædam aurea extra curriculum tractim projiciebat: ipsa autem Atalanta auri cupiditate illecta, extra curriculum profiliens, cursumque interrumpens, ad colligenda mala se inclinabat; interim præcurrens Hippomenes, hoc adhibito strategemate, victoriam certaminis reportavit. Quid hinc? Ex hoc commento non difficile est intelligere, muneribus fortissima quæque facile expugnari; nec eum difficile capi, qui paratus est ad capiendum. Quod probè noverat Lyfander vir ille clarissimus; cum enim tyrannus quidam Siciliae, pretiosas vestes cum donis aureis filiabus ejus misisset, noluit pater, ut munus acciperent, quod

quod illarum honori indubiè insidiaretur, dicens; Nolite capere, ne capiamini. Obsidebat aliquando Philippus Macedo castrum quoddam ingenio loci adeo munitum, ut nullus omnino pateret accessus. Tunc Rex percunctatus, An asellus pecunia onustus, illuc quiret accedere? respondentibus exploratoribus, quod sic. tum ait, Vicinus ergo. ut ostenderet aurum nonnulla conficere, quæ vix aliis viribus effici possint. Hinc pecuniæ dicuntur opes, quia ferunt opem, & facultates à facilitate, quod omnia ex difficillimis reddat facillima. Nihil enim tam munitum, quod pecunia expugnari non possit, cum argentæus gladius omnia penetret. Hæc autem sacra fames à ministrorum mentibus procul esse debet, ne justitiam venalem habentes, proditores appellentur, ita enim lege sancitum est. Judex qui justitiam vendit, proditor dicitur & proceditur contra ipsum, tanquam contra reum, qui commisit crimen læsæ majestatis. & hoc citra injuriam. Quoniam judex iniquus ad reipublicæ perniciem natus, ultimi supplicii pœnas meretur luere. ut prudenter egit Cambyfes Rex Persarum, is enim judicem pecunia corruptum, decoriari jussit, & pellem è corpore detractam sellæ judicariæ apposuit, in eaque filium ejus judicaturum sedere mandavit, ut novo supplicii genere percussus, æqua lance judicaret. super quam sedem, hoc distichon jussit inscribi,

Tiraq.  
l. 6. un-  
quam c.  
de revo-  
cat, don.

Val.  
Max.  
lib. 6.  
Amian.  
lib. 25.

Herod.  
lib. 5.

*Sit tibi lucerna, pellis, sedesque paterna,*

*A manibus vesces munus, ab aure preces.*

Nec minus præclarè se gessit Artaxerxes Rex item Persarum: is enim plurimis regni sui magistratibus auro corruptis pellem detrahi jussit, eamque per tribunalia suspendi, ut qui ad eandem dignitatem promoverentur, rigido hoc supplicio

Diodor.  
Siculus  
c. 15.

2 Reg.  
c. 15.

perterriti, ab iisdem flagitiis abstinere, sed suum unicuique jus administrarent. Utinam nostrorum temporum iudices ante oculos haberent hoc exemplum: non enim ita facile à tramite iustitiæ declinarent, Phariseis omnino similes, qui Christi pauperis causam agentes, unanimi consensu inclamant, Expedi, ut moriatur. Porro cum de Lazaro divite tractant, consilia ineunt, cogitaverunt, ut Lazarum interficerent. divitum supplicia protrahuntur, pauperes statim neci traduntur. hoc autem quàm sit turpe nefas, declarat Dominus per regium prophetam, Devorant plebem meam sicut escam panis. En iustitia, telis aranearum comparata. En iustitia, virga quidem, sed non æquitatis. En iustitia, cingulum lumborum. hinc enim inclinatur ad potentiæ timorem, illinc ad pecuniæ pondus. En iustitia; statua illa multiformis, in qua caput aureum non comminuitur, lutei pedes dissipantur. ita fecit impius Saul, proinde percussus à Deo. Vade, iussit Dominus, percutite Amalech, & demolire universa ejus. Instruit Rex exercitum, regionem vastat, sed pepercit universis, quæ pulchra erat; quidquid autem vile fuit, hoc demolitus est. En iudex, facies peccatorum sumens, contra quos clamabat Salomon, Pondus & pondus, mensura & mensura, utrumque abominabile apud Deum. hinc emergit malorum congeries, quam describit Oseas Propheta, Non est veritas, non est misericordia, non est scientia in terra, maledictum, mendacium, homicidium, furtum, adulterium inundaverunt. sed, quæso, unde tot mala? sanguis sanguinem tetigit. Cur Regna everuntur? cur bona reipublicæ dissipantur? cur tot civitates exterminantur? cur solo æquantur? quia æquitatis invertitur ordo. Siquidem iudices sanguini

guini tantum, & auro inhiantes, non quod jus exigat, hoc decernunt, sed quò cupiditas impellit, eò defleunt. Sicut enim imposita humeris onera deprimunt, & ad terram flectunt etiam validissimos, ita animi licet erecti, munerum pondere incurvantur, mollescent duri, liquefcunt solidi, subsidunt robore pleni, reliquisque invicti vitiis, auro victi jacent. hinc Poëta,

*Auro pulsa fides, auro venalia jura,*

*Aurum Rex sequitur, mox sine lege pudor.*

Proinde Athenienses, ut huic incommodo occurrerent, apud illos cautum erat, ut judices in tenebris causas agerent, quò ad causam, non ad personam respicerent, ne muneribus illecti, perperam judicaret. Apud Thebanos, in loco ubi congregabatur magistratus, pingebantur Senatores, & in medio eorum Princeps, senatores sine manibus, princeps sine oculis; sine manibus, ne munera acciperent; sine oculis, ne personam respiceret. Lacedæmonii non solum oculos claudebant, sed & aures: volebant enim, ut per schedulas peterent, ne coram judicibus loquentes, eos fletibus, efficaci-que modo dicendi emulcerent. Hunc modum videntur probare divinæ Scripturæ, Non secundum visionem oculorum judicabit, nec secundum auditum aurium arguet, sed judicabit in justitia pauperes, & arguet in æquitate pro mansuetis terræ. Quandoquidem, qui munera diligit, muneribus oppletus, veluti Cerberus, objecta ossa latrare desistit. de quo Sapiens, Quasi mutus in ore, lectio Græca habet, Quasi frenum in ore. Et apud Athenienses versum erat in proverbium, Bos in lingua. appellabant autem bovem quandam monetam, in qua imago bovis erat picta. Porro quando judex adversus divitem facinorosum, non audebat

senten-

Alex. ab  
Alex-  
dierum  
genial.  
c. 5.

Pineda  
in Job  
c. 9.

Isa. 18.

Aul.  
Geil.li.  
11.c.9.  
Bruton.  
li. 1, c.1.

sententiam proferre, mox populus inclamabat, Bos in lingua. Quod Demostheni celeberrimo Græciæ oratori accidisse refert Aulus Gellius. Is enim pecuniis corruptus, ne diceret contra legatos, qui Mileto publicæ rei causâ venerant Athenas, lana circa collum advolta, ad populum prodiit, dixitque se anginam pati, propterea contra Miletos loqui non quire, tum è populo unus clamatavit, Non anginam, sed argentanginam pati, quoniam argenti mole suffocatus, orationem contra habere non poterat.

*Quid non argento, quid non corrumpitur auro?*

*Qui majora dabit munera, victor erit.*

Stob.  
serm.35.

Utinam judices hujus sæculi ad verba Phocionis mentis aciem dirigerent, proculdubio à tràmite justitiæ, ne latum quidem unguem discederent. Alexander Macedonum Rex, centum talenta dono miserat Phocioni. is verò percunctatus est eos, qui pecuniam adferebant, Quid ita? cum essent Athenienses permulti, sibi uni illa mitteret Alexander? illis respondentibus, Quoniam unum te judicat virum & honestum, & bonum. Ergo, inquit, finat Alexander metalem & haberi, & esse. Insinuavit vir prudens illos, qui rempublicam administrant, & tamen à capiendis muneribus non abstinent, nec bonos esse viros, nec tales debere existimari. Et quidem prudenter. Quoniam sic cautum est in sacrarum litterarum monumentis, Judices & magistratus constitues in omnibus portis tuis, ut judicent populum recto judicio, nec in alteram partem declinent. Declinabit autem judex, si munera inhianter accipiat, qui enim capit, capitur, & rigidi canis instar objecto cibo mansuescit, & ad potentis nutum contra jus animum flectit, & ab æquitate declinat. Non sic Joannes, qui

Deut.  
c.16.

qui ob aureum dicendi flumen, os aureum nuncupatur. Huic enim Eudoxia Imperatrix Arcadii conjux, per suos nuntios minas, & terrores intenuit, eò quod ejus iniquis cupiditatibus strenuè se opposuerat: at responsum est ei à suis, quos miserat legatis, Frustra illum hominem terres, qui nihil, nisi peccatum timet; & mortem potius subibit, quàm à semita justitiæ recedat. Non sic Ambrosius Ecclesiasticæ disciplinæ propugnator acerrimus. Cùm enim Rufinus magister militum, Theodosium Imperatorem de censure valdè sollicitum hortaretur, ut bono animo esset, & promitteret, se curaturum, ut Episcopus Ambrosius etiam sua sponte vincula ei laxaret; respondit Theodosius, Novi ego constantiam Ambrosii, qui nullo regiæ majestatis timore divinam legem transgredietur; qui potius deficiet, quàm non efficiet, cujus mens in sanctis propositis semper immota manet. Non sic sanctus Thomas Cantuariensis Episcopus, cùm enim legibus regiis omnino injustis, animo infracto se opponeret, Gilbertus Londinensis Episcopus ad eum scripsit, ut mollius ageret cum Rege, sapienter respondit; Clavum teneo, & ad somnum me vocas? tales esse oportet Præfecturam gerentes, ut nihil formidantes, viam Dei in veritate doceant, oraculi divini memores: Noli fieri judex, nisi valeas virtute irrumpere iniquitates, ne fortè extimescas faciem potentis. Sanctus Ludovicus Rex Gallorum, nonne hoc persuasum semper habuit ab ineunte ætate, potius mori velle, quàm contra legem æquitatis agere? Sed ne quis perfectionem Sanctorum, hoc loco excipiat, testimonium Ethnici proferamus, & faciem nostram operiât confusio. nonne Aristoteles sæpius dictitabat? Melius est mori, quàm ali-

Theodor. li. 5.  
hist. eccl.  
e. 18.

Eccl. 7.

Sar. in  
vita e-  
jus.

Arist. li. 3  
ethic.

quid

quid agere contra bonum virtutis. Papinianus Jurconsultus mori maluit, quàm jubentē Antonio Caracalla Imperatore, parricidium ejus de occiso fratre Geta defendere; audacter enim respondit; Non tam facilè parricidium excusari posse, quàm fieri.

Verùm graviora negotia, ut revertamur, unde digressi sumus, quæ debent à Principe tractari, non illa existimo, quæ ad nobilium causas duntaxat pertinent; minimè quidem. illa majora duco, & gravioris ponderis, quæ cæteri administri vix attingere consuefcunt; imò obducunt supercilia, contrahunt frontem, dicunt non habere otium. Causæ nempe viduarum, pupillorum, & infimæ sortis hominum, quas minores judices despiciunt, gravissimæ meo judicio censendæ sunt, & catholico Principe dignæ, ne jure conqueratur Dominus, Pupillo non judicant, & causa viduæ non ingreditur ad illos. pulchre Poëta,

Isa. c. I.

*Curia pauperibus clausa est, dat census honores,*

*Census amicitias, pauper ubique jacet.*

Quod quidem de plerisque nostri temporis potest decantari; qui nulla ratione ad opus exeunt, nisi sint auri & splendore, & sonitu excitati. Quod eleganter expressit Poëta,

*Aurea nunc verè sunt secula, plurimus auro*

*Venit honos: auro conciliatur amor.*

*Ipse licèt venias Musis comitatus Homere,*

*Si nihil attuleris, ibis Homere foras.*

Innoc.  
de mis.  
hom.lib.  
6.c.39.

Huic rei convenit non ineptè, quod refert Innocentius Pontifex, de quodam philosopho, qui cùm in vili vestimento Principis aulam adiisset, & diu pulsans, & rogans, non fuisset admissus, mutavit habitum, mox ad primam vocem patuit aditus; ille verò ad Principem accedens, pallium quod



quod gestabat frequenter osculabatur. at mirante Principe, cur ita faceret? respondit philosophus, Honorantem me honoro, quia quod virtus non potuit, vestis obtinuit, quali diceret,

*Si modò me spernis, mutata veste redibo,*

*Quod mihi non dederis, vestibus ipse dabis.*

Sed unde hoc malum? ex malis ministris, lucro tantum inhiantibus, de quibus idem Pontifex egregie loquitur, Mali ministri non attendunt merita causarum, sed pecuniarum; non quod ratio dicat, sed quod voluntas affectat; non respiciunt jura, sed munera; non justitiam, sed pecuniam. nec mirum. habent enim linguam, manus, & animos venales. tales profectò non erant, quos instituit Josaphat Rex sapientissimus; is enim creans iudices pro servanda Imperii integritate, hanc concionem habebat, Videte quid facitis? Non enim hominis exercetis iudicium, sed Domini. Et quòdcunque judicaveritis, in vos redundabit, Sit timor Domini vobiscum, & cum diligentia cuncta facite. Tales requirit Dominus quos ad magistratus assumere statuit: Provide, ait Moyse, de omni plebe viros sapientes, & timentes Deum, in quibus sit veritas, & qui oderint avaritiam. Ex eis constitue Tribunos & Centuriones. tales exquirebat David, & solos admittebat, Ambulans in via immaculata hic mihi ministrabit, & munera super innocentem non accipiens. Tales ex millibus eligebat Alexander Severus, præsides enim provinciarum quos verè laudabiles comperit, in itineribus semper secum in vehiculo habuit, & muneribus ornavit, dicens: Fures à republica pellendos, ac pauperandos; porrò integros, & insignes viros esse redimendos atque ditandos. Tales ambibat Philippus Macedonum Rex, fideles nimi-

Innoc.  
de mi-  
ser. hom.  
lib. 2. c.  
39.

2 Paral.  
c. 19.

Exod. c.  
16.

Pl. 100.  
Lam-  
prid. in  
vita A-  
lex. Sev.

Lege 30.  
C. de  
episc.

nimirum, de quibus nulla suspicio corruptelæ, qui non auro ducuntur, sed jure; non cupiditate, sed veritate; qui non pro commodis privatis, sed ob salutem Regni, & Principis ornamentum laborant, more canis venatici, qui aggreditur, & firmat leporem, non tamen occidit, sed domino servat. apposita nota, Non edendi, sed vincendi cupidus. In admittendis ministris, ita erat studiosus Rex Macedo, ut quos aliqua labe notatos comperiebat, statim ab aula regia eliminabat. Hinc est, quod cum quendam ex Antipatri amicis, in numerum judicum adscripsisset, ubi primum cognovit, illum tingere capillos, mox submovit eum, dicens: Qui in capillis fidus non esset, in rebus gerendis non est dignus, cui fides adhibeatur. Chius quidam senex in Lacedæmonem pervenit, quem cum senectutis suæ puderet, canos tinctura oblitescere conabatur, progressus igitur in publicum, de rebus, quarum gratia venerat, concionem habuit; tunc surgens Archidamus dixit: Quid ille rectum diceret, qui mendacium non in anima solum, sed in capite quoque circumfert! Vis nosse, ô Princeps, quisnam minister in aula regia sit admittendus? Consule Justinianum Imperatorem, qui luculenter illum describit his verbis, Minister debet esse à cupiditate adeò sepositus, ut quæratur cogendus, rogatus recedat, invitatus effugiat; si autem accipiat, non auro, sed juri incumbat, quoniam gloria magistratus non residet in thesauris congestis, sed in rebus præclarè gestis. ut re ipsa declaravit. Titi Labieni miles magnanimus; huic enim cum Labienus multum auri ex præda Gallica donasset, miles aurum ad pedes Labieni abiecit, & paulò deinceps, idem argenteis armillis donatus, lætus omnino abiit. contempsit aurum miles,

miles, honores amplexus est. & jure quidem. quoniam cupiditas habendi, animum profternit, & rationis judicium pervertit. ut probè noverat Scipio Æmilianus. Narrat Valerius quod cùm duo Consules contenderent in Senatu, quis de duobus, quorum alter nihil habebat, alteri nihil fatis, in Hispaniam mitteretur? tunc ait Scipio Æmilianus, omnibus ejus sententiam expectantibus, Neuter horum mihi placet. alter, quia nihil habet; alter verò, quia nihil fatis. æquè malum Imperii ministrum judicans, inopiam, & avaritiam. Quando enim Præfectus egenus est, multa extorquet, ut ditetur; quando verò avarus, multa rapit, ut os avaritiæ impleatur; at nunquam dicit, sufficit. At tales à magistratibus explodendi, utpote Reipublicæ proditores. quos Paulus vocat idololatrias. Avaritia idolorum servitus. Hujus autem rationem reddit D. Thomas, <sup>Ephes. c. 5.</sup> dicens: tunc esse idololatriam, cum honor soli Deo debitus, creaturis tribuitur. At honor duobus modis refertur in Deum, quando in eo ultimum finem statuimus, & quando in eo totam spem, & fiduciam nostram ponimus. qui secus facit, idololatriæ culpandus est: at avarus eò insanitiæ redigitur, ut creaturam pro Deo habeat, in eaque ultimum finem ponat, & totam spem constituat. Qui ergo avaritiæ servit, pro idololatra habendus, proinde ab officiis, & dignitatibus eliminandus. Et quomodo erga Principem fidelis, qui Deo est infidelis? Deum autem negat, qui avaritiæ inhians, justitiam venalem habet, & jura divina conculcat. Non enim homini plures ultimi fines esse possunt. tales ergo ministri ab aulis regiis arceantur, ne totam Rempublicam turpiter inficiant. Ad hanc rem appositè facit, quod David de corruptis

- ministris justitiam venalem habentibus, dicebat.
- Psal. 70. Quoniam non cognovi litteraturam, introibo in potentias Domini. Sed quid audio, ô sancte Vates? numquid solis ignaris cœli patebit aditus? Hieronymus legit, Quoniam non cognovi negotiationem. hoc est, quia scientiam meam venalem non habui, ut plerique judices, qui non ad justitiam, sed tantum ad quæstum oculos convertentes, leges pro libito intorquent. O venale hominum genus! prudenter ille, Vidi morbum incurabilem, ad quem curandum non invenitur medicus; sed nunquam inveni causam adeò deperditam, ad quam tuendam non inveniatur advocatus. Pulchre & luculenter Bernardus; Aliqui, ait, scire volunt, ut sciant, & hæc curiositas est; aliqui ut sciantur, & hæc vanitas est; aliqui, ut ædificentur, & hæc prudentia est; aliqui ut ædificent, & hæc charitas est; aliqui verò, ut scientiam vendant, & hic turpis quæstus est. Verum hujusmodi judices, non introibunt in potentias Domini? imò perpetuis suppliciis tradentur sine fine cruciandi, ut pulchre sub velamine ostendit
- Apoc. c. 2. Ioannes; nam recensens numerosam multitudinem Prædestinatorum, refert ex qualibet tribu duodecim millia fuisse signatos, & cum singulas referret; solam tribum Dan silentio involvit; nullum enim ex hac tribu signari vidit, ad salutem. Quid hinc? Dan idem significat, quod judex, quod oraculi divini testimonio liquet; dicit enim Sacer textus; Dan judicabit populum suum. & statim subditur: Fiat Dan coluber in via, cerasites in semita. Judex qui quasi coluber tortuosus est, pro libito leges intorquens, & quasi cerasites insidias parans, justitiæ rectitudinem non observat. talis equidem inter electorum numerum
- Bernar. in Cant. ferm. 36.
- Gen. c. 49.

rum supputandus non est, & in potentias Domini non introibit.

Princeps itaque omni studio laboret, omnes nervos intendat, pro viribus enitatur, ut miserorum querelis assistat, causis judicandis interfit, sententias recto examine ponderet, Regis Evangelici vestigiis inhærens, qui voluit ipsemet rationem ponere cum servis suis, quod summæ prudentiæ adscribendum est. noluit Rex sapiens vices suas aliis committere, sed ipse debitores suos audivit, rationes trutinavit, exactè omnia exploravit, & rebus regni miro ingenio providit. ita se gerebat Assuerus, potens ille Persarum Monarchia, iussit sibi afferri annales priorum temporum, quæ illo præsentē legerentur; solus enim Principis oculus Regni negotia, ut sua, rectè judicat, cæterorum oculi suspecti sunt. Proinde cùm sit custos justitiæ, & ad ipsum spectet summa rerum, causis miserorum incumbat, ne illi exprobetur, Noli ergo regnare. Nam supplicantis orationem non admittere, rationem amittere est. Verùm quoniam ob ingentem negotiorum molem, quibus premitur, & sæpe opprimitur Princeps, omnibus causis interesse nequit, videat saltem, provideat, inquirat, ne ministrorum incuriâ, seu potius culpâ, sanguis pauperum deglutiatur, & recta imperandi institutio corruat. Quod quidem faciliè continget, nisi legum sanctarum observatio opere compleatur. Quid enim prodest novas condere, & coacervare leges, si nunquam ad actum exercitum reducuntur? scitè admodum scripsit ille Politicus; Corruptissima Respublica, plurimæ leges. nam Tac. lib. 4 annal. experimento compertum habemus, plurimis legibus non instrui civitates, sed destrui. sanè ut miles multiplici, eaque gravi armatura oneratus, ad

pugnam ineptus efficitur, & ab hostibus facile capitur, ita profectò miseri cives multitudine sanctionum obruti, & quid agant, & quomodo se gerant, omnino ignorant, magisque spem abjiciunt, quàm concipiant observandarum legum. Huc spectat, quod Thucydides apud Stobeum refert, Arcesilaum dixisse; Ubi plurimæ leges conduntur, facili negotio contemnuntur, eò quòd cives variis, ac propemodum innumeris onerati legibus, graviter confunduntur. Sicut cibus confer-tim ingestus, non nutrit, sed onerat, nec densa pluvia terram irrigat, sed inundat; nec clavorum numerus tabulæ leviter insertus, sed unus aut alter clavus fortiter impactus, crebrisque ictibus incussus, fabricæ compingendæ accommodatus est; ita non legum multitudo, quæ obruit, sed paucarum executio, quæ proficit, in Republica instituenda est. Isocrates in Areopago dicere solebat; Non sunt legibus porticus implendæ, sed civium animi justitia, & virtute imbuendi. Homines enim rectè instituti, paucis legibus diriguntur, improbi verò, omnes leges facile aspernantur. Paucae itaque leges condantur, sed exactè observentur. Hanc sanè egregiam regnandi institutionem apprime noverrat Philosophus ille apud Thebanos insignis. Cùm enim Thebani Lacedæmoniorum legibus inviderent, eorumque Rempublicam agnoscerent florentissimam, philosophum quendam Phitonem nomine, ad Lacedæmones destinarunt, qui leges eorum attentius consideraret, & quod in illis erat admirabilius, diligenter observaret, & patriæ deinde communicaret. Cùm igitur per multos dies commoratus fuisset, singulaque seriò contemplatus, Thebas tandem reversus est, mox omnes ad audienda mirabilia, aures accommodant. At ille

Senatum

Senatum ingressus, compedes, catenas, equuleos; plurimaeque id genus, instrumenta coram illis proposuit, quo facto, nullo habito verbo, Senatu egressus, statim se proripuit. Verum Thebani facti hujus novitatem demirati, enixè postulant, ut rationem legationis reddat, & quidnam sibi velint instrumenta illa, protinus aperiat. Tunc Philosophus hac ad eos oratione usus est, Misistis me Thebani cives clarissimi in Lacedaemoniam, ut leges, instituta, & quidquid Respublica illa laudabile haberet, ad vos transferrem; ego autem utilius esse duxi, justitiæ instrumenta vobis afferre; non enim legibus, sed executione legum indigemus. Quid prodest tot leges coacervare, si legum transgressores nullas poenas luunt? Quorsum tot virgæ, si nec rectæ, nec vigilantes sunt? hinc in dies pullulant impia facinora, quoniam nimia indulgentia homines reddit ad vitia proniores. Nullus unquam Orator posset oratione complecti, quantum ponderis habeat suppliciorum meditatio, etiam apud magnates. divina auctoritate hoc probatur. Nam cum filii Israël fornicarentur cum filiabus Moab, & ab eisdem ad deorum cultum invitarentur, tunc Deus ad iracundiam provocatus, mox præcepit Moyse, ut de tam nefario flagitio vindictam sumeret, dicens: Tolle cunctos Principes populi, & suspende eos contra solem in patibulis. Quid hinc? Visa hac gravi animadversione, tantus omnes invasit timor, ut deinceps in idem peccatum nullus legatur relapsus. Verum est enim quod per omnium ora decantatur, Poena unius, metus multorum. Cedrenus celebris historicus insigne quoddam refert memoratu dignum, huic rei valdè appositum. Cum pauperes sub Mauritio Imperatore à potentibus opprimerentur,

nec Imperator monitis, & rescriptis proficeret, querelisque undique premeretur, convocatis aliquando in curiam potentibus, orationem ad eos habuit; cujus ea conclusio fuit, Quodsi præceptis suis parere nollent, sed suis obsequi cupiditatibus, alium sibi suo arbitrio deligerent Imperatorem. Ego enim, inquit, contumacibus, injustis, & aliena violentibus imperare nolo. Tunc quidam procerum, libertate dicendi sumpta, ita Imperatorem alloquitur, Constitue me coram omnibus præfectum urbis, mandaque ne cujusquam rationem potiore justitia habeam, utque mihi te de rebus necessariis monituro semper aditus pateat, recipio me effecturum intra mensem, ne ulla sit vel illata in urbe, vel accepta injuria. quodsi quis proferat culpam, quam mihi indicatam non punierim, capite me plecti jubeo. Pergratum id Imperatori fuit, eumque præfectum urbis constituit. Is ergo cum mane pro tribunali sederet, & quædam vidua quereretur, se à magistratu quodam omnibus suis facultatibus spoliata, mittit eam cum sigillo ad magistrum illum, jubetque eum ad dicendam causam venire: at cum eandem viduam malè mulctatam remisisset, mittit Præfectus ad eum de cursoribus unum, sed hunc quoque verbis delusum demittit. Interim dum Præfectus in circo sederet, magister ab Imperatore ad convivium vocatur, eodem se Præfectus quoque confert, aitque Imperatori, Si in eo Imperator persistis, quod mihi mandasti, ne cui eorum, qui pauperes concutiunt, parcam, scito me promissis satisfacturum; sin eos, tu poenitentiam ductus, amicos potius habeas, & conviviis adhibeas, scias me quoque detrectare ea, quæ in me recepi. Imperatore respondente, ut seipsum  
potius



potius folio detraheret, si fontem talis criminis sciret. Præfectus illico magistrum vi abripuit, & in curiam cum eo abiit. ibi diligenter utriusque sermone considerato; cum haud levibus injuriis ab eo affectam mulierem comperisset, verberibus impositis, homini caput rasit, asinoque nudum impositum, per mediam urbem velut in triumpho duxit; & omnes ejus opes mulieri addixit. hoc exemplo reliquos ita in viam redegit, ut ubique summa in pace viveretur, atque intra trigesimum diem, neque actor ullus esset, neque reus injuriarum. Tunc Præfectus Imperatori significat, se promissa implevisse, & Imperator in publicum progressus, cum nulla querela audiretur, patritia dignitate eum ornat, & per omnem ejus vitam Præfectum Urbis esse jubet. Utinam Principes talibus ministris uterentur, qui justè judicarent, non utique tot flagitia impune emergerent. Hæc est vera regnandi institutio. Proinde Solon interrogatus, quodnam esset inclytum, & excellens regnum? illud esse, respondit, in quo bonis præmia proponebantur; improbi verò pœna, ac supplicio afficiebantur sine ullo personarum delectu.

Princeps itaque qui diu & feliciter principatum administrare exoptat, ministros in primis exquirat probata integritate insignes, non aurum sitientes; isti enim non clientelis, sed clitellis onerandi sunt, cum magis latrocinium, quam patrocinium exerçant. Ministrorum autem incorrupta justitia honoribus, ac beneficiis fovenda. Si quidem hæc sola est firmamentum Imperii, pax populorum, impunitas innocentium, horror impiorum, bonorum omnium fundamentum, qua duce, ac comite, quasi quodam pabulo, ars

omnis imperandi nutritur, roboratur, longè latèque propagatur.

*Eligat insignes Princeps probitate ministros,*

*Quales elegit, instituitque David.*

*Non quos sacrasames invasit turpiter auri,*

*Sed sint custodes, integritate, fide.*

## C A P U T X.

*In arduis rebus peragendis, optimos Consiliarios,  
tanquam Regni Custodes. exquirat Princeps:  
& dilatabitur Regnum ejus.*



Ux Consilium appellavit veri Principatus baculum, sine quo Respublica diu nequit consistere, meo quidem judicio, sapienter admodum locutus est. Siquidem cum Princeps solus, non possit omnia sci-

Thom.  
in 1.2.q.  
14.

re, multorum consilio utatur oportet: ex tot enim sapientibus, qui per omne ævum floruerunt, nemo adhuc post homines natos inventus est, qui se omnia scire profiteretur, & qui prudentum virorum consilio non indigeret. Proinde cum Præsides in summo dignitatis fastigio constituti, non valeant singula prospicere, cuncta investigare, & tandem in uno homine non possint singula absoluta esse,

Arist. in  
3. ethic.  
c. 3.

propterea non ex omni parte perfecti; nam Cæsar notatur ambitionis, Alexander temulentia, Pyrrhus iracundia, Annibal perfidia, Fabius tarditatis, idcirco plurimis consiliis indigent, sed amicorum, qui fideliter consulant, & quod ipse solus nescit, ipsi perficiant. Quod eleganti sanè exemplo probavit Zeuxis, pictor ille insignis, cum simulachram

lachrum Helenæ pingēret, ex variis namque puel-  
lis perfectam imaginem delineavit, non satis esse  
ducens unius exemplar. sic prorsus contingit in  
regimine principatus, nam alium iustitia, alium  
fortitudo, alium prudentia commendatum efficit;  
unus autem qui virtutes omnes complectatur, &  
cui nihil desit, nondum (ut arbitror) inventus est.  
hinc Aristoteles refert, Herculem inter duos &  
septuaginta liberos, foeminam unam genuisse,  
quia nullus quamvis praeclaris dotibus insignis,  
valet perfecte omnia absolvere. Siquidem in hac  
terrestri plaga, in qua omnia coagmentantur ex  
actu & potentia, vel, ut more Pythagorico lo-  
quar, ex pari & impari, ex dextro & sinistro,  
ex masculo & foemina, nihil potest esse ex omni  
parte absolutum; non aurum sine faece, non ar-  
gentum sine scoria, non vinum sine flocibus, non  
rosa sine spinis. Cum itaque stipantur Principes,  
quasi custodia tuta, consiliariis multis, hisque &  
eruditione, & integritate ornatis, tunc, qui pridie  
duos tantum oculos, binas manus, ac pedes habe-  
bant, & proinde non omnia attingere poterant,  
coactis, quasi in unum coetum, multorum oculis, ac  
manibus, universa commodius, & clarius lustrare,  
& contrectare possunt. Sic enim in unum collati,  
quasi unum hominem praestant, qui multiplici in-  
genio pollet, qui oculis pluribus cernit, qui opera-  
tur manibus multis, & qui pedibus pene infinitis  
graditur. Quod quidem insigni emblemate mu-  
tuum auxilium adumbrante, descripsit Alciatus in-  
ter Jurisconsultos clarissimus.

Arist. de  
hist. ani-  
mal. lib.  
7, c. 6.

*Loripedem sublatum humeris fert lumine captus,  
Et socii haec oculis munera retribuit.*

*Quo caret alteruter, concors sic praestat uterque,  
Mutuat hic oculos, mutuat ille pedes.*

L 5

Dum

Dum cæcus, & claudus, inquit Alciatus, ad ripam cujusdam fluminis simul essent, ad alteram transferri cupientes, unusquisque autem solus nequireret; claudus enim pedibus, cæcus verò oculis carebat, ita sibi invicem ingeniosè subvenerunt, cæcus claudum humeris imposuit, at claudus cæco viam demonstrabat, sicque mutuis auxiliis ad optatam fluminis ripam pervenerunt. quibus satis appositè quadrat nota, Neuter solus. Quorsum gemina membra in nobis Deus esse voluit? binas aures, totidem oculos, manus, pedes? nimirum, ut alter alterum juvaret, cùm res postulasset. quam mutuam opem docent etiam bruta in gruibus, cervis, & aliis ferè omnibus. Grues quidem, sic turmatim volant, cùm novas ædes transmarinas petunt, ut sibi mutuò innitantur, sed ita, ut quæ prima agmen ducit, ubi defatigari incipit, eò quòd nulli innixa fuerit, ad extremam redeat, cui tantisper incumbat, donec omnibus id successivè facientibus, iterum prima fiat. hoc idem observatur in cervis, ut luculenter exprimit academicus Intentus, habens pro insigni cervos quamplures flumen transvadare contendentes, apposita hac nota, Per mutua nixi. si enim Augustino credimus, quando ratione pabuli aliquod flumen transmeare coguntur, solonaturæ ductu, alter alterius onus portat, quia unus super alium, caput reclinat; ille verò qui quasi dux omnes alios præit, cùm defatigatus fuerit, ad posteriorem se confert, & super ipsum caput inclinat, & sic vicissim sibi auxilium subministrantes omnes gregatim feliciter transeunt, adeò ut mutuus amor sit illis, loco navis; quasi rationis præsidio utantur, sed re vera non ratione, sed instinctu naturæ moventur. Verùm licèt animalia bruta, ratione & prudentia

dentia non utantur, habent tamen operum suorum ducem & rectorem ipsum Deum naturæ auctorem; ideoque non est mirum, si quædam conficiunt tam mirò artificio elaborata, ut hirundines nidos, araneæ telas, formicæ horrea, apes favos mellis, ducuntur enim ab intelligentia non errante, hinc apud philosophos circumfertur tritum illud axioma, Opus naturæ, opus intelligentiæ. hoc idem ferè accidit in summa rerum administranda, in qua, quia vident plus oculi quam oculus; consilii ope opus est. ita consulente sapientissimo Prov. c. 24. Vate: Ubi multa consilia, ibi salus. Proinde Plutarchus in Philosophia morali nulli secundus, Trajano suadebat, ut in negotiis socios adhiberet. Corn Tac. lib. 1. annal. Cùm enim Princeps gravia pertractet, proprios humeros consulere debet, quid ferre valeant, pro comperto habens, magna negotia magnis egere adjutoribus. manus manum lavat, inquit adagium. Ad Dei conditionem prope accederet, qui nullo indigeret, sibi que sufficiens esset. Nam experimento compertum est, nullam provinciam omnibus sibi necessariis abundare, sed in hac aurum, & argentum; in alia vinum & oleum. In Oriente cælo benignius influente, gignuntur margaritæ, at in Occidente metalla; Arabia phœnicem, Ægyptus crocodilum, Africa leones producit. Sol inter astra cœli, nonne primum locum obtinet? at non potest vel unicum folium producere, nisi terræ & aquæ auxilio interveniente, nec terra ex suis visceribus aurum profert, nec mare è sinu suo gemmas educet, nisi Solis comite virtute. bene Academicus, Non sufficit alter.

*India mittit ebur, molles sua thura Sabæi,  
Fluminibus salices, crassique paludibus alni,*

*. Nascuntur steriles saxosis montibus orni,*

*Littora*

*Littora myrtetis latissima, denique apertos*

*Bacchus amat colles, aquilonem & frigora taxi.*

Sed quare hoc? ut una provincia indigeat alterâ, & mutuo convictu jungatur. In gratuitis simi-

1 Cor. 2. le quid factum cernimus; noluit enim Deus, ut aliquis sibi sufficeret, sed alterius indigeret ope,

Eccl. 2. idcirco dona sua divisit. Alii quidem datur sermo sapientiæ, alii scientiæ, alii gratia sanitarum, alii operatio virtutum. hinc Apostolos binos mittebat, ut ostenderet, quod nemo sibi sufficit, sed fratris indiget auxilio; Frater enim sic dicitur, quasi ferens alterum. Sapientissimi Regis testi-

monio, Frater adjutus à fratre, quasi turris firma. Quod experimento probavit Moyses dux præstantissimus, sic narrat sacer textus, Venit Ietro socer Moysis in desertum, ut Moysen videret, quem videns tota die occupari, in omnium litibus audiendis, ait ei; Non bonam rem facis, stulto labore consumeris, ultra vires tuas est negotium, solus illud non poteris sustinere, sed audi verba mea,

Exod. c. 18.

& erit Dominus tecum. Esto tu populo in his, quæ ad Deum pertinent, provide autem de plebe, viros sapientes, & timentes Deum, in quibus sit veritas, qui oderint avaritiam, & qui judicent populum in omni tempore. si hoc feceris, implebis præceptum Dei. quibus auditis fecit Moyses

August. de doct. Christiana lib. 1.

omnia quæ illi suggererat. Hoc exemplum expendens Augustinus admirabatur dicens: Loquebatur Deus quotidie facie ad faciem cum Moyse, sicut loqui solet amicus ad amicum, eumque monebat de minimis rebus, qua ergo ratione non ei dedit consilium hoc, quod Ietro dedit? proculdubio ostendere voluit Deus, neminem ipsi adeo familiarem esse, ut ope alterius hominis non indigeat. Utinam Principes Christiani, quando singulis

gulis vires non sufficiunt, sibi invicem opem ferrent, ut animo concordii, juratos Christiani nominis hostes funditus delerent, & radicitus evellerent, aut saltem illorum conatus eluderent, & tot animas captivas ab impio detestandi Mahometis jugo extraherent. Nonne miseri quotidiano experimento probamus, quod ex dissidiis Christianorum, quasi spectatorem agens, suam non parùm ditionem auget? quod Georgius Sabinus graphicè expresse hoc Hexasticho,

*Mutua discordes faciebant praelia turdi,  
Acris & alitibus pugna duobus erat.  
Vidit, ut amborum prædo certamina nissus,  
Vnguibus, & rostro dilaniavit aves.  
Sic modò, dum faciunt discordes praelia Reges,  
Turcius Europa diripit hostis opes.*

Hoc idemmet alter poëta, temporum nostrorum calamitatem deplorans, eleganter cecinit,

*Gallia cui paret, cui paret Betica tellus  
Jam conferre manum Marte furente parant,  
Jamque animis, & jam concurrunt fortibus armis,  
Turbidus ut jam jam sanguine Sabis eat.  
Et tamen amborum cervicibus imminet hostis  
Thracius in pharetris acer, & acer equis.  
Qui majus nil mente petit, nil voce precatur,  
Quàm semel ut pugnent hi duo Marte pari.  
Sperat enim nostris confractis viribus omnem  
Europam parvo posse labore premi.  
Illius ergo Duces in pectora vertite ferrum,  
Sternere qui telis ardet utrumque suis.*

Hoc autem non contingeret, si Principes in unum collati, adversus hostem communem mutuis viribus praelia dirigerent, adhibitis semper prudentum virorum consiliis.

Nec erubescat, in rebus præsertim arduis, inferiores

riores etiam consulere, licet ipse acutissimo ingenio polleat: sæpe enim & olitor est opportuna locutus. Optimi siquidem gubernatoris esse duco, in maximis tempestatibus vectores quoque consulere; alienum enim consilium negligere, temeritatis indicium. Occurrat menti senex ille venerabilis, quem Divus Ioannes supra thronum sedentem vidit: iste universo orbi præsidebat, proinde senibus quasi consiliariis undique erat stipatus. Quid hinc? ut doceret, quod in excelsa fastigio collocati, à latere semper habeant viros consulentes, non tamen sanguine conjunctiores, sed virtute eminentiores, cum quibus omnia ad regimen spectantia conferant. Si enim Princeps, utpote homo, quid facturus sit, quandoque hæsitaverit, illorum sapientiâ fulcietur; si vero ipse probè noverit, aliorum tamen consilio perficietur, oraculo divino præscribente, Audiens sapiens, sapientior erit. hoc namque est maximum sapientis argumentum, in rebus seriis aliorum adhibere consilia. hinc Salomon cor docile enixè postulabat. Dabis servo tuo cor docile. alii transferunt, Dabis cor cum auribus, hoc est, consilia aliorum libenter auscultans. siquidem valde periculosum est Principi, propriæ solertiæ inniti, & præ nimia sui fiducia alienum negligere consilium, ne contingat quod Imperatori Cæsari; hic enim sua virtute fretus, amicorum monita contempsit, qui rogabant; ut suæ salutis custodes adhiberet, sed exitus docuit, facilius esse mortem prævideri, quam morti provideri. ita quoque contigit Alexandro, nam cum à Chaldæis per Nearchum monitus esset, ne ad Babylonem accederet, quod immineret exitus infelix, ipse autem consilium sprevisset, paucorum dierum curriculo, in medio victoriarum

rum



rum cursu veneno sublatus est, quartum & trigesimum annum agens, robore corporis simul, & animi virtute florens.

At fortasse dices, non esse privati hominis Principem emendare, in rebusque peragendis consulere, sed ratio hæc non concludit. quia dicam ego, Nonne est privati hominis, Principi ægrotanti medicinam præstare? ergone Princeps alius accersendus est, qui tangat venas, exploret pulsum, pharmacum componat, ipsumque porrigat? Quamvis Princeps sit magna sapientia præditus, quia tamen aliena consilia admittit, non proinde minuitur ejus magnitudo, sed viget, clarescit, & potius illustratur. Quod præstantissimorum Principum exemplis facile comprobatur. Quis unquam sapientior Salomone? Consiliarios tamen sapientes semper habuit, à latere nunquam recedentes. hinc discant Reges, quos posuit Deus custodes populorum, negotia magni ponderis, absque multorum consilio non expedire, quoniam qui sapiens est, audit consilia. Naaman Syriæ Princeps, quomodo à lepra mundatus fuit? quia servorum prudens consilium non respuit. tanti valet consilium, si quis sapienter eo utatur. Alexander ob rerum præclarè gestarum gloriam, cognomèto Magnus, nonne pollebat admirabili ingenii acumine? nihil tamen ferè agebat sine Aristotelis consilio. Prov. 12.

Pericles dux clarissimus magistrum habuit Anaxagoram, cujus consiliis frequentissimè utebatur, non modò in rebus urbanis, verùm etiam bellicis, quibus cùm esset egregiè intentus, audiretque Anaxagoram diuturnæ vitæ tædio, per incediam mortem sibi consciscere velle, ad eum protinus advolavit, precibusque & lachrymis obsecra-  
vit,

Franc.  
Sen. lib.  
2 de  
reg. &  
repub.

vit, ut si non sibi; saltem Pericli vivere vellet, quem consiliorum socium in regimine optaret.

Brufon.  
lib. 3. c.  
31.

Dionysius tyrannus ad sævitiam natus, ita Platonis erat addictus consiliis, ut ei in Siciliam naviganti obuius progrediretur magno Principum comitatu, in rebus arduis consulendi gratiâ, à quo multa didicisse, vel hoc ipso testatus esse videtur, quod cum eiectus esset è Regno, petereturque à quibusdam, Quid tibi Plato, & philosophia prouit? audacter respondit, Ut æquo animo feram tantam fortunæ mutabilitatem.

Rex Antigonus Zenoni Stoico litteras dedit, ad hanc sententiam, Ego fortunæ ac gloriæ magnitudine te supero; sed tu sapientia, & perfecta quadam felicitate longè præstantior es. Proinde oro, ut ad me venias, discipulumque habeas: nam qui Regem ritè docet, universum etiam populum cui præest, bene instituit. jam tædio habebat iste Princeps ignavam adulatorum vanitatem, quibus regni omnes semper abundant; idcirco Stoicum accersire optabat, quem in consilio haberet, & libere loquentem audiret. Optimi siquidem Principis est, viris prudentiâ præstantibus, liberio rem quandam loquendi potestatem facere, ut in rebus seriis libere, ac sine metu salubre consilium afferant. Quapropter Demetrius Phaleræus Ptolemæum Regem frequenter hortabatur, ut pararet sibi libros, de Regno, deque militari imperio tractantes, eosque diligenter eolveret, quia illa, de quibus amici non audent admonere Reges, in libris habentur inscripta. ita sentiebat Alphonsus Siciliæ Rex, qui dictitabat, mortuos esse optimos Consiliarios, libros nimirum, à quibus sine metu, quæ opportuna sint, fideliter audiret, non tamen vivorum consilia negli-

Laërt.  
lib. 5. c. 5.

Panorm.  
lib. 3 de  
reb. gest.  
Alphon-  
si.

negligebat, sine quibus nihil penitus decernebat.

Pyrrhus Epirotarum Rex inclytus sæpenumero Brufon. li. 4. c. 31. dicebat, plures urbes Cyneæ oratoris eloquentiâ, & consilio cepisse, quàm nervis & viribus exercitûs armati. Sciebat nimirum, res grandes imperii, non tantùm viribus perfici, sed arte & ingenio. homo pusillus nonne ingentes elephantes capit? nonne indomitos equos frenat? nonne boves subjicit aratris? volucres de cœlo dejicit? ac denique quod etiam in imo fluminis latitat, homo hamo extrahit? ita enim comparatum est, ut vires cedant ingenio. hinc solvitur quæsitum illud; Cur unus Demosthenes Philippo Regi majori erat terrori, quàm universa Græcia? quia non ingenium superatur viribus, sed vires ingenio. Parva sunt arma foris, dicebat Romanus orator, Tall. li. 1 de offic. nisi consilium sit domi. Cur Alexander tam frequentes & ingentes victorias obtinuit? quia prudentum consilio cuncta agebat. De ipso enim tradunt historici, quod cùm ad prælium iturus, exercitum conflaret, non quoslibet admittebat, Trog. Pomp. lib. 11. licet viriùm robore præstantes, sed veteranos tantùm, qui cum patre, patruoque militaverant, adeò ut non milites, sed militiæ magistros putares. ordines quoque nemo nisi sexagenarius duxit. itaque nemo fugam in prælio, sed victoriam cogitavit, nec alicui in pedibus quidquam spèi, sed in lacertis fuit. Non autem sic de viribus Darii. quid mirum, si victor ille, iste victus fuit? tanti valet ingenium.

Hinc Romulus statim ac Urbem condidit, centum ex senioribus elegit, quorum consilio omnia ageret, & hos Senatores appellavit. Innocentius Lud. Gran. in phil. moral. Papa octavus imparem se tanto oneri animadvertens, duodecim consiliarios elegit, sine quorum

M

confi-

consilio nihil prorsus decernebat. Agésilæus Lacedæmoniorum Rex, interrogatus, quas res Imperatorem habere oportet, dixit: Adversus hostes audaciam; erga subditos benevolentiam, in opportunitate rationem & consilium. Sciebat enim quod sicut in Principatu beatissimum est, non cogi, ita miserrimum non suaderi. Et in hac infamia, proh dolor! versantur plurimi, qui ut fortunâ, sic & sensibus super alios se putant. De quibus Sapiens, Via stulti recta in oculis ejus; qui autem sapiens est, audit consilia. imò nonnulli ita mentis inopes, ut etiam post consilia, ne alienæ sententiæ egere videantur, in diversa, & deteriora rapiantur. Inter quos (instar omnium) prodeat Xerxes ille, qui Græcis bellum indicturus, adhibitis Asiæ Principibus; Ne viderer, inquit, meo tantum usus consilio, vos contraxi, cæterum mementote, parendum vobis magis esse, quàm suadendum. Quid autem acciderit ob consilii inopiam, exitus belli conprobavit. Porro quanti referat consilium summâ prudentiâ comitatum, egregiè noverrat Alexander ille Farnesius, Italiæ splendor eximius, Europæ fulgentissimum lumen, unicum belli fulmen, perpetua militiæ gloria, nunquam victus, semper victor, nunquam animo fractus, cui egregiè convenit elogium,

*Etiam si fractus illabatur orbis,*

*Impavidum ferient ruine.*

Dux iste Serenissimus nunquam res grandes aggredebatur, quin priùs secum maturè provideret, quæ possent contingere, & licet prudentissimus esset, nihil tamen moliebatur, non audito priùs aliorum consilio. Laudet pro libito antiquitas Imperatores suos, nostra hæc ætas Farnesio duce gloriatur, in quo uno virtutes omnes, tanquam

Prov.  
c. 12.  
Valer. li.  
5. c. 9.

quam in proprio domicilio enituerunt. Præclara quidem gessit Alexander Macedo, sed magis feliciter, quam prudenter; ducebatur enim à fortuna magis, quam à consilio. Alexander Farnesius nihil imprudenter, omnia cum consilio. Annibal Carthaginensis ducis officio egregiè functus, qui ter Romanas fregit vires, at novissimè acta oblitterarunt prima. In Duce Farnesio omnia ad extremum usque gloriosa. Fabius Maximus laudibus extollitur, quia ipse cunctando restituit rem. Farnesius fortiter pugnando, & opportunè cunctando sæpe victoriam obtinuit. Pompejus strenuè belando aliquando vicit, non tamen novit prosequi victoriam. Farnesius animosè pugnando superabat hostes, non tamen victoriis intumescibat. claruerunt alii duces corporis robore, alii ingenii viribus. Farnesius ingenio simul & corpore. Novit Anverpia, novit Gallia Belgica, novit alia Gallia, quam strenuè pugnaverit dux invictissimus. at quibus auxiliis? prudentiâ duce, comite consilio. Quocirca Romani Principes Consules dicebantur, vel à consulendo civitatibus, vel à regendo cuncta cum consilio. Quoniam consiliis sapientum respublica regitur, conservatur, augetur; ut pulchre scribit Augustinus de Themistocle, qui cum interrogaretur, an sciret canere nervis? & diceret, se nescire, adjecit importunus, Quid igitur nosti? respondit vir sapiens, Novi rempublicam ex parva magnam facere, arte nimirum, ingenio, & consilio. Alexander Severus Imperator tanti faciebat optimorum consilia, ut nullam sanciret legem sine viginti viris, hisque prudentissimis, nec ulla in re judicium ferebat, quin prius iret per sententias singulorum, & scriberetur quid quisque dixisset. An autem

Aug. de  
civ. Dei  
lib. 5.  
c. 12.

Aug. ad  
Diosc.  
epist. 38.

hæc fuerit optima regiminis institutio, rerum feliciter gestarum exitus comprobavit. Noverat enim egregius Imperator, quod hisce præsiidiis stipatus Princeps, prospere, & diu firmabit Regnum. Proinde consiliarii à Demosthene comparantur canibus, nec falsò id quidem; nam sicut canes custodiunt gregem, ita illi Regnum, sine quibus omnino corruunt Imperia. Hoc probè intelligebat Philippus Macedo, idcirco summâ ope nitebatur, sapientibus viris hostes orbare, quorum consilio civitates reddebantur inexpugnabiles. propterea dum Athenienses obsideret, destinavit Legatos, qui hæc verba referrent, Si pacem civitatis vestræ diligitis, decem oratores quos elegero, mihi tradite. quibus verbis auditis, famâ per totam urbem volitante, Demosthenes in medium prorumpens, frequentiam populi sic allocutus est, Viri Athenienses, conferebat tempore quodam lupo cum pastore, lupo fraudulenter agens, dixit pastori, Controversiam totam, quæ est inter nos, canes tui procurant, hos si mihi tradere volueris, nulla deinceps erit inter nos concertatio. Credidit pastor, & datis canibus; qui custodiebant oves, ovile statim dissipatum est. Idem vobis accidet Athenienses, Philippus Macedo lupo est rapax, vos omnes estis oves, nos philosophi canes sumus, quos sibi quasi infensos postulat tribui. Sed quid facit hic apologus ad rem nostram? hoc nimirum, ut Princeps benevolentia & beneficiis foveat Consiliarios, utpote tutos Regnorum custodes. Quod bene animadvertens Theopompus Spartanorum Rex prudentissimus, tantum honoris tribuit suis Senatoribus, ut Ephoros instituens, magnam partem Regni illis adjunxerit, cum summa auctoritate Imperii. At cum Regis uxor id ægre ferret, quod

quòd Regnum angustius relinqueret liberis ; imò latius, respondit, & firmitus relinquam : quippe qui consilio, & auctoritate Senatùs, non potentiâ & viribus magnitudinem Regni definiebat.

Cur Homerus Ulyssi Minervam comitem facit? ut ostendat Ulyssem, sapientiâ comite, pericula omnia superasse. Optimo namque consilio quasi Minervæ clypeo, Principes constipati, universos scopulos effugient, at sine consilii adminiculo præcipites corruunt. ita Lyricus,

*Vix consili expers mole ruit suâ.*

Longè majora geruntur paucorum consilio, quàm viribus fortissimorum. quod Homeri sententia comprobatur, dum inducit Agamemnonem asserentem, longè facilius esse rem Trojanam evertere, si decem Nestores, aut Ulysses in consilio haberet, quàm si totidem Ajaces, & Achilles fortiter dimicantes. Hoc itidem expressit Alciatus egregio emblemate. Pinxit hinc Ulyssem in consiliis agendis prudentissimum; illinc verò fortissimum Græcorum Diomedem. hoc addito symbolo, Unum nihil, duos plurimum posse. hoc est, consilium sine robore parùm, robur sine consilio nihil. at ubi utrumque confluerit, tunc præclarum quid efficitur. Veteres quoque dum prudentem virum referre vellent, duplicem pinxere Mercurium, juniorem unum, seniore alterum; hic consilium & prudentiam senibus propriam designabat; ille vires & robur, quod in flore viget juvenili. Sensus itaque ænigmati erat, eum, in quo vires & consilium connubium inière, perfectum & egregium ducem esse, at longè consilium superat vires. Proinde verissimum semper judicavi illud Sallustii dictum, Omnia Regna, civitates, nationes usque eò prosperum habuere Imperium,

Franc.  
Sen. de  
regno.  
& rep.

2 Paral.  
c.4.

dum apud eos vera consilia valuerunt ; at ubi gratia , timor , voluptas , ea corrumpere , brevi temporis intervallo imminutæ opes , deinde sublatum Imperium , postremò jugum servitutis impositum. ut experimento probavit Rex Roboamus Salomonis filius ; is enim à populo derelictus , magnam Regni partem amisit , quia seniorum , & saniorum consilia neglexit. Cur Rex Chaldæorum tot miseriis obnoxius ad terram usque prostratus ? quia eò amentia devenit , ut optima sapientum consilia contemneret. Romanum quoque imperium quamdiu floruit ? quousque cives bonis consiliariis usi fuerunt , honestèque vixerunt. Nam plures republicæ , ait Xenophon , sunt funditus everse administrantium culpâ , quàm hostium atrocitate. Etenim Athenas non hostis foris , sed intus civium evertit invidia. Spartam non peregrinorum bellum , sed Spartanorum sustulit avaritia. Ilium denique non Græcia , sed Paridis perdidit libido. Quapropter omni præsidio firmius est imperium , ubi prudentum vivitur consilio. Ubi autem consilii inopia , quid mirum , si inde emergit omnium malorum copia ?

Cæsar primus Romanorum Imperator , cur in Senatu trucidatus infelicitèr occubuit ? in promptu causa est , quia Spuriæ consilium irrisit ; is enim monuit Cæsarem , ut caveret discrimen ingens , quod ultra Calendas Martii non protraheretur. eo ipso die , dum in Senatum iret , fortè Spurinam obvium habuit. Quid ais , inquit , quasi irridens , nonne Calendæ Martiæ advenere ? Ita quidem , respondit , advenere , sed nondum præteriêre. nec mentitus , quia vix Senatum ingressus , viginti tribus vulneribus confossus , miserrimè animam exhalavit.

Quam



Quàm bene agebatur cum Xerxe potentissimo Rege, si amici consilio acquievisset. is cum Græcis bellum indixisset, & proinde copias parasset innumeras; septuaginta enim millia è regno armaverat, triginta millia deauxiliis, & centum millia navium habuerat. Sed quid? blandientium adulationibus allectus & elatus, famam & exercitum infeliciter amisit. Quidam dicebant, Græcos nuntium belli non expectaturos, sed ad primam adventûs famam, terga versuros; alii asserbant Græciam non tantum vinci, sed mole exercitûs opprimi; non defuere assentatores, qui dicerent, vix naturam rerum sufficere, angusta esse classibus maria, militibus castra, equitibus campos, vixque cælum patere sagittis; alii verò potentiam Regis extollentes, timendum esse, dixerunt, ne urbes vacuas invenirent, futurum enim esse, putabant, ut Græci relictis habitationibus, fugam arriperent, domosque desertas relinquerent. Demum dum Regem his vocibus nimiam elatione furem concitarent, Demaratus Lacedæmonius dixit: Ingens ista multitudo, quæ tibi placet, ô Rex, valde metuenda est, utpote quæ non vires, sed pondus habet. notum est enim illud adagium, Immodica aut nunquam, aut difficulter possunt regi, nec diu durare potest, quod regi non potest. Porro à tramite veritatis non deflexit. Acciderunt enim omnia, quæ Demaratus prædixerat. Itaque stratus per totam Græciam Xerxes, tandem intellexit, sed serò, quantum ab exercitu turba distaret, & tunc pudore, quam damno miserior, Demarato gratias egit, quod solus vera nuntiasset. Mirum profectò, & penè incredibile dictu, Rex qui tam numerofo exercitu florebat, per totum quin-

Thog.  
Pomp.  
lib. 3.

quennium congregato, quàm multitudinem è specula aspiciens, plorasse fertur, quod nullus ex tot militibus, spatio centum annorum esset superfuturus, qui navium copiâ totum Hellespontum operuit. apud Thermopylas tamen à quatuor millibus hominum victus fuit, & qui antea tot maria navibus sternebat, vix parvâ cymbâ effugere potuit. At tantæ infelicitatis quæ causa fuit? blandum consilium, prava adulatio. rectiùs sibi consulisset miser homo, si spretis adulationibus, Demarati consilio aures accommodasset. Quonam furore ducebatur Nero, sævitix portentum, ad tot impia facinora perpetranda? quia mentem habebat expertem consilii, nec vera consulentes admittebat: existimabat enim iste misellus, in tanta potentia, omnia sibi pro libito licere; propterea neglectis consiliis, ad nefanda quæque scelera præceps ruebat. pulchre Claudianus Principi consulebat,

*Non tibi quod libeat, sed quod fecisse decebit  
Occurrat, mentemque domet respectus honesti.*

Quare operæ pretium duco, ut Princeps pro summa rei ritè administranda; non adulatoribus aures præbeat, non proprio tantùm ingenio confidat, sed prudentibus consiliariis utatur, qui veritatem sincerè & libere pronuncient; non multis, & phaleratis verbis, sed paucis, at magni ponderis, ne mentem Principis confundant; non enim debet fieri per plura, quod potest fieri per pauciora, & æquè bene. Rex Agesilæus cùm declamantem audiret, qui ex mulca faceret elephantem, remque nullius ponderis in longum protraheret, indignabundus concione se subduxit, dicens: Egregium cerdonem, qui tantillo pedi, tam amplum adaptat calceum. Hinc laudari solent literæ

Arist. li.  
2. phy-  
sic.

teræ Laconicæ, quæ brevi compendio, magnum sensum includunt. quarum aliquas posteritati mandavit scriptorum diligentia. Inter quas sunt illæ Lyfandri ducis, quibus Ephoros certiores reddebat victoriæ de Atheniensibus partæ. litterarum series hæc est, Captæ sunt Athenæ. cui Lacedæmones rescripsere, Sat est capi. En gratus omnium auribus Laconismus, & verbosæ deductiones insipidæ. Philippo Regi de multis sciscitanti his verbis responderunt, ad id, quod scripsisti, Non. ad prolixam Regis epistolam unica syllaba responderunt, quàm grandibus litteris pinxerant, ut expleret justum epistolæ spatium. iterum Philippo ab eisdem per epistolam petenti, utro modo vellet, ut veniret ad illos, hostili, an amico? Laconicâ brevitate responderunt, Neutro modo. Julius Cæsar cùm in bello civili Pharnacem primo congressu vicisset, Laconicâ brevitate ad suos scripsit, Veni, vidi, vici. De Phocione, cujus dicendi vim admiratæ sunt Athenæ, referunt historici, quòd hic theatro jam pleno, expectatus ut oraret, obambulabat foris cogitabundus, intentus in hoc unum, ut circumcisâ undique oratione, eò sententiis angustior esse videretur, quò esset angustior verbis: sicque, dum in eum omnes oratenerent, expectarentque oracula; crebris ipse sententiis non tam orare, quàm de cælo in terras velut novus Jupiter tonare & fulgurare videretur. ita planè Consilarii cum Principe in rebus seriò gerendis, non verba ventosa effutiant, sed pauca; omnia tamen ad salutem Principis spectantia. hoc verò egregiè præstabunt, si tales existent, quales instituebat Rex David, qui velut Argus diligenter exquirebat in toto Regno electos ex millibus, nullâ suspitionis labe in-

Pl. 120. feſtos, dicebatque familiaribus, Oculi mei ad fi-  
 deles terræ, ut ſedeant mecum, nec unquam ad-  
 duci potuit, ut ad aulam Regiam admitteret, niſi  
 immaculatos, Ambulans in via immaculata, hic  
 mihi miniſtrabit. Si tales, quales præſcribit Am-  
 broſius, Elige tibi Conſiliarios bonos, Deum ti-  
 mentes, & veritatem amantes: ſæpe enim adula-  
 tores blandâ facie decipiunt animas audientium,  
 & perpetuæ mortis laqueis interimunt. ſi quales  
 Gregorius inſinuat, nullus fidelior tibi ad conſi-  
 lium eſſe poteſt, quàm qui non tua, ſed teipſum  
 diligit. ſi quales vidit Joannes; Vidi, inquit, ſe-  
 dem in cœlo, & in circuitu ſedis ſedilia viginti  
 quatuor, & ſuper thronos viginti quatuor ſenio-  
 res ſedentes, circumamiſti veſtimentis albis, &  
 in capitibus eorum coronæ aureæ, in medio ſe-  
 niorum ſedebat ſupremus Princeps. Quid hinc?  
 nihil ita potenter Conſiliarios in officio ſuo reti-  
 nere poteſt, quàm præſentiæ divinæ conſideratio.  
 Stat enim poſt parietem, reſpiciens per cancellos,  
 vias tuas conſiderans, grefſus tuos dinumerans,  
 imperfectum tuum videns, in libro indelebili o-  
 mnia ſcribens, cuncta aliquando ſtriſtè diſcuſſu-  
 rus. Proinde dicebat Dominus Abrahæ; Ambula  
 coram me, & eſto perfectus. Hebræus legit;  
 Ambula coram me, & eris perfectus. quia ambu-  
 latio coram Deo ducit ad perfectionem, ait Cæſ-  
 tanus. Nulla eſt enim efficacior ratio compo-  
 nendi actiones, quàm ambulare ante faciem Prin-  
 cipis. hinc Regius propheta; Non eſt Deus in  
 conſpectu ejus. quid inde? Inquinatæ ſunt viæ  
 illius in omni tempore. lectio Hebræica habet:  
 Parturiunt viæ illius in omni tempore. Siquidem  
 iniquitatis foetum gerentes ſexcenta parturiunt  
 delicta, & nunquam ceſſant parere. ô magna de-  
 mentia!

Apoc.  
 c. 4.

mentia ! Dixit insipiens in corde suo, non est Deus. atqui fieri potest, ut sit aliquis adeò stultus, ut dicat non esse Deum? cùm ipso naturæ lumine sit notum? non vult absolutè dicere, non esse Deum, sed quod non considerat Deum præsentem, & hoc educitur ex Hebræo; Dixit insipiens in corde suo, non est iudex. Super thronos erant seniores. Psal. 13. Quorsum hoc? quoniam omnis gubernatio prudentiam requirit, quæ intra breve tempus comparari non potest. In antiquis enim est sapientia, & in multo tempore prudentia. Erant induti vestimentis albis. Candor, ait Ambrosius, puritatis est symbolum. quoniam vitæ innocentia, Consiliariis summè necessaria. Candor itidem, pacis signum, ut innuat, Consiliarios pacem, non bellum consulere debere, ut imitentur admirabilem Consiliarium, qui semper cogitat ea, quæ pacis sunt. Ego cogito cogitationes pacis, non afflictionis. Coronas aureas in capitibus gerebant. quid hoc? per aurum charitas denotatur, quâ omnes Consiliarios insignitos esse decet, ut non proprii commodi, sed publici boni rationem habeant; charitas enim non quærit quæ sua sunt. Corona autem præ se fert potestatem, quam ministri in suas passionibus habere debent, ad Regni tantum, & Principis salutem respicientes. Proinde omni studio caveant, ne pravo consilio animum Principis inficiant, illum avertentes à tramite iustitiæ, quia tunc dissiparent animam prægnantem, & propterea gravi supplicio plectendi. ita comminatur Dominus per os prophetæ; Super tribus sceleribus filiorum Amon, Amos. c. 1. & super quatuor non convertam eum. sed quid, ô bone Deus? nonne dixisti, Nolo mortem peccatoris, sed magis ut convertatur, & vivat? quomodo

modo nunc dicis, Non convertam eum? nonne dixisti; In quacunque hora ingemuerit peccator, omnium peccatorum ejus non recordabor amplius? & nunc dicis, Non convertam eum? nonne dixisti Petro; Non usque septies, sed usque septuagies septies? hoc est, secundum Augustinum, toties quoties? quomodo non convertam eum? Septuaginta legunt; Super quartum non convertam eum. eò quòd disperdere fecit prægna-  
 tam in Galaad. Sensus litteralis est, Amonitæ erant auro ita inhiantes, ut post devictos Galaaditas, trucidarint etiam fœminas eorum prægna-  
 tes, ne filios parerent, qui postea acceptæ injuriæ ultores, bona, quæ ab eorum parentibus abstulerant, armis repeterent. hoc autem Deo ita displicuit, ut difficile adduci potuerit, ut remitteret. Glossa interlinearis per hanc prægna-  
 tam, intelligit animam bonis propositis gravidam, adeò ut sensus prophetæ, secundum expositionem Gregorii sit iste; Qui bonam voluntatem sanctis desideriiis plenam, abortum facere studuerit, non solum futuro, sed præsentì supplicio, dum vivit, est afficiendus. Quod filii Heli experimento probavere. hos enim Deus durissimis pœnis afflixit, quoniam viros pios impediabant, ne Deo offerrent sacrificium. ita habet Sacer textus; Erat peccatum puerorum grande, eò quòd retrahebant homines à sacrificio Domini. & quid est hoc, nisi ex parte nostra dominium Dei coarctare? sicut econtrà, qui convertit animam, dilatat quodammodo ejus dominium. ita exponere solent Patres verba illa; Magnificat anima mea Dominum: non dixit Deum, sed Dominum. quia cum quis animam, vel verbo, vel exemplo, ad meliorem frugem reducit; tunc facit Deum, majorem

jorem quidem Dominum , sed non majorem Deum. quod quidem præclarissimum opus est. Et quid gloriosum magis , quàm oves errantes ad sinum Dei perducere ? Qui autem abducit oves , non solum grande scelus perpetrât , sed quantum est ex se , conatur minuere divinum imperium. Vera itaque consulentes audiat Princeps, non adulatores propria commoda procurantes , qui Regnum , & Regem periculis exponunt , tanquam alienæ salutis proditores , quales fuere Consiliarii Saul contra David , de quibus conqueritur, Quare audis verba hominum loquentium , David quærit malum adversum te ? quales fuerunt ministri Achab Regis Israël , qui consulebant ei , ut ascenderet in Ramoth Galaad , & deceperunt eum. solum autem Michæas è sincero pectore vera deprompsit , sed non audita ; idcirco in ipso prælio fuit Achab misere interfectus. sed pro dolor ! quis nostrâ hac tempestate invenitur , qui sincerè & fideliter loquatur ? Multi quidem sunt inter Placentiam , & Laudem , sed pauci pergunt Veronam. Porro paucos illos , qui puram propinant veritatem , foveat Princeps , honoribus complectatur , cumulet beneficiis ; siquidem ingenua libertas , non solum æquo animo ferenda est , sed etiam lætanter recipienda , tanquam certissima Regnorum custodia. Rogatus olim ab amico quodam divinus Plato , quodnam ei acceptum obsequium præstare posset ? Si quidquid , ait , in me vitiosum videris , liberrimè arguas. hoc idem apud Apellem in more positum erat : quidquid enim pingebat , omnium oculis expositum volebat , ut transeuntes , si quod deprehendissent erratum , libere aperirent. Hujus sententiæ erat Alexander Macedo , is enim à familia servum ablegavit , quia duodecim anno-

1 Reg.  
c. 24.3 Reg.  
c. 22.Plat. lib.  
31, c. 10.

annorum spatio, quibus cum eo commoratus fuit, nullum in Rege vitium deprehendisset, quod reprehenderet. hinc discant Principes, moderatam dicendi libertatem æquo animo pati. pungit interdum, fateor, sed cognito deinde veritatis nucleo, salutarem aculeum sustinebunt. Aculeatus enim sermo, modò sale modestiæ sit aspersus, non mordet, sed oblectat Principem. Porro si veritas suapte naturâ est tam admirabilis & amabilis, cur adeò molestè à Principibus audiri solet? quia proprias animi maculas non percipiunt; quo fit, ut difficiliùs curentur animi ægritudines, quàm corporis, quia mala corporis ex pulsibus arteriarum, & vultûs pallore deprehenduntur, at animi mala hujusmodi signis non se produnt, & propterea plerosque ita fallunt, ut etiam pro malis non habeantur. Hinc fit, ut febrim nemo sanitatem dixerit, nec tabem quis appellaverit bonam corporis habitudinem; at vitiis sæpe virtutum nomina imponuntur, & hanc sanè ob causam, corpore ægroti medicos quamprimum accersunt, animo autem ægri, etiam oblatam medicinam respuunt. quid dico respuunt? hostem arbitrantur, qui medicinam offert. radii Solis cùm vitrum feriunt, ignem in eo non accendunt, quia ibi non sistant, at verò in speculo reflectentes, statim ignem concipiunt, quando ulteriùs non progredientes, ibi detinentur, & reflectuntur; sic consilia non proficiunt, quia Principes vel negligunt vel non rarò rejiciunt; blanda autem colloquia libenter audiunt, & illis insistant, quid mirum si mores eorum corrumpuntur, & Regnum dissipatur? amara, non inficior, primo in limine veritas; at si innotescat, nihil suavius, dicebat Lactantius. Sed quomodo veritas dulcis, & amara? aureâ distinctione



etione satisfacit Divus Bonaventura. Duplex est <sup>Bonav. in prol. i sent.</sup> effectus veritatis; primus est illuminare, hoc pacto nullus odit veritatem, omnes enim naturaliter illuminari desiderant; alter effectus est arguere, sic mali oderunt veritatem, & illis videtur amara. quod exemplis divinis comprobatur. Isais veritatis gratiâ in duas partes sectus occubuit. Hieremias pro veritate lapidibus obrutus est. Daniel leonibus deputatus fuit. Joannes Baptista quare in vinculis positus, & capite truncatus? quia arguebat Herodem Joannes. Cur Divus Paulus tot calamitates passus? quia veritatis præco in universo mundo. Factus sum vobis inimicus verum dicens. Nec desunt ex philosophis exempla.

Anaxagoras apud Athenienses reus factus est, quia dixit Solem esse quidem lampadem ardentem, non tamen esse Deum. Socrates cur veneno periit? propter veritatis patrocinium. Cicero quartum & sexagesimum annum agens, jussu Marci Antonii, propter Philippicas, quas contra eum scripserat, capite & dextrâ tuncatus est. Monitos tamen Consiliarios velim, ut in aperienda Principi veritate, modum adhibeant, ne in scopulos immodicæ libertatis incidentes, misere naufragium patiantur, non enim dentata, ut mordeat; sed simplex, ut profit, debet esse veritas. Siquidem valde periculosum est, vellicare leonem, & suadere Principi quod oportet, multilaboris. <sup>Tac. li. i hist.</sup>

Neronis odium, scribit Cornelius, adversus Vestinum, ex intima sodalitate coeperat, dum hic, <sup>Tac. lib. 15 hist.</sup> ignaviam Principis penitus cognitam despicit, ille ferociam amici metuit, sæpe asperis facetiis illusus, quæ ubi multum ex vero traxere, acrem sui memoriam relinquunt. igitur non crimine, non

Tac. lib.  
4 hist.

non accusatore existente, quia speciem iudicii induere non poterat, ad vim dominationis conversus, Gerelanum Tribunum cum cohorte militum immittit, jubet prævenire conatûs Consulis. Quid plura? misero abscinduntur venæ. vicens adhuc balneo infertur, calida aqua versatur, nullâ edita voce, quâ semet miseraretur. at, ô Vestine, quantò prudentius egisses, si cùm secunda fortuna utebaris, res Principum silentio premere novisses. Sciant experimento compertum, quomodo pessimis Imperatoribus sine fine dominationem, ita quamvis egregiis, modum libertatis placere. Cùm quispiam interrogaretur, quid tutum esset viro libere agenti cum Principe? Obsequium, respondit, nec ineptè. deinde, quid periculosum? Consilium. ubi enim res malè cadit, ibi consilii auctor improbatur. Siquidem hæc est conditio Regum, ut casûs tantùm adversos hominibus tribuant, secundos fortunæ suæ. Quare, ut est apud Plautum, plus oportet scire subditum, quàm loqui. Valde enim periculosum est, nosse magnatum arcana, quorum siquid effutias, actum de capite, & solent odisse conscios eorum, quæ nolunt efferi. Proinde Lacydes Cirenæus, plurimis promissis accersitus ab Attalo Rege, ut in suam amicitiam, & Regni societatem veniret, respondit, Se Regi ingentem habere gratiam, negavit tamen se venturum, eò quòd philosophi à Regibus, ut picturæ, & imagines eminus, non cominus sunt videndæ. ita consulebat philosophus, ad Principem accedendum est, sicut ad ignem, nec nimis prope, ne uraris; nec longius, ne frigeas. Eatenus veritas colenda, ut nimiam libertatem, quæ semper exitiosa fuit, prudenter rescindant, ita tamen, ut prudentiâ comite, nec ad sinistram

foedissi-

fœdissimæ adulationis, neque ad dexteram immodicæ libertatis flectantur. ita enim, Deo pro-  
pitio, multa evitabunt pericula, prudentiores Laërt. li. s. c. 5.  
effecti improbè loquentium exemplis. In primis  
occurrat Calisthenes, qui ob nimiam dicendi li-  
bertatem, ad exitium ruit, quod multò antè præ-  
dixerat Aristoteles, Homérico carmine quasi di-  
vinans,

*Talia nate loquens, haud multo tempore vives.*

Scribit enim Valerius, quod cum Aristoteles mit-  
teret Calisthenem auditorem suum, ad Alexan-  
drum Regem, monuit, ut ei aut nunquam loque-  
retur, aut jucundissimè, ut apud Regias aures  
vel silentio esset tutior, vel sermone acceptior,  
sed quia consilio non acquievit, jussu Alexandri  
occisus est. Val. lib. 7.

Seneca, vir omnium sæculorum memoriâ di-  
gnus, ob nimiam carpendi libertatem, extremum  
clausit diem infelicitè. Porrectis enim utriusque  
brachii venis, cruorem effundere jussit Impera-  
tor. Quorsum autem? objiciebant criminatores,  
cum oblectamenti Principis palàm iniquum de-  
tractare, vim ejus equos regentis, illudere voces,  
quoties caneret, cùm in Senatu de Agrippina re-  
ferretur, cæterorum adulationes abhorrentem,  
de Senatu egressum fuisse. & ut brevius agatur,  
apud Neronem delatum fuit, quod cuncta, quæ  
diceret, faceretque Seneca, Stoicæ sectæ liberta-  
tem præ se ferrent, quæ omnia Principibus invisa. Tac. lib. 14 an-  
nal.

Prexaspes unus ex Regni primariis, Cambysem  
Regem monuit, ut parcius biberet, turpem rem  
esse dicens, ebrietatem in Rege, quem oculi  
omnium, auresque sequerentur. At quem fructum  
collegit ex intempestiva objurgatione? omnino  
infelicem. quem ita describit Herodotus, pulchre

N

quidem

Herod.  
lib. 3.

quidem & exacté: Cambyſes Prexaſpem Perſam, quem præcipuo honore proſequēbatur, interrogavit, Quemnam virum, Perſæ me eſſe judicant? aut qualem de me ſermonem habent? Domine, reſpondit, cætera quidem omnia in te laudibus magnis ferunt, ſed nimis te vino deditum, ajunt eſſe. Quibus ille indignatus, Siccine, inquit, Perſæ ajunt me vino deditum deſipere, nec mentis eſſe compotem? tunc intelliges, an Perſæ vera dicant, an potiùs hæc dicentes, ipſi deſipiant: nam ſi filii tui, qui in veſtibulo ſtat, medium cor non fruſtrato ictu percuſſero, conſtabit nihil eſſe, quod Perſæ dicunt; ſi aberravero, conſtabit Perſas vera loqui, & me eſſe intemperantem. hæc locutus intendit arcum, mox vertens ſe ad patrem, dixit; Ad hoc, ut ſcias amice, quemadmodum nunquam excidam mihi, jam approbabo, & oculos poſt vinum in officio eſſe, & manûs, bibit deinde liberaliùs, quàm aliàs, capaciſſimis ſcyphis, & jam gravis, & vinolentus, ac violentus, jubet filium procedere ultra limen, allevatâque ſuper caput ſiniſtrâ manu, ſtare, tunc arrepto jam arcu, & ſagittâ emiſſâ puerum percuſſit, atque eum collapſum, juſſit diſcindi, & inſpici ictum, cùmque in corde ſagitta eſſet inventa, ob id lætabundus, atque cachinnans, ad patrem pueri inquit, Prexaſpes facta eſt tibi fides, non me inſanire, ſed Perſas. Verùm nunc mihi dicito, quemnam ex omnibus hominibus noſti, ita ad deſtinatum emittere ſagittam? Prexaſpes hominem advertens eſſe veſanum, & in ipſum quoque inſanientem; reſpondit miſer, Nec Apollinem certius jaculari potuiſſe. En imprudens, & importuna objurgatio in quas ruinas præceps ruat. is qui nuper ebrietatem Regis, ita libere arguebat, paulò

paulò pòst suimet oblitus, infandum homicidium comprobavit.

Quid de Harpago dicemus? imprudens iste homo, idem quoque Regi suo Persarum suavit, quo audito, statim Rex magnâ indignatione furens, carnes filiorum in cœna apposuit, quibus misellus pater, tanquam epulis jucundis pastus est; deinde, ut agnosceret, quibus cibis stomachus esset onustus, statim iussit afferri caput, manûs, & pedes, & quomodo esset acceptum interrogavit? tunc miser ait, Apud Regem omnis cœna jucunda est. Ecce quid pariat intempestiva libertas.

Clitus Alexandro familiaris cur ab ipso inter Q. Curt.  
lib. 8. pocula occisus? ob nimiam carpendi libertatem. non igitur satyricè, neque lyricè, cum Principe agatur, sed fideliter, & sincerè. Planè sicut fœdum est, dum placere studes, in adulationem incidere, ita prorsus fœdum; dum adulationem vitas, immodicâ libertate gratiam amicitiae, simulque medendi perdere utilitatem. Ecquid ineptius esse potest, quàm in illum dicere, & scribere qui potest proscribere? Quid itaque agendum? Præclaram historiam Nathani Prophetæ studiosè legant, & sedulò observent Consiliarii, illinc abunde haurient, quomodo Principi sit aperienda veritas. Propheta itaque aulam Regis ingressus ita sermoni viam paravit, intolerabilis planè casus contigit in Regno; Domine mi Rex, duo viri erant in civitate, unus dives, & alter pauper; dives habebat oves plurimas valde; pauper autem nihil habebat omnino, præter ovem unam parvulam, quæ creverat apud eum, cum filiis ejus simul, de pane illius edens, & in sinu illius dormiens. cùm autem peregrinus quidam venisset ad divitem, nolens ille sumere de ovibus suis,

tulit ovem viri pauperis, & præparavit cibum homini qui venerat ad se: pro tanto igitur scelere, quâ pœnâ afficiendus? tunc Rex acerbo illo casu perculsus, indignatione furens, ait, Filius mortis est vir qui fecit hoc. Porro Nathan his auditis à Rege, volens eum propriis verbis condemnare, ait, Tu es ille vir, qui fecisti rem hanc; tunc David videns se irretitum, & proprio ore condemnatum, oculis ad cælum sublatis, & genibus in terram curvatis, plorans exclamavit; Peccavi, peccavi Domine. En quomodo veritas profuit, sed tempore opportuno prolata; si rigido verborum impetu, in eum irruisset, nil procul dubio profecisset. Prudentia itaque humanæ vitæ lux & dux, in rebus omnibus observanda. hæc enim, quæ agenda sunt, & quæ omittenda opportunè demonstrabit. hæc si ad gubernaculum sedebit, perturbatas etiam procellas, prospere & tutò diriget cursum, quasi inclamando, Inanes inanes minæ. hac verò destitutus fluctuabit Consiliarius, non minùs quàm sine rectore navis huc atque illuc tempestate agitata. hæc denique rebus gerendis describit modum; sine quo summa rerum in exitium ruit.

*Est modus in rebus, sunt certi denique fines,*

*Quos ultra, citraque, nequit consistere rectum.*

Summa itaque vis prudentiæ in eo sita est, ajunt veri Politici, ut Principis ingenium in primis cognoscatur. Quemadmodum enim, præcipuæ sunt nautarum partes, sidera & ventos nosse; quoniam his cognitis, haud erit difficile, gubernaculum regere, vela expandere, ipsæve contrahere, quo sibi loco ac tempore jaciendæ sint anchoræ, aut tollendæ, quæ stationes capiendæ, qui scopuli vitandi; ita Consiliarius Principum mores debet exactè

exactè cognoscere. si Principis ingenium turbidum inveniès, tunc nautas imitare, qui exortà tempestate, turbatoque cælo, tantisper mutatà velificatione, furentibus ventis obsecundant, donec ad opportunam aliquam stationem, navim appellant, quasi inclament, Flectimur, non frangimur. Quid si nunquam mare tranquillum? Quid si semper Principis ingenium veritatem implacabili odio prosequatur? tuæ salutis debes consulere. sicut enim mari, quod navigabile, ac pervium non est, nosmet, & res nostras, committere non audemus; ita profectò, nec hujusmodi animis veritatem committendam puto. Porro si Principis ingenium placidum reperiès, tunc non erit periculum proferre veritatem, modò sit prudens, & opportuno tempore collata; quam quidem Principes, si diuturna volunt imperia, benignè excipiant, & ipsos veritatis propinatores honoribus ac beneficiis cumulent, tanquam firmissimos Regnorum custodes.

*Bellipotens Princeps armis stipatus utrinque,*

*Milite, divitiis, robore, præsidis.*

*Non tamen in Regno tutus, non mœnia firma,*

*Sit nisi cum Marte Palladis auxilium.*

## CAPUT XI.

*Princeps, tanquam pater, imponat Populis onera discreta. Et erit in pace locus ejus.*



ÆPIUS mente revolvat Princeps, quod à supremo omnium Rege in excelso dignitatis fastigio est constitutus, tanquam pater populi, publicus & communis. Proinde tenetur subditos, ut filios fovere, diligere, & dirigere. Est dispensator publicorum bonorum, idcirco cavere debet, nè aliquid ex eis usurpet, in propriumque usum convertat. Est curæ & bono alterius destinatus, ideo proprio commodo alterius bonum tenetur præferre. Perpendat denique, præcipuum Imperii robur esse, amorem civium, & longè melius benignitate, & præmiis, quàm nimia severitate, & pœnis ingenuos viros gubernari. ita attestante sapientissimo Rege, Roboratur clementiâ thronus ejus. Hinc Xenophon introducit Cyrum sic loquentem, Non aureum istud sceptrum est, quod regnum custodit, sed amicorum copia. hæc autem paratur beneficiâ Principis. errant planè, qui beneficia conferendo regna enervari putant. testis est Alphon-

Prov. c.  
20.

Xenoph.  
lib. 8.

sus Rex Siciliæ, vir liberalitatis gloriâ insignis. Cùm à suis interrogaretur, quid servaret sibi, qui tam multis, tam multa donaret? respondit, Ea ipsa, quæ dono. egregia vox tanto Principe digna, Perinde, ac si diceret, opes bonis viris collatæ, sunt firmissimum robur Imperii, atque inexhaustum totius Reipublicæ ærarium. melius enim beneficiis imperium custoditur, quàm armis. si

Galba



Galba homo suæ pecuniæ parcus, publicæ avarus, suis militibus donativum exsolvisset, fortè nec imperio, neque vitâ privatus fuisset. Constat, inquit Tacitus, potuisse conciliari animos, quantumcunque parci senis liberalitate. Non timeat igitur Princeps regnum exhaurire; cum donat, non amittit, sed deponit. docuit id egregiè Alexander Magnus. cum enim omnia amicis donasset, & jam ferè omnes Regias opes absumpsisset, tum Perdiccas unus ex ejus intimis, Quid tibi Rex, inquit, jam superest? Spes, respondit. Noverat enim, si res postulabat, quo ex fonte, quæ per liberalitatem erogarat, eodem propter benevolentiam, posset ad se redire. O miram Principis benignitatem, qui populis prospiciebat, sicut pater filiis. Proinde Cyrus bonum Regem pastori comparabat, & pulchre quidem. Nam sicut pastor die noctuque sollicitat, ut ovibus congruentia pascua inveniat, ita & Rex saluti populorum invigilare debet. sic Valentinus, & Martianus Imperatores rescripsere, Humanitatis nostræ est, egenis prospicere, ac dare operam, ut pauperibus alimenta non desint. Huc spectat perbellè, quod in sacris litteris memoriæ proditum est. Rogabant populi Principem quendam, ut ipsis imperaret. at hic propriæ inopiæ conscius; In domo mea, ait, non est panis, neque vestimentum, nolite me constituere Principem populi. quasi insinuare volens, illum non debere Imperii sceptrum suscipere, qui non valet, vel negligit subditos sublevare alimento. Improbilane Principes censendi, qui in Imperio, non nisi imperium cogitant, & qui se non civibus datos arbitrantur, sed sibi cives, Nam sicut sidera splendorem habent, sic tamen, ut usibus

Tac. lib.  
histor.

mortalium deserviant, ita Principes dignitatem quidem habent; sed cum munere, officioque devinctam. Collata est in sinum vestrum à Deo hominibusque respublica, sed nempe in sinum, ut foveatur. O verè prædicandum Principem, qui duas res diversissimas, potentiam & modestiam, indivisibili nexu connectit. Quem prodeuntem, certatim velut beneficum, & salutare quoddam numen aspiciunt, inter amorem timoremque medii, & alternis judicijs ambigentes, dominum salutent, an patrem. subditi enim re verâ fratres, & filii sunt, non servi. hujus rei præclarum est testimonium; Alcámenes Teletri filius. Is enim, cui-dam percunctanti, quo pacto imperans, Regnum diu servare posset? Si lucrum, respondit, non magnificerit, & subditorum commodis enixè studuerit. Vespasianus pro insigni publico gestavit delphinum anchoræ alligatum, quo significaret, totum se esse ad boni publici conservationem: nam cum nautæ in tempestatibus marinis anchoram jaciunt, illi circumplicatur, quò tenaciùs hæreat, ac navim in undis firmet; sic Princeps reipublicæ statum incolumem ut servet, toto studio elaborare debet. ad hanc rem pulchre Alciatus,

*Titanii quoties conturbant æquora fratres,*

*Tum miseros nautas anchora jacta juvat.*

*Hanc pius erga homines delphin complectitur, imis*

*Tutius ut possit figier illa vadis.*

*Quàm decet hæc memores gestare insignia Reges,*

*Anchora quod nautis, se populo esse suo.*

Ita prorsus sentiebat Artaxerxes, cognomento Longimanus, quòd alteram manum habebat longiorem, is dicere solebat, Regaliùs est addere, quàm adimere. Et Ptolemæus Lagi filius dicebat; Convenientius est Principi ditare, quàm ditari.

hoc

hoc est enim Principis munus, opes eorum, quibus imperat, augere potius, quàm minuere, ipsosque non onerare, sed exonerare. Fiscus enim bonorum Principum, non subditorum damnis, sed hostium spoliis debet augeri, & apud Principem plùs justitia quàm licentia valeat. Sed, proh dolor! tanta est, apud quamplurimos, dominandi libido, & auri coacervandi cupiditas, ut omne studium conferant, non ad pascendos populos, sed ad ipsos opprimendos, vel potius deglutiendos, de quibus conqueritur Dominus; Væ pastoribus Israël, qui pascunt semetipsos, nonne greges pascuntur à pastoribus? Lac comedebatis, & lanis operiebamini; quod crassum erat, occidebatis, gregem autem meum non pascebatis; quod infirmum fuit non consolidastis, quod ægrotum non sanastis, quod confractum non alligastis, quod abjectum non reduxistis, quod perierat, non quaesistis, Quo fit, ut populi nimis onerati à Principe interdum deficient. aspera enim vox est auribus, & animis infesta, avida tributorum exactio. quod perspicuè divino oraculo comprobatur. Mortuo enim Salomone, Regno potitus est Roboam, tanti Regis hæres & filius, natu majores Israël missi sunt legati ad Regem, rogantes, ut onus tributorum, quod grave nimis esse sentiebant, levius redderetur. Pater tuus (dixerunt) durissimum jugum imposuit nobis, tu imminue paululum de imperio patris tui durissimo, & de jugo gravissimo, quod imposuit nobis, & serviemus tibi. Remisit nuntios, tres dies postulans sibi dari ad respondendum, quo transacto tempore, rediére legati, ut responsum acciperent: tunc Rex, senum neglecto consilio, juvenumque secutus sententiam, ita respondit eis: Pater meus

Ezech.

32.

3 Reg.

22.

aggravavit jugum vestrum, ego autem addam. Pater meus cecidit vos flagellis, ego autem cædam vos scorpionibus. Alperâ hac responsione indignatus populus, Regem Roboamum recusavit; & mox novum Regem sibi constituit. tanti valet ad conciliandos animos annonæ copia, ex vigilantia Principis proveniens. Vera est enim Philosophi moralis sententia, Nullâ ratione ducitur, nullâ æquitate mitigatur, nec ullâ prece flectitur populus esuriens. Hoc autem non ignorabat Augustus Cæsar, qui ad firmandum Imperium populum pellexit annonæ copiâ. de quo pulchre

Tac. lib. Tacitus his verbis: Ubi militem donis, populum  
I annal. annonâ, cunctos dulcedine otii pellexit, insurgere paulatim, munia Senatûs, magistratum, legumque in se trahere, nullo adversante. Habeant ergo pro constanti dominantes, quod tunc fortuna Principis maximè nutat, cùm ingravescit annona. sic attestante Poëta,

*Nescit plebs jejuna timere.*

Porro hos scopulos facile evitabit Princeps, si præcavens in futurum, Patriarcham Josephum, & Severum Imperatorem pro viribus imitabitur ille tantam frumenti copiam in horrea Pharaonis conportari jussit, ut ea non modò Ægyptii, sed & finitimi populi, sæviante annonâ, mirum in modum sublevati sint. Imperatori autem tantæ curæ fuit annona, ut cùm è vita discessit, reliquerit in horreïs publicis frumentum, quod septem annos populum Romanum abunde alere potuisset. Hos Principes tibi magistros constitue, & tunc gratiam invenies coram oculis omnium. ex hoc æquitatis fonte potarunt Tiberius, & Marcus Aurelius Imperatores, quos quidem, hoc præsertim titulo, celebrat antiquitas. ille præsidibus

bus suadentibus, onerandas tributo provincias, ita Franc. Sen. lib. de instit. Reip. rescripsit: Boni pastoris officium est, tondere pecus non deglubere. idem ferme protulit & Alexander. Cicer. epist. 2 ad Attic. Prov. c. 30. Cùm enim quidam diceret, civitates subiectas majora posse pendere tributa, sapienter admodum respondit: Olitorem odi, qui radicitus evellit olera; ac si dixisset, pennæ non sunt adeò incidendæ, ut nequeant renasci; quia qui nimis emungit, elicit sanguinem. justitia namque servanda est geometrica, non autem arithmetica. justum verò est illud ab omnibus concessum, ut qui majoribus præditi sunt facultatibus; magis solvant, quàm qui minus habent. Cæterùm de Marco Aurelio monimentum legimus æternitate dignum, huic rei satis accommodatum. hic etenim in expeditione Marcomanica suam suppellectilem auream, argenteam, cristallinamque; picturas, gemmas, & quicquid pretiosum à suis majoribus coacervatum fuerat, voce præconis vænire maluit, ut ex earum rerum pretio milites alerentur, quàm provincias plus æquo onerari. sed quid? Alexander Magnus, cùm audiret milites sui exercitus ære alieno esse oppressos, nonne publico edicto evulgari fecit, ut quotquot essent creditores, chirographo ostenso, de proprio ejus ærario solutionem acciperent? Verùm tam creditores, quàm debitores, parvam fidem verbis Regis adhibentes, nullus pro solutione pecuniam exposulavit. Quod Alexander animadvertens in publico foro ante fores palatii, mensas præcepit parari, in quibus decem milia talentorum posita fuere, tuncque confestim omnes certatim adierunt, ut Regiâ liberalitate fruerentur. qua benignitate omnium animos sibi conciliabat.

Nec

Plat. in  
apophr.  
Imper.

Nec silentio prætereundus Rex Darius, is enim cùm tributa imponeret subditis, procures provinciarum evocatos interrogabat, an ea essent gravia? Cùmque responderent, valde mediocria esse, dimidium ejus, quod proposuerat, singulos pendere jubebat. alijs Principibus relinquens exemplum, non tributis & exactionibus populos opprimere, sed tanquam patres mansuetudine, ac clementiâ gubernare. sic enim vincuntur, ac vincuntur subditorum animi.

Ad hanc rem optimè facit, quod Hosiinus historicus narrat de Agefilao Rege; is enim, cùm Apellem ægrotantem visitasset, pulvinar surrigere fingens decumbentis cervici, cautè aurum supposuit. non multò post Regis discessum, adveniens puer, amoto pulvinari, dum lectulum sternere vellet, aurum reperiens, exclamavit, Vide domine, quid in lectulo tuo invenerim: at Apelles silentium eï indicens ait, hoc est furtum Regis. mox intulit puer; Quid? benignitate motus voluit tuæ inopiæ subvenire, & furtum dicis? tunc Apelles, Optimè dixi, quia Rex hoc munere cor meum furatus est, & perpetuò me sibi addixit. Sciebat nimirum Agefiläus, multò præclarius esse, alios ditare, quàm ditari; & nihil esse gloriosius, quàm beneficium apud bonos viros depositum. siquidem, sicut hamo piscatores capiunt pisces, ita principes beneficio capiunt homines. Quid enim aliud est Principis donum, nisi veluti quoddam servitutis vinculum? & quasi catena aurea, qua irretitur beneficio affectus? hoc probè novērunt exploratores, idcirco dixerunt ad Raab, In fenestra, per quam demisisti nos, Septuaginta legunt; Per quam ligasti nos: lectio Hebraïca habet; Per quam concatenasti nos. quasi dicerent; benefi-

Iosue. c.  
2.

beneficium quod à te accepimus , concatenavit nos. Hinc in dubium verti solet , uter in liberalitate magis esset laudandus , an capiens , an largiens ? hic non libertatis , sed rei tantum possessionem amittit. ille vero sui juris libertatem perdit. Quod quidem probè noverat castissimus Josephus. Cum enim uxor Potipharis , à pulcherrimo adolescente enixè postularet , ut suæ libidinis voluptatem expleret , respondit , Ecce Dominus meus , omnibus mihi traditis , ignorat quid habeat in domo sua , nec quidquam est , quod in mea non sit potestate , præter te , quæ uxor ejus es , Quomodo ergo possum hoc malum facere ? & peccare in Dominum meum ? non dixit , quomodo malum hoc faciam ? sed Quomodo possum hoc malum facere ? quia beneficia sunt compedes aurei , quibus homines adstringuntur.

Gen. 39.

Non tamen onera quæque improbo , nec enim me latet ob labores , qui in republica gubernanda necessario perferuntur , imponi debere : nam , nec quies gentium sine armis , nec arma sine stipendiis , neque stipendia sine tributis haberi queunt. Sunt enim pecuniæ rerum gerendarum nervi. Scio itidem Neronis cuncta vestigalia omitti jubentis , impetum repressum à Senatoribus , dissolutionem Imperii docendo , si fructus , quibus respublica sustinetur , minuerentur. siquidem tributa ornamenta pacis sunt , & subsidia belli. Hinc dicebat Dominus , Reddite quæ sunt Cæsaris , Cæsari ; & quæ sunt Dei , Deo. non dixit , date ; sed reddite. Reddere actus est justitiæ ; dare vero spontaneæ voluntatis , etiamsi nullum præcesserit debitum : at in omni debito solvendo est reddere , quia nullum debitum causatur , nisi .

nisi ex accepto ; idcirco potius dixit , Reddite ,  
 quàm date. Deo quidem debemus omnia , cùm  
 ab eo omne donum profluat. Principibus autem  
 debemus tributa , quia ab eis defensionem , tran-  
 quillitatem , & alia bona suscipimus. Reddendum  
 est ergo Cæsari , quod ad Principis jus pertinet :  
 jus autem Regis est , ut alatur à Regno , & qui-  
 dem in pompa regali , & ad bella gerenda , & ad  
 pacem conservandam. hinc census , vectigalia ,  
 tributa legitimè à Rege exiguntur ; & necessario  
 à populo fidei solvuntur. propterea Paulus ait ,  
 Rom. 13. Omnis anima potestatibus sublimioribus subdi-  
 ta sit. non dicit autem , Reddite Cæsari quæcun-  
 que petit ; sed , reddite , quæ illius sunt. nam ubi  
 Princeps à nobis aliquid petit , per quod in of-  
 fensam Dei incurrimus , id non esset Cæsaris , sed  
 diaboli tributum. quamobrem nec præstare de-  
 bemus. oportet enim magis Deo obedire , quàm  
 hominibus. Proinde mox subjecit , Reddite quæ  
 sunt Dēi, Deo. Principibus fidelis esse debes , sed  
 Deo longè magis ; ut pulchre os aureum docet ,  
 Tu verò cum audias reddenda esse Cæsari , quæ  
 sua sunt , illa solum dici non dubites , quæ pie-  
 tati , ac religioni nihil offiunt. Nam quod fidēi,  
 ac virtuti obest , non Cæsaris , sed diaboli tribu-  
 tum , & vectigal est. huic sententiæ accedit Eu-  
 sebius dicens : Non dicit Dominus , Reddite Cæ-  
 sari omnia , sed quæ sunt Cæsaris ; non constituit  
 Deus magistratum , ut pro suo arbitrio , ac libi-  
 dine expilaret subjectos , sed ut ab illis modera-  
 tē exigeret , quæ ad rempublicam honestè gu-  
 bernandam spectarent. sicut Deus auctoritatem  
 regendi populum dedit magistratui , ita vicissim  
 magistratus debet Deo ; & Ecclesiæ Romanæ ejus  
 sponsæ omnem obedientiam. Et sicut Romana  
 Eccle-

Homil.  
 71 in  
 Matth.



Ecclesia docet, populum Christianum magistratui debere esse subiectum; ita & ipse, qui non sine causa gladium portat, debet Ecclesiam defendere, ac subditos suos ad ejus obedientiam compellere; sicque mutuas sibi invicem præstare debent operas, ut expleatur illud, reddite quæ sunt Cæsaris, Cæsari, & quæ sunt Dæi, Deo. Paulus ad Cæsarem appellans, reddit Cæsari, quæ erant Cæsaris, ejus supremo tribunali se subjiciens; sed idem Paulus Romæ Euangelium prædicans, & à deorum cultu, quos Cæsar colebat, omnes quos potuit, abducens, reddidit Deo, quæ erant Dæi, ejus fidem defendens, & dilatans. Petrus docens Regem honorificandum, eique tanquam præcelsenti obediendum, reddidit Cæsari, quæ erant Cæsaris; sed idem, Principibus fidæi prædicationem interdicentibus, respondens; Obedire oportet Deo, magis quàm hominibus, reddidit Deo, quæ sunt Dæi. pulchre Augustinus. Si aliquid Proconsul jubeat, & aliud jubeat Imperator, cui obediendum? illo contempto, Imperatori obsequendum; ergo si aliud Imperator, aliud Deus; quid agendum? majori serviendum. tributa solvenda. obsequia præstanda. da veniam Imperator, tu carcerem, ille gehennam minatur. hanc distinctionem docuit Christus apertè; Nolite, inquit, timere eos, qui corpus occidere possunt, & postea non habent, quod agant: ostendam autem vobis, quem timeatis; timete eum, qui postquam occiderit corpus, habet potestatem mittere in gehennam. at dicet aliquis, nonne Apostolus dicit; Si malum feceris, time potestatem; non enim frustra gladium portat. an discipulus contrarius magistro? nequaquam. Sed loquitur Apostolus de iis, quæ sunt Cæsaris, quæ si illi non reddantur, meritò

Euseb.  
de vita  
Const. li.  
4. c. 24.

merito timendus Cæsar, timenda potestas. Loquitur autem Christus de iis, quæ Dei sunt, quæ si Deo reddimus, si fidem, si pietatem, si virtutem colimus, & hæc Cæsari displicent, suisque legibus hæc interdicat, hinc non est timendus Cæsar, sed est timendus Deus. hanc distinctionem Evangelicam primus Imperator Christianus Constantinus Magnus probè tenuit, cum sic ad Episcopos loqueretur. Ego quidem communis sum Episcopus, sed vos eorum, quæ sunt in Ecclesia, ego eorum quæ extra sunt, à Deo constitutus Episcopus, hoc est, superintendens. Potestati ergo debemus, sed magis Deo. Non omnes itaque exactiones improbo, sed nimis onerosas, quarum hodie tanta est moles, ut ea homines obruti vix sese attollere, atque erigere queant. vetus est adagium usu comprobatum, Ne quid nimis. Quocirca à Principe extrema sunt vitanda, & vetanda: quod enim extra medium existit, & turpe, & nocens est. Quapropter cum esset admonitus Trajanus Imperator à Pompeja uxore, quod in Regno haberet ministros nimium rapaces, qui provinciales calumniis expilabant, quorum unus ex primariis, unumquemque divitem sic convenire solebat, Quid habes? Unde habes? pone quod habes. improbas ac turpes huiusmodi exactiones ægre ferens pius Princeps, statim adhibitis pœnis ejusmodi exactiones cohibuit, adjiciens hæc verba omnibus sæculis laudanda, nimirum, Fiscum esse lienem, quo crescente reliqui artus contabescunt. & appositè quidem. quoniam sicut lien multum succum, qui ad corporis alimentum transire deberet, non rarò ad se trahens, totum corpus macie, taboque consumit; sic planè ex fisco civium opibus tumescente, universa

universa Respublica insanabili morbo contabescit. ut graphicè expressit Alciatus,

*Splene aucto, reliquis tabescunt corporis artus,*

*Fisco aucto, arguitur civica pauperies.*

Sentebat quippe optimus Princeps, iniquum esse, sic explere fiscum unius, ut nihil habeant subditi, præsertim cum boni Principis sit, quidquid habet populus. Ad quod pulchre facit insigne illud academicum, Draco nimirum, qui grandior indies confurgit, parvulos serpentes deglutiens, appositâ hâc notulâ, Compendium unius, dispendium alterius. non ita verus Princeps, cujus officium est, populorum commodis consulere, propriis etiam sumptibus. hinc Aristoteles scitè admodum, ut sollet, ærarium Principis stomacho comparabat, quoniam sicut è stomacho cibi recepti, in omnia sensim membra diffunduntur, sic à Regis thesauro, pecuniæ jam congestæ, cum accidit opportunitas, in populis sublevandis erogari debent, ne sæviente annonâ afflicti, ac importunis oneribus agitati provocentur ad seditiones, exitium inevitabile afferentes. sicut accidit Achæo Lydiæ, Meoniæque Regi. Is crebra tributa, eaque nimis gravia populis imponebat, radebatque usque ad cutem, & ex lapide nitebatur sanguinem elicere. Sed, quod deplorandum magis, in tributis exigendis, sævus, improbus, atque inexorabilis erat. Verùm cum tantam injuriam diutius populi ferre nequirent, nocturnâ tessera inter se datâ, subito hominum concursu, illum cum omni familia trucidarunt, & regiâ incensâ, ejus cadaver unco tractum, in Pactolum flumen præcipitarunt, ut aurum sitiens, auriferas aquas deinceps potaret. quasi acclamantes, Aurum sitisti? aurum bibe.

Franc.  
Sen. de  
regis in-  
stit. li. 4.

*Vberibus, lactis succum, non sanguinis hauri.  
Et corio misso, sit tibi lana satis.  
Non nimis emungas populos, sed viribus æqua  
Exige, sic Regnis pax erit alma tuis.*

## CAPUT XII.

*Leges latas observet Princeps, & inveniet gratiam  
coram oculis omnium.*



**D**IGNUS planè nomine Principis, qui legibus obtemperat, quas ipse populo præscribit, ita in Pandectis scriptum legimus, Vox digna majestate regentis, se legibus obnoxium Principem profiteri. Et apud Plutarchum in septem sapientum convivio, ille scopum tetigisse dicendus est, qui se publicis patriæ legibus subjicit, supremi Legislatoris vestigiis inhærens, qui dedit legem, & observavit. Non veni solvere legem, sed adimplere. de quo Esaias vaticinans ait, Factus est principatus super humerum ejus. Lectio Hebræa sic habet, Suscipiet legem super se, & observabit eam. Ægyptiaci Reges, (teste Diodoro Siculo) tunc optimè se gubernare putabant, si parendo legibus, populum potius excitarent suâ virtute, quàm legum auctoritate. ita divinus Plato, cujus aurea verba sunt, Paratum exitium illi civitati video, in qua non lex magistratibus, sed legi magistratus præfunt; salutem verò illi, ubi lex magistratibus dominatur. pulchre facit huic rei apposita Demosthenis similitudo. Civitatis anima, ait, lex est, ut ergo anima totum corpus, & singula membra animat, tota in toto, & tota in qualibet parte; sic & lex, non solum

Leg. digna, C. de legibus.

Plato li. 9. de legibus.

lūm in inferiora rēipublicæ membra, sed & in ipsum caput, hoc est Principem transfunditur. non enim Rex est extra rēipublicæ corpus, sed præcipua ejus pars, ergo & ad illum legis anima pertinet. Interrogatus quidam dux, Quisnam Regum omnium esset maximus? respondit, Qui sibi libentiùs imperat, quàm aliis. Ipse primus institutor, viam ingrediatur oportet, & statim sequentur alii, quia participatus labor cum duce, fit populis levior. quare si Princeps secundum leges vixerit, unaquæque civitas optimè gubernabitur. Dabo clavem David super humerum ejus, ajunt oracula divina. quid per clavem, nisi potestatem jurisdictionis, & animarum regimen? porrò illa clavis, non pendet à cingulo, sed gestatur in humero; tum quia gravissimum pondus, est animarum cura, & adeò grave, ut dicat Concilium Tridentinum, Onus Angelicis humeris formidandum; tum quia Prælati debet ea, quæ præcipit, humero etiam gestare. Proinde sanctissimum habendum est Romani Prætoris edictum, & præ foribus cujuslibet curiæ scribendum, Quod quisque juris in alterum statuerit, ipse quoque eodem jure utatur. ita sentiebat moralis philosophus Principem alloquens, Si vis omnia tibi subicere, subjice te rationi. multos reges, si te ratio regat. ab ipsa disces, quid, & quemadmodum agere debeas. ita quoque subscribit eloquii Romani Pater; Antiqui Principes, ait, subiciebant se legibus statutis, ut ad eas implendas, alios provocarent. Noverant siquidem, populum habere ad sui disciplinam, acrem sensum oculorum, aurium vero hebetem. Sodiades unico verbo verum Principem instituit, Impera tibi. nullus enim Princeps rectè imperabit populis, nisi priùs sibi ipsi imperaverit, & legi à se latæ obtemperave-

Solon.  
apud  
Laërt.  
lib. 1.

Sen. e-  
pist. 38.

Tull. H.  
1 offic.

peraverit. aureum Epicteti philosophi dictum, Sustine, & abstine. hæc est prima æquitas, ait Cassiodorus, Præsules à se inchoare, ut criminosi nequeant illos similes eis reperire. Hinc Romani laudantur in primis, quia leges observabant, quas aliis præscribebant. tunc enim Rempublicam beatam existimamus, aiebat Bias sapiens, cum Princeps primus omnium paret legibus: nam populus licet invitus, invitatur, cum Principis conditio hæc sit, ut quod ipse facit, id aliis præcipere videatur. Proinde Agesilæus dicebat, si quid esset, quod per milites celeriter confici vellet, primus ipse sub oculis omnium operas aggrediebatur, quo vel pudore ad industriam extimularentur. hoc probè noverat Gedeon fortissimus Princeps, qui cum ad pugnam progredieretur, ad milites conversus dicebat; quod me facere videritis, hoc & ipsi facite. quo exemplo edocti, fortiter dimicarunt, & hostibus prostratis, victoriam obtinere. tanti valet in rebus aggrediendis auctoritas Principis. Qui itaque clavum Regni tenet, tale vivendi institutum sibi præscribere debet, ut faciat, non quod sibi libeat, sed quod ipsum deceat; non enim quod quisque potest, id ei licet, nec propterea ei permittitur, quia non obstat, siquidem id tantum licere dicimus quod legibus, Majorumque institutis conceditur. Nam nihil infelicius Principibus, quàm velle agere, quæcunque possunt, & præsertim, cum omnia sibi licere existimant. Tunc consummata est infelicitas, ubi turpia non solum delectant, sed placent; & desinit esse remédio locus, ubi quæ fuerant vitia, mores fiunt. Et tunc pessimè cum Athenientibus agebatur, quando publica vox erat, Athenis omnia honesta. Quocirca explodendum, ex-

cran-

Cassiod.  
lib 6  
epist.

Aug. de  
civ. Dei  
c. 17.

Jud. c. 7.

Toll. in  
philipp.

Sen.  
epist. 19.

erandum illud verbum, Libido Regum, pro legibus habenda. sic volo, sic jubeo, sit pro ratione voluntas, utpote à procaci, eâque impudenti fœminâ prolatum. Cùm enim Antoninus Caracallus Romanus Imperator, novercam nomine Juliam formâ insignem, infano amore diligeret, dixissetque, Vellem, si liceret. mox illa subjecit, Si libet, licet. An nescis te Imperatorem esse, & leges dare, non accipere? quod verbum, ita animum Principis sollicitavit, ut statim amentilibidine concitatus, nuptias infestas, incestas, ac omnino infaustas turpiter celebrarit. O pessimum insatiabilis fœminæ consilium, quæ nescit intra fines continentiæ contineri, symboli Pythagorici prorsus oblita, Stateram ne transilias. hujus farinæ erant Persarum Judices, qui Cambyſi roganti, Num qua lex permetteret nuptias cum sorore? negarunt quidem, talem se invenire, sed quandam aliam, quâ licet Persarum Regi, facere quidquid libet. Scio jurisperiti oraculum, Quod placuit Principi, legis habet vigorem: at ritè intelligendo, nempe quando voluntas Principis ratione est regulata; si autem ratione non dirigitur, illam potius iniquitatem, quàm legem existimant sapientes. Caveat ergo Princeps ab hac voce, Regibus omnia licent, tanquam à facie colubri, & pestiferâ regnorum perniciæ; sed potiùs aures accommodet Antigono Regi sapientissimo; hic enim cuidam dicenti, Omnia Regibus honesta, justâque esse; Sunt quidem, respondit, barbarorum Regibus; at nobis, ea duntaxat honesta sunt, quæ honesta sunt; & ea tantùm justa, quæ justa sunt. ita sentiebat Theobaldus Rex apud Cassiodorum dicens; Cùm omnia possimus, sola nobis licere credimus, laudanda.

Cæsar quoque Anthemius dictitare solebat, Nihil amplius licet bonis Principibus, nisi quod licet privatis. noverant enim præclari heroës, præcipuum Regis munus esse, leges quidem præscribere, sed præscriptas observare. ne jure illis exprobratur, Imponunt onera gravia, & ipsi nec digito volunt ea movere; dicunt enim, & non faciunt. Non sic supremus Legislator, qui fundavit Regnum suum super humeros proprios: at Reges plerique fundant regnum super humeros subditorum, variis tributis illos vexando, & plurimis legibus comprimendo; ipsi autem delitiis vacantes, dorsum ab oneribus divertunt. Quod mente revolvens Cyrus major, inter Reges præstantissimus, dicere solebat, Neminem debere Principatum suscipere, nisi melior his, in quos susciperet. Sentiens hoc esse proprium Regi, aliis prospicere, & publicis commodis consulere. id autem quis efficiet, nisi qui animi integritate; & legum observatione, cæteris antecellat?

*Publica nimirum tunc res sibi constat, & æquum Imperium, cum Rex, quod jubet, ipse facit.*

Valer. li.  
6. c. 5.

Quis ignorat, memorandū Seleuci Locrensiū Regis exemplum? Plurimas, & quidem aureas condidit leges; inter quas hæc fuit præcipua, nimirum, Adulterium committenti oculi ambo eruantur. Contigit autem ipsummet filium, Regni hæredem legem maculasse, quia facinus interdictum perpetravit. mox vinculis traditur, in carcere truditur, sententia fertur, ut oculi eruantur, à primariis Regni rogatur Rex enixè, ut ignoscatur Principi; oraverunt quidem, sed non exoraverunt; nunquam enim potuit adduci Rex, ut lex jam promulgata violaretur. Quid itaque; jussit, ut oculus filio, alter verò sibi erueretur. ita debitum suppli-



supplicii modum, legi tradidit, admirabili æquitate temperamento, se inter misericordem patrem, & iustum legislatorem partitus. tanti faciebat legum, quas condidit, observationem. Sciebat enim Princeps egregius, quod qui viri iusti personam induit, deponit parentis. Quid de Bruto? hic fuit legum adeo rigidus observator, ut filios ad palum alligatos securi percuti iusserit, quia dominationem Tarquinii Regis Superbi à se expulsam reducere volebant. exiit patrem, ut ageret Consulem, orbatumque vivere maluit, quàm vindictæ publicæ deesse. Mirum profecto, quod narrat Paradinus. ait enim, quod Sicambrorum Rex Basan in suis insignibus effingebat nudum ensẽ, in cuius extremitate, laqueum habebat implexum, addita inscriptione, Discite iustitiam moniti. ut hoc commento subditis incuteret metum, & se iustitiæ acerrimum ostenderet custodem. quod re ipsa comprobavit. siquidem, ne violaret iustitiæ leges, propriis manibus filio, nomine Sedano, caput amputavit. ita legum observator fuit. Nec silentio prætereundus Manlius Torquatus: is namque Consul missus contra Tusculanos, præcepto edixit, sub pœnâ capitis, ne quis extra ordinem pugnaret in hostem. dum ergo oraturus rei gratiâ in prætorio esset, filius ejus in castris remanens, ab uno ex hostibus provocatur ad pugnam, Tu ipse congregare mecum, ut hoc eventu cernatur, quantum Latinus eques præstet Romano. tunc filius juvenili ardore accensus, singulare certamen congreditur, & strenuè se gerens, hostem interfecit; spoliisque detractis, ad patrem accessit, dicens; En pater, hæc spolia capta ex hoste cæso porto. quod ut pater cognovit, consilio convocato, eum morti tradidit, dicens;

August.  
de civit.  
Dei, lib.  
3. c. 13.

Parad, in  
simb.  
her.

Aug. lib.  
5 de civ.  
Dei.

Quando neque imperium Consulare, neque majestatem paternam veritus, adversus edictum nostrum, extra ordinem pugnasti, quantum in te fuit, disciplinam militarem, quâ stetit usque ad hanc diem res Romana, solvisti; meque in eam necessitatem adduxisti, ut aut reipublicæ mihi, aut meï, meorumque obliviscendum sit; nos potius nostro delicto plectemur, quàm Respublica tanto suo damno nostra peccata luat, mandavitque lictori, ut ipsum morti traderet: qui atutiùs erat ipsum interficere, quàm Rempublicam militari disciplinâ carere. Insigne Fabii factum laudavit semper antiquitas. nam dum Consulatus fungeretur officio, patrem suum sibi obvium equitantem aspiciens, erat enim apud Romanos in Consulum præsentia prohibitum, satellitem misit, qui ut ex equo statim descenderet, jussit. At pater filii sui mandato lubenti animo obtemperavit, & eundem tanquam consularis dignitatis defensorem celebravit. Hinc summis præconiis usque ad sidera extolluntur Principes, qui legibus ita se submiserunt, ut etiam sibi facultatem ab iis abeundi ademerint. quales fuere Antigonus Macedonum Rex, Antiochus Asiæ tertius, Gratianus, Valens, Theodosius Imperatores, qui provinciarum suarum Præfectis rescribere, si quid fortè adversum legibus juberent, ne admitterent. appositè admodum facit, quod Sanazarius scribit, laudans præclarum Regis Neapolitani facinus, qui lege latâ contra arma deferentes, postridie in publicum prodians ostendit populo primus inermes latus. Sentiebat enim gloriosum esse Principi, legibus à se latis subjici. Non tamen desunt plurima testimonia Principem legibus esse solum assentientia, & hac præsertim ratione moventur, quoniam

niam Rex David coram Deo provolutus, dicebat; Tibi soli peccavi. Quæ verba perpendens glossa, sic ait, Rex hominem non habet, qui sua facta judicet: duo sunt quippe hominum genera, quæ in sacris litteris videntur legibus esse soluta, justorum nempe, & Principum. de justis dicit Paulus; Justo non est lex posita. de Principibus autem, adducitur illud supradictum, Tibi soli peccavi: sed hæc non faciunt, quin omnes legibus subdantur. Lex enim, secundum mentem Angelici Doctoris, deducitur à ligando, eò quòd omnes homines vinculo adstringat. quæ nominis etymologia sacris litteris valde consonat, ubi sæpe repetuntur hujusmodi voces; Rupisti vincula, confregisti jugum. Quantum igitur spectat ad justos, locus Pauli sic intelligendus, Justo non est lex posita, non quòd justus non subdatur legi; Omnis enim anima (ut ait Paulus) potestatibus subli- Rom. c. mioribus subdita sit, sed quia justus non eget co- 13. actione, ad observandam legem: plus enim sponte suâ præstant, quàm lege præscribatur. Siquidem justus non metu legis, sed amore virtutis servat legem. Quod etiam evidenti ratione comprobatur, nam si essent justus exempti à jugo humanarum legum, sequeretur, quod omnes essent exempti; quilibet enim dicere posset, se esse justum, & inde emergeret perturbatio reipublicæ, & sic leges à nemine observarentur. Si verò loquamur de Principibus, ut res nostra postulat, non subduntur legibus, quantum ad vim coactivam, quoniam non habent superiorem, à quo compellantur, & nemo cogitur à seipso. geminâ namque vi lex pollet, quarum alteram directivam appellant Theologi, & est circa ea, quæ agenda, vel vitanda sunt: alteram coactivam, quâ cavetur, ne quis

O 5

à legis

Sot. de  
just. &  
jur. li. 1,  
q. 6, a. 7.

Anto.  
nin. p. 1,  
tit. 17.  
Franc.  
Patrit. li.  
8 de re-  
gno &  
repub.  
tit. 6.  
Matt. 23.  
D. Th. 1.  
2, q. 6,  
a. 5.  
Leg. 4.  
C. de le-  
gibus.  
Plat. in  
lib. 4 de  
legib.  
Cél. Ro-  
dig. lib.  
8. lect.  
antiqua-  
rum, c. 1.

à legis præscripto aberret, at si aberraverit, ple-  
ctatur. ab hac posteriore vi, Princeps est quidem  
solutus re, sed non jure. hinc Sotus ajebat, & do-  
ctè, quod sua Principem lex non cogat, non inde  
venit, quod ipse non egeat, sed quod lex naturâ  
suâ non queat. Princeps itaque legibus est solu-  
tus, si vim cogentem consideremus, quia nullus in  
ipsum potest judicium condemnationis inferre, si  
contra legem agat. Propterea dicebat Rex Da-  
vid, Tibi soli peccavi. Porro si vim dirigentem in-  
spiciamus, Quis dubitat Principem suis legibus  
esse subjectum? & hoc probatur ex jure divino;  
Aliis onera gravia imponunt, ipsi autem nec di-  
gito volunt ea movere. ex jure etiam canonico,  
ut colligitur ex cap. cum omnes de constitut. ubi  
Innocentius Papa III ait, Quod quisque juris in  
alterum statuit, ipse eodem jure uti debet. ex jure  
demum civili, nam scriptum legimus, Digna vox  
majestate regnantis, legibus alligatum se Princi-  
pem profiteri. accedit etiam illud Catonis à Divo  
Thoma citatum, Patere legem, quam tu ipse tu-  
leris. illud item Platonis; Paratum exitium illi ci-  
vitati video, in qua non lex magistratibus, sed le-  
gi magistratus præsumunt; salutem verò illi, ubi lex  
servientibus magistratibus dominatur. Bias eum  
verè principem opinatur, qui primus patriis legi-  
bus se subjecerit. Trajanus quoque cum Præfe-  
ctum prætorio designasset, gladium ei in manu  
porrexit, hæc verba subjiciens, Utere hoc gladio  
adversus hostes meos, si ego minùs justè egero,  
eum in meipsum stringito. huic rei apprime facit  
quæsitum illud scitu dignissimum, An utilius sit  
Reipublicæ, gubernari optimis legibus, an tantum  
optimo Principe, sine aliqua legum positione, Ali-  
qui dicunt esse utilius Reipublicæ, gubernari opti-  
mo

mo Principe. nam in primordio generis humani, respublica sine aliqua legum positione gubernabatur, & gubernatio optima erat. ratio autem talis potest adhiberi, quoniam utraque virtus legum, directiva, nimirum, & coactiva, præstantiori ratione invenitur in Principe, quàm in legibus scriptis. optimus enim Princeps, quoniam est regula viva, animadvertit omnes circumstantias particulares, & statuit quid hîc, & nunc agendum sit. Lex verò scripta, quoniam est regula universalis, omnes casus particulares cavere non potest. quod verò vis coactiva præcipuè inveniatur in Principe, liquet, nam lex mortua jacet, Princeps verò non sine causa gladium portat. Oppositum tamen videtur sentire Philosophus, cujus ratio est, Quoniam talis est natura libidinis, ut optimos etiam viros contorqueat. Verùm leges scriptæ definiunt, quid sit faciendum, quid verò fugiendum seclusâ omni cupiditate; Princeps verò, quoniam homo mortalis est, sæpenumero perturbatur passionibus, quæ illum facile à recto deflectunt. Pro summa ergo rei, dicendum est, quod si posset inveniri unus homo, cujus virtus esset longè major, quàm cæterorum hominum, essetque consummatæ virtutis, utile esset, & justum, quod hic unus homo, cum summa potestate administraret Rempublicam, sed quia hoc est difficile, proinde habita ratione naturæ, & conditionis humanæ, utilius est Rempublicam legibus scriptis gubernari, illisque fideliter subjici, cum sapientis vigeat auctoritas, ab omnibus recepta, Patere legem quam tu ipse tuleris.

Arist. 3.  
Politic.

*Quas posuit leges Princeps, observet & ipse,  
Sic populo, & superis, semper amicus erit.*

Ratio-

## CAPUT XIII.

*Rationem statûs Humani legibus Divinis submittat Princeps, & accipiet benedictionem à Domino.*



MISERANDAM nostrorum temporum conditionem, in quibus longè pluris æstimatur, humani statûs ratio, quàm divinæ legis observatio. Quandoquidem ubi de ratione statûs agitur, continuò nullâ habitâ rationis ratione, violantur jura, dilaniantur sanctiones, confringuntur fœdera, negligitur fides, & ut brevibus singula omnia perstringam, nulla hominum, nulla divini nominis, & numinis, reverentia; non adeò sæviunt tigrides raptis catulis, sicuti Principes, vel minuendi, vel dividendi Imperii tantillâ suspicione commoti, ut perbellè canit Poëta,

Lucan.  
lib. 1 de  
bello ci.  
vili.

*Nulla fides Regni sociis, omnisque potestas  
Impatiens consortis erit, nec legibus ullis  
Credet, nec longè fatorum exempla perantur.  
Fraterno primi maduerunt sanguine muri.*

Proinde magnus Alexander, cùm adversus Darium præliaturus surrexisset, omnem prorsus pacis conditionem à Dario oblatam respuit, legatos Persas hisce verbis remittens, Ite, nuntiate Regi vestro, quod neque terra duos Solès, neque Asia duos Reges sustinere potest. ita ferme populi Lydorum. Nam cùm Rex Croesus fratrem sibi in imperio ascisceret socium, quidam ex Lydis primarius, ait, ô Rex potentissime, omnium in terra bonorum Sol est auctor, at si gemini Soles forent,

forent, periculum esset, ne omnia incenderentur; ita Regem quidem unum accipiunt Lydi, duos simul tolerare non possunt. Ecquis ignorat, quod nec Roma quidem duos fratres ferre potuit, neque una Sparta duos Lyfandros? quid? domus Abrahæ, ut Isaacum retineret, nonne Ismaëlem eiecit? & in Rebeccæ utero, duo gemelli antequam nascerentur, nonne bella gesserunt? præclarè Ovidius,

*Non bene cum sociis Regna, Venusque manent.*  
alter etiam cecinit:

*Non patitur Regnum socios, neque tada jugalis,  
Hæc duo nec Pyladæ jungere posset amor.*

O insana regnandi libido, ad quæ flagitia non impellis? Quid non mortalia pectora cogis Regni sacra fames? Per te, cognati cognatorum sanguine sordidantur. Per te, frater in fratrem insurgit. Per te, patruus in nepotem. Per te filius in patrem. Per te, mater in filium. Per te, uxor in proprium virum. sed quid dicam? per te, mater sævit in seipsam, adhuc dicam abominationem majorem. Per te, homines insurgunt in ipsos deos. Sed quia hæc sunt dictu horrenda, & vix auditu credibilia, proinde antiquorum exemplis comprobare non erit absonum, quin operæ pretium duco.

Fredegunda Regina Galliæ, quot innoxios truncavit regio sanguine satos? at quorsum? ne turbarent Clotarii filii sui imperium. de Athalia impia scœmina, quid referam? nonne omnes regii sanguinis affines occidit, statim post mortem filii sui Ochoziæ, ut hac viâ ambitione tumens, Regnum ad se devolveretur? en sacra Regum historia, Athalia verò mater Ochoziæ videns mortuum filium, surrexit, & interfecit omne semen regium. Ptolc-

I Reg.  
c. 18.

Ptolemæus gener, Simonem Judæorum Principem, focerum convivio exceptum, cum duobus filiis, regnandi cupiditate, obtruncavit. Saul infano regnandi furore agitatus, quid mali non est molitus in generum Davidem? quot insidias non paravit? quoties tentavit eum lanceâ transfigere? at quorsum tam diro odio eum prosequeretur? solo timore amittendi Regnum. Siquidem, cum audiret nobiles Hebræas honoris ergo, choros ducentes, simulque exclamantes, Saul percussit mille, & David decem millia; statim cœpit dentibus fremere, ira excandescere, & nimio furore correptus, nullâ beneficii, nullâ innocentiae habitâ ratione, mortem quoque minitari. sic referente divinâ Regum historiâ, Iratus est autem Saul nimis, displicuit in oculis ejus sermo iste, dixitque; Dederunt David decem millia, & mihi mille dederunt, quid ei superest, nisi solum Regnum? Romulus, ut Regno solus potiretur, fratrem Remum miserè trucidavit. cui facinori satis appositè convenit illud poëticum,

*Fraterno primi maduerunt sanguine muri.*

Sabel.  
dec. 8,  
lib. 7.

Pro sola regnandi libidine, nonne Etheocles, & Polynices fratres, ita mutuis exarserunt odiis, ut nedum copiis infensis decertarent, sed infestis etiam armis digladiando, sese mutuò confoderent, ac demum in rogo coniecti, flammæ utriusque cadaveris, adhuc invicem pugnarent, quod animadvertens soror exclamavit, Vivit, vivit adhuc odium.

Antonius Severi Imperatoris filius, nonne fratrem suum infantem, matris ubera adhuc sugentem pugione confodit, ut solus Imperio frueretur?

*Vivitur ex rapto, non hospes ab hospite tutus,*

*Non focer à genero, fratrum quoque gratia rara est.*

Quod



Quod si magis exploratum habere volumus, an dominandi libidine frater sæviat in fratrem, legantur annales Gallici; ibi enim exactè describuntur quatuor filiorum Clodovei, primi Francorum Regis Christiani, atrocia inter se bella. Nam quilibet post mortem patris regium diadema sibi imposuerat. Unus Rex Aurelianensis, alter Parisiensis, tertius Sueffionensis, & quartus Metensis Rex nuncupabatur: gravissima deinde inter fratres orta discordia, causa desolationis Gallici Regni extitit.

Omnibus passim nota est Turcarum historia, quorum Imperator, ut primùm suscepit Regni gubernacula, confestim omnes fratres, quamvis adhuc imbelles, & in cunis vagientes, trucidari jubet. At quorsum tam dirum nefas? regnandi cupiditate commotus. Itaque primum Imperii signum, est fraterni sanguinis effusio; & prima dies, quæ illum effert ad fasces, illos effert ad secures.

De Abimelech Gedeonis filio, nonne referunt Jud c. 9. sacrarum litterarum monimenta, quod hac potissimum de causa, fratres suos legitimos septuaginta viros, more barbarico jussit interfici?

Cur Salomon Adoniam fratrem imperavit occidi? regni amittendi metu. sic divina narrat historia. Bersabea postulavit dari Abisag Sunamitidem Adoniæ in matrimonium: at Salomon fraudem fratris intelligens, respondit matri, Quare postulas Abisag Sunamitidem Adoniæ? postula ei & Regnum. perinde ac si dixisset, an ignoras mater, Abisag, quam fratri postulas, patris mei David conjugem fuisse, ac reginæ nomen adeptam, multis ab eodem locupletatam fuisse divitiis? quod si Adonias hanc duxerit, nonne advertis, quod regnandi

I Reg. 2.

gnandi libidine incensus, in me conspiraturus sit, meque regno privaturus? Quomodo igitur se gessit Salomon, ut res suas in tuto collocaret? cognitâ fraude, Adoniam fratrem interfici mandavit. Sed omittamus fratres, nonne insatiabilis dominandi libido impellit etiam patruos ad cædem nepotum? Aftyagis Medorum Regis testimonio comprobatur. is unicam filiam habens, Cambyssi Persæ privato viro collocavit, metuens, ne ab illius futurâ sobole, Regno pelleretur: viderat enim per quietem ex pudendis filiæ vitem surgere, quæ palmitibus suis omnem Asiam obumbraret, idcirco natum ex ea infantem exponi iussit feris devorandum: sed puer nomine Cyrus, beneficio pastoris educatus, ac grandiusculus factus, ab æqualibus suis collusoribus, Rex nuncupatus est; at cùm jam adolevisset, certior avitæ injuriæ factus, ultionem meditatus est, & contracto exercitu pastorum, in Medos trasmittit, quibus fugatis, captoque Aftyage, regnum invadunt Persæ. Sed quid de Mithridate Rege commemorem? nonne immensâ Imperii cupiditate flagrans nepoti pugione vitam ademit? simulatâ namque occasione pacis ineundæ, eoque proinde ad colloquium evocato, abscondito sub femore pugione, dum ruit in amplexus tanquam nepotis, alterâ manu arrepto pugione crudeliter illum interfecit.

Huc optimè accedit dira Lotharii in nepotes fratris sui senioris filios crudelitas. adhuc enim tenellos projecit in parietes, & defixo in ventrem cultro interfecit. Quorsum hoc? ne Totildis mater Regina, eos ad regnum elevaret. Sed audiamus sævitiam longè majorem. Ptolemæus inauditis execrationibus adjurat se sincerâ fide matrimonium sororis petere, nuncupaturumque se  
eam

eam Reginam, neque in contumeliam ejus, se aliam uxorem, alioſve, quàm filios ejus, ſe liberos habiturum. Arſinœ, & ſpe impleta eſt, & metu ſoluta, in matrimonium fratris conſenſit. nuptiæ magno apparatu, lætitiæque omnium celebrantur, ad concionem quoque vocato exercitu, capiti ſororis diadema imponit, Reginamque eam appellat. quo nomine in lætitiâ effuſa Arſinœ, ultro virum in urbem ſuam Caſſandriam invitât, cujus urbis cupiditate fraus ſtruebatur. Prægreſſa igitur virum, diem feſtum urbi in adventu ejus indicit, filios quoque ſuos Lyſimachum ſexdecim annos. natum, Philippum triennio minorem, utrumque formâ inſignem, coronatos occurrere jubet, quos Ptolemæus ad celandam fraudem cupide amplexus, oſculis diu fatigat. Ubi ad portam ventum eſt, occupari arcem jubet, pueros interficit, qui cùm ad matrem confuſiſſent, in gremio ejus inter ipſa oſcula trucidantur. Proclama- vit Arſinœ, quod tantum nefas, aut nubendo aut poſt nuptias contraxiſſet, pro filiis ſeiſpſam percufforibus obtulit, corpore ſuo, puerorum corpora amplexata protexit, plurimæque vulnera excepit. demum ſpoliata etiam funeribus filiorum, ſciſſa veſte & crinibus ſparſis, duabus tantum ancillis comitata, ex urbe protracta, Samothraciam in exilium abiit, eo miſerior, quod mori cum filiis ei non licuit. Nec Ptolemæo inulta ſce- lera fuere: nam exiguo interjecto tempore, à Gallis ſpoliatus Regno captuſque vitam ferro, ut meruerat, amiſit.

Antipater nonne Alexandro Magno nepoti ve-  
 nenum propinavit, ut ipſe Regno potiretur? Quid  
 • plura? nonne fames dominandi, filios etiam im-  
 pellit in patres? Quis vidit unquam abomina-  
 P tionem

Sabell.  
 ennea-  
 de 4.  
 lib. 8.

Q.  
 Curt.  
 lib. 4.

tionem majorem? & tamen Alexander Magnus, si Justino credimus, Philippi patris mortem procuravit operâ Pausaniæ, quia timebat habere socium in Regno, Attalum spurium fratrem. Quis non abhorrebit immanitatem Tullia Tarquinia filia? impia hæc foemina, non virgo, nec virago, sed vorago, ut regnaret, patrem occidi mandavit, & renitentibusequis, ac invito auriga, jussit ut cadaver paternum rotis currus, cui infidebat, contunderetur, ut Tarquinius Superbum virum suum, Regem salutaret. Ex quo intelligimus, quàm minimè tuta sit ambitiosis fides, quando ex sanguine etiam domestico ipsa exulat. Verissimum est illud pro oraculo habendum; Regnandi cupiditas nescit jura pietatis.

2 Reg.  
c. 15.

Quare Absalon, Davidis Regis filius, patrem velut hostis expugnavit? infestum ei bellum movit? diras paravit insidias? quia regnandi desiderio ardentissimè flagrabat.

Nic.de  
Lira  
in cap.  
14 Isa.

Quid dicemus de immensa dominandi libidine Evilmerodach filii Nabucdonosoris Regis? is cum patrem vita functum cerneret, timens ne iterum viveret, ejus corpus contundi jussit, in frusta concidi, ejusque pulverem in ventum dispergi, ne iterum coalesceret, & ipsum de solio deponeret. Ingenti urebatur ambitione regnandi Moreveus, Chilperici Regis filius, proinde patri suo adhuc viventi insidias varias & graves struebat, verum à Domino divinitus admonitus, & terrore correptus abstinuit. Cùm enim quadam die ad convivium vocasset Gregorium, & postea postularet, aliqua legi ad instructionem animæ, statim Gregorius reserato Salomonis libro, ver-

Gre-  
gor.  
Tu-  
ron.  
lib. 5.  
c. 14.

siculum, qui primus occurrit, arripuit. hoc autem continebat; Oculum, qui adversus patrem respe-

Prov.  
30.

respexerit, effodiant eum corvi de convallibus. diram hanc pestem, utpote omnibus legibus ex diametro repugnantem, abhorrebat Decii Imperatoris filius. cum enim pater imperiali diademate filium proponeret insigniri, renuit filius dicens; Vereor, ne si id fiat, dediscam esse filius; imperet pater meus, meum imperium sit parere humiliter patri imperanti: quasi diceret; turpe nefas, ita naturam ipsam exuere, ut quis in proprios parentes insurgat; ad hoc autem impellit regnandi libido.

Proinde rogatus Solon, cur nullas leges adversus eos, qui parentes verberassent, constituisset? quod nullos, inquit, tales futuros existimabam.

Sed quid dicam? nimia dominandi cupiditate, horribile quidem dictu, verum tamen, ipsa etiam mater sevit in filium. testis est Irene Constantinopolis Imperatrix; hæc enim crudelia spectacula edidit, sola dominandi libidine impulsæ. duces namque, datis muneribus, eò pertraxit, ut Constantinum filium ex insidiis captum, oculis effossis in carcerem conjicerent, ubi miser mœrore luctuque confectus, paucis post diebus, exspiravit. Quorsum Herodes ad tantam sevitiam devenit, ut tot innocentes pueros, matris uberibus affixos, jugulari præceperit? iratus est valde, & mittens occidit omnes pueros à bimatu & infra; ut firmiorem Regni sedem statueret. Et hac de causa, nonne etiam proprium filium trucidavit? unde Augustus Cæsar, audita tam truci immanitate, jocans, dicebat: In domo Herodis, mallem esse porcus, quàm filius. nam, ut rigidus legis, Judaicæ observator, fues ne quidem tangere auderet, in filium tamen cruentas manus injicere non fuit veritus. Quid si dixero cæcam

Math.  
c. 2.

Ma.  
crob.li.  
2 Sa-  
turn.  
c. 4.

regnandi libidinem, eò usque prolabi, ut uxor in proprium virum sæviat? hoc tamen liquet aperto Semiramidis testimonio. Cùm enim Semiramis à marito Nino impetrasset, ut saltem diem unum in regio tribunali sederet, obiretque munus regium, jus dicendo, ac fanciendo, quæ vellet, exploratis jam satellitum animis; tunc Ninum Regem blandè apprehendi iussit, deinde cum risu in vincula conjici, & demum ludibrio expositum, capite truncari. O scelus planè inauditum! Sed quis crederet aliquem eò dementiæ devenire, ut ambitione ductus, seipsum interfici gloriosum ducat? Prodeat in scenam Agrippina Neronis mater, hæc tantâ ambitionis siti æstuabat, ut cùm oracula consulisset, num aliquando filius regnaturus? eique responsum fuisset, Regnaturum quidem, sed in Imperio matrem suam necaturum; avida diadematis dixerit, Occidat, modò imperet. Sed cur pluribus immoramur? ambitiosa dominandi libido ita sævit, ut etiam in deos ipsos insurgat.

Sabell.  
li. 4,  
c. 7.

Fal-  
gof.  
li. 9,  
c. 5.

In corde Caligulæ, si Fulgosiō credimus, ita invaluit sola sine consortio regnandi cupiditas, ut non solum in homines; dicebat enim, Utinam populus Romanus unicam haberet cervicem! sed in deos ipsos sæviret. Nam omnium deorum simulacra decapitari iussit, & singulis singula capita, vultum ipsius Caligulæ referentia, inferebat, ut solus adoraretur. Quis tale facinus sanè inauditum unquam crederet? sed videamus, si lubet, insaniam penè incredibilem ex regnandi libidine emergentem. Valens Imperator, ut solus Regno potiretur, nedum vivus, sed & mortuus, superstites, quos suspicabatur, post ejus mortem regnatos, omnes trucidari iussit. Cùm enim nonnulli

curiose

curiose investigantes sciscitarentur, quis post Valentem Imperii gubernacula obtineret? ita responsum fuit, litteras quatuor esse. Th. E. O. D. ex quibus ejus nomen, qui esset post Valentem regnaturus, inciperet. mox ejus rei fama ad aures Imperatoris evolavit. Quo audito, omnes qui erant vel Theodori, vel Theodoti, vel Theodosii, vel Theoduli nomine appellati, quasi tigris fœviens, interfici mandat. In quorum numero fuit quidam vir nobilis ex genere patritio nomine Theodosiolus, qui ab Hispania ad Valentem adductus, morte mulctatus est, non alio titulo, nisi quia impius & vesanus Imperator suspicabatur eum Imperio potiturum. Hinc multi præ metu animis injecto, sua statim commutarunt nomina, & ea, quæ parentes illis in lucem editis, imposuerant, tanquam plena periculi denegarunt. O pestis diabolica ab inferis suscitata, quæ sensim serpens per corda potentium, contagio prorsus insaniabili, totum penè infecit orbem terrarum. Sed quid dico terrarum? Nec cælum ipsum immune fuit ab immani bello, propter hanc impiam dominandi libidinem. Quod satis apertè comprobatur in sacrarum litterarum monimentis. Exclamat enim tuba cælestis; Factum est prælium magnum in cælo. Scio quidem varios doctores variè sentire, <sup>Apoc. c. 13.</sup> quodnam fuerit dæmonis primum peccatum.

Doctör subtilis opinatur fuisse luxuriam, non <sup>In 2.</sup> tamen quamcumque, sed inordinatum sui <sup>a-</sup>dist. 6. <sup>dist. 6.</sup> morem.

Angelicus doctör arbitratur fuisse superbiam, <sup>1 p. 9.</sup> ita etiam Athanasius, Ambrosius, Augustinus, Na- <sup>63.</sup> zianzenus, Chrysostomus, Cyrillus.

Alexander de Ales doctör irrefragabilis, tenet <sup>1 p. 9.</sup> radicem peccati dæmonum, fuisse avaritiam. non <sup>78.</sup> quidem <sup>memb. 2.</sup>

quidem pecuniarum; sed honoris; ac gloriæ, & proinde spiritualement.

Bernardus doctor mellifluus, vult dæmonem peccasse invidia, propter unionem hypostaticam Verbi divini, aliquando communicandam naturæ humanæ; quasi indoluerit, quod creata natura longè se inferior, deberet sibi anteponi, & quod majus est, deberet eam venerari.

Rupertus Abbas arbitratur peccatum dæmonis, fuisse odium contra Christum, statim atque mysterium incarnationis est Angelis revelatum. Displicuit enim illi, quod potius humanam, quàm Angelicam naturam assumeret, hac de causa mortem ejus machinatum fuisse. Proinde dicebat Ioan. c. 8. Ille homicida fuit ab initio.

Ego autem, si licet cum tam præclaris viris meam proferre sententiam, primum dæmonis peccatum dicerem fuisse, nimiam dominandi libidinem, quàm rationem status vocant politici: dixerat enim in corde suo, In cælum conscendam, si-  
 Ifa. c. 14. milis ero Altissimo. Neque hoc est meæ mentis inventum, sed gravissimorum doctorum placitum, nempe, dæmonem in sui primordio, appetiisse Principatum, ut videre licet apud Bonaventuram, Bona. in 3. Lyranum, Augustinum, Gregorium, qui omnes dist. 1. Au-  
 gust. Quid igitur mirum, si omnes ejus asseclæ, in Io-  
 an. cap. 14. ubi de ratione status agitur, confestim nulla habita rationis ratione, indignantur, fremunt, sæviunt, Greg. dentunt, vipereunt, & tanquam feræ furunt? li. 34. Quid mirum, si inordinatus zelus amittendi Re-  
 moral. c. 17. gnum, ita anxie torqueat, angat, mordeat tyrannorum animos, ut ad omne impietatis facinus, præcipientes ferantur? Quid mirum, si impius ille Herodes, tyrannorum antesignanus, tot parvulos adhuc



adhuc vagientes, tam dire jusserit trucidari? Quid causæ fuit, ut scelus tam execrandum perpetraret? timebat de regia sede deturbari; ita deplorat Ecclesia,

*Audit tyrannus anxius,  
Adesse Regum Principem,  
Qui nomen Israël regat,  
Teneatque David Regiam.  
Exclamat amens nuntio,  
Successor instat, pellimur,  
Satelles, i, ferrum rape,  
Perfunde cunas sanguine.*

Submitte igitur, ô Princeps, legi divinæ fasces tuos, si vis tutum, si vis diuturnum imperium. non viribus humanis inniti, tanquam baculis arundineis; sed in omnibus, consule Dominum; jura tua illi subijce, Principum seniorum vestigia sequere, qui, ut refert Joannes, Adoraverunt vi- Apoc.  
ventem in sæcula sæculorum, mittentes coronas c. 4.  
suas ante thronum Dei. quasi cum regio Vate ac- Psalm.  
clamarent; Non in gladio nostro possidemus ter- 117.  
ram, nec brachium nostrum salvat Imperium, sed dextera Domini exaltat Regnum, & dextera Domini facit virtutem. si autem secus feceris, vide, ne tibi contingat, quod minatus fuit Dominus Ezechiaë Regi; Auferentur omnia quæ sunt in domo tua, ut cognoscant Principes, non esse potentiam, neque consilium, contra Dominum.

*Imperii fines semper divina tuetur*

*Religio. labat hæc? vis labat Imperii.*

*Legibus ergo Dei Regnorum subijce jura,*

*Regna tibi, ô Princeps, si diuturna cupis.*

## CAPUT XIV.

*Gloriosum Principi, servare fidem; violare, ingloriosum.*



Valer.  
li. 6. c.  
4.

Tull.  
li. 3. de  
offic.

An-  
guft.  
de civ.  
Dei, li.  
1.

Urpe nefas, violare fidem, & Christiano Principe prorsus indignum. Quod præclaro Alexandri Regis testimonio comprobatur. Nam cum Parmenio Princeps militiæ, quidpiam suaderet, quod præter fidem, ac decorem esset, repeteretque sæpius, Ego quidem facerem, si essem Alexander; & ego, ait, si essem Parmenio. Quippe qui sciret, nihil à Regibus patrandum, nisi præclarum, & animo regio dignum. Egregium itidem apud Romanos Atilii Reguli testimonium. is enim à Carthaginensibus captus, ab iisdem Romam missus est Legatus, ut de captivorum redemptione ageret cum Senatu, fidem pollicitus, se reversurum. Fidelis fuit patriæ, fide etiam in hostes inviolata permanente. dissuasit captivorum permutationem, pro patriæ beneficio. hostibus tamen servavit fidem, quia Carthaginem reversus, ubi postea atrocissimis pœnis vitam cum morte commutavit. poterat mortem durissimam evitare, at maluit diem extremum obire, quàm promissam hostibus fidem violare. ex qua servata fide, tantam consecutus est gloriam, quantam cæteri Principes, ex præliis feliciter gestis. Quid enim turpius esse potest, quàm fidem fallere, promissa non præstare, & dictis conventisque non manere? Proinde Romani, mundi dominatores, fidem ingenuè observabant: quod facile potest conjici, ex responso Carthaginensibus allato.

allato. Nam Duellius Cornelius Asina, cùm in primo Punico bello exercitum in Sicilia haberet, ab Amilcare, & Hannone, quì exercitui Carthaginensium præerant, præstita fide ad colloquium evocatus, per dolum interceptus est, & in vincula coniectus: sed cùm postea adverso Marte, Carthaginenses terrâ marique bello succumberent, placuit ut de petenda pace ageretur, resque Amilcari & Hannoni demandata est à Punico Senatu. Amilcar memor violatæ fidei Cornelio Asinæ, ad Consules ire formidabat. Hanno autem Romanorum fide fretus, audacter ad Consules perrexit. ad quos profectus, cum causam liberiùs exponeret, tunc Tribunus quidam militum obstrepere cœpit, perfidiæque eum accusare, minitandoque dixit, Facile fore, ut ei contingeret, quod Cornelio Asinæ jam acciderat. tunc uterque Consul silentium ei indixit, Hannonemque legatum ita sunt allocuti, Noli timere, isto periculo fides Romana te liberat. O memorandum exemplum Romano pectore dignum! Sacrum enim, etiam inter gentes, legatorum jus. Quid enim sine fide, hoc est, <sup>Tac. lib. 3 hist.</sup> justitiæ base, regnum est aliud, nisi magnum & publicum latrocinium? Quod planè intelligens Aristoteles, inter multa præcepta, quæ reliquit Alexandro Regi, hoc præcipuum instituit: Cave ne infringas fidem datam, quia hoc, nec infidelibus quidem convenit. Siquidem turpe nimis, ac indecorum, fidem semel datam non servare. Proinde dux ille inclytus Alcibiades dicere solebat, quoties in Socratem incideret, se rubore suffundi, quod illi promissis non stetisset. hinc Phocion inter Græcos illustris consulebat, non esse magna hominibus promittenda, sed præstanda potius. Laudabilius nimirum est, pauca polliceri, & plura

facere, in Principibus præsertim, vicem Dei gerentibus, qui nec falli, nec fallere potest. ideo ipsemet dicebat: Cælum & terra transibunt, verba autem mea non præteribunt. Perinde ac si dixisset, nolo ut verba mea irrita fiant, sed fidelis ero in omnibus verbis meis. quod re ipsa probavit: nam quod semel promisit, fideliter observat. Promisit justis mercedem laborum suorum, abundanter retribuit, quia, & ultra condignum; unde Paulus dicebat: Non sunt condignæ passionibus hujus temporis ad futuram gloriam. Pro cuius doctrina notare debes, quod triplex meritum apud Theologos reperitur; de rigore justitiæ, de condigno, & de congruo: meritum de rigore justitiæ est illud, quod non innititur gratiæ, aut misericordiæ acceptantis, sed habet valorem ex persona offerente, quale est meritum Christi Domini: nam persona Christi de se est infinitè grata, & ejus opera habent infinitum valorem apud Deum; propter quod meritum Christi est de omni rigore justitiæ. Meritum de condigno est illud, quod licet innitatur gratiæ, & misericordiæ acceptantis, est justum & condignum ad præmium futurum; hujusmodi est meritum Sanctorum. Meritum de congruo, est illud, quod non innititur justitiæ sed congruentiæ tantum. Deus itaque, quia est fidelis, præstabit justis de condigno, quod promisit, non tamen vi obligationis, quia Deus nulli debet; nam debitor quatenus debitor, est creditore inferior; debet tantum suæ ordinationi, & promissioni, & manu plena præstat, quod promittit; aliàs Deus non esset Deus, neque prima veritas, dicente Paulo. Fidelis Deus seipsum negare non potest. Quia ergo Princeps vices Dei gerit, fidem datam etiam hosti

hosti inviolabiliter servare debet. hoc est enim animo excelsò, & regio dignum, cui concinne competit elogium, Sit sine labe fides. Quod animadvertens Saul, fidem semel datam Davidi omnino servavit, generum Regis constituendo. Inter cætera Davidis adhuc adolescentis præclara fortitudinis indicia, refertur, quod urfos dilaniaret, leones laceraret, lupos jugularet, aliasque beluas, & mole ingentes, & feritate immanes, non sine magno corporis periculo conficeret. quæ quavis singularia heroicæ virtutis argumenta forent, nullam tamen ex iis laudem, nullam gloriam, imo ne obolum quidem assecutus est; at mox, ut hominem interfecit, quem ictu lapidis eminus ad terram prostravit, omnium præconiis celebratus, gratiam filiæ Regis consecutus, & Saulis gener effectus est. Quorsum hoc? unica hujus rei ratio fuit, quod Saul, Goliæ percussori filiam suam dare sponddisset, nuptiasque & affinitatem Regiam jurasset. Tanti valuit apud Regem datæ fidei auctoritas, & verbi Regii observatio. hinc laudatur Nerva Imperator, cum enim interposito jurejurando, Senatui dixisset, se auctore, nullum Senatorem morti tradendum, abstinuit à ferro in eos, quos in caput suum conjurasse sciret. tantum potuit, in alta gentilitate jurejurando fides confirmata, ut religione illius tactus Imperator, parceret ferro & sanguini, etiam in capitis periculo. Ad rem satis appositè spectat, quod de Nerone refert Seneca. In familiari quadam confabulatione dixit Imperator, Ferrum tuetur Principem; at ipse continuo subjecit, melius fides: hoc est, promissa adimplere. licet nostris temporibus pluris æstimetur dolus & simulatio, quàm datæ fidei observatio. Non ita, non ita Prin-

Principes ingenui, quorum splendor regius, in rebus præclare gestis gloriose refulget. hi enim victorias obtinuerunt, Regna comparaverunt, hostes straverunt, non dolo, non fraude, ac violata fide, sed prudentiâ, armis, & ingenio. ita Lycurgus legislator egregius. Cùm enim Spartani reipublicæ gerendæ peritissimi, Lycurgo defuncti Regis fratri, Regnum. & coronam detulissent, viduâque defuncti, se prægnantem comperisset, verita, ne novus Rex, hoc audito indignaretur, ac moleste ferret, quod forsitan masculus ex se nasciturus, regnum illi auferret, utpote legitimus hæres, nuntiavit illi, se foetum utero conceptum, veneno necaturam, aut aliquo medicamento, abortum causaturam, si modo vellet, quo illius Regnum firmaret tutum, & ab omni competitore liberum redderet. Placere sibi consilium finxit Lycurgus, at nolle effectum, ne tali medicamento, sibi aliquod afferret detrimentum, quare, infantem tempore suo nasci sineret, sibi jam natum extinguendi rationes non defuturas. credidit illa, & cùm egregium masculum Charilaum nomine peperisset, Lycurgus acceptum in Senatum detulit, hac usus oratione; Ecce legitimum Regem vestrum, Lacedæmonii, non vero me, quare regia ornamenta puello imposuit posthumum, ut omnes intelligerent, eum longe pluris fidem, quàm amplissima Regna facere.

Valer. De Camillo autem Consule Romano, acerrime  
lib. 6. mo fraudis inimico, quid dicemus? iste dux egregius, cùm Phaliscos obsideret, ludimagister nobilissimos pueros, tanquam ambulandi gratia, extra muros educens, in castra Romanorum perduxit, illos offert Duci, inquiens, En sine sanguine parta victoria, quoniam in repetendis talibus obsidibus,

Sabel.  
li. 10.

dibus, sponte civitas se tibi tradet, & imperata faciet. tunc Camillus, qui justitiæ personam sustinebat, non solum respuit perfidiam, sed restrictis etiam post terga manibus, magistrum virgis agendum pueris dedit, ut ad parentes adducerent. quo beneficio, & animi ingenui testimonio capti Phalisci, magis quam armis victi, portas Romanis aperuere. Itaque Camillus, quam ex fraude recusavit, ex justitia consecutus est victoriam. Fit enim ad propugnandam, non ad evertendam justitiam. Fabricii Romani spectatâ fidem quis non celebrabit? Cùm Pyrrhus Epirotarum Rex, cum Tarentinis venisset in subsidium contra Romanos, & intellexisset Fabricii paupertatem, qui erat unus de legatis Romanorum, missis nuntiis ad eum, obtulit quartam partem Regni sui, ut ad se transfiret, necnon magnam auri quantitatem ei præstare voluit, si proderet Romanam civitatem. cui Fabricius, dixit; Regnum tuum simul cum auro tanquam lutum despicio. Existimo enim incorruptæ fidei observantiam nobiliorem esse omnibus Regnis, & auro mundi. Cæterum interjecto anno, missus est Fabricius cum exercitu à Romanis contra Pyrrhum, ad quem medicus Pyrrhi veniens nomine Timocrates, promisit se Regem veneno necaturum: at Romanus dux ingenuus, statim vinctum reduci jussit ad Pyrrhum, eique dici, quod contra eum medicus spondidisset. Tunc Rex plurimum admiratus, dixisse fertur; Ille est Fabricius, qui difficilius à fide, & honestate, quam Sol à suo cursu potest averti.

Inviolatæ fidei observantissimus fuit Sextus Pompejus: nam cum Marcum Antonium, & Octavium conciliatos, navi sua susceptos veheret, necare poterat, & imperare. noluit, ne per violatam fidem ad imperiū venisse videretur, dignissimus

Ful-  
gos. li.  
6. c. 6.

Bru-  
son. li.  
2 c. 35.

simus Pompeji nomine, & vel hoc solo, quando fidem monarchiæ præposuit, nec regnandi causa, jus violare voluit. sic enim respondit Menodoro Pompejanæ classi Præfecto, Siquidem cum Menodorus adhærens Pompejo clam cum illo locutus; dixisset: Visne ô Sexte anchoras succidam, & te non Siciliæ, neque Sardiniae, sed Romani Imperii faciam Dominum? cui Pompejus, cum paulisper secum cogitasset; Oportuit, inquit, ô Menodore, hæc per te ipsum, me incio, fecisse. pejerare enim nequaquam meum est. En vox ingenuo Principe digna, licet à politicis nostri temporis irrideatur. Sciebat enim, nihil magis gloriam Principis labefactare, quàm sacros fidei cancellos transilire. hinc Divus Ambrosius dicebat; Sunt quidem jura bellorum, & fœdera etiam inter ipsos hostes servanda, contra quos geritur bellum. Quod idem ferme sentit Augustinus; ideo scribens ad Bonifacium dixit: Fides quando promittitur, etiam hostibus est servanda. Poterat quidem dux ille, inimicum dolo prosterne-  
re, at maluit fidem in hostem servare, quàm dolose superando, turpiter triumphare; turpiter autem triumphat, qui dolo & fraude; gloriose vincit; qui industria & ingenio. nullo enim eventu licet fallere hostes insidiis, dicendo falsum, aut non servando promissum, licet quidem fallere hostes insidiis, occultando illis intellectum & propositum nostrum. Siquidem in pugna, non dolo, sed industria militaris laudatur. hinc Lycurgus legislator non probabat prælii genus, in quo virtuti locus non esset.

Au-  
gust.  
ad Bo-  
nifac.

D.  
Tho.  
2.2. q.  
41 a. 3.

Quod experimento docuit aliquando Cyrus rei bellicæ gnarus. hic enim firmatis castris, simulato metu; quasi fugiens, castra vino epulisque referta,



referta, reliquit diripienda: quod cum Regina Thomiri denuntiatum foret, adolescentulum filium adsequendum eum, cum tertia copiarum parte misit: adolescens autem rei militaris ignarus, cum venisset ad castra, tanquam ad epulas, omissis hostibus, prorupit ad crapulas. Cyrus autem per exploratores edoctus, nocte revertitur, cibo, potuque graves, atque somno oppressos, strenue invalid, cunctosque cum Regina filio trucidavit. At Regina mater, non metu perculsa, sed Virago, perduto unico filio, & magna militantium parte, ipsa quoque simulata diffidentia, propter vulnus recenter acceptum, Cyrum semper refugiebat, quousque hostem in insidias traxit, ubi dispositis inter montes insidiis, ducenta millia Persarum cum Rege delevit, adeo ut nec tantæ cladis nuntius superfuerit, Cyriq; caput amputatum, in utre humano sanguine pleno, reponi iusserit, dicens: Sanguinem sitisti, sanguinem bibe. hæc non est fracta fides, sed industria militaris, quæ arte delusit artem. hanc militarem astutiam observavit Gedeon dux illè fortissimus, qui pugnavit, superavit, vicit; non quidem fraude, sed industria singulari. iussit namque à singulo milite lagenam fictilem sinistra manu portari, in qua lucerna ardens latitabat; dextera vero tubam, nocturno tempore hostiles copias aggreditur. mox milites in tres turmas divisi, buccinis clangunt, fractisque lagenis, ardentes faces hostibus conspiciendas ostendunt. itaque hostes, quos somnus ante oppresserat, experrecti, tria existimantes esse castra, nam copia hominum, multarum tubarum clangor, gentes in tres partes distinctæ, trium castrorum species præ se ferebant, repentino quodam terrore exanimati, Gedeoni terga

terga verterunt, & in seipfos irruentes mutuis se vulneribus trucidarunt. Auxilium planè à Domino, sed medio hoc stratagemate parta victoria. Gedeonis quoque filius Abimelèch turrim Sichem fortissimam, ac penè inexpugnabilem, non dolo, sed armis & astu militari obtinuit. aderant in ea homines innumeri, strenue locum illum custodientes. tunc ascendit Abimelech montem Selmon, accepta securi præcidit arboris ramum, quem statim propriis imposuit humeris, mox ad milites conversus, ait, Eja fratres, quod me videtis facere, & vos facite. Protinus ramis abscissis, ducis vestigia sequuntur, & exiguo temporis spatio, turrim veluti vallo circumvallantes, & statim ramos succedentes, fumo & igne, hostes, qui intus erant, misere confecerunt. En duces egregii, non violata fide & dolo, sed militum robore & bellica industria utebantur. noverant planè, quàm sit execrandum crimen, fidem semel datam, etiam hosti violare. Quod olim Athenienses præclaro testimonio comprobavere. nam proditores, nec mortuos nec vivos ferre consueverunt. Itaque Athenis fidei fractores, neque defunctos sepeliebant, neque viventes inter socios admittebant. hinc Cæsar dicere solebat, Placere sibi proditorem, non proditorem. Augustus idem ferè dictitabat, Ego proditorem amo, proditorem non approbo. Antigonus assererat, se proditores amare, dum proderent; ubi verò prodidissent, odio prosequi. Philippus Rex Macedonum idem dicebat, sed elegantius, Amo prodituros, non proditores. nec injuriâ. Quomodo enim sperandum est, eum in alienos fidum fore, qui in suos perfidus fuit?

Non tamen perfidiæ arguendos dixerim, qui  
eam

eam fidem frangunt, quam & sibi, & reipublicæ indecoram, & exitiosam futuram cognoverint. quoniam cum alter non habeat jus ad petendum, nec collatum bono jure possit accipere, ita nec iste tenetur promissa, cum tanto publicæ rei detrimento adimplere, imò penitus frangenda: sic consulit Isidorus; In malis promissis rescinde fidem, & in turpi voto muta decretum: impia est enim promissio, quæ scelere adimpletur. hinc laudatur Rex David, quod jusjurandum in Nabal resciderit: damnantur Herodes & Jephte, quod impia vota, impiâ sanguinis innocentis effusione expleverint.

Bannes  
in 2.2. q.  
41. a. 3.

Siquidem cum fides justitiæ fundamentum sit, quis unquam sanæ mentis, illam censebit fidem, quæ justitiam evertit? Quin potius eos irridendos arbitror, qui, si quippiam inhonestum promiserint, mori malunt, tanta est vecordia, quàm inconstantiae convinci. Sunt enim nonnulli Principes, qui non minùs turpe existimant flecti, quàm vinci, sed hoc turpissimum est. non autem turpe, cum re mutare consilium. hinc elicitur quanta olim fuerit Germanorum stultitia, qui aleam sobrii inter seria exercent, tantâ lucrandi perdendive temeritate, ut cum omnia defecerint, extremo, ac novissimo jactu, de libertate, ac de corpore contendant, victus voluntariam servitutem adit, quamvis junior, quamvis robustior, alligari se, ac vœnire patitur, & quod stultius est, hanc dementiam, ipsi fidem vocant: at hæc non est fides, sed pervicacia, sed furor, sed infania; non enim est levitas, à cognito & damnato errore discedere. Est quidem superbæ stultitiæ indicium, semel dictum, qualecunque sit, & fixum, & ratum velle. siquidem melius est recurrere è medio cursu, quàm

Cic. l. 1. de offic.

Sen. de  
benef. li.  
6. c. 30.

Sen. de  
benef.  
lib. 4.

Q

malè

malè currere. mutatio quippe in melius semper est optima.

Nec fides Principe digna, quæ comitata fugo, fraudibusque implexa, qualem habuerunt Thracæ. isti enim cum Boëtiis inducias, certo dierum numero pepigerunt, ac noctu cum illi in tuto se esse existimarent, agros eorum populantur. violatam fidem, inclamant ruinam passi. negant isti, se perperam egisse, cum induciæ dierum pactæ essent, non autem noctium. sed hæc, est ne dicenda fides? minimè gentium. Perfidia quidem, & ingenio Principe prorsus indigna, ex cujus ore verba prolata, mentis conceptui respondere debent. de quibus potest dici, Averterunt se, & non servaverunt pactum. Proinde pomum Persicum pro insigni, unà cum folio adhærente, additâ notâ, Idem ambo, appositè attribuitur Principi. illud enim quis non videt, quandam humani cordis figuram præ se ferre, & ejus folium linguæ formam præmonstrare? Quid hinc? ut discat Princeps, proprium illius manus esse, quod ore pronuntiat, opere complere,

*Fert folium linguæ, fert poma simillima cordi,*

*Hinc vitam, ô Princeps, degere disce tuam.*

Ne vulgò decantetur, aliud habet in ore promptum, aliud in pectore clausum. quod turpe, quod nefas, quod inglorium. Horset animus, cum Radamisti barbarum facinus memoriâ repeto, qui, ut Cornelius refert, in Mithridatis amplexus effusus, simulans obsequium, socerum & parentem appellavit. Insuper adjecit jusjurandum, non ferro, nec veneno vim allaturum. mox in lucum propinquum trahit, provisum illic sacrificium dictitans, ut, diis testibus, pax firmaretur. sed quid immoror? Radamistus quasi jurisjurandi memor, non ferrum,

ferrum, nec venenum in patrum, & sororem expromit, sed porrectos in humum, & veste multâ, & gravi opertos necat. En barbari hominis fides infida.

Scio quidem esse hominem quendam perditissimum, omni vitiorum genere maculatum, qui Principem instituit sine fide, sine pietate, sine religione. Quippe, qui nihil tribuat religioni, præter opinionem hominum, in quorum gratiam, vult suum Principem aliquam rationem divini cultus profiteri, adeo ut iste homo, si tamen hominis nomen meretur impius atheus, Principem suum doceat, ut potius studeat religionis cultor, & virtutum amator videri, quàm esse revera, si velit tutius potiri Regno. Quin vult eum ita animo esse compositum, ut quod flaverint venti, & quod fortuna impellit, eò se vertat, & cum fuerit necessitas, operetur malum, leonem & vulpem agens violentiâ, & fraude. Quam impiam, pestilentem, & perniciosam institutionem à cordibus Principum avertat Deus, utpote à fide, à religione, ab humanitate alienissimam. Quod etiam ipsi Pagani non solum agnoscere, sed quàm maximè detestati fuere. ut præclare Marci Tullii testimonio comprobatur. Cum enim, inquit ille, duobus modis fiat injuria, nempe, aut vi, aut fraude; fraus quasi vulpeculæ, vis leonis videtur, utrumque ab homine alienissimum, sed fraus odio digna majore. Quid dicet hic, perditus ille homo, sui temporis macula? nonne surget in judicio Paganus hic philosophus, & condemnabit generationem istam? quæ Deum ipsum, ab animo suo penitus abalienavit? dixit olim Ethnicus quidam potentissimus tyrannus, Si violandum est jus, regnandi causâ violandum est; nec dixit absolutè, sed adhi-

Ambros.  
Carar.  
opusc.  
de lib.  
elimi-  
nandis,

Cic. lib.  
I de of-  
fic.

Sueton.  
in vita  
Jul. Cæs.

adhibitâ conditione , si violandum est jus. At hic nec Deum , nec homines veritus , absolutè jus violandum proponit , & suadet.

Nec silentio prætereunda ingens hominis istius stoliditas , duos proponit Principes , tamquam exempla imitanda , quorum tamen exitus infelix , ambo enim veneno extincti turpiter occubuere. Sed de hoc perditissimo homine , qui famam infamem , ut alter Erostratus sibi comparavit , satis hæcenus. siquidem recitasse ejus impia dogmata , apud verè Christianos , est idoneè confutasse. Satiùs esse duco , Principes Catholicos in Domino exorare , ut malint Christi sapientiam audire , quàm hæc diaboli fallacias , per quas ad tartara præcipitantur. Potentes enim potenter tormenta patientur. Quod si , ô Principes , vultis experimentis doceri , illos Imperatores excogitate , qui & leones , & vulpes fuere , illorum planè vitam reperietis , & periculis , & angustiis refertam , mortem quoque prorsus horribilem. Annales Regum evolvite , & videbitis populum Israëliticum fame vexatum. sed quamobrem ? quia Saul fidem à Josue Gabaonitis datam violasset , nec tantum scelus expiatum , nisi septem virorum è familia Saulis , in crucem actorum supplicio , ac nece. Perlegite quoque antiqua historiarum monimenta , & passim videbitis plurimos Principes , fidei beneficio , opibus locupletatos , longè , latèque suum Imperium propagasse. Verùm , quia longior esset sermo , quàm institutum nostrum patitur , si omnium Principum exempla hîc enumeranda susciperem , qui ob servatam fidem incolumes à Deo servati fuerunt. unum (instar omnium) proferam , ex quo Principes facîle intelligent , quàm benè bonis Principibus cesserit , integra & incorrupta fides. Cùm magnus

Lib. 2  
Reg.  
cap. 23.

Joseph.  
de antiq.  
Jud.  
lib. 11.  
c. 8.

gnus Alexander Macedo bellum gereret cum Dario Persarum Rege, omnem movit lapidem, ut Iaddum suminum Judæorum sacerdotem, à Dario abalienaret, eumque sibi fœdere copularet, misit proinde ad eum nuntios, qui illius animum optimis oblatis conditionibus, pertentarent. Quibus respondit summus Sacerdos, illud sibi neutiquam licere. Fœdus enim, quod cum Dario percussum fuerat, inviolabili sacramento confirmatur. Fateor, Alexandrum, audito Sacerdotis responso, tunc vehementer excanduisse. Verùm explorata fidei observantia, usque adeò ejus ira deferbuit, ut ipsum postea sacerdotem pontificiis vestibus indutum, piè ac religiosè veneratus fuerit. Feliciter itaque vobiscum agetur, si dolis fraudibusque rejectis, divino potius numini innitamini. Quoniam nisi Dominus custodierit civitatem, frustra vigilat, qui custodit eam.

*Gloria quanta fidem præstare? at frangere pacta,  
Principibus magnum dedecus, atque nefas.*

## CAPUT XV.

*Litterarum cognitionem Imperio annexam habeat Princeps, Et nomen ejus apud omnes gloriosum.*



**P**RÆCLARUM Principis ornamen-  
tum, cognitio scientiarum, quæ sum-  
mopere conducit ad summam rei  
ritè administrandam. Nec erit diffi-  
cile comprobare plurimorū exem-  
plis, qui quò eminentiores doctrinâ,  
eò famâ clariores, populis gratiores, & in rebus  
gerendis feliciores. Ecquid est enim imperantis  
Q<sub>3</sub> scien-

Robert.  
lib. 1 de  
Consul.

scientia, nisi imperii sanitas, consilii lumen, justitiæ robur, & denique publicæ salutis inexpugnabile quoddam propugnaculum? omnia namque bene cedunt Imperio, cui sapiens dominatur, neque lædi, neque decipi potest, quoniam (instar omnium) solus omnibus sufficit. Quippe litteris ornatus, quasi alter Janus, oculos habet etiam à tergo, ac duplum magis videt, quàm solent cæteri homines. Quod animadvertens Plato dicebat, tum beatum orbem terrarum fore, cum vel Sapientes regnare, vel Reges sapere cœpissent; hinc Regina Saba beatos appellabat, qui sub Rege Salomone vivebant. Cum enim ab extremis orbis terrarum partibus, multo comitatu stipata, venisset Hierusalem, admirans in rebus gerendis Salomonis prudentiam, in eloquiis sapientiam, in omnibus regium splendorem, præ nimio stupore exclamavit, O beati servi tui, qui assistunt coram te omni tempore! nec id falsò quidem. Quoniam Princeps baculo prudentiæ innixus, & doctrinarum cognitione insignitus, veluti novus Theseus, novit populos subjectos ex errorum Labyrintho, quasi quodam virtutis glomere, & deducere, & in viam reducere. Proinde Philippus hortabatur Alexandrum filium, ut studia bonarum artium complecteretur; ne inquit, multa committas, quæ me fecisse nunc pœnitet. Cognoverat nimirum egregius Princeps Regem philosophiæ expertem, Regno minùs idoneum esse. nec puduit fateri, se multa perperam fecisse per errorem, quòd à teneris unguiculis, philosophiæ præceptis non fuisset imbutus. Hoc apprime intelligebat Julius Cæsar primus Romanorum Imperator, in militia nulli secundus. hic enim pari ardore, & armis, & litteris fuit semper additus.



ctus: cujus excellens Elogium, Ex utroque Cæsar.

Scipio Africanus belli fulmen, dux invictissimus, Pædiam Cyri de manibus nunquam ponebat, quippe qui sciret, Principem sine litteris, contemptui semper habitum, unde Bernardus ad Eugenium, Simia in tecto, Rex fatuus sedens in solio. Carolus Magnus bonarum artium summo exarsit studio, quod ex hoc facile intelligimus, quoniam Parisiense Gymnasium, & Papiense instituit, accersitis ex omnibus terræ partibus doctissimis viris, quæ ambo ad hæc usque tempora, & ingenti & pari gloriâ florent. Præclaro sanè testimonio hoc idem confirmavit Alexander Magnus, nam post Darium prælio fractum, scrinium in regia præda gemmis elaboratum comperiens, affectibus amicis, hunc esse locum condendis lapillis accommodatum; longè magis pretiosa, respondit, includam. moxque Homeri Iliades in eo clausit. tanti faciebat doctrinarum cognitionem, utpote, qui potaverat ex Aristotelis fonte, hoc interesse inter doctos, & ignaros, quod inter vivos & mortuos: cum enim aliquando interrogaretur philosophus, Qua in re differant docti ab indoctis; Quâ, inquit, vivi à mortuis. Sentiens hominem absque litteris, verius esse hominis statuum, quàm hominem. De hujus Principis studio scribit Seneca, quod Geometriam potissimum discere studuit, sciturus, quam pusilla erat terra, ex qua minimum quid occuparet, propterea se infelicem appellabat, quod falsò gerebat cognomen magni. Quis enim magnus in pusillo? quasi diceret cum Seneca, Punctum est, ô mortales, in quo navigatis, in quo bellatis, in quo regna disponitis, punctum est, in quo tumultuatur humanum genus, quod inter gentes ferro & igne dividitur.

Bernardus  
ad Eugenium.  
lib. 1.

Baptista,  
Egnatius.  
Plut. in  
vita Alex.  
Plin. li. 7.  
c. 20.

Sabel.  
li. 2, c. 7.

Laërt. li.  
5, c. 1.

Bruford  
li. 3, c. 3.

ditur. ô quàm ridiculi sunt mortalium termini ! In tanto precio apud Ægyptios habebatur litterarum cognitio, ut qui illarum esset ignarus, vir tantum inter mulieres; mulier verò inter viros haberetur. At quoniam viri est imperare, non mulieris, ideo in Principe requiritur singularis eruditio. Siquidem, qui doctrinæ est expers, quasi cassus lumine, cæcus cæcos ducit, inde plurima emergunt incommoda in populis, & in Rege auctoritas non parum negligitur. Proinde Antigonus Macedoniæ Rex, non ignarus, quantum adjumenti afferrat doctrina regimini, famâ Zenonis permotus, & litteris, & nuntiis, & promissis enixè curavit, ut ad se veniret, ibique maneret. Gordianus Imperator imperii præsidia, firmiora in litteris ponebat, quàm in armis. illæ enim imperant, hæc imperata faciunt. Quare usque adeò fuit litterarum studiosus, ut pluris fecerit librorum, quàm auri vel argenti thesauros.

Sozom.  
li. i. hist.  
eccl.

Pyrrhus Epirotarum Rex, qui bella cum Romanis semper strenuè gessit, non solum studiis scientiarum se totum dedit; verum libros composuit, mirâ eruditione insignes. De Theodosio Imperatore, nonne scribit Sozomenus, quod nocturno tempore studiis accuratè vacabat? ejus verba sunt hæc, Ajunt te interdum rem militarem, & corpus exercere, subjectorum causas exactè disceptare, judicare, simul & agere, modò seorsum, modò publicè, quæ sunt agenda considerare; totis verò noctibus, libris incumbere. Quid de clarissimo Pericle, qui quinquies gloriosè triumphavit, quique ob res præclarè gestas, Olympii nomen est adeptus? nonne Anaxagoræ in philosophia discenda operam dedit, in arteque oratoriâ adeò claruit, ut omnes illius ætatis oratores superarit? Nec silen-

tio involvendus Annibal Carthaginensis, qui dux exercitûs creatus fuit, annum agens trigefimum sextum; qui Saguntum Hispaniæ civitatem, ultra Iberum expugnavit, apud Ticinum, Publium Cornelium Scipionem, apud Trabiam Titum Sempronium, apud Cannas Romanorum exercitum debellavit, idque tantâ Romanæ nobilitatis strage, ut ex postrema hac victoria, duos modios annulorum aureorum Carthaginem miserit. is nonne litteris Græcis apprime eruditus, historiam illo eloquio luculenter scripsit, Phormionisque philosophi discipulus, & auditor assiduus extitit?

Lucius  
Florus  
lib. 2.

Alphonfus Aragonum Rex, dum quodam tempore à familiaribus rogatus, qui fieri posset, ut tantæ potentiæ Rex, ad inopiam aliquando devenisset? sapienter respondit, Si sapientia venderetur, tacite innuens, illam eum empturum, plurisque facere, quàm omnes divitias, omnia mundi Regna quasi præ oculis haberet Salomonis oraculum, Præposui illam Regnis, & sedibus, & divitias nihil esse duxi in comparatione illius. Cato junior, ne incuria quidem dum Senatus cogitur, temperare sibi voluit, quò minùs Græcos libros lectionaret, quâ industriâ ostendit, aliis tempora deesse, alios temporibus superesse. Quid de Cleanthe philosopho dicemus, cujus adeò pertinax fuit discendi studium, ut ne diurno tempore à Chrysippi lectionibus abesset, nocturnum extrahendæ aquæ ad inopiam suam sustentandam impenderet. Quis Marco Aurelio in discendi cupiditate conferendus? Fuit hic philosophiæ usque adeò addictus, ut annum duodecimum ingressus, habitum philosophi sumpserit, quod philosophiæ studium, nec ad imperium evectus, remisit, nam ad domum

Sap. 7.

Qs

Apol-

Apollonii magistri, jam Imperator, discendi causâ ventitabat, audivit & Sextum Cheronensem Plutarchi nepotem, & alios quamplures, illud Platonis semper in ore habuit, Tunc florere civitates, si aut philosophi imperarent, aut Imperatores philosopharentur.

*Regna beata forent, si vel contingeret esse*

*Philosophos Reges, vel Reges philosophari.*

Innumeri sunt principantes, qui discendi desiderio flagrant, asciverunt sibi sapientes ad instruendum: hinc Alexander Aristotelem præ oculis habebat, à quo multa Principe digna suscepit. Inter quæ illud præcipuum, Annales patrum discute, inde enim poteris multa bona extrahere, quoniam facta præterita dant certum documentum in futuris. Si quis ex gravi & diuturno morbo, diligenti medicorum curâ convaluisset, quodnam consilium opportunius, quàm ut id audiat, quo à simili morbo, sibi in posterum bene caveat? si quis ex longinqua, & periculosa navigatione, post multa naufragii pericula, rebus omnibus salvis, optatum portum tenuit, an non esset sermo bene acceptus, qui de iisdem periculis in proxima navigatione evitandis, de locorum situ, de tempore navigationis opportuno, de ventis propitiis instruxerit? denique si ex quocunque vitæ, & fortunarum discrimine, recenter aliquis evaserit, nonne amicus fidus censendus ille, qui qua ratione simile discrimen postea declinet, eum diligenter monet? ita prorsus efficiunt annales, tanquam veræ rerum gerendarum institutiones; nec differas edoceri, quando jam ingruunt infortunia, & nullus penè locus effugii relictus: tunc enim, aut nihil, aut parum proderunt consilia, sed tempestivè cavendum periculum. Experimento namque probatum est, quod

quod navis cum per rimulas aquam bibit, in portu, non in freto sarcienda est. Mœnia civitatis disrupta in pace, non in bello, reficienda sunt, arma ante pugnam, non in ipsa pugna, præparanda sunt. Quare Alexander Magnus, instructa jam ad prælium acie, cùm cerneret militem quendam eo tempore adaptantem arma, quando pugnandi tempus aderat, ut ignavum & inutilem ab exercitu submovit. Non pigeat itaque, ô Princeps, libros & peritos consulere, ut Regnum feliciter instituitur. Domitius Nero Senecam habuit, qui eum instruxit de clementia. Pericles Anaxagoram, à cujus consilio ne latum quidem unguem discedebat. Trajanus habuit Plutarchum, qui eum accuratè erudit in libro planè aureo, qui inscribitur de instructione Trajani, ut videre est in ejus epistola, quæ passim circumfertur. Plutarchus Trajano salutem dicit: Modestiam tuam noveram, non appetere principatum, quem tamen semper mereri, morum elegantiam studuisti. Quo quidem tanto dignior judicaris, quanto à crimine ambitionis videris alienior, tuæ igitur virtuti congratulor, & fortunæ meæ, si tamen rectè gesseris, quod probè meruisti, alioquin te periculis, & me detrahentium linguis, subjectum non dubito, cùm delicta discipulorum refundi soleant in præceptores, sicut Seneca Neronis sui improbitate, meritò detrahentium carpitur linguis. adolescentium suorum temeritas in Quintilianum refunditur. Socrates denique in pupillum suum fuisse clementior criminatur. Tu verò quis es? rectissima geres, si à te ipso non recesseris, si primò te composueris, si omnia disposueris ad virtutem, rectè tibi cedent omnia. Ecce disciplinam morum, & viam virtutis descripsi tibi, huic si obtemperas,  
Plu-

Ecclef.  
c. 10.

Policra-  
tus li. 6.

Pfal. 81.

Exod.  
c. 10.

Plutarehum habes vivendi auctorem, alioquin præsentem epistolam testem invoco, quod in perniciem imperii non pergis auctore Plutarcho. Probè noverant præstantissimi Principes, quod qui nullum prorsus habent cum Pallade commercium, in gravi regiminis negotio cæcutiunt, & quod deplorandum magis, unà cum populis turpissimè ruunt. Quoniam iudex sapiens iudicabit populum, & principatus sensati stabilis erit; at Rex insipiens perdet populum suum. Proinde Policratus dicebat, & quidem scitè; Tria sunt potissima media, ob quæ Romani omnium gentium domitores, & totius orbis dominatores fuere, fides, exercitatio, scientia. Et profectò, ut magna rerum publicarum felicitas est, dum virorum sapientum reguntur consilio; ita summa earum pernities, dum imperiti ad earum sedent gubernacula. Rectorum quippe ignorantia, universi Regni statum evertit. Quod divinus Vates pulchre innuit, dicens: Nescierunt, neque intellexerunt, in tenebris ambulant, movebuntur omnia fundamenta terræ. Una ex præcipuis Ægypti plagis, fuit densitas tenebrarum, quâ fiebat, ut unus alterum discernere nequiret. Quis autem nescit tenebras, ignorantia hieroglyphicum esse? nulla itaque major calamitas Regno potest accidere, quàm dum imperiti summam rei administrant. Corpus humanum, quamvis brachiis, pedibus, auribus, oculis, aliisque membris truncatum sit, vivere nihilo minùs potest, at capite imminutum, quàm primùm mori necesse est. ita Respublica cum filios labe infectos habet, misera quidem, & deploranda est, vivit tamen & spirat, modo capita erudita, ac pastores honestæ vitæ nacta sit: at si præfules ipsi omnibus vitiis habenas

benas laxant, ignorantia tenebris involuti, statim omnia collabuntur, & in præceps ruunt. Propterea Cabrias dux Atheniensium dicere solebat, Semalle exercitum cervorum, duce leone, quàm exercitum leonum, duce cervo. Quod egregium apophthegma nostræ rei sic adaptari potest, In majori periculo versatur illa respublica, quæ doctis hominibus abundat, sed ductor eorum est cervus, hoc est, ineptus & ignarus; quàm illa, quæ imperitis hominibus referta est, sed regitur à leone, hoc est, à sapientissimo Principe. Proinde bene consulebat Sapiens; Diligite Sapientia lumen, vos qui præestis populis. ac si dixisset, sicut Sap.c. 6: dignitate, ita & virtute excellere debetis. Quoniam Princeps sine litteris, ait Petrus Chrysologus, est navis sine regimine, & volucris absque pennis. Interrogatus Plato, quidnam interesset inter peritum, & imperitum, respondit; Quod inter medicum & ægrotum. Huc facit per bello aureum Diogenis responsum: Cùm enim quendam ad sapientia studium hortaretur, illeque renueret, dicens; non sum idoneus philosophia; quid igitur vivis? inquit Diogenes, si nulla tibi rectè vivendi cura est? Non enim ad hoc vivit homo, ut vivat tantum, sed ut discat rectè vivere. monuit philosophus nobilem quendam virum, ut filium ad scholas mitteret, quò philosophia operam daret; ille autem interrogavit, Quam utilitatem assequetur filius meus ex studiis philosophia? cui philosophus respondit, cùm fuerit in theatro, de eo dici non poterit, Lapis super lapidem sedet. Quare Philippus nato sibi filio Alexandro, ingenti lætitiâ perfundebatur, non tantum, quia in lucem erat editus Regni hæres; sed quòd his temporibus esset natus, quibus vivebat

Aristo-

Veget.  
li. 1 de  
re milit.

Aristoteles, à quo instituendus erat. ejus epistola est hæc, Philippus Aristoteli salutem. Scito mihi filium genitum esse, qua de re ingentem diis habeo gratiam, non ideò, quia natus est, sed quia Aristotelis, à quo potest erudiri, natus est tempore. Spero fore, ut edoctus abs te, dignus fiat Regno paterno. Vale. siquidem nullus est, quem oporteat vel plura, vel meliora scire, quàm Principem, cujus doctrina potest omnibus prodesse subjectis.

Plato li.  
4 de re-  
pub.

Aspera quidem, non me latet, ad bonas disciplinas via, earumque cognitio apprime difficilis, at proinde laudabilis, & præclara. Siquidem, quæ res grandis & gloriosa, easolet plurimis rerum asperitatibus intercludi. Nil enim præclarum apud nos reperitur, nisi arduum; nil pretiosum, nisi sudore paratum; nil animo salutare, quod corpori non videatur amarum. ita circumfertur adagium; Per ardua virtus. ut eleganter descripsit Poëta,

*Littera Pythagora discrimine secta bicorni*

*Humana vita speciem præferre videtur.*

*Nam via virtutis dextrum petit ardua callem,*

*Difficilemque aditum primum spectantibus offert,*

*Sed requiem præbet fessis in vertice summo.*

Hinc Minerva ab antiquis fingebatur armata, quia doctrina nullis, nisi acriter disceptantibus, fit præda. Hac de causa, ni fallor, Palladi templa apud Græcos in altissimis erigebantur arcibus, ut docerent, scientiam in arduo esse sitam, & in magnis tantum animis habitare, ignavis autem ad doctrinam nullum omnino patere aditum. Quocirca Ægyptiorum sacerdotes, os amygdali constituerunt virtutis hieroglyphicum; est enim plurimis veluti stigmaticis notis, & cicatricibus insignitum, ejusque arbor clavo innixa, fertilior, red-



redditur. atque quod maximè admirandum, arboris ejus cortex, cùm amarissimus sit, suavissimos tamen fructus edit. En verum virtutis symbolum, quæ non nisi laborioso certamine paratur. & quid mirum si ignavis omnibus ad virtutem interclusus est aditus? sudandum enim & laborandum est, ut pulchre Poëta.

*Virtutem posuere dii sudore parandam,*

*Multa tulit, fecitque puer, sudavit, & alsit.*

Non est magnum, mare tranquillum navigare; magnum est, in procelloso strenuè agere. Quæ magna laus equitis armati, qui pugnat contra hostem ligneum? Inertis est tuta secare.

Camelus non bibit, nisi prius pede concutiat aquam, sic ait academicus, adjectâ notâ, Juvat emptâ labore gloria. in discendi studio labor quidem, sed inde magna voluptas, & præ lætitiâ gestiens dices, Quæ prius devia, nunc pervia. Et ubi mentis oculus caligabat, nunc illuminatur & perficitur intellectus, quamvis enim excellens sensibile corrumpat sensum, excellens tamen intelligibile perficit intellectum. hoc autem non præstabis, nisi comite improbo labore. non tamen operis difficultas deterreat, sed strenuè prosequendum. Qui ignem è filice cupit excutere, non semel percutit, sed iterum atque iterum, donec tandem scintillam excutiat; ita licet confestim abditâ quæque non medullitus penètres, non tamen desistas, sed audentior eas, quoniam tandem nubibus disjectis, voti compos eris. Siquidem labor improbus omnia vincit. Quorsum Romani bovem diis mactaturi, caput illius coronis cingebant? proculdubio animus erat innuere, soli labori coronam deberi. Nulla enim (ait Romani eloquii pater) potest esse diuturna gloria, quam labor

M. Tall.  
Toscul.  
lib. 3.  
Clem.  
Alex.  
strom. 8.

labor strenuus, & indefessus primum non antecesserit. Memoriam succurrat illud Clementis, Fama est, virtutis domicilium esse in quibusdam rupibus, ad quas difficilis admodum sit ascensus, ea verò non conspicitur, quibuscunque hominum oculis, neque unquam ad eam quisquam perveniet, tanquam ad fortitudinis propugnaculum, nisi primum in sudore, ac labore suam industriam probarit. Quid gloriæ Alexander, quid Epaminondas, quid Themistocles, sibi comparassent, nisi laboriosis expeditionum angustiis, arduum virtutis iter sibi conficiendum proposuissent? Quas laudes Cæsar esset consecutus, si facile illi fuisset, Britannis inferre bellum; aut Annibal, quam famam sibi cumulasset, si dum Italiam adiret, pervias Alpes citra pulverem & sudorem, & sine magna suorum clade fecisset? Quàm bene Propertius,

Propert.  
4. elegiarum.

*Magnum iter ascendo, sed dat mihi gloria vires,  
Non juvat ex facili lecta corona iugo.*

Hæc est via regia, ingenuo Principe digna, res præclaras aggredi, ad quas non omnibus pateat accessus, per quarum semitas ad gloriæ culmen pervenitur; notâ poëticâ ita insonante, Sic itur ad astra. Quod etiam perbelle insinuarunt poëtæ, dum Palladem fingunt natam ex patre, sine matre. hoc enim commento ostendunt, doctrinam, non ex voluptate, quâ capiuntur molliores, quasi mulieres, sed ex plurimo labore nasci, quo viri vitam agunt, pro comperto habentes, unumquodque opus, quò difficilius, eò etiam præclarior; in Principibus præsertim, qui in sacro dignitatis culmine constituti, aliis viris præcellere debent, non tantum dignitatis robore, sed viribus ingenii, & doctrinarum cognitione, quarum  
radices

radices amaræ nimis, & spinis undique circumseptæ, porro fructûs gloriosi & suaves. ita canit adagium per omnium ora decantatum, Virtutis gloria fructus.

*Imperium firmant viâtrices Palladis artes,  
Ex quibus omne decus, gloria, fama simul.  
Omne tulit punctum regalia sceptrâ gubernans,  
Qui Imperio jungit, cum probitate, Togam.*

## CAPUT XVI.

*Viros doctrinâ præstantes, ac probitate insignes,  
bonioribus, ac beneficiis foveat Princeps, Et  
nomen ejus in benedictione erit.*



INFELICEM nostræ tempestatis conditionem, in qua paucissimi sunt potentes, qui bonarum disciplinarum studia, benevolentiam complentur. Ubi nunc Mæcenâs, qui doctos viros observet, ac non potius negligat, ne dicam contemnat? non ita, non ita priscis sæculis, & quidem aureis. Siquidem tunc temporis Principes eruditissimis viris delectabantur, favebant, fovebant, in consiliis maximarum rerum adhibebant, illos observabant, honoribus, ac beneficiis cumulabant. Quin etiam sapientum virorum consuetudine, adeò oblectabantur, ut eum diem se perdidisse putarent, in quo nullum cum eîs de rebus seriis sermonem habuerint. Imò viros insigni doctrinâ claros, sic amabant, venerabantur, suspiciebantque, ut ex iis tanquam ex oraculis penderent toti, nihilque probarent, nisi quod probarent ipsi, & quod generosius est,

R

Arist.  
lib. 4.  
ethic.

est, illis, quorum sapientiâ, & consilio illustrabantur, quæ ad vitam necessaria erant copiosè suppeditabant, eorum instar, qui lucernæ, quâ opus habent, oleum instillant. Quippe, qui probè norant, virtutem suapte naturâ amabilem, comitem secum trahere honorem, ac benevolentiam, veluti corpus umbram. Nec eos latebat, honorem esse præmium virtutis; monstrum autem esse in natura, si vitiorum fiat præmium. Quod ut apertiùs omnibus sit exploratum, aliqua priscorum exempla proferamus in medium.

Cræsus Lydorum Rex opulentissimus, cùm studio sapientiæ flagraret, cerneretque barbaras illas nationes, quibus imperabat, viris doctis omnino carere, Anacharsis famâ excitatus, ad eum Athenas usque, unum ex familiaribus suis misit, qui illum ad se accerferet, aurumque eî dono offerret; ad quem ille hujusmodi epistolam scripsit. Anacharsis Cræso bene agere. Veni in Græciam, Lydorum Rex, ut bonas disciplinas perdiscerem. auro non egeo. satis mihi fuerit, si doctior, meliorque ad Scythas rediero. Sed quia benevolentiam tuam mirificè amplector, ad te quamprimum ire pergam. Vale.

Antigonus Rex observantiâ penè incredibili prosecutus est Bionem Borysthenitem, quod vel ex hoc faciliè conjici potest, quia cùm audisset illum graviter ægrotare, & multâ etiam inopiâ laborare, nonne duos ex suis familiaribus ad eum visendum, & curandum misit? jussitque, ut omnia eî opportuna suppeditarentur?

Metrodorus Sceptius, vir eloquio dulcis, & variis disciplinis eruditus, Mithridati maximo Regi tantâ benevolentiam conjunctus fuit, ut ab omnibus passim Pater Regis appellaretur. Platonis quoque

quoque memoriam adeò veneratus est hic Rex eximius, ut illius statuam in academia crexerit, ejusmodi titulo inscriptam, Mithridates Rodobati filius Musis Platonis imaginem dicavit.

Antigonus Rex Macedonum, philosophorum amantissimus, accepto nuntio de morte Zenonis Stoicorum Principis, quem ille ante omnes admirabatur, proclamavit, Quale theatrum perdidit!

Dionysius tyrannus tanti faciebat doctrinam Platonis, ut illi in Siciliam venienti, regiam navim miserit obviam, & egredientem in littore, albis quadrigis exceperit. Quid? nonne iste, quamvis ad sævitiam natus videretur, Aristippi tamen philosophi disciplinâ summopere delectatus est? eo præcipuè, quòd loco, & tempori inservire nosset, jocisque ac salibus abundaret; quod quidem vel ex hoc colligi licet: tres enim adolescentulas formâ insigni, & integrâ ætate adducit ei Dionysius, ut ex illis unam quam vellet, acciperet. Tunc Aristippus tres simul abduxit, asserens Paridem neutiquam impune tulisse, quod unam deam duabus prætulerit. quo quidem lepore, ac joco voti compos factus est, & integrum munus accepit. Nec minùs habet festivitatis, quod de illo etiam circumfertur; Cùm Aristippus à Rege pecuniam aliquando postularet, facetè Dionysius ait: Nonne docuisti, sapientem pecuniâ non egere? at ille, Da, inquit, & postea disferemus. cùm verò dedisset; Videsne, ait, me pecuniâ non egere? & cùm tyrannus his rebus delectaretur, eundem summis honoribus, ac muneribus indies afficiebat.

Pyrrhus Epirotarum Rex nonne semper magno in honore habuit Cineam Thessalum? imò tam præclarè de eo sentiebat, ut diceret, plures urbes à

Cineæ oratione , quàm à se armis expugnatas esse. tantâ pollebat suavitate dicendi.

Sed quid dicam de Alexandro ob res præclare gestas magno & maximo ? viros spectatâ doctrinâ insignes ; quot beneficiis affecit ? quot honoribus decoravit ? quantâ benevolentiam profecutus ? nonne mirificè dilexit Onesicritum , quem in militia secum habuit , & res in bello ab eo gestas litteris mandari voluit ? Diogenem quoque Cynicum nonne semper magnificet ? Serio enim dicebat , Diogenes esse vellem , nisi Alexander essem ; quasi se unum omnibus mortalibus anteponeret , Diogenem verò secundum faceret. Nonne tanto studio Homeri Iliadem observavit , ut eam rei militaris viaticum appellaret ? imò dormiens sub pulvino cum pugione tenebat. Præclarus testis est Xenocrates , quantis honoribus viros doctos soleret afficere. siquidem Xenocratis ingenium admirans , quinquaginta talenta dono misit , eò quòd acceperat ab amicis , illum ex angustia rei familiaris laborare , & proinde Musas ipsas cum viro paupere in squalore jacere. dicebat enim egregius Princeps , potentiorum liberalitate Musas esse depascendas , quasi decantans Isocratis dictum , Nullus præclarior thesaurus , quàm beneficium apud doctos , & bonos viros collocatum. & illud Publii mimi oraculum , Beneficium dando capit , qui digno dat ; qui autem non dat , videtur potius , quod alienum est retinere , quàm quod suum est , non dare. Nec silentio prætereamus observantiam singularem magni istius Principis erga Aristotelem philosophum. hunc tantò amore prosequabatur , ut diceret , pares gratias Aristoteli magistro , & Philippo patri se debere , ut qui ab hoc vivendi causam , ab illo autem bene vivendi rationem

tionem accepisset. quâ quidem sententiâ facîle intelligimus, quanti fecerit Alexander sapientiæ studium, & divinarum humanarumque rerum cognitionem, pro qua non minùs ambitiosus fuit, quàm pro imperio totius orbis terrarum. Siquidem cùm intelligeret ipsum philosophum evulgasse occultiora quædam philosophiæ arcana, illum per epistolam his verbis objurgavit, Alexander Aristoteli salutem. Quod speculativas edidisti disciplinas, id mihi nequaquam acceptum est, nec mehercule rectè egisti. Eam enim rem, quâ cæteris præstabam, jam omnibus dedisti esse communem. malueram equidem singulari disciplinâ, quàm ingenti potentiâ cæteros antèire, quali recollens Antisthenis monitum, ea esse paranda viatica, quæ simul cum naufragio enatarent; sentiens bonas artes ubique esse in pretio, nec posse à fortuna eripi. sic Aristippus Cirenæus civibus suis mandavit, ut eas sibi pararent opes, quæ navi fractâ, simul cum possessore possent enatare, nunquam enim & nusquam virtus sine honoris dignitate est, ut nunquam Sol sine radiis, etiam cum nubibus obducitur.

Aul.  
Gell. li.  
20, c. 4.

Laërt. li.  
6, c. 1.

Archelæus Macedonum Rex, Euripidis familiaritate, mirum est dictu, quàm vehementer fuerit oblectatus, quod ex hoc facîle conjicitur, quoniam cum Poëta ab eo rediens, præ malevolorum invidia à canibus fuisset laceratus, ejus rei dolorem non solum lugubri veste, sed etiam crine tonso, multisque propter immane scelus de medio sublatis, perspicuè demonstravit.

Marcus Antonius inter Cæsares singulari exarsit litterarum studio, quarum institutoribus tantum defererebat, ut ad Consulatum usque eveheret.

Marius dux ille insignis, litteratos homines

unicè diligebat, Poëtas præcipuè, quorum ingenio speraret, suarum rerum gestarum gloriam celebrari posse. talis ingenii fuit Antoninus Caracalla, qui in singulos Oppiani Poëtæ versus, quos Imperatori dicarat, & quorum numerus ingens erat, singulos aureos iussit rependi. Quis enim est Princeps, qui non cupiat nomen suum immortalitati mandare? at hoc sine litterarum præsidio fieri nequit. Fluxa nempe est hominum memoria, picturæ labiles, caducæ statuæ, & inter mortalium inventa, nihil stabilius litteris nullo tempore perituris. Scio quidem nunc temporis incultas, & penè mutas esse Musas, sed quid mirum? sine Gratiarum choro, Musæ parùm belle concinunt; rara nunc eloquentia, quæ Cleanthis lucernam oleat. in promptu causa est, qui indigent lucernâ, oleum non instillant. Quæ strenuè geritis, ô Principes, obscurâ oblivione involuta occident, nisi scriptorum eloquentiâ, quasi quodam Sole, illustrentur. illos igitur fovete, & vestris beneficiis, immortalitatem rependent, dum vestras laudes, transmissis ad posteros egregiis litterarum monumentis, perpetuò personabunt. hoc probè intelligebat Alexander ille Macedo, nunquam satis laudatus. hic enim Princeps adhuc adolescens, Regno potitus, & ad ipsam orbis monarchiam evectus, nihil tamen sibi actum in tanto rerum fastigio putabat, nisi eruditos viros apud se haberet, quorum consilio uteretur, quique ejus res gestas æternitati commendarent. nec silentio involvendum responsum illud, aureis litteris inscribendum. Cùm enim quadam die mœrore conficeretur, miles ad eum pervenit, dicens: bonum nuntium tibi affero, invictissime Imperator; at Alexander, Quid mihi boni nuntiabis, nisi nunties



nunties Homerum revixisse? en quanto studio prosequeretur viros doctrinarum cognitione insignes. sermo nimis protraheretur, si cuncta beneficia recensere vellem, quæ Alexander non conferebat, sed effundebat in viros Palladi additos. hoc unum dicam, Thebis bello captis, cum urbis excidio communis omnium strages immineret, statim edixit, ut à Pindari penetibus, ejusque familiâ, omnis vis bellica abstineret. Experimento namque animadvertit, quantæ utilitatis sit, habere viros à latere, doctrinâ præstantes; litteris enim traditum est, quosdam, qui Alexandrum oderant, obtulisse puellam quandam, formâ insignem, sed veneno nutritam, hoc consilio, ut ad illam accedens, veneno inficeretur: sed Aristoteles ejus præceptor, per oculorum puellæ obtutum, perpendit veneno illam esse enutritam, prohibuitque Alexandrum ab ejus contactu.

Lyran.  
super  
Dan. c. 8.

Scipio Africanus perpetuis laudibus verè celebrandus, qui statuam Quinti Ennii Poætæ in sepulchro suo collocari jussit, ut posterì perpetuò intelligerent, quanti fecerit tertiæ terrarum orbis partis victor Poëtam illum, qui primus apud Latinos carmen heroicum scripsit, & gesta populi Romani celebravit.

Sigismundus Imperator, Alberti focer, illo præcipuè titulo commendabilis fuit, quod, ut ipse linguarum ac litterarum peritissimus fuit, ita viros eruditione præstantes, semper fovere, ac beneficiis cumulare studuit. quo nomine, cum à Germanis Principibus, qui Latinas litteras oderant, carperetur, quoddam homines obscuro genere natos, ob litterarum commendationem ita complecteretur, Quid ni, inquit, eos amem, quos natura cæteros antecellere voluit? dignum sanè

Baptista  
Egnatius.

oraculum, multo fale aspersum. sicut enim homo, ratione cæteris præstat animantibus, ita vir eruditione insignis, imperitis hominibus antecellit. Germani plurimum tribuebant generis nobilitati, at vir prudens intellexit in viris doctis esse quoddam stemmate præstantius. illi habent parietes clypeis & imaginibus depictos, at hi animum habent egregiis disciplinis insignitum. Porro, ut naturâ animus præstantior est corpore, ita ornamenta ingenii, pulchriora sunt externæ nobilitatis insignibus. Qui enim nihil amplius habent, quàm majorum imagines, isti sunt nobiles veriùs opinione, quàm re. at qui virtutum radiis undique coruscant, hi germanam ac nativam habent nobilitatem. cuidam exprobranti patriam, respondit Anacharsis, Mihi quidem probro patria est, tu verò patriæ. Hinc Antigonus Rex, filio paternâ virtute glorianti, & idem stipendium postulanti, respondit, Andragathia, Patragathia. hoc est, virilitas, & bonitas paterna. quali diceret, non avitis stemmatibus, sed propriis virtutibus innitendum. Solis instar, qui proprio, non mutuato lumine coruscat. Satîs compertum est apud omnes, qui bene sentiunt, pluri semper fuisse habita nomina, quæ proprio Marte parantur, quàm quæ à parentibus accipiuntur. hæc enim jure sanguinis, ad nos perveniunt, illa propriâ virtute quærentur. Unde cernimus Patriarcham Jacobum, postquam fuerat cum Angelo fortiter luctatus, proprio nomine mutato, accepisse nomen Israël, quoniam Angelo prævaluit. Apostolus doctor gentium, Sauli nomine relicto, Paulus appellatus fuit, quòd Sergium Paulum ad fidem convertisset. Caput Ecclesiæ, relicto nomine Simonis, quo prius vocabatur, Petri nomen assumpsit, à Christo impostum,

tum, propter firmitatem fidei, quâ inter alios Apostolos excelluit.

Nec solum in sacris, sed in profanis quoque literis, hujus rei inveniuntur exempla. Scipio, cur Africanus nuncupatur? quia Africam subjugavit. Domitianus debellatâ Germaniâ, meruit Germanicus nominari. Manlius Romanus, quia Gallum quendam virum strenuum, in singulari pugna prostravit, & illi torquem detraxit, tanquam tropæum, inde laudis gratiâ, dictus fuit Manlius Torquatus. Otho Vicecomes in bello Terræ sanctæ, vicit Sarracenum, qui in galea, & in clypeo, pro stemmate, gerebat viperam, in memoriam tantæ victoriæ sumsit, & pro se, & pro posteris, viperam pro insigni gentilitio. hinc est quod Christus Salvator aliis nominibus, & titulis relictis, nomen Jesu nunquam demiserit. alia quippe nomina, ut Eloïm, Adonai, Jehova à divina natura habent originem, at præclarissimum nomen Jesu propriâ virtute quæsit. propterea quando Paulum equo dejecit in terram, & diceret, Quis es Domine? non respondit, Ego sum Alpha, & Omega, magni consilii Angelus; sed tantum, Ego sum Jesus, quem tu persequeris. Gell. c. 13. lib. 9. Act. c. 9.

Genos enim animi proprium est, pluris æstimare; quod propriâ fortitudine, quàm quod jure hæreditario paratur. Hoc namque vix nostrum putamus. hinc videmus strenuos milites de signis hosti ereptis, de versis in fugam copiis, de superato vallo, aliisque in bello præclaris facinoribus à se gestis, libentiùs, & frequentiùs, quàm de majorum stemmatibus, & imaginibus gloriari. Proinde magnus ille dux Agatocles ex figulo ad Regnum assumptus, vasa terrea inter aurea collocabat. ut pulchre expressit Poëta,

R 5

Fercula

Auson.  
lib. epi-  
gram.

*Percula gemmati cum poneret aurea vasis ,  
Et misceret opes , pauperiemque simul ,  
Quærenti causam , respondit , Rex ego qui sum  
Sicania , figulo sum genitore satius.*

Herod.  
lib. 2  
hist.

Perinde , ac si diceret, hæc est vera nobilitas, propriis meritis, non alienis inniti. non puduit pristinae fortunæ, sed gloriosius existimavit regnum virtute partum, quàm si hæreditate obvenisset: nam Regem nasci, nihil magni est, porrò Regno dignum se præstare maximum est. Quod præclaro Amasis Ægyptiorum Regis exemplo comprobatur. is enim obscuro loco natus, cum ad regalem dignitatem pervenisset, nobiles & primarii obsequium præstare detrectabant. tunc Rex accito ad se aurifice, mandavit, ut è pelvi quadam pedibus suis lavandis antea destinata, insignem Jovi statuum conficeret, quam, dum quâdam die ipse, totusque populus in templo versarentur, jussit in medium afferri, mox eam flexis genibus omnes adorarunt. quibus Amasis, Quid adoratis? adoratis vas, quod hesternâ die abluendis pedibus meis deserviebat. Cui omnes uno ore responderunt, Non aspicimus quod fuit, sed quod nunc est. tunc Rex hæc eadem verba in eo retorquens, continuo dixit, Ergo non aspiciendum, quod fui, sed quod sum. humili quidem sum loco natus, tamen Deo ita disponente, ad regalem thronum ascendi. hoc commento docuit, in omni prælatione divinitus ordinata, non materiam, sed formam spectandam esse. Quippe, quod vera nobilitas non alienis, sed propriis ingenii viribus innitur, quibus, qui præstant, cæteros homines faciliè antecellunt. Ecquid igitur mirum, si olim præstantissimi Principes, viros doctrinâ conspicuos, veluti quædam numina admirabantur, suspiciebant, beneficiis fovebant,

Arist. li.  
8 politic.

bant, & multis honoribus cumulabant? & ne longè exempla petamus, instar omnium, veniat in mentem solus Leo Decimus Pontifex Maximus, Mediceæ familiæ splendor illustrissimus, verus litterarum Mæcehas, perpetuis encomiis extollendus: is enim in fovendis, & favendis doctis viris, totus fuit, & in ditandis, atque dotandis bibliothecis, assiduè insudavit. Quid? nonne de hoc egregio Principe claris historiarum monumentis traditur, non sine maximâ admiratione & laude, ita beneficum fuisse erga viros litteris ornatos, ut pro numeris, nummos daret, & pro metris, mitras? ô præstantissimum virum æternâ memoriâ dignum! hoc idem gloriôsè decantatur de Nicolao Quinto Summo Pontifice,

*Consilio illustris, virtute illustrior omni,*

*Excoluit doctos doctior ipse viros.*

Non tamen Princeps æquali omnes beneficio afficiat, neque omnes æqualibus debet cumulare honoribus: non enim est una omnium facies, ait Cicerò; nec ex omni ligno fit Mercurius, ut ait vetus adagium. Nec quivis ad quodvis munus idoneus est, ut apud omnes sapientes experimento est comprobatum. Sed majores virtute, majori etiam dignitate cumulabit. Solis instar, qui omnia quidem ædificia lumine suo illustrat, sed illa magis, quæ fenestras habent patentiores. ita sanè Princeps, omnes quidem subditos pari studio complectatur, at illos majori afficiat honore, quos animo præstantiores, & ad res gerendas noverit magis idoneos: cæteros tamen non negligendo, optimi pictoris instar, qui non oculos solum, & faciem, quòd potiora sint, penicillo exornat; sed totam quoque imaginem colorum varietate honestat. cui rei convenit egregiè, insigne illud  
acade-

Prov. c.  
26.

academicum, vasa nempe, parva, & magna, quælibet tamen pro modulo suo repleta, cum inscriptione, *Æquum*, sed non *æquæ*. & tandem se habeat Princeps, veluti centrum, quod minores lineas mittit ad circulum minorem, & majores ad majorem, ne minùs dignos dignioribus anteponeus, jure optimo redarguatur à sapientissimo Rege his verbis, Sicut qui mittit lapidem in acervum Mercurii, ita qui tribuit insipienti honorem. Pro cuius loci intelligentia, non erit abs re, aliquorum sententias adducere. Hieronymus linguarum peritissimus, pro explicatione, præsupponit antiquam gentiliùm consuetudinem. hi namque in biviiis viarum, Mercurii statuam collocare solebant, in qua, quò iter tenderet, scriptum erat, unde viatores cultûs & religionis gratiâ, & in gratiarum etiam actionem, statuam illam lapidibus circumdabant, non secus, ac modò peregrini juxta cruces, lapides varios coacervare solent. hoc supposito, sensus est, Sicut illi, qui colebant Mercurium, vero Deo injuriam inferebant, debitum honorem, qui eî soli debebatur, falso Deo deferentes; ita etiam, qui ad dignitatem aliquam, indignum eligit, & erigit, injuriâ afficit dignum, eî denegans honorem sibi debitum; est enim grave delictum minùs idoneis, dignitatis munus committere, ut docet proverbium illud jam vetustate contritum, *Clitellæ, bovi non sunt imponendæ*. proinde scitè admodum loquitur Sapiens; Sicut qui mittit lapidem in acervum Mercurii, ita qui tribuit insipienti honorem.

Alia expositio affertur, nec prorsus indigna. sicut ineptum esset, gemmam aliquam pretiosam, in acervum lapidum mittere, ita stultum est margaritam

ritam præclaram dignitatis, indigno tribuere. quod nefas ita abhorrebat Socrates, ut in quendam, quem videbat passim & sine delectu beneficia largientem, inveheretur his verbis, Malè tibi sit, qui Gratias virgines, scorta fecisti. quod planè sit, cum Princeps ingentes opes, sine judicio, in obvios quosque etiam immerentes prodigit.

Doctores Hebræi aliter interpretantur. asserunt enim in originali linguæ sanctæ, reperiri hanc dictionem; margema, quæ quamvis acervum significet, purpuram etiam denotat. unde perinde fuit, ac si dixisset: quemadmodum, si quis saxum aliquod, purpurâ indueret, manifestum dementiæ argumentum proderet; sic qui dignitatem homini insipienti impertiretur. hinc Orator Romanus dicebat, Benefacta malè locata, malè facta arbitror. Pessimum malum est, dignitates ad indignos deferri, quia nequitia, quæ privata torpebat, in excelso collocata, plures provocat ad imitationem. Diversâ ratione explicarunt Septuaginta Interpretes: nam ubi nostra vulgata legit; Sicut qui mittit lapidem in acervum Mercurii; ipsi legunt, Sicut qui ligat lapidem in fundâ, ita qui dat insipienti honorem. & sapienter quidem. sicut enim saxum, ob gravitatem à natura sibi ingentam, ad inferiora semper propendet, & nihilominus in funda positum, brachii impetu, adeò evolat in sublime, ut & aves quandòque transcendat, ita ignarus suæ indignitatis pondere pressus, instar lapidis, loca inferiora petit: at Princeps in funda suæ protectionis collocans, & potentiae suæ impetu sublevans, ad altissimum culminis fastigium præter omnium opinionem provehit. sæpe tamen accidere solet, quod veluti saxum ad æthera usque projectum, cessante

Cic. lib.  
2. de  
offic.

cessante impetu à projiciente eï impresso, gravitatis suæ pondere, ad ima rursus descendit; ita etiam non semel visum est, ut ignarus honore indignus, deficiente benignâ Principis aurâ, à dignitatis fastigio misere decidat, &, quod notatu dignissimum est, sicut qui imprudenter lapidem projicit, ad illatum damnum tenetur; ita qui perperam dignitates distribuit, universa damna propter electi imperitiam, reipublicæ illata, reficere debet. Quoniam cùm Princeps sit minister justitiæ in Republica; ideo si officia tribuat indignis, peccat, & restitutioni est obnoxius. Quis enim ignorat dignitates, instar gladii esse? quo vir prudens ad sui tutelam utetur opportunè, hostesque strenuè propulsabit; improbus verò ad neces, ad proditones, ad infinita penè scelera abutetur. Porro sicut furioso gladium petenti non dares, ita nec imperitis hominibus dignitates conferendæ, à quibus domûs, civitates, imperia everti solent. ut experimento docuit Tiberius Imperator, sub cujus regimine, plurimum meri exhaustisse, virtus erat; & ebrietati, non integritati, supremi honores deferebantur. Quid? nonne litteris proditum est, ipsummet Principem, continuum biduum cum Pomponio Flacco, & Lucio Pisone epulando, potandoque consumsisse? quorum alteri Syriam provinciam, alteri præfecturam urbis confestim detulit. Cur tot flagitia perpetravit Nero, & tam brevi, tamque infelici exitu corruit Regnum? quia non judicium, & rationis trutinam, sed suas libidines in eligendo secutus. Satis abunde ejus turpitudines detegemus, si Sophonium Tigellinum, extincto Burro, prætoriiis cohortibus impositum dicemus. Quid sordidius Vespasiano, qui rapacissimos quosque, provin-

D. Tho.  
2.2.q.65.  
a. 2.



provinciis præficiebat, ut mox locupletatos condemnaret, indèque ditior fieret? Quis non usque ad stomachum detestetur Henrici octavi Anglorum Regis pueriles ineptias? in ejus enim aula, si Sanderò credimus, alius ob suam egregie assatum, hoc namque cibi genere libentissimè vescabatur; alius quod in lusu alexæ elegantius se gereret, non beneficio solùm, sed etiam honore auctus dicitur. Ecquid mirum, si sub præfectis improbis, & ignaris, Regna sensim ad perniciem properant? non est bonus nauclerus, qui furentibus ventis, gubernaculum committit pueris imperitis. Prudenter itaque procedat Princeps in electionibus faciundis, ne indignos ad honorum culmen elevans, deturpetur, ut olim contigit in exaltatione Ventidii Bassi: hic enim cùm priùs curandis mulis victitaret, postea Cæsaris auctoritate, Consul effectus est. quam rem adeò molestè tulit populus Romanus, ut per vias Urbis vulgò scriberetur; Concurrите omnes augures portentum inusitatum conflatum est recens, nam mulos qui fricabat, Consul effectus est. Siquidem indignos eligens, præterquam quod ab omnibus non sui compos existimabitur, vix etiam notam tyrannidis effugiet. Solet enim nimia dominandi libido, eos qui servitio sunt promptiores, non qui virtutibus eminentiores, opibus ac honoribus cumulare, quoniam tyrannus viros, doctrinâ, & probitate præstantes, odit, ac perdit, ne arguantur opera ejus. Hinc fama est, falsum Mahumethem prohibuisse sectatoribus suis, philosophiæ studium, eo consilio, ne per eam illuminati, deprehendant errores, & suæ legis fallacias. Non ita Alexander Severus Imperator, qui nunquam gubernatores, ad provincias mittebat, quin priùs multò antè

Nico-  
laus  
Sand.  
lib. 1. de  
schism.  
Anglic.

Chryf.  
hom. 7.  
in Matr.

Cant. c.  
1.

2 Reg.  
c. 6.

antè nomina ederet, ut si quod eorum vitium apparuisset, aliis provincias committeret. Utinam Principes ex Christo veritatis fonte aliquando potarent. is enim ad montem excelsum, non quoscunque, sed tres tantum selegit vitæ integritate insigniores, ut divino hoc documento edocerentur reipublicæ capita, dignitates, & officia dignioribus esse conferenda. Nam indebitæ electionis damnum; non est unum tantum, sed multiplex, damnum electo, damnum officio, & damnum electori. Quod perspicuè insinuavit Spiritus Sanctus, dum introducit Sponsam, dicentem: Posuerunt me custodem in vineis; porro quia tanti regiminis eram prorsus ignara; ideo vineam non custodivi. itaque cum ad hujusmodi officium omnino inepta essem, cum ad filum acu ducendum, non ad lanceam manu vibrandam nata sim, vinea funditus devastata est. non secus in dignitatibus distribuendis contingere frequenter videmus. siquidem imprudens electio, damnum non exiguum officio, & ipsi electo afferre consuevit, quin non parum etiam ipsis electoribus. Ad cujus rei comprobationem examinare oportet, cur Deus repentinæ mortis casu Ozam extinxerit. Quamvis enim de hac re variae sint scribentium opiniones, non omnes tamen veritatis scopum attingunt. Doctissimus Abulensis arbitratur, Deum tam atroci supplicio affecisse, quia sacram illam arcam contigerat, cum tamen ab uxoris concubitu, præcedenti nocte non abstinerit. at cum id culpa non esset, non videtur poenam aliquam meruisse, cum poena sit culpæ correlativa. Lyranus sentit causam punitionis divinæ in Ozam fuisse, quod minori reverentiâ, quàm debuêrat, arcam tetigisset. Verum nec ista opinio mihi probatur: nimis enim  
gravis

gravis esset illa pœna, ad levissimam illam culpam comparata. Quid? nonne arcæ contactus, ne in terram decideret, reverentiam potius, & religionem redolebat? Vera igitur tam repentini casûs causa fuit, quod cùm Oza teneretur, humeris suis arcam deferre, ipse tum, ut diverteret ab onere dorsum ejus, junctis duobus ad plaustrum juven-  
cis, ferendam Dei arcam commisit, & cùm declinantibus à via juven-  
cis, utpote, jugo minimè af-  
fuetis, Oza manum suam extenderet, ne penitus arca in terram corrueret, tunc Deus indignatione plenus, amplius dissimulare noluit, dicens: Cur tu arcam hominum humeris ferendam, brutis ani-  
mantibus commisisti? pœnas pro tam nefario crimine nunc nunc exsolves, & continuò gravi vulnere humeros ejus percussit, quibus arcam gestare illi incumberebat, ut egregiè adnotavit Glossa interlinearis his verbis, Percussus est in humeris, quibus secundùm legem arcam ferre debuit. Hinc facile colligent Principes, qui reipublicæ officia conferunt, quàm sit periculosum, illa juven-  
cis, hoc est, minus expertis credere. ipsi enim veluti juven-  
cis arcam in terram dejicient, officiis abutentur, & perperam administrabunt. Quod non obscure expressit Ovidius, dum finxit Phaëthontem obtinuisse, ut uno die Solis currus sibi committeretur: verùm cùm esset aurigandi imperitus, deflectentibus Solis equis, in terram misere decedit, inde totam terram conflagravit. Quis sanæ mentis non videt, fabulam hanc ad vivum exprimere dissipatos nostræ tempestatis mores? Cùm enim litterarum imperiti, & regiminis omnino ignari, ad gubernacula sedent, tunc Rempublicam præcipitant, bona Regni dissipant, ac omnia funditus ad exitium pertrahunt. Quomodo qui regendus  
S ipse

ipse est, aliorum auriga fiet? Quomodo exercitûs curam suscipiet, qui ne hostis quidem vultum iratum, nedum exertum gladium conspexit unquam? Summâ itaque vigilantia utantur Principes, ut in præfecturis proponantur digniores. sic antiquitus apud Romanos in more positum fuit. Nam, ut refert Trebellius, cùm ad Romani Consulatus electionem accederetur, prudentiores Senatores, ut Valerianus eligeretur, unanimi consensu suffragati sunt, eâ solâ ratione permoti, quia Valerianus omnibus melior, prudens, gravis, tyrannorum hostis, sed vitiorum multò magis. Hinc est, quod huic optimo regimini insistentes, duo celeberrima templa, virtutis, nimirum, & honoris construxere; ita tamen disposita, ut ad honoris templum, non aliâ viâ nisi per templum virtutis pateret ingressus, cui appositè adjungitur nota, Virtute præviâ. Vidit olim Daniel arborem altitudine insignem, in cujus altioribus ramis, aves ædificabant, sub umbra autem animalia terræ. Quid hinc? nonne edocemur, optimum regiminis institutum illud esse, in quo doctissimi viri, qui tanquam volucres cæli altiùs evolant, scientiaque ac prudentiâ insignes sunt, in eminentiori etiam dignitatum loco collocentur, ignari verò in imo jaceant? & omni jure. Nam sicut indecorum esset, si terrestria animantia in ramis sublimioribus morarentur, aves verò in terra degerent, ita nonne vitiosum prorsus regimen esset, si ignari ad æthera sublimentur, doctrinâ autem illustres, ad terram usque deprimantur? Hanc calamitatem deplorabat Sapiens, Est malum quod vidi sub Sole, positum stultum in dignitate sublimi. Perinde, ac si diceret, inordinatam omnino vidi compositionem, stellas in terris jacentes, animalia in nubibus cæli habitantia,

Aug. de  
civ. Dei  
lib. 4.

Dan, c. 4.

Ecclesi.  
c. 10.

tantia, viros nempe spectatâ doctrinâ conspicuos, dignitate tamen vacuos serpere, ignaros autem ad summa fastigia evectos. hæc est præcipua Hierem. c. 5. Hierem. c. 5. lamentatio, nimirum, quod servi dominarentur, & imperarent illis, qui ad imperandum nati erant. hinc suspirans agebat, Servi dominati sunt nostri. Quid nostris hisce temporibus diceret? ubi homines imperiti, ac improbi, nati tantum consumere fruges, ad sublimes evehuntur gradus; viri autem doctrinâ & virtute eminentes, in imis detinentur subselliis, imò in pulvere sedent, imò sordescunt, imò humi serpunt. Verum planè adagium illud, Probitas laudatur, & alget. hinc Crates olim comparabat honores iis ficibus, quæ in altis præruptisque locis nascuntur, è quibus homo fructum non accipit, corvi tantum, & milvi. Quam pestem adeò Regnis perniciosam, ut radicatus evellat Princeps, quid efficiet? quod in officina monetam cudentium observatur. prius quippe ponderant auri molem, deinde juxta pondus, figuram quoque imprimunt, ita in electionibus agendum prorsus. merita prius trutinanda, inde dignitates distribuendæ, non tamen quibuscunque, sed dignioribus viris. Verum est enim illud apophthegma omnibus sæculis celebrandum, Nihil æqualitate inæqualius.

*Quid juvat Imperium? Quid fortia mœnia circum?*

*Quid tibi divitiæ? Stemmata quid faciunt?*

*Si claros probitate viros, virtutis alumnos*

*Non foveas Princeps, muneribusque colas?*

## CAPUT XVII.

*Divinos libros pra manibus habeat Princeps, & feliciter administrabitur Regnum ejus.*



A C R A oracula consule diligenter optime Princeps; & ex illis tanquam ex purissimis fontibus hauries, quæ ad rectam vivendi, & regendi rationem apprime conducunt.

In primis sese offeret venerandum Trinitatis arcanum; divinæ nimirum Essentiæ unitas, personarum Trinitas, sacrae quoque in divinis notiones. Siquidem quidquid in Deo est, aut essentia, aut persona, aut notio est.

Essentia quidem una est, & indivisibilis, quæ nec generat, nec generatur, nec distinguit, nec distinguitur. Personæ autem tres sunt, Pater, Filius, & Spiritus sanctus; Pater à nullo est, Filius à Patre est nascendo, Spiritus sanctus à Patre, & Filio procedendo. Notiones verò sunt, innascibilitas pro Patre, generatio passiva pro Filio, spiratio Patri & Filio conveniens, & processio ab utroque pro Spiritu sancto. Dicuntur autem à Theologis notiones, quia notificant personas; adeò ut divinæ personæ eandem quidem habeant naturam, sed non eodem modo, quoniam Pater à seipso, Filius à Patre per intellectum, & Spiritus sanctus ab utroque per actum voluntatis. Quod sanè mysterium satis bellè explicatur in nomine Dei Jehova quadrilitero. Jod. He. Vau. He. nam prima ejus littera, Jod, quæ principium significat, quod omnium aliarum principium sit, cum unaquæque ab ea originem habeat, ipsaque à nulla originem sumat,

fumat, rectissimè Patrem in divinis insinuat, qui cum à nullo sit, aliæque personæ ab eo emānent, principium sive principio dicitur. Secunda littera, He, quæ esse vel vivere significat, Filium in divinis aptissimè refert, per quem omnia quæ facta sunt, esse cœperunt, & quidquid factum est, in ipso vita erat. Tertia autem littera est, Vau, quæ copulativam dictionem, &, denotat, Spiritum sanctum exprimit, qui cum sit amor Patris & Filii, quo se vicissim amant, rectè copula, hoc est, nexus utriusque nuncupatur. Scitu præterea dignum est, litteram He, quam Filii figuram esse diximus, in hoc sacratissimo Dei nomine, duplicem ob causam geminari; prima est, ut duas in Filio fateamur naturas, divinam, & humanam; altera causa est, ut intelligamus, solam ex divinis personis, nempe Filium, duas habere relationes, nimirum, producti & producentis; respectu Patris, est productus; respectu verò Spiritus sancti, est producens, & spirans cum Patre Spiritum sanctum. ita quod Pater generat, & spirat; Filius non generat, sed generatur & spirat. Spiritus sanctus nec gignit, nec spirat, sed ab aliis duabus personis procedit. In eo tamen quod absolutum est, nullamque relationem continet, omnia communia sunt, nihilque distinctum, omnia enim in divinis sunt unum, ubi non obviat relationis oppositio.

Nec erit abs re, imò præsentī instituto valde consonum, si adjecero Chaldaicum morem, in Dei nomine exprimendo. tribus Iod Chaldaicè describitur Dei nomen ineffabile, circulo uno conclusis, & uno camez signatis. Quod mysterium verè magnum, sic interpretantur doctores. Tria Iod æqualiter depicta, tres insinuant Personas divinas,

quarum nulla minor est aliâ, sed totæ tres Personæ coæternæ sibi sunt, & coæquales. Iod significat principium, tres divinæ Personæ non nisi unum principium sunt rerum omnium conditarum, includuntur tres illi characteres in figura circulari omnium perfectissima, utpote, quæ nec principium habet, neque finem, ut denotetur perfecta æternitas. Est enim Deus sphaera intelligibilis, cujus centrum ubique, circumferentia nuiquam: signantur autem uno tantum camez, quoniam trium personarum est una essentia. En personæ relationibus distinctæ, omnes tamen in maiestate æquales.

Ad hanc rem appositè facit miraculum insigne, quod scribit Eusebius Cæsariensis. Nascente Christo, ait, tres in cælo Soles apparuere, qui paulatim in unum redacti fuere, ut ostenderent tres in Deo personas, in unum tamen conjuncti, unitatem divinæ naturæ declararent.

Boëth.  
Eugub.  
lib. 25.

Nec minùs mirandum, quod narrat Boëthius Eugubinus; ait enim, in corde Sanctæ Claræ de monte Falco, post mortem inventos fuisse tres lapides, ejusdem magnitudinis, ponderis, atque figuræ; in quibus hoc mirum est, quod ejusdem ponderis unus est, ac tres, & ejusdem tres, ac unus. Ecce Trinitatis simulachrum. O veneranda Trinitas, ô indivisa unitas. O bone Deus, tu es cæusa omnium causarum, lumen omnium rationum, finis omnium actionum, per te omnes naturæ habent, ut sint; omnes rationes, ut veræ sint; omnes actiones, ut bonæ sint; præter te nulla natura subsistit, nulla ratio instruit, nulla actio proficit; sine te omnis substantia concidit, omnis ratio caligat, omnis actio deficit. mare magnum, adeò immensum, ut sine fidei cymba, transvadari nequeat.

Cornelius  
Mossus  
de div.  
hist. lib.  
2, c. 13.



queat. Hinc Gregorius Nyssenus dicebat: Sicut <sup>Gen. c. 21.</sup> Abrahamus reliquit pueros ad radicem montis, & solus cum Isaac montem ascendit; ita in hoc mysterio deferenda ratio naturalis, & soli fidei innitendum; non quod contra naturam hæc sint, sed quia superant. Heu quot miseri in hoc Oceano naufragium fecere, quia sine remis fidei navigare ausi fuere. Arrius miser infelicitè perijt, quia Patrem Filio majorem dixit. Macedonius naufragium passus, quia Spiritum sanctum non nisi puram creaturam asseruit. Sabellius ab undarum vorticibus abreptus, funestum finem nactus est, quia rium personarum distinctionem negavit; alii multi in Scyllam, & Charybdin inciderunt, quia ingens hoc mare temere ingressi sunt, soli rationi humanæ adhærentes; est enim mysterium hoc adeò profundum, ut naturalis ratio nulla habeat argumenta, quibus apprehendat: quamobrem satius iudico, summa cum cordis humilitate ipsum adorare, quàm curiosius indagare. Ita olim consulebat Innocentius Pontifex, <sup>Innoc. III de myster. Missæ li. 4, c. 8.</sup> Credere iubemur, discutere prohibemur. si ex terrenis minima percipere non valemus, quomodo cælestia audebimus scrutari? quis licèt sapiens & acutus philosophus, naturam plenè assequitur formicæ, inter omnes animantes minimæ; quis oro, dignitate explicabit, quo spiritu, vel anhelitu illius vita continetur? quibus constet nervis? quod sit illi cor, qui sensus, venæ, arteriæ, medullæ, membranæ? quis parvam illam proboscidem declarabit? quæ sit illi propagandæ posteritatis ratio, quomodo nunc repat humi, nunc alas induat, & per aëra superba volitet? quod si minima hæc præstare non valemus, quomodo Deum apprehendere gloriamur, quando formicæ naturam ignoramus? Quis philosophus

intimas omnium rerum naturalium causas exactè attingere potest? ut de ipso canere liceat,

*Felix qui potuit rerum cognoscere causas.*

Unde tremor terris? quâ vi maria alta tument? quæ ratio fontium? quæ ventorum? quid grando? quid fulgura? quid tohitrua? quid mare salsum? quid flumina dulcia? quis de coloribus Iridis? quis de magnete? quis de echineide, quis de aranearum telis, quis de pendulo bombyce? quod si humani ingenii acies adeò exigua est, ut vilia naturæ penetrare non valeat, nonne extremæ est impudentiæ, ô homo, si ad divinam substantiam pertingere posses confidas? ô arcanum venerando silentio adorandum! dic, quæso, ô homo mortalis, si de iis, quæ tibi sunt sub pedibus, ante oculos, ad aures, ad manus, nescis exactè differe-re, quomodo illa cælestia scrutari audebis? dic, quæso, substantia terræ, est ne penitus defixa, & quasi radicibus suis hærens, an media pendet? quibus librata ponderibus? quibus cavernis maria sustinet? dic substantiam aëris, qui est ventorum sedes, arca vaporum, thesaurus nivium, animantium refrigerium, vehiculum visionum & auditionum; dic substantiam Solis, qui est orbis excubitor, moderatôr temporum, parens viventium, & omnia fovens. dic substantiam Lunæ, cur nunc plena, modò semiplena, modò clara, modò maculis infecta? dic stellas, non satas, non plantatas, non insertas, non infirma aliquâ radice solidatas, sed repentè Dei jussu in cælo creatas. dic substantiam corporis tui, si nosti, quæ substantia nervorum, quæ venarum, qui situs partium, quam vim quæque pars habeat. sed descendamus ad humilia, dic cicadas, locustas, formicas, apes, dic ar-tes, dic motûs gruum, dic industriam bombycum,  
dic

dic stamina araneorum. O miser homo mortalis, si hæc inferiora quæ vides, quæ tangis, quæ palpas, non vales mente percipere, quomodo scrutari cœlestia tentabis? an ignoras, quod scrutator majestatis opprimetur à gloria?

Modò ex hoc thesauro recondito, quid hauries, ô Princeps, hic mente confurge, sursum cor attolle, agnosce dignitatem animæ tuæ, quæ facta est ad imaginem tantæ deitatis, siquidem sicut Deus August. li. 10 de Trinit. unus est in substantia, trinus in Personis, sic anima tua una in substantia, trina in potentiis, memoria, intelligentia, voluntate, & sicut personæ inter se originantur, Filius à Patre, Spiritus sanctus ab utroque, Pater à nullo, ita potentiæ sunt sub actibus suis, quia unus actus est ab altero per modum originis, quoniam sicut à Patre Verbum, & ab utroque Spiritus sanctus, sic quodammodo à memoria actus intellectus, & velle ab utroque originatur. Secundo loco, ex aureo divinarum litterarum thesauro colliges divinæ prædestinationis arcanum, quâ Deus voluntate antecedente ordinat omnes ad gloriam. Verùm voluntate con- i Tim. c. 2. sequente neminem vult salvare, nisi ex præscripto legis viventem. hîc tamen aliquis objiciet, Si Deus Rom. c. 9. vult omnes homines salvos fieri, ergo omnes salvabuntur. quia voluntas Dei est ita efficax, ut nemo possit resistere. Voluntati ejus quis resistet? hanc difficultatem tollunt Sancti Patres aureâ Chryf. hom. 1. ad Ephes. sanè doctrinâ. Duplex est in Deo voluntas; antecedens, & consequens; voluntas antecedens est illa, quæ consideratur in Deo, antequam merita respiciat; voluntas consequens, quâ Deus vult aliquid, respiciendo tamen ad opus creaturæ, & idcirco illa dicitur antecedens, quasi antecedit operum nostrorum cognitionem; hæc autem consequens,

Aug. de  
sp. &  
lit. c. 3.

Matt.  
c. 23.

quens, quasi sequatur operum cognitionem. Ad rem igitur accedentes, dicimus, quod Deus vult omnes salvare, actu voluntatis antecedentis, non actu voluntatis consequentis. hinc non omnes salvantur, imò plurimi damnantur, quia nolunt voluntati divinæ conformari. Proinde conqueritur, Quoties volui, & noluisti? ideo relinquetur domus tua deserta. Deus enim nulli denegat auxilium sufficiens, ne dicatur, Orabat scelestus Dominum à quo non erat misericordiam consecuturus. pœnitentia sufficiens est ad delenda quæcunque crimina, sed dicitur de Antiocho, qui non erat misericordiam consecuturus, quia pœnitentia illa vera non fuit, qualis præsumi potest, quæ usque ad ultimum vitæ terminum protrahitur; quæ magis ex timore, quàm ex amore procedit. Pœnitentia namque sera, rarò est vera. doluit quidem, sed non consecutus misericordiam: quia non in loco criminis iustitiam exercuit; crimen enim commissum fuit in corde, ipse verò pœnitentiam solum in lingua. Pro majori dictorum explicatine advertendum, quod signa distributiva aliquando accipiuntur pro singulis generum, ut illud; Statutum est omnibus hominibus semel mori. aliquando non ita universaliter sumuntur, sed pro generibus singulorum, ut illud Pauli; In Christo omnes vivificabuntur. quod universaliter verum non est, sed tantum pro genere salvandorum; ita quod est distributio accommoda, & significat quod omnes quotquot salvantur, per Christum salvantur; vel quod ex omni genere gentium, vivificantur aliqui. ita explicatur illud; Videbit omnis caro salutare Dei. siquidem non omnes viderunt Christum, sed ex omni populo, tribu, natione aliqui. ita ut nulla sit natio, de qua non salventur

tur aliqui. neque aliqua est in toto Orbe provin-  
cia, ubi Euangelium non sit prædicatum, &  
Christi bonus odor non pervenerit. sic namque  
dicebant senes agnum adorantes; Redemisti nos  
Domine ex omni tribu, & lingua, & natio-  
ne, & fecisti nos Deo nostro regnum, non di-  
xerunt, Redemisti omnem tribum, neque omnem  
populum; sed, ex omni tribu, & ex omni popu-  
lo; ex his enim aliqui in Christum crediderunt,  
& salvi sunt. ita quoque exponitur locus Pauli  
paulò superiùs adductus, Deus vult omnes ho-  
mines salvos fieri. nimirum, pro generibus sin-  
gulorum, non pro singulis generum. Deus itaque,  
ut vela contrahamus, vult omnes salvare, volun-  
tate antecedente; sed non salvabit nisi mandata  
servantes, & non damnabit nisi vocationi resisten-  
tes. Porro ex hac doctrina tam recondita, quid  
colliget Princeps pro Regno optimè administran-  
do? primaria intentio Principis hæc esse debet,  
nempe, ut subditos omnes, tanquam filios in sinu  
foveat, quos autem criminosos, & Regni pertur-  
batores cognoverit, ultimo supplicio perdat. hinc  
summis laudibus extollendus Alexander Severus,  
qui fures à republica eliminabat, ministros au-  
tem integritate ornatos, muneribus & honoribus  
cumulabat.

D. Th. 1,  
p. qu. 19.  
a. 6.

Lampri-  
dus in  
vita Se-  
veri.

Sed ulteriùs, quæso, progrediamur, & mentis  
oculo contemplabimur admirabile creationis  
opus, cæteris actionibus ad extra longè præstan-  
tius, quamvis non habeat in utroque suo termino,  
ens, sive bonum. & jure quidem dicitur præstanti-  
us, non quidem propter magnitudinem ejus, quod  
fit, nam hoc modo majus opus est justificatio im-  
pii, quæ terminatur ad bonum æternum divinæ  
participationis, quàm creatio cæli & terræ, quæ  
ter-

Albertus  
Mag. 2.  
dist. 18.  
a. 4.

terminatur ad bonum naturæ mutabilis, sed dicitur majus ex parte modi agendi, in quo ex nihilo fit aliquid.

*D. Th. 1. 2, q. 113. a. 9.* Hic aciem mentis intende, ô Princeps, & considera summam Dei omnipotentis benignitatem, qui produxit creaturas, non ut inde bonum recipiat, sed ut eis bonitatem influat: nam ultimus finis productionis creaturarum, est divina bonitas, quam Deus creando communicat. Ex hoc aureo fonte, quid potabis ô Princeps? hoc nimirum, ut omnes actiones tuas dirigas in populorum commodum, nullâ cupiditate ductus: nam, ut veteres Academici affirmant, alienum bonum est iustitia.

*Flor. Nan. Bon. in car. arg. super Gen.*

Adeo præclarum est creationis opus, ut Deus nulli creaturæ communicet; nec communicare possit, quoniam sicut non potest communicari creaturæ, quod sit prima causa, ut egregiè docet Reverendissimus Florianus, Theologus celeberrimus; ita sibi non potest communicari, quod sit creans. Quid hinc, ô Princeps? in rebus magni ponderis clavum regiminis ipse teneas, potes quidem, & debes, in administratione Regni consultores adhibere, sed omnimodam potestatem nulli committas, ne tibi contingat, quod Tiberio. Et sicut Deus produxit creaturas mediantibus Ange-

*D. Th. de pot. Dei. q. 3. a. 4.* lis, non tamen operantibus, sed tantum cognoscentibus; Tu quoque, qui vices Dei geris, Regni habenas moderare, adhibitis consiliariis pluribus, non tamen agentibus, sed tantum consulentibus.

Præterea licet Deus ipse solus posset illuminare orbem sine Sole, & hæc inferiora sine corporibus cælestibus gubernare: est enim axioma à philosophis receptum, Quidquid potest Deus mediante causâ secundâ, potest & immediatè, quod quidem intel-

*D. Tb. 1. P. q. 45. a. 5.*

intelligendum est, in genere causæ efficientis, non autem formalis aut materialis : quia non potest facere album sine albedine , nec animal sine corpore; vult tamen admittere creaturas intermedias, & causis secundis uti , præterquam in opere creationis, ubi nulla creatura concurrit, ut instrumentum ad creandum ; imò ( si credimus Divo Thomæ ) neque per potentiam divinam , creatura potest esse instrumentum creationis. siquidem in Principio , hoc est antequam quidquam faceret , creavit cælum & terram , nulla igitur creatura potuit esse instrumentum , quia lumine naturali compertum est , instrumentum esse prius suo effectu. Ita licet Princeps possit , & sciat , ipse solus imperii clavum regere , & rerum gerendarum scientiâ polleat , nil tamen sine sapientum consilio administret.

At plùs ultrà , & in lucidissimo sacrarum litterarum speculo videbimus singularem supremi opificis providentiam , qua omnibus creaturis providet , etiam minimis ; Vestri capilli capitis omnes numerati sunt. Unde Augustinus dicebat : Deus totus oculus est, quia omnia videt; totus manus est, quia omnia operatur ; totus pes est ; quia ubique est. Scio quidem circumferri dictum quoddam Hieronymi dicentis : Deum non videre quot pulices quotidie nascantur ; Sed hanc difficultatem tollit Magister sententiarum. asserit enim , quod Deus non videt per singula momenta quot pulices nascantur ; sed simul , & semper cognoscit omnia. Nec moveat dictum Pauli; Nunquid Deo cura est de bobus ? nam curam omnium gerit pater omnium. Tu pater providentiâ cuncta gubernas. sed specialem curam habet de animantibus ratione præditi, quibus præcepta tradidit. porro hanc

Inc. cap.  
11.

August.  
epist. 36.

Mag.  
sent. li. 1.  
dist. 39.

1 Cor. 8.

Sap. c.6.

hanc curam de brutis non habet. Posset tamen aliquis objicere Sapientis dictum; Æqualiter est illi cura de omnibus. at facile dissolvitur hic nodus; vox, æqualiter, non videtur hoc loco referenda ad ipsam curam, quasi Deus non magis curaret rem unam quàm aliam; sed ad res ipsas quæ curantur, ut sensus sit, nihil omnino subtrahi à providentia Dei; sed res omnes, nullâ prorsus exceptâ, quamvis infimâ & vili, divinâ providentiâ gubernari. Sed hinc quid colligendum? munus Principis hoc esse, omnium subditorum curam gerere, omnibus prospicere, neminem negligere, quia, ut ait adagium; Etiam capillus habet umbram suam.

Bellarm.  
de gratia. &  
lib. arb.  
lib. 2. c. 4.

D. Th.  
3 p. qu.  
10. a. 2.

Nec te pigeat iterum sacrarum Scripturarum fodere parietem, & videbis arcana majora, ibi namque se offeret ineffabilis sapientia Dei, qui licet omnes creaturas infinitâ charitate diligat, non omnibustamen omnia passim communicare voluit. Non est vestrûm nosse tempora vel momenta, quæ Pater posuit in sua potestate. Nec animæ Christi adeò dilectæ, quæ in ipso instanti conceptionis fuit unita Verbo, omnia communicare voluit: siquidem anima Christi apprehendit quidem divinam essentiam, sed non comprehendit; cognoscit quidem omnia, quæ scit Deus scientiâ visionis; sed non omnia, quæ scit Deus, scientiâ simplicis intelligentiæ. Quid hinc hauriendum? caveat Princeps bono regimini incumbens, ne omnia omnibus communicet, quamvis intimis, & longo usu probatis, quia semel emissum volat irrevocabile verbum. Quod enim tacitum esse velis, nemini dixeris.

Innumera ferè sunt arcana, quæ ex aureis divinarum litterarum thesauris colligi possunt, sed brevitati



vitati studentes, consultò omittenda duximus, tu ipse sacras paginas evolvendo, invenies. hoc tantum oro, utinam & exorem, ut die, noctuque oculo mentis perlustres, quanta sit Beatorum in cœlesti Regno felicitas, quæ in actu intellectûs, ut sentit D. Thomas, hoc est, in solâ Dei visione consistit; vel in actu voluntatis, ut arbitratur Scotus, hoc est, in solâ Dei fruitione; vel in intellectu, & voluntate conjunctim, ut scribit Richardus; in visione, nimirum, & fruitione simul. Quæ quidem felicitas tanta est, ut omne desiderium superet, universamque hominis sitim adeò extinguat, ut nihil ampliùs relinquatur appetendum. tanta est illa felicitas, ut non possit augeri, neque minui. non quidem minui, quia nequit amitti, Gaudium vestrum nemo tollet à vobis; nec potest augeri, quia infinita est. at infinito nulla fit additio. cui potest perbelle adaptari pro insigni, fons Madutii, qui est in campis Salentinis, de quo Plinius scribit; quod neque exhaustis aquis minuitur, neque infusis augetur, appositâ notâ, Nec haustu, nec auctu. sed ex tam felici Beatorum gloria, quem fructum capies? hunc nimirum, ut sanctè justitiam administrando, sic transeas per Regna temporalia, ut non amittas æterna. ô quàm gloriosum est Regnum, in quo beati tantâ felicitate fruuntur, ut à summo bono ampliùs deficere nequeant. Scio quidem in hoc loco obijci posse Jobum dicentem: Ecce qui serviunt Iob. c. 4. ei, non sunt stabiles, & in angelis suis reperit pravitatem. Porro hic locus rectè intelligentes parum urget, exponitur enim de angelis viatoribus, quales sunt sacerdotes, & sic nulla est difficultas; si autem intelligatur de angelis beatis, sensus catholicus hic est, quod quantum est ex sua  
natura

Greg. li.  
s. mor.  
C. 27.

natura, possunt delinquere, sic explicat Gregorius. Aliqui verò, nomine pravitatis intelligunt, non peccatum, sed ignorantiam, & in hoc sensu dicit Dionysius Areopagita, quod Angeli superiores illuminant, & purgant inferiores, non tamen lumen infundendo caulativè, sicut Sol illuminat aërem; quia sic solus Deus illuminat, sed luminosum offerendo, sicut deferens candelam lucentem illuminat domum, hoc modo Angelus superior illuminat Angelum inferiorem, eī loquendo de aliquo noto sibi, non alteri. Erunt itaque Beati ita confirmati in gratia, utpote videntes divinam essentiam, quod erunt omnino impeccabiles, & proinde semper exultantes. Exultabunt sancti in gloria. sed insurget quispiam, Quomodo Beati vivunt in gaudio perenni, si habent timorem comitem individuum? timor Domini sanctus permanet in sæculum sæculi; nemo autem ignorat objectum timoris esse malum, quod timemus. si timor perpetuus, quomodo animi tranquillitas? In vita beata non est timor, qui sollicitudinem secum afferat, qualis est timor servilis, qui non est in patria, illum enim foras mittit perfecta charitas. manet quidem timor filialis, qui in Beatis non est expectatio futuri mali, sed reverentia quædam voluntaria tantæ deitatis, cum perpetuâ animi tranquillitate. Si autem dicas, quomodo non tanguntur aliquo saltem animi mœrore, advertentes filios, parentes, amicos esse damnatos; non propterea turbantur? respondeo ego, quia beati id volunt, quod vident Deum velle, & in adimplentione divinæ voluntatis conquiescunt. Lætabitur justus cum viderit vindictam. Confor- mantur namque penitus divinæ voluntati, tum in volito materiali, tum etiam in volito formali, in  
volito

Medina  
in. 1. 2. q.  
9. a. 8.

Psal. 57.

volito quidem formali, quia quidquid volunt, volunt propter ultimum finem, in voluto materiali, quia volunt, quidquid Deus vult. Sed adhuc aliquis fortasse dubitabit, si Beati spiritus omnino conformantur divinæ voluntati, quomodo conciliabitur illa dissensio inter Angelos beatos, quam refert oraculum Danielis? Princeps Regni Persarum restitit mihi viginti & uno diebus. Divus Hieronymus explicans hunc locum dicit: Principem Regni Persarum esse Angelum, qui se opposuit liberationi populi Israëliti, pro quo Daniel orabat, Gabriele preces ejus Deo præsentantē. Princeps autem Regni Persarum, est bonus Angelus custodiæ illius Regni deputatus. Contentio autem erat ista, Archangelus custos Regni Persarum procuravit, quantum in eo erat, salutem illorum, qui erant in dicto Regno vidensque quod ex conversatione Judæorum, multi ex Perlis convertebantur, annuebat, ut populus ille, in captivitate perseveraret. alter verò, qui præsidebat populo Judæorum, illius populi liberationem procurabat, precesque Danielis, præsentabat Deo. omnes tamen Dei voluntatem impleri volebant. modò ex prædictis locis explicatis quem fructum colliges? considerare debes sedulo, Principes instar Angelorum esse constitutos, ad custodiendas animas, & corpora subditorum, proinde rationem exactè reddent, & stabit anima illorum pro animabus istorum, sic acclamante oraculo divino, Durissimum judicium fiet his qui præsent; idcirco regius Vates non sine lachrymis dicebat: Ab alienis parce servo tuo.

In illo Regno felicitatis æternæ Deus Princeps liberalis, præmiat Beatos ultra condignum, sic attestante Apostolo, Non sunt condignę passionēs hujus

T

tem-

Dan. c.

10.

D. Tho.

1 p. 9.

113.

Rom. c.

8.

temporis ad futuram gloriam. hinc dicitur, Dominus, quasi, do munus. Nec contradicit doctrina Theologorum ab omnibus recepta, nempe, quod Sancti merentur vitam æternam de condigno. hanc enim difficultatem solvit egregiè Divus Thomas, hâc aureâ distinctione, Quando dicit Apostolus, non sunt condignæ passionēs, ita explicari debet iste locus, non sunt condignæ, quatenus opera nostra procedunt ex libero arbitrio; at quatenus prodeunt ex gratia Spiritûs sancti, & ex merito Christi Salvatoris, ingentis sunt valoris & momenti, & tunc merentur de condigno. Sed quid hinc degustabis ô Princeps? de republica bene meritos beneficiis fove, non tantum pro merito, sed cumlatiore mensurâ, ut alter Alexander, qui dicebat: Non quæro, quid oporteat te accipere, sed quid deceat Regem dare.

Improbos, & sacræ legi adversantes, in perpetuas flammâs tradit supremus Judex sine fine duraturas, nullum spei relinquendo locum. Nec me latet historia illa, quæ circumfertur de Trajano, Divi Gregorii precibus à pœnis inferni erepto, quam ego nullatenus approbo, cùm ipse Gregorius in suis operibus nullam hujus rei mentionem faciat, nec est alicujus ponderis citatio Damasceni dicentis in quodam sermone, quod Gregorius oravit pro eo, & audivit vocem dicentem sibi: Vocem tuam audivi, & Trajano veniam do. non probatur inquam, quia Damascenus vir magnæ auctoritatis, non potuit de eo talia scribere. ratio est, quia Damascenus antiquior fuit Gregorio ducentis annis. Nam floruit sub Theodosio Imperatore, & fuit illi à secretis, Gregorius verò sub Mauritio. necesse est ergo ut dicamus, illud opus alterius esse, & non magni Damasceni. denique si vera est illa

Melchior Canus  
li. 11 de  
locis c.

2.

D. Tho.  
in 4 sent.  
d. 55. q.  
2. a. 2.

illa historia, cujuscunque sit, necessario dicendum, non quod translatus sit ex Inferno ad gloriam, quod est omnino contra legem, sed quod fuit revocatus ad vitam, in qua egit poenitentiam, paulò post defunctus, & salvus factus. Licet autem poenae Inferni sint æternæ & acerbissimæ, aliquatenus etiam misericordiæ recordatur Deus, quia punit damnatos citra condignum. Posset enim peccatorem ad nihilum redigere de rigore justitiæ, tamen illis relinquit esse, quod est bonum. Tu quoque, ô Princeps, quos verè criminosos, & proinde supplicii dignos cognoveris, nec prece, nec pretio liberabis; ita tamen, quod semper effulgeat aliquis clementiæ radius. Ex parte objecti, ait Divus Thomas, una est omnium Beatorum gloria; omnes enim eundem Deum possident, & possident totum; sed non totaliter, quia vident quidem divinam essentiam infinitam, sed modo finito; omnes apprehendunt Deum, sed non comprehendunt, quia solus Deus comprehendit seipsum. Nec ipsa anima Christi comprehendit divinam essentiam: illud enim dicitur comprehendi, quod perfectè cognoscitur, perfectè autem cognoscitur, quod tantum cognoscitur; quantum cognoscibile est, nullus autem intellectus creatus potest pertingere ad illum perfectum modum cognitionis divinæ essentiae, quo cognoscibilis est, quia cum essentia divina sit infinita, infinitè cognoscibilis est, porro intellectus creatus non potest illam infinitè cognoscere. Hoc etiam Epictetus philosophus videtur insinuasse, licet lumine fidei destitutus. Cum enim plura discipulis verba fecisset, ut declararet Deum, & illis dicentibus, non plenè intellexisse, respondit; Si omnino ego declarassem Deum, vel ego Deus essem, vel quem ego declaravi, Deus non foret;

Abulens.  
sup. 4.  
reg. 4. q.  
57.

D. Tho.  
1, 2. q. 5.  
a. 2.

Cic. lib. 1 de nat. decorum. ret. idem prorsus sentiebat Simonides, Quamto magis Deum confidero, tanto mihi videtur obscurior: Doctè quidem ac sapienter, nam cum plenè intellexeris hoc mysterium, beatus eris; imò nec tunc comprehendes: ut enim Deus sit, infinitus oportet sit; quem verò caperet intellectus tuus, infinitus non esset. Omnes ergo Beati vident Deum, sed non omnes eodem modo, quia pro mensura meritorum unus videt perfectiùs altero. hinc dicebat Paradisi Princeps, In domo Patris mei mansiones multæ sunt. & Paulus, Stella differt à stella in claritate. quæ sanè allusio pulcherrima est, & valde appositæ ad intelligendum, pro varietate meritorum, diversam quoque Beatorum esse gloriam: sicut enim astra omnia recipiunt quidem à Sole omnem splendorem, quodlibet tamen juxta suam qualitatem, & prout magis minusve solidum est, & diaphanum, plùs, minusve refulget. Sic sanè quamvis omnes iusti videant Deum, & Deum totum, qui est Sol fulgentissimus, nequaquam tamen ex æquo, sed juxta modum suæ dispositionis, hoc est, meritorum suorum diversitate, gloriam animæ & corporis recipiunt. Hoc etiam præclaro Concilii Florentini testimonio roboratur, nam in illo definitur hæc conclusio; animæ beatæ vident Deum trinum & unum sicuti est, sed pro diversitate meritorum, alius alio perfectiùs videt. neque repugnat illud Matthæi; ubi videtur dari idem præmium omnibus operariis, nempe, denarius quidam diurnus: nam denarius ille significat æqualitatem æternitatis, non gloriæ & excellentiæ. datur omnibus idem denarius, ait Ambrosius, quoniam Sancti omnes sine fine regnabunt, quamvis non omnes eadem eminentiâ regnabunt, quemadmo-

Ioan. c. 24.

1 Cor. 15.

Matth. c. 20.

admodum commune est stellis omnibus, perpetuò  
fulgere in cœlo, licet aliæ aliis clariùs micent. Ex  
hoc sacro fonte quid potabis ô Princeps? hoc  
fanè præclarum documentum, pro diu & feliciter  
summa rei administranda, nempe, ut viros summâ  
integritate ornatos, muneribus & honoribus co-  
las, non tamen æqualiter omnes, sed pro dignitate  
meritorum. Non enim est æquum omnibus ex  
æquo. Etece ô Principes quanta Beatorum feli-  
citas? tanta utique ut Beatus Augustinus veneran-  
dâ admiratione permotus exclamet, omnem ser-  
monem superat, omnem humanæ mentis sensum  
excedit, illud decus, illa glória, illa pulchritudo,  
illa majestas. Gregorius Magnus in admirationem  
raptus dicebat, Quæ autem lingua dicere, aut quis  
intellectus capere sufficit illa supernæ civitatis  
quanta sint gaudia. Ad hanc rem appositè facit vi-  
sio illa Hieronymi olim Augustino facta. Cùm  
Augustinus Hieronymo in Palæstinam scribere de-  
crevisset, & petere illius de æterna beatitudine ju-  
diciũ, contigit Hieronymum interea expirasse,  
Augustino apparuisse, & verba hujusmodi locu-  
tum fuisse, Vide si numerare potes stellas cœli, &  
guttas maris. id namque facilius est, quàm gloriam  
Paradisi dicendo explicare; est enim res tanta,  
ut nisi ipse vidissem, nunquam credidissem, &  
tam longè abest ab eo, quod ego vivens cogita-  
bam, ut omnino sit quidpiam in infinitum majus.

Angelicus doctor cùm immensum cœlestis glo-  
riæ Oceanum ingenii sui velis tentasset transfre-  
tare, statim in sacrum silentii portum se recepit,  
admiratio enim quæ maxima est, non parit ver-  
bum, sed silentium, attestatus est, nihil præstantius  
cœlesti Beatorum gloriâ. In prima namque quæ-  
stionum suarum parte, disquirens, an summus ille

Bellarm.  
de justif.  
lib. 3. c.  
16.

August.  
epist. ad  
Cyril-  
lum.

Basil lib.  
7.

August.  
in foli-  
loq.

opifex, qui cuncta è nihilo produxit, creaturas perfectiores posset efficere! posset quidem, concludit, cum sit omnipotens, tribus tamen exceptis, quæ non patiuntur augmentum. nempe, Christi Salvatoris humanitas, Mariæ Virginis maternitas, & Beatorum gloria. O beati igitur qui habitant in domo tua Domine. ibi enim est omnium deliciarum oceanus, omnium divitiarum thesaurus, omnium bonorum fons indeficiens. ibi juvenus nunquam senescit, ibi vita terminum nescit, ibi decor nunquam pallescit, ibi amor nunquam tepescit, ibi gaudium nunquam decrescit. ô gaudium super gaudium, ô gaudium vincens omne gaudium, quando intrabo in te? ut videam Deum meum, qui habitat in te? Ex hoc torrente voluptatis, quid hauries, ô Princeps? omnibus viribus enitendum, omni studio elaborandum, remis, velisque contendendum, ut de terreno hoc, ad cæleste illud Regnum perveniamus. sed quibus semitis? audi sapientissimum Regem, vias regias demonstrantem; Domine quis habitabit in tabernaculo tuo? qui ingreditur sine macula, & operatur justitiam. in media regia, vitæ nimirum integritas, & justitiæ æquitas. ita se gerebat in administrando regno Ludovicus sanctus Galliarum Rex, qui de terreno ad cælestis Regni gloriam est evectus. sed quibus ducibus? audi. Quia justitiam strenuè administravit, quia neminem læsit, quia jus suum unicuique tribuit. his itineribus pervenit ad Regnum. illud academicum decantando, Sic itur ad astra.

*Sacrarum, ô Princeps, divina volumina legum*

*Præ manibus teneas, perlege nocte, die.*

*Fontibus ex istis, quanam sit forma regendi,*

*Quid caveas, quid agas, lectio sacra docet.*



## CAPUT XVIII.

*Sapius mentis revolvat Princeps, se esse hominem,  
& proinde ad caelestia formatum, mox enim vi-  
lescent omnia, quæ habentur in terris.*



**I**OANNES Picus Mirandulanus Princeps, ob singularem doctrinarum cognitionem, nostræ ætatis Phoenix appellatus, in quadam quæstione examinat, quam ob causam, Deus postremum omnium creavit hominem. Creavit enim cœlos, & Angelis cumulavit; creavit terram, & bestiis omnis generis implevit; creavit aërem, volucris dedit; creavit aquam, piscibus concessit; repletis omnibus locis, tunc creavit hominem. At si jam occupata sunt omnia, ubi erit locus Principis? creavit hominem summus ille artifex, respondet egregius doctor, omnibus jam occupatis, ut cognosceret quietem, & finem hominis, non in rebus creatis, sed in Deo solo collocari debere, teste Augustino; Fecisti nos Domine ad te, & inquietum est cor nostrum donec requiescat in te. Ad rem facit Anaxagoræ dictum, hic enim licet gentilis, & veri numinis ignarus, cum æmuli propter opes actionem intentassent, omnium potius jacturam facere maluit, quam iudicio jus suum prosequi, cumque argueretur, quod omnibus bonis se orbari sineret, digitos in cælum sustulit, clamans, Illa patria mea est, illa hæreditas mea, illam curo, non ea quæ super terram. ac si diceret, immortalia immortalis animus meditetur. O præclaram Ethnici homi-

Aug. 1 li.  
Confess.  
c. 1.  
Diog.  
Laër.  
lib. 2.

Hebr.c.  
13.

nis sententiam. sed quid ? nonne, cùm per varias regiones peragraret, compellantibus quibusdam, quò tenderet? Cœlum intuens, dixit, Ad patriam tendo, quasi oraculum Apostolicum pronuntiaret; Non habemus hîc civitatem permanentem, sed futuram inquirimus. Hoc apprime intelligebat Phocion Atheniensis, cui cùm Alexander Magnus ex Persica gaza, magnum auri pondus misisset, recusans, interrogavit, Cur ad me solum tantum auri pondus Rex mitteret? responderunt, Quia te omnium Græcorum optimum esse arbitratur. Sinite igitur, inquit, eum esse me, quem ille me esse arbitratur. sentiebat quippe vir sapiens, quod homo ad cœlestia formatus, divinis debet inhiare; hæc autem fortunæ bona, tanquam ludibria parvifacere. Nec abs re erit, si in medium proferemus, quod Divi Bernardi fratres ad monasterium convolantes, dixerunt ad natu minimum; Ad te solum\* respicit terra possessionis nostræ. At ille, licet puer ætate, non tamen sensu, dixit; Vobis cœlum, mihi terra? non ex æquo divisio facta est, & paulò post omnibus relictis, secutus est fratres. quasi diceret cum philosopho morali, Ad majora natus sum, quàm ut rebus terrenis serviam. Ipsi quoque Philosophi, quamvis à fide alieni, nonne hac in re Christianorum sententiam secuti sunt, cum Platone dicentes, hominem inter cætera animalia, arborem esse inversam? ramos enim inferius habet homo, radices verò, præter omnium arborum naturam, superius extollit. sed quorsum hoc? ut ostendat cælo se omne bonum petere, ac si dicat; Levari oculos meos in montes, unde veniet auxilium mihi.

Quod quidem etiam Philonis Hebræi hominis doctif.

doctissimi testimonio comprobatur, ait enim Solam in terris cœlestem plantam Deus fecit hominem, cæterarum plantarum capita defixit in terrâ, soli homini caput sublime dedit, ut alimenta cœlitus incorruptibilia quærat. pulchre Poëta,

*Pronaque cùm spectent animalia cætera terram,*

*Os homini sublime dedit, cœlumque tueri*

*Fussit, & erectos ad sidera tollere vultus.*

Siquidem homo creatus est, non ut statuatur oculos in terram, sed ut extollat ad contemplandum Deum, cujus gratiâ conditus est. Quorsum cor superius latum, inferius angustum? ut claudatur terræ, aperiatur cœlo, à quo bona cuncta procedunt. Hinc Propheta Regius dicebat: Quis ascendet in montem Domini? mox sibi ipsi respondit, Qui non accepit in vanum animam suam. Frustra autem aliquis dicitur aliquid accipere, quando finem non consequitur, ad quem ordinatur. In vanum miles accipit arma, quando ad militiam non procedit. Cur anima nobis à Deo concessa? non ut terrenis inhiet, cùm ipsa sit immortalis, sed ut Deum contempletur, in quo felicitas nostra conquiescit. Hoc probè noverat Tertullianus, vir planè egregius, Cur in sacris litteris, nunquam Deus, nomen Domini assumit, nisi post creationem hominis? tunc enim statim nomen domini jungit; Formavit Dominus Deus hominem de limo terræ. rationem reddit, id factum fuisse, ut hominem doceret, nullum dominum, nisi Deum cognoscere debere, in quem assiduè oculos defigeret, ad cuius imaginem factus est. Porro in quo propriè consistat hæc similitudo & imago, non est ita facile explicatu.

Aliqui arbitrantur, hominem dici ad imaginem

T 5

Dei

Lib. con.  
tra Her-  
mog.  
hæreti-  
cum.  
Gen. c. i.

Dei formatum, quia sicut Deus replet omnia, Cælum & terram ego impleo; ita corpus univ-  
 sum replet anima. anima est tota in toto, & tota  
 in qualibet parte corporis. Alii sentiunt, ad ima-  
 ginem Dei formatum, quia sicut Deus est Domi-  
 nus universorum, Domini est terra, & plenitudo  
 ejus, ita homo omnibus dominatur creaturis.  
 Omnia subjecisti sub pedibus ejus. opinantur non-  
 nulli hominem ideo ad imaginem Dei formatum,  
 quia sicut in Deo omnia continentur eminenter,  
 & causaliter, sic in homine quodammodo etiam  
 omnia continentur: nam participat in essentia cum  
 lapidibus, vitam communem habet cum plantis,  
 sensum cum brutis: at rationis particeps, similis  
 Deo efficitur; sicque in omnibus communicans,  
 omnia in se continere dicitur. Proinde bene do-  
 cebat Aristoteles, dum inquit, animam nostram  
 esse quodammodo omnia. & Plotinus; Homo est  
 quoddam omne. Ambrosius affirmat, similitudi-  
 nem hanc, in unitate animæ consistere, cum po-  
 tentiarum Trinitate. nam sicut in Deo, cum Trini-  
 tate personarum reperitur unitas essentiæ, sic ani-  
 ma cum una sit, tres potentias habet distinctas.  
 Chrysoft. tenet, hanc similitudinem in dominio  
 consistere, nam sicut Deus est supremus orbis mo-  
 narcha, sic homo super opera manuum suarum  
 constitutus. cui opinioni videtur favere illud Ge-  
 nesis, postquam enim dictum fuit; Faciamus homi-  
 nem ad imaginem, & similitudinem nostram; quasi  
 reddens rationem hujus similitudinis, mox adjecit;  
 Qui præsit bestiis terræ, piscibus maris, & volatili-  
 bus cæli, instar Regis prudentissimi, qui in suis pro-  
 vineiis solet Rectorem constituere, qui ejus vices  
 gerat, & personam regiam referat; sic planè Deus  
 hominem constituit, super universam mundi fa-  
 miliam,

Psal. 23.

Lib. 3. de  
anima.Ambros.  
lib. de  
dignit.  
hum.  
cond.

Gen. c. 1.

miliam, qui omnibus creaturis imperaret. Cyril-  
lus tenet, hominem in hoc Dei imaginem expri-  
mere, quia capax est beatitudinis Dei, in quo solo  
satiatur, & quiescit.

Hinc apud Rabbinos Hebræos vocatur Deus,  
nomine Sadai, quod apud nos sonat, Qui sufficiens  
est; quasi innuere vellent, Homo, si habes Deum,  
habes omnia, quia Deus universale bonum, & hoc  
sufficit. Ad rem pulchre facit Regii Vatis oracu-  
lum, Dominus regit me. sed ex hoc, quid erit ti-  
bi? nihil mihi deerit. quia solus Deus satiat. Pro  
cujus rei confirmatione, egregiè facit Felicis ver-  
sio, nam ubi nos legimus; animam meam con-  
vertit; Felix legit, animam meam quietavit. Hoc  
itidem Sponsi cœlestis testimonio comprobatur.  
ubi enim nostra vulgata legit; Ego flos campi; Cant. c.  
2.  
exemplar Hebræum habet, Ego flos saturitatis.  
At dicet quispiam; Nonne ipsemet Sponsus Ecclef.  
c. 24.  
alibi dixit: Qui edunt me, adhuc esurient? si  
satietas, ergo non fames? si fames adest, satie-  
tas non erit. Quomodo nodum hunc explica-  
bimus? Advertendum imprimis, quod fames  
duo continet, unum molestum, aliud gratum, &  
jucundum. Molestum est, quod quandiu durat  
fames, stomachus languet, quia caret sufficienti  
alimento. Gratum verò, quod excitat appeti-  
tum. Unde abiit in proverbium millies decan-  
tatum; Optimum cibi cōdimentum, fames. Sa-  
tietas & ipsa habet aliquid, quod est utile, & ali-  
quod noxium; utile est, quod indigentiae naturæ  
satisfacit; noxium verò, quod fastidium & nau-  
seam parit.

Beatorum ergo felicitas, ejus est conditionis, ut  
ex satietate & fame, noxiis dimissis, in unum co-  
pulaverit; quæ optima sunt. è fame, comedendi  
appe-

1 Petr. 1.

appetitum, & desiderium mutuat. sic intelligitur illud, In quem desiderant Angeli prospicere. At ex satietate accipit posse explere, & plenè desiderio satisfacere. & hinc est, quod Dominus loquens de Angelis custodibus dicebat: Angeli eorum semper vident faciem Patris mei, qui est in cœlis. Nec obstat, si aliquis objiciat; Quomodo si Angeli vident, videre desiderant? Quod enim possidetur, non desideratur. Huic difficultati satisfacit Theologus, hanc planè doctrinâ aureâ, In visione beatifica, hæc duo apprime conjunguntur, satiat quippe Beatos, eisque plenè satisfacit, & hinc fit, ut ab omni molestia, & anxietate liberi, continuo quodam appetitu, & desiderio videndi, ac fruendi Deo in æternum, & ultrà, avidissimè trahantur, unde utroque bono, quod in fame, & satietate reperitur, feliciter potiuntur. Satiant igitur bona cœlestia, & plenè, & semper, & sine molestia; non sic terrena, quæ dum habentur, in fastidio sunt; dum non habentur, in desiderio. Quocirca Sponsa cœlestis declaratura inconstantiam, & brevitatem temporalium bonorum, & æternorum firmam perpetuitatem, dixit, Sponsum alloquens: Meliora sunt ubera tua vino. Per vinum caduca, & brevis hujus sæculi voluptas; per ubera, constans & æterna cœlestis vitæ delectatio. ratio autem hujus discriminis est, quoniam si racemum uvarum comprimas, semel & iterum succum elicies, sed postea in racemo nihil superest liquoris, sed rugosa tantum uvarum pellicula, secus autem matris accidit uberibus, quæ quia, instar fontis perennis, continuè manant, proinde puer hodie fugit & satiatur, cras itidem, idque toto anni circulo factitans, uberum maternorum lacteo

D. Bern.  
super  
Cant. 1.

laeteo liquore, & ubertate non destituitur. En latum discrimen, quod inter bona temporalia, & æterna versatur; nam illa sunt momentanea, nec omnino delectant; bona verò cœlestia æterna sunt, omni bono redundantia sunt, & cordis humani desiderium explent usquequaque, quod totus mundus obtinere nequit, ut egregiè indicavit magnus ille Alexander, qui audiens à quodam Philosopho plures esse mundos, ingemuit dicens: Heu me miserum! qui nec uno quidem sum potius. En evidens argumentum, animum Alexandri toto mundo esse capaciores. Hinc Philippus pater, ejus magnanimitatem admirans, solebat dicere; Quare aliud regnum Alexander, quia Macedonia te non capit. & Poëta,

Plotar.  
in vita  
Alex.

*Vnus Pellao juveni non sufficit orbis.*

Quod rectè expressit elogium illud; Alexander toti orbi augustus est, totus orbis Alexandro angustus est.

*Parvus Alexandro fuit orbis, sed fuit orbi*

*Magnus Alexander, ipse sibi exiguus.*

*Questus, quod citius, quam miles, terra deesset,*

*Quodque suum Oceanus clauderet Imperium.*

Siquidem dominandi libido neque finem, neque modum habet. Cyneas philosophus hanc insaniam Pyrrho Epirotarum Regi perspicuè demonstravit. Pyrrhus enim cum cum Romanis bellum gereret, rogatus à Cynea, quid illis subactis faceret? respondit; Italiam totam occupabimus, Quid Italiâ subacta? Siciliam vicinam capiemus. Quid captâ Siciliâ? superest Lybia, & Carthago. quibus captis, faciliè Græciæ dominabor. sed delectis omnibus, quid tandem factururus es? tunc otio, & amicis fruemur, nosque invicem oblectabimus. Tum Cyneas, At quid vetat, ô Rex, quo

quo minus nunc eodem otio perfruaris? nisi quod cæca ambitio te quietum esse non finit? Sine quiete quid profuit Alexandro totius Asiæ dominum, qui non secus ac si esset mendicus lachrymabatur, quod totum mundum suo Imperio non subjugasset. Hinc colligemus solutionem illius celebratissimæ quæstionis, Athenis olim propositæ, nimirum, Quid maximum pariter & minimum? Omnes qui tunc aderant Philosophi, quæsitam difficultatem considerantes, in varias distracti sententias abiêre. Quidam enim arbitrabantur, id esse visûs potentiam, quæ intra oculi pupillam includit, Solis, Lunæ, ac Stellarum magnitudinem, quarum quælibet, totum mare, terramque transcendit. Ecce maximum pariter & minimum. Alii verò sentiebant, id esse proprium intellectûs humani, quoniam omni carens quantitate, universam mundi machinam complectitur, ac cælum puncto temporis perlustrans, pari quoque velocitate terrarum profunda perscrutatur. hoc est maximum pariter & minimum. Alii verum scopum attingentes, dixere, cor hominis, esse maximum & minimum; est enim minima pars corporis humani, si molem attendamus; at si illius capacitatem; adeò magnum, ut totus mundus sinu suo capere non possit; nec ejus sitim omnino extinguere. Unde de siti unius Alexandri cecinit Poëta,

*Æstuat infelix angusto limite mundi.*

Magna porro sitis hominis, cui totus mundus non sufficit. nec mirum, quia aquæ hujus mundi falsæ sunt, proinde sitim non extinguunt, sed excitant, replent, non satiant. sitim potus sedat; famem, cibus restinguit; corpus vestis operit; nulla mundi voluptas cordi satisfacit, de qua, jure  
licet



licet dicere, quod medico competit imperito, Pharmacum tuum morbum auget. Heliogabalus Romanus Imperator, joci captandi gratiâ, universum populum Romanum in Palatio invitavit, omnis plebecula prandii avida confluxit, mensæ sternuntur, aulæis parietes vestiuntur, verum non nisi fucata fercula mensæ inferuntur, ita ut convivæ delusi, tantum abfuit, ut satiarentur, quod etiam majori cum fame à mensa recesserint, quam accesserint. En convivium mundi, in quo fercula picta, & illusionibus plena. Quid mirum si non extinguunt? Dubitant expōitores, quare Lothi uxor de Sodoma egrediens, in statuam salis conversa est? Cur non æris? cur non marmoris? quia res mundi, inquit Cajetanus, naturam fallis imitantur, quæ sitim potius excitant, quam expleant. Quærent sacri Doctores, cur Salvator noster moritur sitiens? dixit enim, Sitio, cum proximus esset morti. Cyrillus exponit de siti naturali, quæ in Christo Domino patiente maxima fuit; imò fuit unum ex gravissimis tormentis, quæ pertulit. Sitis autem hujus causa fuit, quod ab hora cœnæ nihil biberat, & summis laboribus, ac doloribus afflictus fuerat, qui sunt causa præcipua sitis. Præterea in sanguineo sudore plurimum sanguinis emisit, & in cruce penè omnem. Nunc exhaustus fuit, & humidum radicale consumptum, ideo ardentissimâ siti vexabatur. Quod ut explicaret, dixit, Sitio.

Augustinus intelligit de siti spirituali, quasi diceret; Sitio salutem animarum vestrarum, sitio sanguinem effundere, sitio conferre beneficia. Egregiam, ac prope auream Titi Imperatoris sententiam, refert Plutarchus, Amici hunc diem perdidimus, quia nullum in eo beneficium contulit.

Sueton.  
de Tito  
cap. 7.

Si

Si homo vermiculus tanto studio optabat beneficia conferre, ut perditum eum diem diceret, in quo beneficia non contulerit, quid mirum, si infinita bonitas Principis supremi dicat, & sæpius dicat, Sitio dare, sitio beneficia conferre?

Cyprianus reddens rationem, quare Christus moriens dixit, Sitio. Sitebat, inquit, plura pati. maximus charitatis ignis ardebat in corde Christi. hic autem fecit, ut vestimenta abjiceret, & sitiret. Licet enim multa passus esset, totum tamen ei parum videbatur præ amoris magnitudine, ideo clamat, Sitio: quia cum illius charitas sine termino esset, optabat etiam labores immensos, & absque limite esse.

Rupertus Abbas, aliam rationem nostræ rei magis consonam in medium profert, ideo Christus moriens dixit, Sitio, ut ostendat, nihil esse in mundo, quod sitim nostram expleat. vita hominis finietur, sed non sitis. Nam licet plurimas dignitates superbus bibat, nunquam dicit, Sufficit: sed semper, plus ultra. siquidem aquæ hujus mundi non extinguunt sitim. Qui biberit ex hac aqua sitiet iterum. talis autem ratio assignari solet, quia res mundi non permanent, sed transiunt, Quæ felicitas in umbris? at res mundi sicut umbra prætereunt; bona verò æterna semper durant, ideo satiant. Satiabor cum apparuerit gloria tua.

Ioan c.  
4.

1. p. q. 2.

Siquidem, ut scribit Doctor Angelicus, Tota beatitudo cœlestis est bonum perfectum, quod taliter quietat appetitum, aliter non esset ultimus finis, si adhuc remaneret aliquid appetendum. objectum autem voluntatis est universale bonum, & hoc bonum universale, non est in ente creato, nisi in Deo solo, in cuius visione consistit nostra beatitudo.

Nec

Nec moveat dictum illud Joannis, Deum nemo vidit unquam. multas enim explicationes admittit; & quidem pias omnes, & verè catholicas. Joann;  
C. I. Prima explicatio est, Deum nemo vidit unquam, nimirum, in hac vitâ mortali, Non videbit me homo, & vivet. Nec objicias, de Moyse, de Paulo, & de Benedicto, quia isti viderunt divinam essentiam in carne mortali (si tamen viderunt) per modum transeuntis, non permanentis. Secunda explicatio, Deum nemo vidit unquam, intelligitur etiam de Beatis in patria, oculo corporeo, sed bene vident oculo intellectuâli. Tertia explicatio, Deum nemo vidit unquam, oculo scilicet comprehensionis; apprehendunt quidem divinam essentiam Beati, sed non comprehendunt, quia solus Deus comprehendit seipsum. Illud enim dicitur comprehendi, quod perfectè cognoscitur; perfectè enim cognoscitur, quod tantum cognoscitur, quantum cognoscibile est, at nullus intellectus creatus potest pertingere ad illam perfectam cognitionem divinæ essentiæ, quâ cognoscibilis est. Siquidem cùm essentia divina sit infinita, infinite cognoscibilis est: at intellectus creatus non potest illam infinite cognoscere. Nec etiam anima Christi comprehendit divinam essentiam, licet semper fuerit Verbo unita, cognoscit quidem D, Th. 3;  
P. q. 10, 2;  
1. omnia in Verbo, quæ cognoscit Deus scientiâ visionis, at non scientiâ simplicis intelligentiæ. Scientia visionis, est cognoscere omnia quæ fecit Deus, quæ facit, & quæ facturus est. Scientia simplicis intelligentiæ, est cognoscere omnia quæ fuerunt, quæ sunt, & quæ futura sunt, & quæ possent fieri, sed nunquam erunt. hæc cognitio dicitur comprehensio, quæ soli Deo competit. At dubitabit aliquis, & jure, si anima Christi cognoscit omnia

Matth.c. 24. omnia in Verbo , quæ scit Deus scientiâ visionis ; quomodo intelligendum illud , De die illa nemo scit , neque Filius hominis , cùm sit articulus fidei , diem judicii aliquando futurum. Inde venturus est judicare vivos & mortuos. Circa hoc variæ sunt Doctorum expositiones.

D. Th. 3. Divus Thomas asserit Filium hominis nescire , non quod verè nesciat , sed quia non facit scire.  
p. q. 1 o.  
a. 2.

Origenes exponit de Christo , secundum corpus ejus , quod est Ecclesia , quæ hoc tempus ignorat. Divus Ambrosius , & Divus Hieronymus dicunt , quod illa dictio , neque Filius hominis , addita fuit ab Arrianis. sed non probatur hæc expositio , quia hæc particula habetur in editione vulgata , quæ ex decreto Concilii Tridentini est authentica. certum itaque est , quod Christus cognovit diem Judicii , & ut Deus , & ut homo , quia cognovit omnia , quæ scit Deus , scientiâ visionis ; sed non cognovit , scientiâ simplicis intelligentiæ : hoc enim esset comprehendere , ad quod nec anima Beati , nec anima Christi potest pertingere. Si autem aliquis objiceret illud Pauli ; Sic currite , ut comprehendatis , pro explicatione advertendum , quod comprehensio duobus modis à sacris Theologis consideratur , vel pro cognitione divinæ essentiae totaliter & omnibus modis , quibus est cognoscibilis. hoc modo dicimus , solum Deum comprehendere seipsum , quia Beati vident Deum totum , sed non totaliter. vident divinam essentiam infinitam , sed non infinité. alio modo accipitur comprehensio , pro consecutione ultimi finis , nimirum , quia habent Deum præsentem cum perpetuitate , & securitate. hoc modo Sancti dicuntur comprehensores , quia vident , possident , & tenent Deum , nec unquam dimittent. sic intelligitur illud Pauli ; Sic curri-

D. Th. 1.  
p. q. 12.  
a. 7.

currite, ut comprehendatis. Quapropter licet Divus Paulus viderit divinam essentiam, non tamen <sup>1 Cor. c. 9.</sup> fuit comprehensor, quia fuit per modum transeuntis. Beati vero jure dicuntur comprehensores, quia habent semper Deum præsentem, & præ lætitia canunt, Gaudium nostrum nemo tollet à nobis. Si igitur, ô homo, divinæ consors factus es naturæ, si ad Regni gloriam cum Angelis vocatus, si ad Imaginem divinæ Majestatis conditus, cur non aliquando agnoscis dignitatem tuam? cur tanto studio curas res viles, res perituras? Cur ad cælum natus, circa terram cor tuum apponis? O quàm melius tecum ageretur, ô homo, si tanto studio animæ salutem quæreres, quanto corporis. Quid enim non præstas, ut corporis saluti prospicias? quas opes non profundis? quibus laboribus non insudas? si ob hoc in longinquas partes peregrinandum sit, peregrinaris. si corpus diuturnâ inediâ extenuandum sit, extenuas. si à solitis deliciis abstinendum sit, abstines. si ferro, igne, incisionibus opus fuerit, ferrum pateris, & ignes, ut corporis dispendio majus redimas ejusdem corporis dispendium. Nonne magnæ insanix evidens argumentum, corporis morituri gratiâ, tam multa præstare, & propter immortalem animam ad cælestem gloriam destinatam, aut nihil, aut parùm pati? Hanc dementiam eleganter expressit Ovidius,

*Vt corpus redimas, ferrum patieris & ignes,*

*Arida nec sitiens ora lavabis aquâ.*

*Vt valeas animo quidquam tolerare negabis?*

*At pretium pars hæc corpore majus habet.*

De Leone animalium Rege legitur, quod finit se ligari, & exiguo filo etiam à puero circumduci ut eleganter expressit Alciatus; dum currui à leonibus

Alciat.  
embla.

nibus tracto, puerum aurigam præficit, qui eos, quò libitum erat, dirigebat. at si fortè transeundo respicit fontem aquæ vivæ, & ibi imaginem regiam repræsentari, statim indignatus vincula frangit, puerum dejicit, & rugiens properat ad silvam. Tu Rex omnium creaturarum, Deï imaginem gerens, cur non fremis? cur non rubore suffunderis? cur non dissolvis vincula colli tui? cur non clamas cum Philosopho morali, Ad majora natus sum, quàm ut terræ serviam.

Sæton.  
in Aug.

Julia Cæsaris Augusti filia, cùm argueretur à patre de superbo amictu, & ipsam enixè rogaret, ut mundum muliebrem nimis pretiosum exueret, audacter respondit; Pater meus oblitus est, se esse Cæsarem; at ego memini me esse Imperatoris filiam, & proinde primam omnium, quæ sunt in mundo Reginarum: quare æquum est, ut quæ sim, exterius quoque demonstrarem. Tu homo, qui summi Imperatoris es filius, ad Regni gloriam destinatus, super omnes creaturas, Angelis exceptis, collocatus, propriæ dignitatis immemor, rebus vilibus deservies? ad æternam gloriam te voco, ad quam natus es, at quid potest commensurari animæ æternæ, nisi æternum? si ergo ad gloriam non morituram creatus es, quid gloriam quæris perituram? Recordare cujus capitis sis membrum, attende ad petram, de qua excisus es; in mentem revoca, cujus Principis sis Imago, sic enim visitans speciem tuam, non peccabis. cujus loci duplex est interpretatio, prima est lectionis Hebraicæ, quæ sic habet, Visitans habitaculum tuum non peccabis. ubi per habitaculum, corpus intelligimus, quo anima includitur, cujus si cogitemus misérias, humiliter de nobis sentiemus; non secus ac superbus Pavo, qui postquam pulchras expandens

Iob. c. 35.

pandens alas intumuit, cùm ad pedum deformitatem defleat oculos, mox illas contrahit, ac mœrore languescit. Secunda expositio nostro instituto valde accommoda, est doctissimi Lyrani, qui per speciem intelligit pulchritudinem, adeo ut sensus sit; Visita speciem tuam, hoc est, considera animæ tuæ dignitatem, in qua. Deï relucet imago, tunc non ita humiliter de te judicabis, ut ad res viles indignè illam dejicias. Recole, ô homo, cujus imaginem geras, Deï nimirum, sic enim affirmant divina oracula; Faciamus hominem ad imaginem nostram. Sed dubitabit quispiam, cur in productione hominis mutatus est loquendi modus? primò enim dictum fuit, Fiat, postea dicitur, Faciamus. quid est hoc? Respondet Augustinus super Genesim, non in hoc præminet homo aliis rebus, quod Deus fecit ipsum hominem, quasi alia ipse non fecerit, cùm scriptum sit; Opera manuum tuarum sunt cœli. sed in hoc, quod ad imaginem Deï factus est homo. utitur tamen Scriptura in productione hominis speciali modo loquendi, ad ostendendum, quod alia propter hominem facta sunt, ea autem quæ principaliter intendimus, majori cum studio efficimus. Nec intelligendum est, Deum Angelis dixisse, Faciamus hominem, sed hoc dicitur ad significandam pluralitatem divinarum personarum, quarum imago expressiùs invenitur in homine. dixit ergo, Faciamus, quasi in formatione hominis Deus advocaret divinarum Personarum consilium. tantæ molis erat humanam condere gentem. Hanc hominis præstantiam non ignorabat Cicero dicens: Qui se ipsum novit, sentit se habere aliquid divinum. Huic rei de qua agimus, appositè facit exemplum, quod narrat Plinius de Rege Demetrio; is enim o-

D. Th. 1  
p. q. 91  
art. 4.

Alex. 2  
p. qu. 55.  
memb.  
2.

Lib. 2 de  
legibus.

pulentam urbem Rhodum, obsidione dum premeret, monitus à militibus, urbem capi non posse, nisi templum, in quo Protogenis inclyti pictoris erat imago, incendio immisso, corrueret, protinus obsidionem amovit, majus arbitrans incommodum, tam præclaram excellentis viri statuam comburi, quam optato victoriæ triumpho privari. si ergo Demetrius inane unius hominis simulachrum tanti faciendum judicavit, quanti, quæso, sempiternæ divinitatis Imaginem, quam animo habemus inclusam, æstimare debemus? O maximum dementiæ genus, pro umbris & figmentis solida & vera bona negligere! Pulchre hujusmodi homines insipientes canes comparantur, quem moralis Philolophus in suis apologis fingit flumen transeuntem, qui portans in ore magnum carnis frustum, mox videns subter aquam, umbram ipsius, putansque illud quod apparebat in aqua grandius esse, dimisit verum, ut apprehenderet fictum, unde contigit, ut utroque fuerit destitutus.

Refert Plutarchus in vita Periclis, Cæsarem, cum exterarum gentium legatos Romæ obambulantem cerneret, & catellos brachiis foventes, interrogasse, num mulieres apud illos liberos parent; quasi ineptiam illorum argueret, quod amorem pueris debitum, bestiis adaptarent. O quantis lachrymarum imbribus, calamitatem hanc deplorabat Vates Regius; Homo, (suspirans aiebat) cum in honore esset, non intellexit, comparatus est jumentis insipientibus, & similis factus est illis. siquidem quemadmodum bestię nihil amant, nihil quærunt, nihil volunt, nisi bona hæc sensibilia, quia aliorum bonorum capaces non sunt; sic homines, culpâ suâ, in conditionem bestiarum



ftiarum transferunt; nihil enim cogitant, nihil expetunt, nihil sapiunt, nisi terrena, quasi sine spe alterius vitæ viventes, veluti pecudes omnia bona, & malâ ex utilitate, & ex detrimento corporis metientes. & quæ, rogo, major calamitas, quàm ut homo baptizatus, qui supra Angelos sese attollere potest, in gradum bestiarum sese dejiciat? Quod expendens Gregorius dixit; Pejus est comparari, quàm nasci, quoniam naturaliter non habere rationem, tolerabile est; hominem verò ratione decoratum, irrationabili naturæ comparari, crimen est voluntatis. O quàm pulchrè Tertullianus, Video hederas, quantum velis premas, statim ad superna conari. video illas, nullo præeunte suspendi, quod malint parietibus invehi textili sylva, quàm humi teri voluntariâ injuriâ. Tu animal ad sublimia natum, humi reptare pulchrum putabis? cælum, cælum potius inspice, ad cujus spectaculum te excitavit Deus, & pro stemmate Helitropium gerens, audacter clama, Non inferiora sequar.

*Os sublime datum? Mentem quoque dirige sursum,*

*Si ad cælum natus, calica Regna pete.*

*Quid tibi cum brutis, supremi Regis Imago?*

*Terram terra colat, spiritus astra petat.*

## CAPUT XIX.

*Facilis & benignus ad Principem pateat accessus ,  
& omnes gentes magnificabunt eum.*



IVINUM oraculum ab historico Evangelico relatum vobis propono , Principes , imitandum. Stans autem Jesus jussit cæcum adduci ad se. Hinc enim faciliè intelligetis , præcipuum munus Principis esse , aures benignas auxilium implorantibus præbere , eorum lites non protrahere , jus sum unicuique reddere , populi salutem totis viribus procurare , etiam æraria exhauriendo , etiam proprias divitias , etiam sanguinem effundendo , si res expostulasset. Licet enim servi sint subditi , homines tamen sunt ; licet servi sint , humiles tamen amici sunt. Nec obstat axioma Aristotelis , Domini ad servum non est amicitia , quia sic intelligitur : non est amicitia secundum quod servus , sed secundum quod homo ; nam secundum quod servus , dissimilis est ei ; ut autem homo , similis. At si similis , benignus esse debet , juxta illud adagium , Homo homini Deus. Quod quia Principibus , ad Imperium ritè administrandum plurimum conducit , proinde non erit absonum , si ejus rei quædam singularia , nec omnibus passim obvia , proferemus exempla.

Inc. c.  
18.

Sen. ep.  
47.

Arist. li. 8  
ethic.

Xiphillinus ex  
Dione in  
Adriano  
Imper.

Cum Adriano Imperatori mulier occurrisset in via , ab eoque , ut se audiret contenderet ; primo quidem sibi esse otium negavit , ubi tamen mulier ita exclamare cœpit ; Noli ergo regnare , mox conversus libenter eam audiivit.

Nec Demetrii exemplum silentio obvolvendum ,

dum, de quo ita Plutarchus. Obtundente aliquando Demetrium anu in transitu, & crebrius flagitante audientiam, ait Rex, tunc temporis sibi non vacare. quæ cum exclamaret; Noli ergo Rex esse, graviter hoc dicto stimulatus, & rem tacitus considerans, statim domum rediit, omniaque postmittens, exorsus ab illa anu, per multos dies vacavit.

Plat.to.  
3 vitar.  
in De-  
metrio.

Idem prorsus de Philippo Alexandri patre scribit historicus, Anus quædam inops, ait, sæpenu-mero petiverat, ut causam disceptaret, at respondente Philippo, non vacare sibi, confestim subjecit mulier; Noli ergo regnare. Quod ille dictum admirans, non illam modò, sed & alios statim audit.

Plat.to.  
2, opusc.  
de Phil.

Quid dicam de Artaxerxe Cyri minoris fratre? hic non tantum compellantibus liberalissimè vacabat, sed & uxori suæ jubebat, ut pilentiaulæa dimoveret, quò posset ab iis, qui vellent, compellari in via.

Plat.to.  
1, opusc.  
de Ar-  
tax.

De Cn. Pompejo, Romanæ eloquentiæ parens ita scribit, Adeo facilis aditus ad eum, ita liberæ querimoniæ de aliorum injuriis esse dicuntur, ut is, qui dignitate Principibus excellit, facilitate par infimis esse videatur.

Cicer.o.  
rat.pro-  
l.Man-  
lia.

Sed quid? Nonne de Octavio Augusto scribit Suetonius, quod promiscuis salutationibus admittebat & plebem? quin tantâ comitate adeuntium desideria excipiebat, ut quendam joco corripuerit, quòd sic sibi libellum porrigere dubitaret, quasi elephanto stipem. hoc est, non sine metu. molestum autem erat ei, timeri.

Sueton.  
in Oct.  
Aug.c.3.

Quis pro dignitate celebrabit Vespasianum Imperatorem, summis laudibus ad sidera usque extollendum? Hunc enim etiam è morbo decum-

bentem, legatos admisisse, & audisse accepimus, ut ostenderet, Principes, omni prorsus horâ paratos esse debere, subditorum necessitatibus audiendis. dicebatque familiaribus, Imperatorem stantem mori oportet. bene in hanc rem Divus Bonaventura, Subditi facilem accessum ad præfulem habeant, patienter eos audiat, benignè eîs satis faciat, studeat magis amari, quàm timeri; quia libentiùs obeditur illi, qui diligitur, quàm qui timetur.

Hoc probè noverat Rudolphus Imperator, Austriaci sanguinis decus, & ornamentum. hic cùm intelligeret, purpuratos, & aulæ regiæ primarios, ab ejus congressu, tenuiores arcere, dignam suo genere vocem edidit. Sinite homines ad me venire, neque ideo Imperator sum, ut arculâ includar. dignissima vox Imperatore Austriaco.

Nec minori laude dignus, Princeps ille piissimus, qui ut omnibus pateret, querelas auditurus, duobus hebdomadæ certis diebus in loco publico confidebat, duos secum insignes habens viros, quibus illud sæpè dictitabat, sanè memorabile, Si nobis, qui homines sumus; licet ad Deum accedere absque ullo intercessore, quomodo non etiam id licebit conservis nostris ad nos? • Ô vox Christiano Principe digna.

Quid dicam de Trajano Imperatore, præclaro pietatis exemplo? hic cùm profecturus ad bellum, jam equum conscendisset, vidua quædam occurrit suspirans, plorans, altaque voce clamans, Filius meus (Ô Rex) te regnante interfectus est. mox apprehenso pede illius, dixit: Obsecro domine, ut quia eum mihi reddere non vales, sanguinem ejus saltem vindicare digneris. Ego, ait ille, satisfaciam tibi, cum rediero; quod si non redieris, ait illa,

illa, quis mihi præstabit? Successor meus, ait Imperator, satisfaciet tibi. at illa, Quomodo hoc sciam? quod etsi facturus est; quid tibi proderit, si alius benefecerit? Successor tuus injuriam patientibus, vel passuris, pro se tenebitur, te non liberabit justitia aliena. nonne melius tibi est, ut tu justitiam mihi facias, & pro hoc mercedem tuam recipias, quàm alteri hanc transmittas? Tunc Trajanus ratione pariter pietateque commotus, equo descendit, & causam viduæ diligenter examinans, condignâ satisfactione viduam consolatus est. O Principem perpetuis encomiis celebrandum! de quo Plinius ita scribit, Nulla in audiendo difficultas, nulla in respondendo mora, audiuntur statim, admittuntur statim.

Quid? de hoc etiam Principe, refert Eutropius, quod culpantibus amicis, quia nimis circa omnes communis esset, & facilis, benignè respondit, Talem se velle esse Imperatorem privatis, qualem Imperatorem privatus optasset. Hinc meritò acclamatum est, Bonitas Trajani.

His artibus Absalon Princeps furabatur corda hominum, ait enim sacer textus, Omnem virum, qui habebat negotium, ut veniret ad Regis judicium, vocabat Absalon ad se, & familiariter alloquebatur dicens: Videntur mihi sermones tui boni & justi, sed non est qui te audiat constitutus à Rege, dicebatque, Quis me constituat judicem super terram, ut ad me veniant omnes, qui habent negotium, & justè judicem? sed & cum accederet ad eum homo, ut salutaret illum, extendebat manum suam, & apprehendens, osculabatur eum, faciebatque hoc omni Israël venienti ad judicium, ut audiretur à Rege, & sollicitabat corda virorum. Benevolentia enim populorum (dicebat Rex

Eutrop.  
rerum  
Rom.  
lib. 8.

Lib. 2.  
Reg.  
c. 15.

Rex Antigonus) est optimum Regni fundamentum, & unicum rerum gerendarum præsidium.

Luc. c. 5. Regum Monarcha, de quo Apostoli acclamabant, Turbæ te comprimunt. Quo ex loco apertè colligitur, Deï filium non habuisse janitores, qui accedentes ad eum impedirent, contra plurimos Principes, qui inaccessibiles se reddunt; perinde ac si essent res, quæ non solum usu, sed & visu consumerentur. Servandus tamen omnino est modus à lege præscriptus, quæ sic præcipit, Observandum est jus reddenti, ut in adeundo quidem facilem se præbeat, ita tamen ut non patiatur se contemni.

l. obser.  
dig. de  
offic.  
præsid.

*Aures sponte tuas miseris poscentibus offer,  
Omnibus esto pius, omnibus offer opem.  
Sic populis charus, sic Regni firma potestas,  
Sic tibi summa quies, sama perennis erit.  
Templa patent cunctis, omnes ut Numen adorent.  
Regia si pateat, Numinis instar eris.*

## C A P U T XX.

*Importunos delatores non facile audiat Princeps,  
nec admittat, & erit in pace Regnum ejus.*

Plato li.  
de Re-  
pub.



ELATORIBUS non facilem aditum præbeat Princeps. sic præscribit divinus Plato, & quidem pulchre. Intelligebat, nimirum vir sapiens, nimiam delationum facilitate, ingentem campum calumniis aperiri, calumniis autem innocentiam exterminari, ac demum omnia confundi, ac perturbari. rogatus Apollonius à Rege Babylo-  
niæ,

niæ, quâ ratione quietus in suo principatu perduraret? Si, inquit, paucis fidem adhibueris: nulla enim major Regibus perniciēs impendet, quam cum delatoribus facilem ad se aditum præbent. Non tamen accusationes omnino rejiciendæ, nec omnibus abroganda fides. utrumque enim, ut ait Seneca, in vitio est, & omnibus credere, & nulli. sed magna est adhibenda cautio, ne aures Principis seducantur. Hic est enim nervus Imperii, non temere credere, quoniam pro rectè administrando Regno omnibus fidem præstare, fatuitatis est; nulli, pertinaciæ; bene autem consulenti ambas aures aperire, summa prudentia est. Cæterum, quia frons, oculi, vultus persæpe mentiuntur, & oratio sæpissime; nec facile est, infidias artificiosè compositas primo congressu judicare; proinde summo studio invigilandum. siquidem, quot homines experimur, verba melles dulciora proferentes, qui tamen incautos miserè decipiunt? Annales Taciti evolvamur, & Sejanum scelestissimum hominum reperiemus, pro optimo, fidelissimoque habitum à Tiberio, de quo sic historicus; Et quamquam exitiosa suaderet, ut non fui anxius, cum fide audiebatur. Vetus erat adagium, Homo homini Deus. non multò post; Homo homini lupus. at nostrâ hac tempestate; Homo homini hamus. est lupus, non inficior, belua ferox, & sæva nimis, verum si te eminus aspiciat, aliquando in fugam convertitur; si cominus, spiculo transverberatur. At quis est tam lynceus, qui hamum escâ opertum dignoscat, ab illoque semper caveat? Quis, inquam, tam prudens, qui hominis infidias dulci sermone obvolutas, subterfugere sciat? Utinam tam facile esset præstare, quam est simulare bonitatem. Proinde

mo-

Corn.  
Tac. lib.  
4 annal.

Lactan.  
lib. de  
vero  
cultu  
c. 6.

monendi sunt Principes, ut cautè delatores audiant, aures omnibus præbeant, non etiam fidem, illud adagium præ oculis habentes,

*Pelle sub agnina, latitat mens sæpe lupina.*

Nam multi spe, aut odio, vanæ deferunt, & aures Principum phaleratâ oratione ita præoccupare solent, innocentes criminando, ut difficillimum sit, ex præcordiis illorum evellere, quod falsus criminator infixit. Quam aptè Regius Vates delatores impios comparat serpentibus, Acuerunt linguas suas sicut serpentes. in tribus consistit similitudo, in cibo, in morsu, in lingua. quis cibus serpentis? terra. Terram comedes. qui cibus detrahentis? proximi peccatum. sic peccatorem appellat David, nimirum, terram & pulverem; Non sic impii, non sic, sed tanquam pulvis quem projicit ventus à facie terræ. serpentes, quos mordent, veneno inficiunt, præsertim aspidēs, sic affirmante Vate Regio, Venenum aspidum insanabile. detrahentis morsus insanabilis, quia sagittæ instar penetrat, Dentes eorum arma & sagittæ. facili negotio ingreditur sagitta, sed in extrahendo illam, hoc opus, hic labor. pulchre Bernardus, Levis est sermo, quia leviter volat, sed non leviter vulnerat; leviter ingreditur, sed non leviter removetur. Proinde Sapiens dicebat; Verba bilinguis, quasi simplicia, & ipsa perveniunt usque ad interiora ventris. hinc Propheta comparabat detractores carbonibus, quia, aut comburunt, aut inficiunt; Sagittæ potentis acutæ cum carbonibus desolatoriis. Hyeronimus ex Hebræo legit, cum carbonibus juniperorum. isti adeò inficiunt, & denigrant, ut vix possit deleri nigredo,

*Quem semel horrendis maculis infamia nigrat,*

*Ad bene tergendum multa laborat aqua.*

Quinque

Prov.  
c. 8.



Quinque conditiones linguæ serpentis affert  
 Plinius; subtilis, atrii coloris, perlonga, vibrans,  
 trifulca. Lingua detrahentium, omni gladio acu-  
 tior, lingua eorum gladius acutus, & adeò subti-  
 lis, ut intimas cogitationes hominum, instar  
 Dei, audeat penetrare. O improbe, an nescis re-  
 gulam apud legistas, qui judicat in alieno territo-  
 rio, incurrit crimen læsæ majestatis, quia est vi-  
 tium usurpatæ jurisdictionis? hoc est munus pro-  
 prium Dei; solus enim Deus scrutatur corda. atrii  
 coloris. quia detractor, utpote, quia malus &  
 niger, omnes alios judicat esse malos, juxta Phi-  
 losophi oraculum, Omne quod recipitur, per mo-  
 dum recipientis recipitur. & Sapiens dicebat; Cor  
 sapientis in dextera ejus, cor fatui in sinistra. scri-  
 bunt medici, quod cor situatum est in medio pe-  
 ctoris; & inclinatur in sinistram, & hoc in omnibus;  
 quomodo igitur dicit Salomon, cor sapientis in  
 dextera, & cor fatui in sinistra? quia fatuus omnia  
 quæ videt perperam judicat, & ad sinistram par-  
 tem flectitur, perlonga est lingua serpentis, lingua  
 impii delatoris longa, quia omnes attingit, nemini  
 parcit; ideo vitium detractionis dicitur peccatum  
 sine lege. dixit Angelus ad Isaïam quondam auli-  
 cum, Peccatum tuum mundabitur. Hebræus le-  
 git, peccatum tuum sine lege. sed quomodo?  
 quia nulli parcit, nec amicis, nec inimicis, nec  
 bonis, nec malis, nec præsentibus, nec absentibus,  
 nec vivis, nec mortuis. vibrans. hoc est, ad ferien-  
 dum parata. trifulca. quia lingua delatoris iniqui,  
 tres interficit ictu uno. sed quid? non solum impius  
 delator est similis serpenti naturali, sed etiam dia-  
 bolico. quis enim fuit primus detractionis inven-  
 tor? utique diabolus. Scit Deus, dicebat, quia  
 in quacumque hora comederitis aperientur oculi  
 vestri.

Rom.  
c. 8.Eccl. c.  
10.

Isa. c. 6.

Gen. c. 1.

- vestri. hinc in oraculis divinis hoc vitium dicitur  
 1 Tim. diabolicum. Paulus namque enumerans conditio-  
 c. 3. nes sanctarum mulierum, dixit; Non detrahentes.  
 Psal. 40. lectio Græca habet; Non diabolicas. sic David;  
 Verbum iniquum constituerunt adversum me.  
 Hieronymus exponit, verbum diaboli. Quid igitur,  
 o Princeps? non libenter audias, sed sepi aures  
 tuas spinis, sic particeps peccati non eris. ita  
 Psal. 14. volebat innuere David; Domine quis habitabit  
 in tabernaculo tuo? qui loquitur veritatem, &  
 qui opprobrium non accepit adversus proximum  
 suum. D. Hieronymus ex Hebræo vertit; Et opprobrium  
 non sustinuit adversus proximos suos.  
 Prov. c. 25. Dubitat Bernardus, uter magis delinquit? qui loquitur,  
 an qui audit? nodum solvit dicens: Qui  
 murmurat habet diabolum in lingua; qui autem  
 libenter audit, habet diabolum in aure, quia si vultum  
 subtristem, imò iratum exponeret, statim  
 Prov. c. 4. vox detractoris faucibus hærebit. Ventus aquilo,  
 dicebat Sapiens, dissipat pluvias; & facies tristis  
 linguam detrahentem. audi consilium Salomonis  
 Regis sapientissimi; Remove à te os pravum, &  
 detrahentia labia sint procul à te. propterea prudenter  
 admonebat divus Augustinus,

*Quisquis amat dictis absentum rodere vitam,*

*Hanc mensam vetitam noverit esse sibi.*

Nec valet, cognitâ causâ, facti aliquando pænitere, tum quia res nunquam in integrum redit, tum etiam quia in viro sapiente nihil turpius, quàm dicere, Non putaram. Cum itaque delator sese offert, vires tuas collige (o Princeps) insidiosum aliquid suspicare, alteram aurem absenti claude. ita consueverat Alexander Magnus, qui in audiendis causis, quamdiu diceret accusator, aurem alteram manu occludebat, quæ reo illibata

bata servaretur, alteram tantum porrigebat accusatori. Huc pulchre facit, quod scribit Amianus, de quodam Cephido accusatore acerrimo, qui apud Julianum, Imperatorem accusabat Numerium furti. Cum autem objecta diluerentur; Amian. Marcell. lib. 18. tunc accusator irâ percitus, exclamavit, Et quis nocens poterit esse unquam, si negare sufficiet? Tunc Julianus, Et quis innocens esse poterit, si accusare sufficiet? Exemplum supremi Principis ante oculos tibi constitue, ille enim non contentus clamore, qui usque ad astra pervenerat, descendit, ut videret. sic divina narrat historia, Descendam, & videbo, utrum clamorem, qui venit ad me, opere compleverint. ignorabatne Deus, omnia perlustrans, istorum scelera, ut videre opus foret? non ita quidem, sed eo factum fuit, ut Principibus daretur exemplum, ne in iudicando præcipites ruant, sed audita relatâque exactè discutiant. siquidem in primo statim congressu patulas aures calumniantibus aperire, non solum est indignum viro, sed etiam à iustitia valde alienum. Quoniam nimia credulitas Principis, sæpe est calamitas innocentis.

*Omnibus haud credas, sed tantum vera loquenti,*

*Sæpius innocuo lingua dolosa nocet.*

*Regia ( crede mihi ) res est, non credere cunctis,*

*Rara fides hominum, semper in ore dolus.*

## CAPUT XXI.

*Adulatores tanquam Regni corruptores, abhorreat Princeps. Et erit nomen ejus gloriosum.*



**P**RINCIPUM Regiis quàm perniciosi sint adulatores, satis facile colligi potest ex Tigra-  
ne Ponti Rege, qui in primordio sui principatus, erga omnes mitis, ac placidus fuit; sed brevi temporis intervallo, vanis & variis adulationibus illectus, non acerbus modò & durus, verùm crudelis, & penitus intolerabilis evasit; adeò ut, illius mores Græci omnes execrarentur, nec eum ullo pacto ferre possent. Quin eò superbiæ, & amentię devenit, ut graviter contra L. Lucillum indignatus sit, quòd eum Regem tantum, non autem Regem Regum per epistolam salutasset. Cur autem miser iste Princeps, ad tantam ruit dementiam? quia aures nimium faciles præbuit adulatoribus, à quibus ficta pro veris plerumque audiuntur. Quid Domitianum Imperatorem ad tantam stultitiam perduxit, ut fastu plenus, divinum sibi honorem fieri imperaverit? Quid Maximinum impulit, ut Romanis Senatoribus suos pedes osculandos præberet? Quid Demetrium fascinavit, ut divinum honorem affectans, legatos Atheniensium, biennium apud se detinuerit? Cur Rex Chaldæorum; ad tantam ruit insaniam, ut in aurea statua effigiem suam populo præberet adorandam? omnes, omnes ex fœdo adulationis fonte potarunt. In initio Imperii sui clementissimus fuit Domitius Nero, de ipso enim refert Seneca, quod cum appre-

apprehendisset calamum, ut quosdam damnaret delinquentes, jam morti addictos, cum lachrymis exclamavit: Utinam litteras nescirem! vox Principe digna. At quomodo ad tanta facinora devenit, horrendum sævitiae portentum? vide annales Taciti, & intelliges, quanta incommoda afferat Principibus fœdissima adulatio. dicat, dicat Xerxes in quot mala inciderit nimiam adulatione corruptus. Hic vanam elatione tumens, bellum Græciæ indixit; tunc hominem jam furentem variis adulationibus familiares impellunt, alius enim dicebat, Græcos ad primam adventus famam terga versuros. alius, tantam mole militum non solum vinci Græciam, sed obrui posse. alius, vix rerum naturam sufficere. sed quid? tandem superatus Xerxes, intellexit quam sit perniciofa Principibus pestifera adulatio. Hanc fœvissimam pestem abominabatur Julius Cæsar, quod multis declaratur argumentis, & inprimis, cum ex Alba Romam rediret, dum complures obvii eum sublatiis vocibus regem salutarent, indignatus ille exclamavit, Non se Regem, sed Cæsarem vocari; quin cum honores humanis majores, ex Senatus consulto ei deferrentur, id iniquo animo tulit, dixitque, Referte reliquis Senatoribus, minuendos potius esse honores, qui mortalibus exhibentur, quam augendos. Cum etiam aliquando lupoæalia spectaret, Consul Antonius lauream coronam Cæsari imponere voluit; at ille mox eam rejecit. sed cum rursus afferret, jussit in Capitolium eam deferri, ut ostenderet Jovem Regem, non Cæsarem coronandum esse.

Sen.lib.  
6 de be-  
nef.

Quid de Tiberio Imperatore? nonne adulationes abhorruit? Cum enim à quodam, Dominus

Sueton.  
in vita  
Tib. cap.  
27.

Diodor.  
lib. 57.  
histor.  
Rom.  
Tac. li. 1.  
annal.

appellaretur, tanquam injuriâ affectus ægre ferens; Nolo, inquit, honorem, qui humanitatis fastigium transcendat, at Dominum vocari, soli Deo convenit. & statim, publico decreto vetuit, ne quis eum dominum appellaret. neque (ut scribit Diodorus) ullum templum sibi proprium extrui passus est. Et tandem nomen patris patriæ à Senatu sibi oblatum, totis viribus, ut tradit Tacitus, recusavit.

Hoc etiam titulo laudandus Carolus Quintus Imperator invictissimus. hic enim dum esset in tentoriis, audiens nuntium barbarum, Regem suum vocitantem, Dominum dominorum, justo furore excandescens, dixit: Turpiter mentiris impie, quoniam hoc nomen solius Dei proprium est. sic attestante Romanâ Ecclesiâ, Quoniam tu solus Sanctus, tu solus Dominus. siquidem omnes monarchæ, Dei comparatione, non Domini, sed vicedomini appellandi sunt. Hinc enodatur quæsitum illud non contemnendum, quare in officio divino lectiones dicturi, petunt benedictionem, dicentes: Jube domne benedicere, per syncopam; non, jube domine? quia solus Deus est absolute Dominus, cui merito decantandum Davidicum illud elogium, Domini est terra, & plenitudo ejus, orbis terrarum, & qui habitant in eo. proinde illi soli debetur pleno jure nomen Domini non syncopatum; reliqui verò Principes, non domini, sed diminuti domini, appellari debent. ut sapienter decrevit Imperator Tiberius, pro vitanda & vetanda adulationis nota.

Dignus obelisco Pascenius, quia adulatores, indecoros, & inglorios, tanquam propriæ vitæ infidiatores, ex aula eliminavit. Cùm enim quidam Imperatori, recens constituto, panegyricum reci-  
tare

tare vellet, adulatoria verba ægre ferens dixit: Scribe laudes Marii, Annibalis, vel alterius ducis optimè functi, & narra, quid ille fecerit, ut nos imitemur: nam laudare viventes, irrisio est, Principes præcipuè, à quibus speratur.

Nec silentio involvendus Alexander semper magnus, cum enim Onosicrates laudes Alexandri Regis conscripssisset, sed adulationis & falsitatis plenas, Alexandroque præsentaret, tunc, ait Alexander; O quàm cuperem Onosicrates, cum defunctus essem, ad modicum tempus reviviscere, ut cognoscerem quo animo, posterì scripta hæc lecturi essent; minimè mireris, si nunc illa laudant, nimirum, quia hac quasi quâdam inescatione, unusquisque benevolentiam expiscaturum se sperat.

Sirabo  
lib. 5.

Isocrates vir sapientiâ & eloquentiâ insignis, nullam pestem esse dicebat magis perniciosam Principibus, adlatore. Corruptit enim ingenuos mores, cum semper mentiatur, & vitia pro virtutibus extollat. Proinde Carneades dicere solebat, Principum filios nihil rectè discere præterquam equitare, quod his omnes adulentur, solus equus non curans, Regem gerat an privatum, tergo excutit quemlibet, qui equitandi fuerit imperitus. Hinc est quod haud facillè Principes aberratis recedunt, quod nemo audeat illos corrumpere, nedum leniter admonere. Quin vix audent ipsi confessarii nudam aperire veritatem. Quod quidem turpe, & inglorium, imò gravi supplicio dignum. Et huc appositè facit exemplum memorabile cujusdam potentis. quod utinam mortaliū cordibus infigatur. Hic igitur mortì proximus, accersito notario, qui voluntatis suæ dispositionem scriberet, inter cætera dixit; Corpus meum terræ detur, ex qua sumptum fuit,

anima verò dæmonibus tradatur, quia eorum est. Stupentibus omnibus præ horrore, & scribere recusantibus, rabie plenus repetiit. anima mea dæmonibus debetur, insuper anima uxoris meæ, & animæ filiorum meorum, & anima Confessarii mei. mea quidem, quia aliena rapui & retinui. anima uxoris, quia ad id me invitavit; filiorum, quia ut eos locupletarem, aliena furripui; anima Confessoris, quia debitè non me absolvit, nec unquam corripuit. Et hæc loquens animam exhalavit. Ecce multorum potentium damnatio, quia ipsorum

Sen. de  
benef. li.  
6. c. 30.

Carneades dicebat: Vis scire, cujus rei inopiâ laborant magna fastigia? & quid omnia possidentibus, desit? ille, qui verum dicat. imò pro quodam miraculo habetur, quod Principes relipsant. ita innuere videtur divinum illud oraculum.

Matth. c.  
2.

Ecce Magi ab oriente veniunt. hoc enim adverbium admirandi vix unquam in sacris litteris usurpatur, quin novi semper aliquid portendat. Cùm ergo dicitur, Ecce Magi. prodigia, paradoxa, res novas, & planè admirandas insinuat. Est enim quasi prodigium, principantes ad cœlestia converti, cùm non habeant, qui eos ad viam salutis alliciant. habent quidem adstantem applaudentium turbam, qui illos nimium bellè

Tac. li. 1.

sibi placentes, pertrahunt in præceps. Asperum quidem primo intuitu bonus Consiliarius tibi aliquando propinat, sed cùm divinæ legi consentaneum sit, non debes respuere, sed eorum exempla tibi proponere debes, qui cum speciosiora suadentibus accessissent, dulci adulationis veneno epoto periere, pereuntque in dies funditus. Davidis optimi Principis consilium sequere, ô Princeps, qui malebat à viro iusto corripì, quàm ab impro-



improbis unguento simulatæ adulationis deliniri. Verè laudandus Philippus Macedonum Rex, qui cùm quorundam captivorum spectator esset, vesteque supra genua collectâ sedebat, unus captivorum rogavit, ut eum liberare vellet, qui amici ejus fuerat filius. petiit Philippus, ut nomen exprimeret; cui cùm captivus ipsi soli se id dicturum respondisset, vicinior factus hoc unum dixit, Vestem, ô Rex, quam supra genua collegisti, demitte, neque enim ita sedendo, decorem Regium servas; quo verbo audito, Philippus statim vestem demisit, & ut amicæ admonitioni gratus esset, captivum statim, ut amicum liberavit. en bonus Princeps veritatem non abhorruit, sed libenter audivit. Nec erit abs re, illos Sirenibus comparare, siquidem hæc monstra marina faciem habent muliebrem, & suaviter concinunt, sed nautas auscultantes in somnum inducunt, sopitosque in mare demergunt. Quod intelligens Ulysses, suas, ac sociorum aures, cerâ obturavit, nè incauti illos Sirenum cantûs exaudirent, & ipse navis malo adstrictus, incolumis periculum evasit. ita planè, qui aures adulatoribus aperiunt, in vitiis suis consopiantur, & sopiti in mare iniquitatis demerguntur. Princeps igitur, & gloriæ, & salutis memor, mortiferos blandientium applausûs, Ulyssis instar, furdâ debet aure pertransire, frequenter inclamando, Procùl procùl abite profani.

Ingens hoc periculum intelligebant Athenienses suarum legum observantissimi, proinde adultores tanquam acerbissimos reipublicæ hostes, capitali afficiebant supplicio. Legimus enim Timagoram fœdum Darii adulatorem, ab illis publicâ morte mulctatum, ne unius civis mollissimis blanditiis, tota civitas inficeretur.

Quapropter præclare docuit Diogenes ille Cynicus, periculosius esse incidere in adultores, quàm in corvos; isti enim cadaveribus insidiantur, illi autem homini, etiam superstiti, oculos misere effodiunt. Siquidem veritatem, humanæ vitæ oculum, à cordibus Principum tollere nituntur, quibus, instar meretricum, præter iudicium, & mentem, omnia precantur. nec desideriiis fraudantur, quia Princeps falsâ applaudentium laude delinitus, usque eò insanit, ut præ se omnes despiciat, arbitreturque, se solum egregiè loqui in hominum cœtu, cum vix tria verba connectere sciat, seque solum pugnare, & vincere, cum in pace sit Leo, in prælio Cervus. En miserranda perniciēs, ex pessimis adulatoribus emergens, qui homines extra se rapiunt, populisque ludibrio exhibent. De quibus appositè Evangelicus propheta. Væ qui dicitis bonum malum, & malum bonum, *Isa. c. 5.* lucem tenebras, & tenebras lucem; qui ex eodem ore calidum, & frigidum efflant: ut ait adagium, natum ex apologo quodam satis noto, sed quia ad rem præsentem facit, non erit absolum recensere.

Satyrus quidam cum vehementer algeret, hiberno tempore supra modum sæviente, à rustico quodam inductus est in hospitium, admiratus autem, cur homo inflaret in manus ori admotas, rogavit, cur ita faceret? respondit ille, ut frigidās manūs halitūs tepore calefaciam; deinde ubi extructo foco, appositā mensā, in pultem fervidam rursus inflaret, magis etiam admiratus, denuo postulavit, Quid hoc sibi vellet? ut pultem, inquit, nimium ferventem, halitu refrigerem. Tum Satyrus surgens à mensa, quid ego audio, inquit? tunc eodem ex ore, pariter calidum & frigidum

Pythag.  
apud  
Stobæ-  
um.

frigidum efflas? Valebis. neque enim mihi ratio est, cum ejusmodi homine, commune habere hospitium. Quis compos mentis non videt, hunc apologum adulatoribus satis aptè accommodari? isti enim bilingues & mendaces, virum strenuum omnilaude dignum, ad ima usque deprimunt, & hominem omnino ignavum, extollunt ad sidera. Ecquid turpius unquam dici potest, quàm hominem vitiorum mancipium, virtutum exemplar nominari? hominem ignavum, natum consumere fruges, parentis patriæ nomine cohonestari? Deum immortalem, quis seipsum adeò ignorat, ut cum artis bellicæ sit omnino ignarus, æquo animo illos audire queat, qui strenuum, ac fortissimum Ducem prædicent, admirentur, ac aliis cunctis præferant? Quonam pacto perpeti potest quispiam, se Achillem vocitari, cum vilis Therites, & telluris inutile pondus, ab omnibus passim existimetur, & revera existat? Non possunt viri graves, ficta, ac simulata de se dici animadvertentes, non iniquo animo ferre. Proinde Iſocrates Regem suum monebat, ut omnes illos evitaret, qui laudant quæcunque fecerit; illis autem obtemperaret, qui non fortunam, sed personam metientes, ejus errata placidè, ac sine contumelia ante oculos ponunt: quippe, quod illi, dignitati Principis consulant, isti autem mendacii præmium expectantes, interim gloriam Principis labefactant. Hinc Regni præcipitia, quia Principes hac nostrâ tempestate, libentiùs aures accommodant blandis adulantium lenociniis, quàm sanis Philosophorum consiliis, quod Demosthenes orator insignis, apologo de aselli umbra satis eleganter ostendit. Plurima, ac propè innumera possem afferre exempla, ex quibus facile esset conjici,

Nicol.  
Sand. de  
chism.  
Anglico.

quàm sit pernicioſa aulis Principum adulatorum peſtis, qui veluti ſcorpiones, brachiis ad ample- xandum extenſis, amorem præ ſe ferunt, ſed caudâ pungunt, & venena effundentes, inficiunt. Unum tantum, inſigne tamen, in medium proferam, quod vix ſine magna animi indignatione, nec legi, nec audiri poterit. De quodam Briano, ga- neone turpiſſimo; ſcribit Sanderus, quod eò im- pudentiâ corruit, ut Henrico Octavo Angliæ Re- gi percunctanti, quàm grave crimen eſſet, ha- bere rem cum matre primùm, deinde cum filia? reſpondere auſus fuerit, tam grave, quàm galli- nam cum pullo ſuo comedere. ô vocem non homine, ſed diabolo dignam! Fuit tamen cum riſu ab homine perſito lætanter excepta. En proprium adulatorum munus, ingenio Principum, ac moribus conformari. Quocirca non abs re Echo comparantur, prolatas voces repe- tenti, quoniam ſi Principes aliquid aſſerunt, an- nuunt & ipſi; ſi negant illi, renuunt & ipſi; ajunt, ajo; negant, nego. Sunt etiam umbræ ſimiles, nam illa te ſedente, ſedet; erigitur, te erigente. hoc tamen ſit ſolùm, præſente Sole; quod ſi ipſe deficiat, evaneſcit & ipſa. ita prorſus adulatores rident, obſequuntur, applaudunt, dum torcu- laria vino redundant, & dum horrea frumento abundant; cùm verò intelligunt, te ad inopiam redactum, tunc negligunt, deſerunt, & turpiter explodunt. Si Regia abundat, ad laudes & præ- conia; ſi laborat inopiâ, ad impropria & con- temtum. quibus valde appoſitè poſſet accom- modari tetraſtichon illud, quod primò continet laudes, & ſalutem precatur; ſed ſi legitur ordine retrogrado, plurima mala exoptat. En earmina miro artificio elaborata.

*Laus tua, non tua fraus, virtus, non copia rerum*

*Scandere te fecit hoc decus eximium.*

En laudes. invertamus ordinē. & ecce impropria,

*Eximium decus hoc fecit te scandere rerum*

*Copia, non virtus; fraus tua, non tua laus.*

Iterum

*Conditio tua sit stabilis nec tempore parvo*

*Vivere te faciat hic Deus omnipotens.*

En laudes, en elogia, en bene valere: sed legamus ordine præposito,

*Omnipotens Deus hic faciat te vivere parvo*

*Tempore, nec stabilis sit tua conditio.*

En mala imprecatio: eleganter dicebat os aureum; Sicut finis oratoris est, dictione persuasisse, & medici, medicinâ curasse, sic adulatoris finis est, suaviloquio decesse.

O quam pulchre, qui adulatores locustis similes dixerunt. hujusmodi enim animalia per vineas discurrunt, agros perambulant. sed quando? verno tantum tempore, quando est odor agri pleni: at tempore brumali, quando folia decidunt, frondes arescunt, & fructibus agri spoliantur, mox & ipsa recedunt. hoc est proprium adulatoris ingenium, divitum aures lenociniis mulcere, quando torcularia redundant; at si opes deficiunt, statim terga vertere, imò dentibus & moribus turpiter impetere. sicut accidit Aetæoni, ut Poëtæ fingunt, hic enim à canibus, quos alebat, fuit devoratus; sic Princeps consumtis opibus ab adulatoribus derelinquitur; imò sæpe duris moribus dilaniatur. Est enim quotidiano experimento probatum, quod qui adulatoribus aures accommodant, brevi ad extremam adiguntur pauperiem. Quippe tam frequenter hauriunt, ut omnino exhauriant.

Nec erit absolum Chamæleonti comparare, hoc Plin. lib.  
8, c. 33.  
namque

namque animal, ut scribit Plinius, omnibus vestitur coloribus, albo excepto: ita prorsus adulatores, vitia Principum laudantes, omnibus induuntur mendaciorum coloribus, nunquam tamen veritatis candore. Egregiè doctor ille Gallus, adulatorum mores expressit, inquiens; Adulator, amicus in obsequio, sed hostis in animo; comtus in verbo, sed turpis in facto; lætus ad prospera, fragilis ad adverſa; facilis ad humana, difficilis ad honesta, & semper mendax. O quàm feliciter omnia caderent Principi, si adulatoribus ab aula eliminatis, viros admitterent integritate ornatos. siquidem ob talium societatem domus regia plurima evitat infortunia. hoc autem liquido constat ex oraculo Genesis capite octavo; Non delebo, ait Dominus, propter decem justos, si ibi inventi fuerint, Pentapolim. at vix boni à malis separantur, statim Deus sævit in impios; nam simulatque Loth à Sodomis eductus, flammâ gentem pessimam devoravit. vix Israëlita ab Ægyptiis separantur, illico Ægyptii in mari rubro submersi sunt. simulatque Noë ab impiis sejunctus, & in arca inclusus, diluvium perdidit omnes. hoc probè novit Themistocles Atheniensium dux, volens enim domum venditioni tradere, jussit præconi ut diceret, Est vicina homini bono. tantæ molis est bonorum societas. Divus Ambrosius dubitat, quid est quod navigantibus Apostolis, motus magnus factus est in mari? credit Ambrosius hanc tempestatem excitatam, quia ibi erat Judas proditor. ex quo colligere possumus ingentes calamitates illi domui impendere, in qua impius commoratur. nam si ob unius Jonæ inobedientiam, mare ita concitatum est, ut navim in extremum naufragii discrimen conjecerit, quid expectandum, quando

do plures omnibus flagitiis contaminati, ad iracundiam provocant cælum? Perinde Rex David in familia instituenda cautionem magnam adhibebat, Oculi mei ad fideles terræ, ut sedeant mecum; ambulans in via immaculata hic mihi ministrabit; non habitabit in mediò domûs meæ, qui facit superbiam; qui loquitur iniqua, non direxit in conspectu oculorum meorum. dicunt naturales, super Laurum radium cœli non cadere: vis fulgura & calamitates à domo tua repellere? in ea justum inferre, & omnia feliciter ex votis.

Utinam Principes, Sigismundum Imperatorem sibi proponerent imitandum. hic enim hoc genus hominum, Regiis infensum, tanquam Reipublicæ pestem, cane pejor & angue insectabatur. Hinc memorandum illud & dictum & factum summis laudibus celebratur. Cùm eum quidam adulator, fucatis verbis demulcere tentaret, iratus, colapho percussit, cui dicenti: Cur me cædis? protinus respondit; Et tu, cur me mordes? ô vocem Imperatore dignam! Hisce enim verbis insinuavit Princeps, adulationem esse quendam rabidum morsum, quoniam sub exteriori verborum suavitate, canini latent dentes, ut ait Propheta: Denteseorum arma & sagittæ, lingua eorum gladius acutus. Proinde malebat à viro justo corripì, quàm à simulatore demulceri, Corripiet me justus in misericordia, & increpabit me; oleum autem peccatoris non impinguet caput meum. Quid autem per oleum peccatoris intelligebat? adulationem, nimirum, quæ blanda est, & corda stultorum hominum demulcet.

Notatu tamen dignum est, quod ubi in vulgata lectione legimus; Oleum peccatoris, in Hebræo legitur; Oleum veneni, vel, ut Hieronymus vertit; oleum

oleum amaritudinis. Verùm, quomodo adulatio, quæ quasi blandum oleum corda audientium penetrat, oleum amaritudinis appellatur? optimo quidem jure. Nam comprehendit utrumque adulatio, dulcis est, & amara. dulcis, quia delectat; amara, quia cor decipit, & judicium rationis pervertit.

*Turpis adulator semper longè exulet aula,  
Ni velis Imperii perdere sceptrà tui.  
Vincit adulator blando sermone Sirenes,  
Aures si claudis, instar Vlyssis eris.*

## CAPUT XXII.

*Amicos spectata fidei, in adversa fortuna probatos, non negligat Princeps; sed amore, & beneficiis foveat. Et tutam Regni custodiam inveniet.*



Petr. Re-  
buffus  
lib. de  
privile-  
giis.

Ugo de  
sancto  
Victore.  
Canon.  
Reg.

CITE admodum, ac perbelle fidelis amici figuram describere antiqui sapientes. Pingebant insignis formæ adolescentem, capite nudatum, hirsutâ veste indutum, in cujus fimbria scriptum erat, Vita & mors. In fronte hiems, & æstas. habebat latus usque ad cor apertum, ubi hæc aurea verba legébantur, Propè & longè. Hæc autem omnia, insignia quædam documenta præmonstrabant. Quid ætas viridis, & rosea, quando flavescent crines, caro nitescit eburnea, oculorum gemmis, facies rosea decoratur, viget ratio, visus acutior, auditus promptior, incessus rectior, vultus jucundior? quid, inquam, hæc florida ætas adumbrat? quod vera



vera amicitia virescit semper, tempore senescit nullo. Quid villosa vestis? quod fidelis amicus, debet esse paratus ad toleranda quælibet ardua pro amico. detectum caput, indicat amicum nunquam esse negandum. quod egregiè insigni eventu testatus est Mithridates Rex Ponti. hic enim pro uno Leonico amico, à Rhodiis in pugna navali capto, omnes hostes captivos, qui plurimi erant numero, permutavit. tanti faciebat amicitiae vinculum. latus apertum quid? innuit amicum esse diligendum, non ore tantum, sed corde, & opere: ut verè possit decantari elogium illud academicum, Idem ambo. Olim apud antiquos in academiis Atheniensium pingi solebat Cupido, inter Mercurium & Herculem, quorum alter pulchri eloquii Deus, alter verò virium & roboris. Quorsum hoc? hoc monimento testabantur, veri amoris munus, non in verbis, sed in factis agere radices. Hinc dilectus hortabatur, Non diligamus verbo, neque linguâ, sed opere & veritate. Quoniam, ut ait Gregorius, probatio dilectionis, exhibitio est operis. Sicut ignis in nube inclusus quiescere non potest, sed huc illucque agitur, donec cum tonitruo foras erumpat; ita si amoris ignis in corde amici includatur, in opera externa progreditur: amor enim si operari renuit, amor non est, sed instar ignis picti in tabella, qui non calefacit; & instar leonis marmorei, qui neque rugit, neque sævit. Egregius testis Anaxagoras. hic enim cum jacéret in rerum angustiis, illum Pericles Dux potentissimus, toto cordis affectu monebat, ne se perderet, sed amicis servaret. cui statim ille respondit, Qui lucernâ indiget, oleum instillat. carpens illos, qui nihil prorsus effundunt præter bona verba. Hinc cele-

celebratur Theophrasti philosophi apophthegma. hic enim cùm videret duos incedentes simul, quorum alter divitiis amplissimis abundabat, alter verò pauperiem extremam patiebatur, interrogavit discipulos, quinam essent? respondentibus autem, duos esse amicitiae vinculis conjunctissimos, statim dixit Philosophus, Quomodo ergo alter illorum dives, alter verò pauper? amicus non est, qui fortunæ particeps non est. quia amicorum omnia sunt communia.

Paul.  
Man.  
apophth.  
lib. 6.

Aristot.  
apud  
Diog.  
lib. 5.

Quapropter optimo jure laudatur Alexander Magnus, dum enim unâ die regalibus indutus vestibus, cum intimo amico suo sederet, qui & ipse erat eodem ornatu, quo Rex, corpore etiam major, ecce Syngambriis Darii mater, Persarum Regina, accessit ad Regem, ut ipsum adoraret, sed ex errore Hephestionem Regi assidentem, pro Alexandro salutavit. cùm autem ex nutibus adstantium, intellexisset errorem suum, perturbata, denuo salutavit Alexandrum. Tunc Alexander, Nihil est, ô mater, quod turberis. nam & hic Alexander est, quia amicus est alter ego. hinc originem duxit symbolum illud Pythagoricum, Amicitia, æqualitas. Amicus alter ipse. & Aristoteles dicebat; amicus est anima una in duobus corporibus. hinc fit, ut amicus subveniens amico egenti, non dare videatur, sed reddere, quod debet; si non succurit, quando res, tempusque postulat, videtur retinere, quod alienum est, stante oraculo Pythagorico; Amicorum omnia communia. Amicitia enim est amor mutuus, quare, nisi uterque amet, neuter est amicus, nisi æquivocè, nomine tenus.

In fronte verò hæc duo verba inscripta erant. Hiems, & æstas. quia verus amicus tam in prosperis,

ris,

ris, quàm in adversis, leges amicitiae, vinculo in-  
violabili conservat. Quid? imò magis in adversis,  
nam vera fides in rebus adversis maximè specta-  
tur. In prosperis siquidem servare fidem, genus  
quoddam aucupii est. Hinc Crates Thebanus di-  
cere solebat; Veri amici, in rebus prosperis nun-  
quam adsunt, nisi accersiti: in rebus autem adver-  
si, ultro adsunt, etiam invocati. nihil enim tur-  
pius in amicitia, quàm rogari; non enim dari, sed  
rapi videtur, quod precibus extorquetur. hinc  
philosophus moralis agebat; Nil carius emitur,  
quàm quod precibus comparatur: cui doctrinae  
videntur alluisse sorores Lazari; Domine, ecce Ioann. c. 11.  
quem amas, infirmatur, siquidem amico sufficit  
nuntiare. At nostrâ hac tempestate, multos quidem  
inveniemus, qui gestant amicitiae insignia; pau-  
cissimos verò, qui veræ amicitiae fines attingant,  
adeò ut in contrariis flatibus, & fluctibus, fide-  
liter persistant.

*Tempore felici multi numerantur amici,*

*Si fortuna perit, nullus amicus erit.*

Ad hanc rem facit perbelle Salomonis Regis Eccl. c. 6.  
auctoritas, Est amicus secundum tempus, non Prov. c. 17.  
permanebit in tempore tribulationis. at omni tem-  
pore diligit, qui amicus est, & frater in angustiis  
comprobatur. Pulchre Ovidius,

*Scilicet ut fulvum spectatur in ignibus aurum,*

*Tempore sic duro est inspicienda fides.*

At plures, dicebat Pompejus, adorant Solem o-  
rientem, quàm occidentem. quorum symbolum  
apud Pythagoram est hirundo, quæ tempore veris  
in domo nidificat, tempore hyemis recedit. hinc  
ut statûs sui tenuitatem ostenderet, dicebat; Hi-  
rundinem domi non habeo.

Circa cor, erant hæc duo verba litteris aureis

Y

exa-

Arist. lib.  
7 rhetor.  
c. 10.

Liv. li.  
40. hist.  
Rom.

Propertius li. 2.

Cantic.  
cap. 8.

Cic. li. 3.  
offic.

exarata, Propè & longè. hinc deducitur, quod veri amici etiam absentes, tanquam præsentés, se mutuò diligunt. distantia enim loci non tollit amicitiam. corpora quidem, sed non corda, animosque separat. In fimbria mors, & vita. Quid hinc? qui verè diligit, usque ad mortem amat. testem invoco philosophorum principem; Nemo est amans, inquit, qui sempiternè non amat. Accedit Euripides in Troadibus, Non est amicus, quisquis amare desiit. confirmat Livius historicus insignis, dicebat enim; amicitias immortales, mortales verò inimicitias esse debere. huc appositè facit insigne illud academicum, de myrto & oliva mutuis amplexibus innodatis, quod est amicitiae symbolum; additâ notâ, Nostra vel in tumulto. ita de amico ingenuo scripsit olim Propertius.

*Terra prius falso partu deludet arantes,  
Et citius magnos Sol agitabit equos,  
Quàm possim nostros alio transferre calores,  
Hujus ero vivus, mortuus hujus ero.*

Sed quid? nonne ipse Salomon Rex sapientissimus, idem ferme scriptum reliquit? Aquæ multæ non potuerunt extinguere charitatem. Quod præclaro testimonio probant, ut innumera omittam exempla, duo illi legis amicitiae fidissimi custodes, Damon, & Phitias, mutuo amore ita se prosequentes, ut alter pro altero paratus esset mori. Contigit autem, ut alter illorum capite damnatus, custodiretur in carcere, jussu Dionysii tyranni Siciliae Regis, proditiõis suspicione commoti, qui jam diem necis destinaverat. Tunc ille miser, qui morti addictus erat, paucos sibi dies postulat, pro rebus suis componendis. mox alter hoc audito, sponte se ipsum obtulit pro obside in carceribus custodiendum, quò amicus libertate donetur, annuit

annuit Rex, hac tamen conditione, ut si ille ad diem conditum non rediret ad carcerem, pœnas ipse lueret. libenti animo conditionem accepit. Cùm autem adesset hora morti destinata, & jam obses esset proximus supplicio, unusquisque damnabat sponsores, temeritatis notâ. at is intrepidus nihil de amici fide dubitans, constanter prædicabat socium procul dubio venturum. ô factum æternâ memoriâ dignum. Eodem propè momento, quo tyrannus supplicium indixerat, ecce qui aberat, advenit, se præsentem exhibuit, ne quidquam detrimenti pateretur amicus. Quod factum considerans tyrannus, admirans eorum fidem, ingenti admiratione commotus, reum impune dimisit, obnixè rogans, ut se quoque in amicitiam tertium adscriberent. & quidem sapienter. quia nihil debet esse Principi optatum magis, quàm multorum amicorum præsidio stipari. Hac fortassis ratione permotus Alexander Magnus Achillem felicem pronunciavit, quod vivens fidum amicum, post fata verò magnum sui nominis, & famæ, nactus esset præconem. Nec est obscurum amicitiae testimonium, inter Pyladem & Orestem. Nam ignorante Rege, uter eorum esset Orestes, Pylades se Orestem esse dicebat, ut pro illo necaretur. Orestes autem, ita ut erat, Orestem se esse affirmabat. quod pulchre descripsit Ovidius,

*Ire jubet Pylades charum periturus Orestem,*

*Hic negat, inque vicem pugnat uterque mori.*

*Exstitit hoc unum, quod non convenerat illis,*

*Cetera pars concors, & sine bile fuit.*

Hæc sunt, ô Princeps, vera Regni præsidia, amici nimirum, spectatæ fidei, quos nec ferro cogere, nec auro parare queas, qui non fortunam, sed

personam diligunt. non ut ille, qui Augusto ex victoria adversus Antonium revertenti, occurrit inter alios congratulantes, corvum habens in manu, qui edoctus voces referebat humanas, hoc modo; Salve victor Cæsar Auguste. jussus deinde ut alium corvum produceret, allatus, protinus insonuit, Salve victor Antoni. iste non ad personam, sed ad fortunam respiciebat, quod turpe, & nefas est. Hinc sapiens quidam interrogatus, quos inter familiares, haberet chariores; illos, respondit; qui magis mihi, quàm meipsum metuunt, nam illi amicum, hi verò se ipsos magis amant. Siquidem plerique sub amicitiae nomine latitantes, ut Sejanus cum Tiberio, non cum Principibus, sed cum fortuna Principum loquuntur. ita dicebat Galba Pisonem filium alloquens, Ego ac tu simplicissimè inter nos hodie loquimur, cæteri libentiùs cum fortuna nostra, quàm nobiscum. Quippe aula Principum hominibus plena est, veris amicis vacua. Cum igitur Princeps invenerit amicum fidelem, multis experimentis probatum, sciat se invenisse thesaurum, sine quo Imperium non potest diu consistere, nedum augeri, & propagari.

Quod optimè noverat Rex Darius, qui aperiens malum granatum, numerosam granorum copiam ostentans, rogatus à primariis Regni, cuiusnam rei tantam vellet habere abundantiam? Zopyrorum, respondit. Erat autem Zopyrus vir probitate insignis, & in rebus gerendis versatissimus, quem in multis periculis fidelissimum frequenti experimento probavit. ô magna Principis prudentia. non victorias, non triumphos, non Regna, non thesauros ambibat, sed amicorum copiam, exclamando: Utinam tot haberem Zopyros. Proinde Romanus orator dicere solebat,  
amici-

Tac. li. 4.  
annal.

Corn.  
Tac. lib.  
1. hist.

amicitiā adeò esse mundo necessariā , ut Solis lumine potiùs , quàm eā carendum putaret. aurea ejus verba sunt hæc , Solem è mundo tollunt , qui amicitias ab hominibus tollunt. Quid enim totus orbis esset ; clarâ hac face orbatus ? Quid verò essent homines , hac præclarâ virtute destituti ? Verissimum Oratoris oraculum , sed potissimum in Principibus. Firmamentum enim Regni tollunt , qui amicos à Principe tollunt. Siquidem amicitis Ecclesi. c. 6. fidelis , protectio fortis ; qui invenit amicum , invenit thesaurum. & denique vera Regni præsidia sunt , amici probatæ fidei , qui nec loco , nec tempore , nec metu , nec morte divelli possunt.

*Muneribus cumulare novis non esset amicos*

*Princeps , & fidos semper amore colat.*

*Muneribus cumulata fides , fit major , amoris.*

*Subditus ingenti pendet amore vices.*

## CAPUT XXIII.

*In prosperis rebus non tollatur Princeps , & nunquam commovebitur Regnum ejus.*



SECUNDIS ventis , sereno cœlo , prospero , ac felici cursu navigans Princeps , cunctis ex voto succedentibus , non proinde debet extolli , cæteros parvifaciendo , mente aliquando revolvens , variam fortunæ mutationem , quæ solùm est constans in sua inconstantia , ut pulchre cecinit Poëta ,

*Passibus ambiguis fortuna volubilis errat ,*

*Et manet in nullo certa , tenaxque loco ;*

*Sed modo lata venit , vultus modo sumit acerbos ,*

*Et tantum constans in levitate sua est.*

Quocirca interrogatus Apelles, cur fortunam sedentem penicillo expressisset? Quoniam, inquit, stare nescit: lepidè admodum bifariâ verbi significatione pro sale usus, stare namque dicitur, non solum qui plantis validè nititur, sed & qui immobili firmitate consistit. Quapropter rectius fortasse cum Boëthio insigni philosopho dixisset: Fortunam sedentem pingo, quia in sua volubilitate sedet, & requiescit. Hinc veteres pictores, ut instabilitatem fortunæ notarent, eam in-pila sedentem pingebant, non deam aliquam, quæ nusquam est, significantes, sed mutationem conditionis humanæ, & varios rerum eventus. Nam idem Pompejus qui tot Regna ac nationes vicerat, principatumque in Senatu Romano tamdiu tenuerat, & a rebus gestis cognomen Magni meruerat, ad spadonum proditorumque libidinem, in Ægypto trucidatus est, & ejus caput, quod paulò antè terror gentium extiterat, hosti dono datum. Seneca egregius ille moralis fortunam appellabat vitream, quia quò magis splendet, eò faciliùs frangitur, Solis instar, qui hyeme plùs solito calidior, futuram nobis pluviâ prænunciat, sic nimia felicitas, ruinam. Quod apprime noverat Philippus Macedonum Rex, cui cùm tres eodem tempore læti nuntii afferrentur, Alexandri, nempe, filii natiuitas, equorum deinde suorum in stadio Olympio victoria, postremò urbis cujusdam expugnatio, statim humi prostratus, oculisque in cœlum sublatis, exclamavit, Fortuna moderare lætitiâ, ac tristi aliquo nuntio tantam felicitatem tempera, ne postea simul omnia in caput meum ingruant infortunia. Ita prorsus Theramenes, unus ex triginta tyrannis, hic enim cùm domûs, in qua multi accumbabant, solus ruinam evasisset, ac propterea

fortunatus



fortunatus à multis prædicaretur, magnâ voce dixisse fertur: O fortuna, cui me occasione reservas? sentiebat enim se ab ea non esse servatum, sed ad duriores casus reservatum, & quidem divinavit. nam paulò post misere trucidatus fuit. Sapienter Seneca dicebat, Nunquam ego fortunæ credidi, etiamsi videretur pacem agere, omnia illa quæ in me indulgentissimè conferebat, pecuniam, honores, gloriam, eo loco posui, unde posset ea sine metu & motu meo repetere.

Sen. lib.  
de consol.

Hinc Salomon Principem consulebat his verbis, Ne intuearis vinum quando flavescit, & cùm splenduerit in vitro color ejus, subito enim mordebit ut coluber, & ut Regulus venena diffundet, & eris tanquam dormiens. Satis appositè comparat vino felicitatem humanæ gloriæ sapientissimus Rex, quia sicut vinum sine aqua inebriat, & nocet, ita quoque prosperitas sine moderamine.

Prov.  
c. 23.

Julius Solinus scriptor illustris refert quoddam notatu dignum, nostro instituto valde appositum, nimirum, quod canes Ægyptii, magnam licet sitim patiantur, propter terræ illius ariditatem, non tamen audent ex Nilo bibere, nisi raptim, propter magnam Crocodilorum copiam ibi existentium. decurrit, instar fluvii, humana prosperitas, non tamen fidendum, quoniam latet sub melle venenum.

Ad rem optimè facit Philosophi moralis consilium, Noli huic tranquillitati confidere, momento enim, mare evertitur, & eodem die, ubi luserant navigia, forbentur. Ubi tranquilla tibi omnia videntur, ibi non desunt nocitura, sed quiescunt. semper futurum aliquid quod te offendat, existima.

Sen. li. 2.  
de ira  
c. 31.

Sapienter quidem Pierius Valerianus Fortunam  
Y 4 rotulæ

Pier.  
Val. de  
fac. Æ-  
gypt.  
notis li.  
19.

rotulæ insistentem describit, nempe, ut instabilitatis hieroglyphicum insinuaret. Hanc doctrinam sanè auream probè noverat magnus ille Thebanorum Dux Epaminondas. is enim cùm insigni quâdam partâ victoriâ, domum reversus, Senatum deinde vellet cirtiores reddere, multis undequaque affluentibus, ut tam nobilem, & tot victoriis insignem ducem viderent, eique de victoria congratularentur, ipse domo egressus est, vili quadam veste indutus, facie subtristi, & gressu quodam ad tristitiam composito, quam subitam mutationem omnibus demirantibus, & causam ejus sciscitantibus, respondit; Nimium heri mihi placui, fortunæ mutatio metuenda est. quasi illud tragicum recoleret,

*Nemo confidat nimium secundis,*

*Nemo desperet meliora lapsis.*

Et illud Boëthii oraculum decantaret, Plena est exemplorum vetustas, plena etiam præsens ætas, quot Reges felicitatem calamitate mutarint. Acutum, ac verè falsum parasiti cujusdam dictum non erit absonum proferre, utpote nostro instituto consonum. Hic cùm fessus, ac vehementer fatigatus, deambulando in regia Hispana, adhærenstapeti aulico, qui caminum tegebat, putans locum firmum, retrorsum caderet, magnus illico adstantium risus obortus est: at ille mox surgens, ac subridens, ait, Quid, ô viri, casum meum ridetis? omnibus ferme hoc ipsum contingit, qui palatio incumbunt, & mendaci fortunæ innituntur. Quocirca nullatenus fidendum, ne tibi dicatur, & jure, Confidis baculo arundineo confracto, cui cùm innixus fueris, perforabit manum tuam.

Isa. c. 6.

Huc pulchre facit Diogenis oraculum, nam cùm

cùm Alexander Magnus aliquando illum inviseret, in dolio sedentem, & consistens ante faciem ejus, obumbraret, post multa colloquia invicem habita, dixit Rex, Cogita, ô Diogenes, quid à me velis petere, nam quidquid optaveris, obtinebis; tunc respondit Philosophus, Vellem quod mihi non auferres, quod dare non potes. quod Imperator intelligens, ad aliam partem secessit, & nimia admiratione plenus, dixit: valde miror, quod solus meam non timeas potentiam. cui mox Diogenes; Potentiam tuam non timeo, ô Rex, quia, aut est præterita, aut præsens, aut futura; præteritam non timeo, quia jam non est; futuram non pertimesco, quia incerta est; præsentem non formido, quia citò transitura est. O quàm perbel-  
le comparavit ipsemet Alexander universum mundi Imperium, pilæ. hæc nam quevento turgida, nunquam quiescit, sed alternatim per manus ludentium transit; ita prorsus Imperium mundi, in quo nihil firmum, sed modò in manibus Chaldæorum, mox ex Chaldæis transit ad Persas, à Persis ad Medos, sed hic an diu permanfit? non ita quidem. sed à Medis ad Græcos, à Græcis ad Romanos. Ecce pila, quæ alternatim transit, nunquam in eodem statu permanens. Quod pulchre expressit Poëta hoc disticho,

*Ludus fortune variatur imagine Lunæ,*

*Crescit, decrescit, in eodem sistere nescit.*

Hujus rei testis est Sejanus, qui sub Tiberio Augusto potens, & ad instar ejus statuis decoratus, tandem unâ epistolâ subversus est, & caput illud toto orbe secundum, laqueo præbuit, & cadaver suum, opprobriis, lacerationi, unco, quo die Senatus illum deduxerat, populus in frustra divisit, in quem quidquid congeri poterat, dii, homines-

Sen. de  
tran-  
quillit.  
lib. 1.

que contulerant, ex eo nihil superfuit, quod car-nifex traheret. Nec abs re fugacem mundi glo-riam Rosæ comparavit Academicus, utpote, quæ illâ die, quâ oritur, moritur. Proinde duas Ro-sas, pro insigni gerebat, siccam unam, viridem alteram, additâ inscriptione, Una dies aperit, conficit una dies. Et licet in primo congressu vi-deatur tibi splendescere, non temere credas, quia cùm fortuna beneficiis splendet, non semper splendet, ut te clarum faciat, sed ut fallaci splen-dore oculos tibi præstringat, quò demum obcæ-catus, in præceps ruas.

Proinde sanctus Job vitam hominis compara-  
 Job. c. 7. bat militiæ, & quidem sapienter. Militia est vita hominis super terram. Nam sicut belli tempore, miles nunquam certi sibi aliquid spondere potest, nec semper in eodem versatur statu, modò victo-riam refert, modò stragem suorum videt, modò fugat, modò fugit, hodie cædit, cras cadit, adeò ut arma semper gestare necesse sit; ita prorsus in hac vita nihil stabile, nihil firmum, sed omnia mu-tationi fortunæ obnoxia. Proinde dicitur fortu-na, quasi fortè una, quia vix, aut nunquam per-manet eadem. Hoc bene noveras, ô superbissime Nero, tu enim multis annis epulabaris inter Prin-cipes, & magnates, sed exiguo temporis spatio, ab inimicis in fugam compulsus, ad tantam deve-nisti inopiam, ut aquam foetidam degustare fueris coactus. tunc recordatus felicitatis antiquæ, ex imo pectore ignita suspiria trahens, exclamabas, Hæc sunt decocta Neronis? Hanc rerum humana-rum varietatem, & vanitatem contemplans Ba-ruch propheta, exclamabat; Ubi sunt Principes gentium, qui argentum thesaurizant & aurum, in quo confidunt homines? exterminati sunt, & alii  
 loco

loco eorum surrexerunt. ô rerum mundanarum varietas! quid dicis ô Princeps? hisce verbis non moveris? moveat te saltem experientia. Historias veteres & annales evolve, jam inde à rerum primordio monarchias omnes Persarum, ac Medorum, Græcorum, & Romanorum percurrere. tunc dicito, quonam deciderint? Quis magna hæc Imperia mutavit? Quis potentias illas transtulit? Quis amplas illas dominationes dejecit? respice mutationem. magna illa & potens monarchia Assyriorum in Persidem transit, inde in Græciam, è Græcia ad Romanos commigravit, hodie verò penes Germanos residet. O quàm bene noverat varios fortunæ casus, Marcus Marcellus! is enim captis à se Syracusis, in arce constitit, ut opulentissimæ illius urbis, quæ ferro & igne vastabatur, fortunam ex alto cerneret, qui cùm lugubrem casum ejus aspiceret, lachrymas cohibere non potuit; quem si quis, facti ignarus, tunc aspexisset, alterius victoriam esse credidisset, non ipsius, qui tantum de illius ruina doleret. considerabat vir sapiens omnes homines, præsertim Principes, ejusdem fortunæ jaculis obnoxios esse. An fortasse, quod scribo figmentum putatis? historias percurrere, & plurimos invenietis, qui in cælum usque elati, mox fortunâ illudente, descenderunt in profundum quasi lapis. ut egregiè Poëta,

*Tolluntur in altum,*

*Vt lapsu graviore ruant.*

In primis ante oculos vestros propono Bajazetum, Regem Turcarum potentissimum, verum fortunæ ludibrium. hic cum Tamberlano Tartarorum Rege bellum gessit; sed miser superatus fuit. hunc igitur captum, catenis aureis ligavit

Claud.  
li. 1. in  
Ruffi-  
num.

Falgor.  
li. 9. c. 5.

Tar-

Tartarus, atque in caveam ferream detrufum, per totam Afiam ac Syriam circumduxit, ipfoque, pro scabello utebatur, ut faciliorem in equum pararet ascensum.

Europ.  
lib. 6.

• Simile quoddam legitur de Valeriano Imperatore, hic orbis Imperium cum Romæ moderaretur, in Mefopotamiam bellum gerens, à Sapore Perfæ Rege superatus, mox etiam captus, & in captivitatem abductus, eò calamitatis redactus fuit, ut ftapedam teneret Barbaro equum conscendenti.

Petr.  
Crin. de  
honest.  
disc. li. 9.  
c. 6.

Belisarius præstantissimus militiæ dux, cum jam de Gothis, Vandalis, Persis, Tracibusque triumphasset, atrocis invidentiæ sic invasit morbus, ut impudicorum aulicorum procurante, ac impellente livore, jam senio confectum, de re bellicâ optimè meritum, idem Imperator, cui Imperium auxit, turpiter despexit, insuper & oculos ejus eruit. Unde cæcus & miser factus, ex potentissimo duce, tuguriolum sibi propè viam construi fecit, in quo nummulos ad victum quotidianum quæritans, vitæ reliquum transigeret, dicebatque prætereuntibus, Viator concede obolum Belisario, quem livor, non error cæcavit.

Val.  
Max. lib.  
6, c. ult.

Quid dicam de Polycrate Samiorum Principe? hic tantâ usus est felicitate, ut nullum unquam mœroris argumentum potuerit experiri, & ita feliciter succedebant omnia ex votis, ut velle, & posse in æquo positum esset. sed audi portentum majus. Cum ad excitandum sibi dolorem, annulum ingentis pretii conjecisset in mare, eundem postmodum reperit in pisce oblato sibi à piscatore. Sed homini tam felici, plenis semper velis prosperum cursum tenenti, quid accidit? contra Darium bellum ingreditur, mox ab Oronthe Regis præfecto,

præfecto, superatus fuit, & in excelsis montis vertice, patibulo affixus, avibus relictus est dilacerandus.

Pyrrhus Rex potentissimus, multis annis expertus est fortunam læto vultu sibi arridentem. pugnavit namque feliciter contra finitimos, quo successu elatus, Tarentinis, Lucanis, Samnitibusque contra Romanos in auxilium venit, & Valerium Levinum Consulem insueto elephantorum terrore superavit, rursusque Romanum exercitum fudit; deinde Rex Siciliae factus est, cum insula omnis Carthaginensium bello vexaretur, quibus dejectis, quasi diuturnum Imperium nactus esset, Heleno filio Siciliae, Alexandro autem Italiae regnum destinavit, reversusque in Epirum, Macedoniam occupat, Antigono Rege expulso; nec contentus tanto successu, Asiae regna meditatur, Spartanos aliis bellis intentos, primò aggreditur, sed mulieris virtute repulsus, filium Ptolemæum, & magnam exercitus partem amisit, inde Argos concessit, ubi dum Antigonom in urbe obsessum expugnare conatur, saxo è muro à muliercula quadam jacto, percussus interiit, caputque ejus Antigono oblatum est. & hunc exitum habuit Pyrrhus, Regum omnium virtute & moribus præstantissimus, verum utriusque fortunæ ludibrium.

An silentio prætereundus Syracusius ille tyrannus Dionysius? hic tam iniquum fortunæ iratæ vultum expertus est, ut amisso Regno, sceptri loco ferulam in manus sumpserit, ludumque litterarium in Græcia, jam senio confectus, aperire fuerit coactus. Percunctantique quomodo Regis filius, regnum hereditate acceptum, tam citò amisserit, respondit. Pater mihi Regnum suum reliquit,

quit, non fortunam. non enim omnia omnibus æquè feliciter cadunt.

Cyrus & ipse Persarum Rex inclytus, ob multos triumphos insignis, nonne à Thomiri Massagetarum Regina victus, superatus, & occisus?

Xerxes ille potentissimus, qui subvertit montes, & maria constravit, bello in Græcia infelicitè gesto, suis factus contemtibilis, per Artabanum præfectum suum, nonne misere fuit interemptus?

Darius itidem Rex Persarum opulentissimus, nonne ludibrium fortunæ fuit? ab Alexandro enim superatus & captus, vehiculo ductus, catenis & compedibus aureis alligatus, vulneribus confossus, misere tandem mortuus est. ô varias fortunæ vices!

Marius, qui septies Consul fuerat, de Jugurtha triumphaverat, Cimbros subegerat, Apulejum & Glauciam seditiosos interemerat, tandem nonne victus à Sylla, in paludibus misere delituit. ita scribit Ovidius,

Ovid. li.  
4. de  
Ponto.

*Ille Jugurthino clarus, Cimbroque triumpho,  
Quo victrix toties Consule Roma fuit,  
In Cæno Marius jacuit, cannæque palustri,  
Pertulit & tantum multa pudenda viro.*

Pompejus expugnato Domitio, Jarbâ triumphato, Sertorio in Hispania sublato, piratis subactis, Tigrane Rege Armeniæ debellato, demum post tot illustres victorias, à Cæsare victus in Thessalia, jussu Ptolemæi, ad quem extremâ rerum desperatione confugerat, interfectus est.

Innumera propemodum exempla adduci possent præsentî instituto accommodata, sed duo tantum insigniora proponere animus est. In primis perga-



pergamus Romam, & videamus potentissimum illum monarcham Julium Cæsarem, quinquaginta victoriis nobilem, tot præliis feliciter peractis insignem, tandem occisus est in Senatu à Cassio & Bruto, viginti tribus plagis confossus. Quid dicis Sueton. in Cæsare.  
 ô Cæsar? ubi sunt verba illa fastu plena, quæ dixisti, dum esses in navi? tunc, referunt historici, ad eò dira tempestas ingruit, ut navarchus ipse formidine perculsus, totus expallesceret. ad quem conversus Cæsar, ait, Quid times? Cæsarem defers & fortunam ejus, & times? Quid dicis Cæsar? noli intumescere. Fortuna non seriò, sed joco tecum agit.

In Orientem secedamus, illic videbimus belli fulmen, mundi domitorem, novorum quin etiam mundorum investigatorem Alexandrum Magnum, cui etsi aliquando blandiri videbatur fortuna, citò tamen in alteram partem vultum divertit: nam Alexander post tot victorias, & penè totum Orbem subactum, in medio victoriarum cursu, cum in viridi tunc ætate floreret, quartum & trigessimum agens annum, per Cassandrum Antipatris filium, diro veneno sublatus est. ô Alexander, Jovis te filium prædixisti, & turpiter occumbis? non ridebat, sed deridebat fortuna.

Sed Judæam, si placet, perlustremus, ecce tyrannum Adonibezec, fortunæ jocos inveniemus. Hic, ut divina narrat historia, septuaginta Reges Jud. 10.  
 captivos detinens, instar canum, micis ex mensa decidentibus alebat. Insignis planè victoria. at fortuna inconstans ludit & illudit, quia brevi temporis intervallo, regno deturbatus, eandem fortunæ aleam expertus est.

Quid de Sedechia Rege, nonne divitiis, & opibus affluebat? nonne in summo rotæ fastigio positus, Lib. 4. Reg. c. 20.

tus, fruebatur Regno? ô summa rerum felicitas! at non seriò, sed joco agebat fortuna. mox enim captivus in Babyloniam adductus est, filii ejus crudeliter jugulati, thesauri direpti, oculi eruti, uxor violata, regnum denique eversum, & in servitutem redactum. Ecce, ô monde, quàm evidentia tuæ inconstantiæ argumenta.

Vis videre, ô mortalis, mundi instabilitatem vivis coloribus delineatam? converte oculos ad triumphantem supremi Regis ingressum. Urbem ingreditur illam insignem, mox undique acclamatur, Benedictus qui venit in nomine Domini. viæ circumquaque tapetibus vestiuntur, ramis & floribus pavimenta ornantur, faustæ acclamationes perstreperunt usque ad sidera, Vivat, vivat Rex noster. at vix quinque diebus elapsis, quem antea benedictum acclamaverunt, mutatis vocibus, ad mortem deposcunt. Quem, ut Regem adoraverunt, mox ut latronem cruci affigunt. Quem cæteris præposuerunt, mox post Barrabam ponunt, impiè conclamando, Tolle, tolle, crucifige eum. monde fallax, quàm appositè tibi convenit adagium illud, Polypo mutabilior. Quod felici carmine expressit Ovidius,

Ovid.  
li. 4. de  
Ponto.

*Omnia sunt homini, tenui pendentia filo,*

*Et subito casu, quæ valuerunt ruunt.*

*Divitis audita est, cui non opulentia Cræsi?*

*Iste tamen vitam captus ab hoste tulit.*

*Ille Siracusia modò formidatus in urbe,*

*Vix humili duram reppulit arte famem,*

*Quid fuerat Magno majus? tamen ipse rogavit,*

*Submissâ fugiens voce, clientis opem.*

*Cuique viro totus terrarum paruit orbis,*

*Indigus est factus omnibus ille magis.*

Hoc apprime perpendebat Octavianus Augustus,

ftus: ejus enim tempore fuit quidam insignis pictor, qui tabulam manu suâ depictam, miro artificio elaboratam, ei obtulit; in qua descripti erant omnes illi Principes, qui celebres in vita, nomen suum immortalitati commendaverant. inter hos, in loco eminentiori erat Octavianus, tanquam eorum Princeps; in tabulæ vero inferiori parte, erant omnes tyranni; immanitate notati, quorum primus erat Phalaris Rex Siciliae. Cùm autem Augustus oculos in tabulam conjecisset, picturam miris laudibus approbavit, intentionem tamen, seu inventionem damnavit. duo enim in ea reprehendit; alterum; quòd Phalaris, tanquam tyrannorum Princeps collocaretur, cùm sapientes viros amore, & honore prosecutus fuisset; alterum, quòd ipsum Octavianum adhuc viventem, Principem constituerit mortuorum, qui ob res præclare gestas eam memoriâ reliquissent, de qua nulla ætas conticesceret. Siquidem durante vitâ nullus erat homo, licet in excelso dignitatis gradu constitutus, qui non posset, & à sublimi mundi gloria, & ab insigni virtute præcipitari. Quod quidem Solonis oraculo comprobatur.

\* Cùm enim Cræsus Lydorum Rex Soloni divitiarum suarum copiam ostentaret, interrogaretque; an quempiam vidisset ipso beatiorem? respondit sapiens, Ego quidem confiteor, Cræsum Regem opibus, & Imperio florentem; at beatum non audeo appellare, priusquam hanc vitam feliciter absolverit. multa namque cadunt inter calicem, supremaquæ labia, ait vetus adagium. Quo responso audito, Solonem tanquam stultum hominem, quî præsentem felicitatem parvifaceret, à se dimisit. mox expeditione contra Cyrum Persarum Regem susceptâ, captus, Regnoque exutus, Herod. lib. 1.  
Laert. li. 12 c. 2.  
Val. Max. lib. 7. c. 1.

rogoque, ut cremaretur impositus, clamare cœpit, O Solon, Solon. Cyrus admiratus ignotum vocabulum, postquam causam, remque omnem didicit, Crœsum ab incendio liberavit, & apud se toto vitæ tempore honorificè habuit, humanarum rerum inconstantiam contemplatus.

Zon.  
tom. 3  
annal.

Zonaras in suis annalibus sub imperio Basilij Macedonis, refert Soldanum potentissimum à Ludovico quodam Galliarum Rege captum. is cùm circa Italiam captivus duceretur, toto biennio nunquam ridere visus est, ita ut Rex miratus, promitteret, se eĩ qui barbarum risisse nuntiaret, præmia daturum; semel tandem risit. mox nuntiatur Regi, tunc accersito Soldano, risus causam quæsit, cui ille audacter respondit, Vidi, ô Rex, rotas currus, quo tu veheris, quarum cùm altera pars terræ incumberet, altera sursum tollebatur, mox ea, quæ sublimis fuerat, denuo depressa; iterum quæ humilis, in altum elata est, unde res humanas, eodem modo mutari conjiciens, risi, posse fieri cogitans, ut sicut de sublimi sum humi depressus, ita ex humili loco, in altum elatum, sublimem fore. Tunc Rex in curru victoriæ sedens, de suo quoque statu cogitans, Soldanum sapientem judicavit, & deinceps cum illo honorificè se habuit, variam fortunæ varietatem considerans. Sicque inconstantiam mundanarum rerum perspectâ, postmodum illi, & suspecta & despecta esse cœpit.

Plut. in  
apoph.

Optimè noverat varias rerum mutationes Agathocles Siciliae Rex, figuli filius, proinde ne quâ forsitan inanis gloriæ titillatione ob regnum adeptum extra mentis statum abriperetur, & ut prioris vitæ memor foret, vasa lutea inter aurea & argentea in mensam semper voluit inferri.

Jose-

Josephus Patriarcha, licet dominaretur in tota terra Ægypti, & primus foret in aula Pharaonis Regis, nunquam tamen suæ prioris conditionis oblitus est, quam ut magis ostenderet, fratribus præcepit, ut palam profiterentur, & coram etiam Pharaone dicerent: Viri pastores sumus. Hinc appositè Spiritus Sanctus loquens de Rege, usus est his duobus terminis, homini regi. Simile est regnum cœlorum homini Regi. ut doceret Regem debere in memoriam revocare, se esse hominem. proinde in publicis triumphis, præconis voce ad aures Imperatoris acclamabatur antiquitus, Memento te esse hominem. Huc facit egregiè insigne sceptrum, regię dignitatis signum, appositâ hac brevi notulâ, Olim arbos. innuens hominem non debere efferri, quia ad summos honores erectus, sed mente recolere, quidnam olim fuerit, pulvis ex pulvere.

Ita prorsus Lechas secundus Poloniæ Rex, hic enim cùm ab aratro ad Regnum vocatus esset, vestimenta rustica, quibus in agro uti consueverat, in eminentissimo palatii loco voluit suspendi, ut vestium assiduus intuitus, originis suæ obscuritatem ei semper in memoriam revocaret, quò superbiæ tumore elatus non insolesceret. ecce quàm perbelle novit hic Princeps fugacem mundi gloriam, quam Lucas divino penicillo descripsit, dum momentaneam appellavit. Volens enim mundi instabilem vanitatem ante oculos mortalium proponere, dixit: Ostendit ei omnia regna mundi, sed in momento. Ecce, ait Ambrosius, rerum humana- Luc. c. 4.  
rum non diuturnitas, sed vana fugacitas, quæ vix apparet, quod jam transiit. Ecce, ait Gregorius, momentaneum, quòd delectat. Ecce vester mundus, ait Cyprianus, qui arridet, ut sæviat,

blanditur, ut fallat; extollit, ut deprimat; allicit, ut occidat. Caduca, & fragilia nimirum sunt hæc omnia, quæ nullo in loco, nullo in tempore, nulla in persona, stabilibus innixa radicibus consistunt.

Cùm itaque rota fortunæ adeò sit volubilis, ut diu nequeat consistere, idcirco Princeps prudentiæ clypeo innixus, non debet alios parvifacere, sed moderando cæcam regnandi libidinem, nihil negligere, neminem non timere, recolens frequenter adagium illud, Etiam capillus unus habet umbram suam. Quod pulchre exprimitur hoc insigni, nimirum remoræ gubernaculo navis adhærentis, appositâ nota academicâ, Sic parvis magna cedunt. remora enim parvus admodum pisciculus vix bipedalis, gubernaculo navis adhærens, velificantem navem remoratur. quis crederet? Elephantes licet prosternant acies, & armatos hostes proterant, minimo tamen suis stridore territi, solent terga hosti dare. Quid, quæso, vilius culice? at parvus culex potuit aliquando leoni non minimum facessere negotii, Quid gallus albus, si leonis robori comparemus? at leonem rugientem non solum comprimit, sed etiam territat, atque in fugam suo conjicit buccinatu. Quid? nonne legimus, eos qui grandes, & potentes viros prostraverunt, ab homunculis interdum fuisse superatos?

*Quid magis est saxo durum? quid mollius undâ*

*Dura tamen molli saxa cavantur aquâ.*

O quàm pulchre faciunt huic instituto verba quædam aurea multo sale aspersa, quæ olim dixerunt Scytharum legati Alexandro Regi, qui nimiam imperandi libidine captus, nullis finibus contentus erat, Si dii habitum corporis tui, animi aviditati, parem esse voluissent, orbis te non caperet, alterâ

terâ manu orientem, alterâ occidentem contin- Q. Cart.  
lib. 7.  
geres, & hoc assecutus, scire velles, ubi tanti nu-  
minis fulgor conderetur. ab Europa peti Asiam,  
ex Asia transis in Europam. deinde si omne genus  
hominum superaveris, cum silvis, & nubibus, cum  
feris, ac bestiis gesturus es bellum. Sed quid? an  
ignoras arbores magnas diu crescere, unâ tamen  
horâ extirpari? Leo quoque aliquando minima-  
rum avium pabulum fuit. Ferrum rubigo consu-  
mit, & nihil tam firmum est, cui periculum non  
fit, etiam ab invalido. Proinde fortunam tuam  
pressis manibus tene, lubrica est, nec invita teneri  
potest. impone felicitati tuæ frenos, facilius illam  
reges. egregium planè oraculum à barbaro ore  
prolatum, sed non barbarè.

Insigni huic documento subscribit Archidamus  
Agésilai filius; is enim cum à Philippo Macedo- Platarc.  
in Laco-  
nicis,  
num Rege, post cladem ab eo acceptam, litteras  
aculeatas minarum & terroris plenas accepisset,  
audacter respondit, Si tu (ô Rex) metieris umbram  
tuam, illa nihilo major erit, quàm erat ante victo-  
riam. Salsè quidem. Quoniam non est sapientis  
viri in rebus secundis animo intumescere, sed for-  
tunæ volubilitatem, & humanarum rerum incon-  
stantiam præ oculis semper habere. cum verissi-  
mum sit illud oraculum longo usu comprobatum,

*Si fortuna volet fies de Rhetore Consul,*

*Si volet hæc eadem fies de Consule Rhetor.*

*Prospera cuncta tibi? noli confidere Princeps,*

*Lubrica fortuna est, vitrea, vana, levis.*

## CAPUT XXIV.

*Rebus in adversis non frangatur animus Principis, & metuent eum omnes gentes.*



REGIÆ fortitudinis præcipuum munus est, secundis rebus non extolli, adversis non deprimi, nullo metu frangi, nec se alium, in alia fortuna præbere, ut de ipso pleno jure possit decantari,

*Etiamsi fractus illabatur orbis,*

*Impavidum ferient ruinae.*

Quod quidem facile assequetur Princeps, si clypeo prudentiæ munitus existat. Vir enim prudens, ita firmat virtute suâ volubilem fortunæ rotam, ut minimè commoveatur, nec ob ejus motum, nec ob ejus metum, sed instar cubi; impelli quidem potest, at non prosterni, quasi inclamet, Quò quò veritas. Cubus quippe, in quamcunque partem incubuerit, immotam stabilitatem habet, semperque sui similis est. Porro quantò magis fortuna conatur illum dejicere, tantò magis animi fortitudine resistit, quasi pila vento distenta, fluctibus huc & illuc jactatur, non tamen submergitur, imò super undas exultando, per prosopopœiam inclamat, Inanes minæ. oppugnari quidem potest vir fortis, non expugnari. Verè opus gloriosum, in regno fortunæ, vicisse fortunam; at fortunæ telis frangi, non ingenui, & nobilis, sed vilis, & effœminati animi est. Quippe, non est mirum, in tranquillitate non concuti, mirum est ibi extolli aliquem, ubi omnes deprimuntur; ibi stare, ubi omnes jacent. sapienti viro nihil mali potest accide-  
re,

Sen. ad  
Luci-  
lium  
epist. 73.



re, stat rectus sub quolibet pondere, & nulla res illum minorem facit. Huic sententiæ egregiè subscribit Ambrosius. Sapiens vir, ait, non metu frangitur, non potestate mutatur, non extollitur prosperis, tristibus non mergitur. siquidem vir fortis nunquam in alia fortuna est alius, sed semper idem. Quod Philosophi testimonio facili negotio comprobatur. inquit enim, Magnanimus neque fortunâ bonâ extollitur, neque malâ deprimitur, quia de nullo infortunio tristatur, in tantum ut deviet à via rationis. ac si dixisset, Vir prudens neque prospero rerum flatu trahitur, neque earum ventis reflantibus, retrahitur: sed eundem semper agit cursum, & licet à diversa, & adversa fortuna agitetur, ipse tamen nec diversus, nec alius, sed semper idem existens, eundem animum, mentemque eandem, in diverso & tempore, & statu gerit, quasi stella in orbe fixa, quæ licet orbis in gyrum agat, ipsa tamen non movetur, notâ academicâ inclamante, Immobile in motu. Huc appositè facit, quod Plinius refert mirabile dictu de lapide quodam, quem Abeston vocant Græci. hic cum semel ad ignem applicatus flammam conceperit, nunquam extinguitur, quamvis maximâ aquarum vi perfundatur. Pulchre Poëta,

*Arcadiæ tellus lapidem producit Abeston.*

*Ferreus huic color est, naturæ mira potestas:*

*Nam semel accensus, conceptos detinet ignes,*

*Extinguique nequit, perlucens perpete flammâ.*

De Lauro scribit Geminianus, quod & brumali, & æstivo tempore nativam retinet viriditatem. Ecce vir fortis in diversa fortuna semper idem, Adamanti similis, qui nec ferro infringi, nec igne absumi potest, animi semper invicti signa

Ambr.in  
epist.ad  
Simpli-  
cianum.

Arist.lib.  
4. ethic.

Gemin.  
lib.3 de  
vegetab.  
c. 61.

ostendens. ita Leonidas Persæ cuidam minitanti, quod ipsi Lacedæmonii postero die ex sagittarum multitudine Solem non essent visuri, audacter respondit, In umbra igitur commodiùs pugnabimus. non minorem animi fortitudinem ostendit Pedaretus, signa cum hoste collaturus; cuidam enim dicenti, magnum esse hostium numerum, tantò, inquit, gloriæ plus referemus, quantò plures interficiemus. Hinc Poëtæ fingunt Æolum imperare ventis. sed quorsum? nimirum, ut ostendant Principem in tractando imperii clavo, nullis turbationum tempestatibus succumbere, sed strenuè, ac fortiter imperare. qui enim prudentiæ innititur, non solùm in adversa tempestate novit navigare, sed etiam enavigare. Quippe, quod vir prudens novit temporibus obtemperare, & honestè cedit, qui tempori cedit, testis Antæus; qui quò magis ad terram usque ab Hercule deprimebatur, eò attolebatur eminentiùs. en typus viri fortis, prudentiæ innixi, qui novit ex depressione attolli, ex incommodis commoda capere, & ex malis bona elicere. siquidem fortitudo expers prudentiæ, fortitudinis nomen amittit, induit temeritatis. Præclara viri fortis testimonio comprobatur. Quid est enim, quod Theseus è labyrintho Dædalico, in quem semel detruso, nullus unquam dabatur regressus, sed accepto ab Ariadne fili glomere; impunè evasit? novit qui sapiens est, non solùm in pericula se immergere, sed etiam è periculis emergere. Jacent ergo omnes in imperii custodia vires, nisi adlit sapientis viri prudentia, quæ sola omnibus occurrit incommodis.

Quocirca Echinum, sapientis symbolum constituerunt antiqui, hac ducti ratione, Quoniam hoc animal, quasi temporum observans momenta, duobus latitu-

latibuli extruit orificia, unum Boreæ, alterum Austro expositum. Boreâ igitur spirante, eî, quod est expositum occludit, referat alterum, & è contrario, Austro ingruente, pandit Boreale, altero clauso.

Quid ex hoc naturæ documento? hoc nimirum, virum sapientem non frangi debere, sed tempori serviens, forti prudentiâ tolerare debet quælibet adversa, Academicum illud decantando, *Flectimur, non frangimur undis*. Solet enim prævidere fortunæ conatûs, multò antè quàm occurrant, proinde non animo cadit, sed strenuè sustinet omnia: quia jacula prævisa, ait Gregorius, minùs feriunt. quia facilè, ait Seneca, adversam fortunam sustinere potest, qui semper expectat. quia præmeditatio futurorum malorum, ait Cicero, lenit eorum adventum, quæ venientia longè antè videris. videntur enim omnia repentina graviora. Hoc sanè aureum regnandi institutum, experimento teste, plurimi docuere sapientes.

De Socrate sapientissimo viro, nonne scribit Seneca, quod ita constans in utraque fortuna fuit, ut nunquam visus fuerit in vultu mutatus? verba Philosophi sunt hæc, Non hilariorem quisquam, non tristiores Socratem vidit. æqualis semper fuit, in tanta inæqualitate fortunæ.

Pericles Atheniensium dux, intra quatuor dies duobus filiis orbatus, non ingemuit, sed nec priorem frontis habitum mutavit.

Xenophon, filii morte nuntiata, sacrificium, cui tunc intererat, non omisit, coronam tantum, quam capite gestabat, deposuit. mox interrogans diligentius, atque audiens, quod strenuè pugnans cecidisset, coronam ipsam capiti reposuit.

Quid de Anaxagora? hic mortem filii nuntianti, re-

ti respondit. Nihil novum, aut inexpectatum audio. ego enim cum sim mortalis, sciebam me genuisse mortalem.

Demetrius Phaleræus dux Atheniensium egregius, in diversis & adversis fortunæ eventibus, nunquam diversus, & alius, sed semper idem fuit. quod ex hoc præcipuè conjici potest. ob præclarissima gesta, trecentæ ei statuæ ab Atheniensibus erectæ fuerunt, at post Cassandri obitum, qui eum Atheniensibus præfecerat, æmulorum invidiâ in Ægyptum fugere fuit compulsus. ibi autem cum accepisset illas omnes statuas disjectas esse, & in matulas per ignominiam conflatas, subridens, ait, Statuas quidem evertere potuerunt invidi, at præclara gesta, quorum gratiâ, illas erexerunt, nullo unquam tempore abolere poterunt. Hinc Sapiens dicebat: Melior est vir patiens viro forti, & qui dominatur animo suo, expugnatore urbium. Verè fortis animus est, quem infortunia non dejiciunt, talis fortitudo fuit in Philippo Secundo Hispaniarum, atque Indiarum Rege, cujus contra Britannos classem maximam, cum Oceani rabies ita devorasset, ut vix nuntius ad régias aures elaberetur. eo Rex audito, mox ait, Classem ego contra homines, non contra ventos, & elementa conflaram. Fortis animus, qui mortem quasi per ludum suscipit. talis fuit in Anaxarcho philosopho, qui jussu Anacreontis tyranni positus in concavo saxo, ut tunderetur, per jocum dixit; Tunde, tunde, ô tyranne, vas Anaxarchi tundis, non Anaxarchum. Fortis animus, qui exilio non movetur: talis fuit in Agrippino Romano, cui ad mensam accedenti, cum repentinus satelles, à Nerone Cæsare missus, sine mora exilium ad urbem Ariciam denuntiasset. Ergo, inquit, Ariciæ cœnabimus.

Fortis

Fortis animus, qui si injuriis fortè petatur, respondet, Non memini me læsum. sic dicebat Cato. Fortis animus, qui cohibet iram. talis fuit in Philippo Alexandri patre, cùm enim urgerent Macedones, Sume pœnas, ô Philippe, de intoleranda Græcorum ingratitude, qui tantis abs te beneficiis ornati, de te tam turpiter obloquuntur. tunc Rex vir sapiens, sic respondit; Non bene suaderis amici, qui bene accepti mala rependunt, quanto pejora mala provocati reponent? magnanimi Principis oraculum. non enim abjecti, sed strenui est perferre injurias, nam quemadmodum, ait Plutarchus, stomachi arguit imbecillitatem cibos non continere, ita infirmo atque infimo se prodit animo, qui ne verbum quidem sustinere potest.

Nec silentio prætereundum egregiæ fortitudinis exemplum, quod sancta Melania cunctis mortalibus reliquit imitandum. nam calente adhuc mariti corpusculo, & nec dum humato, ecce nuntius refert duos filios simul occubuisse. Quis illam tunc non putaret more materno, sparsis crinibus, veste conscissâ, lacerum pectus invadere, gemitibus ad cœlum usque elatis? mirum dictu! Lachrymæ gutta non fluxit, immobilis stetit, & virili pectore firma, ad pedes advoluta Christi, quasi ipsum teneret, dixit; Expeditiùs tibi servitura sum Domine, quia tanto onere me liberaſti.

Sed quid dicemus de Imperatore Mauritio præstantissimo viro? hic cùm à Deo postulasset, ut de illo in præſenti vita vindictamsumeret, mox divinitus revelatum est ei, quod peccatorum suorum vindicta servo cuidam suo, qui appellabatur Phocas, commissa est. Qui Phocas cùm contra dominum suum conspiraret, regnumque tyrannicè occuparet. Mauritium tandem cum uxore,

&amp;

Niceph.  
lib. 18  
hist. ec-  
cles. cap.  
40.

& octo filiis interfecit. At devotus Imperator cum intelligeret hoc à Deo fuisse permissum, ad-  
eò patienter, & strenuè, uxoris, & filiorum ne-  
cem pertulit, ut humi prostratus, nihil aliud  
proferret, quàm illa Davidis verba, Justus es  
Domine, & rectum judicium tuum. O regiae for-  
titudinis exemplum tanto Principe dignum! Ecce  
(ô Principes) egregia historiarum monumenta  
vobis proposui, ut hinc discatis in Regnis admini-  
strandis, non adversis frangi, sed (palmae victricis  
adinftar) ad sidera elevari, audacter & strenuè  
inclamando, Tu ne cede malis, sed contrà auden-  
tior ito.

*Rebus in adversis regalia corda probantur,  
Que concussa gravi turbine firma manent.  
Magnanimi proprium, sævis non frangier undis,  
Et sapientis opus, cedere temporibus.*

## CAPUT. XXV.

*In sublevandis pauperibus sit pius Princeps, &  
multiplicabitur substantia ejus.*



Sap c. 7,

UOD de sapientia omnium virtutum parente, dixit olim Salomon Rex sapientissimus, hoc idem liceat Principi cuilibet, de regia in pauperes largitate proferre. Venerunt mihi omnia bona pariter cum illa. Ecquod nam bonum potest à Principe desiderari, quod ab eleemosyna non profluat abundè? Quid, quæso, habes in votis? thesauros tuos nec fraude, nec vi, in tuto collocare. Frange esurienti panem tuum. Siquidem panem, quem ponis in mensa pauperis, non perdis, sed deponis; non amittis, sed com-

committis perpetuò servandum. Hoc probè no-  
verat Sapiens, idcirco consulebat potenti; Mit-  
te panem tuum super transeuntes aquas, & post  
multa tempora invenies illum. Hinc Beatus Lau- Eccl. c.  
11.  
rentiustyranno dicebat; Facultates Ecclesiæ, quas  
requiris, in cœlestes thesauros manûs pauperum  
deportaverunt.

Hoc idem sentiebat Martinus, singulari in pau-  
peres benignitate insignis, cùm enim sub signis,  
gregariùs adhuc miles ageret, & mendicus qui- Falgos.  
li. 4. c. 8.  
dam nudus, eleemosynam ab eo postularet, argen-  
tum autem & aurum tunc ei non esset ad manum,  
arreptam ex humeris chlamidem; dissecuit me-  
diam, sibi que partem servans, mendico alteram,  
magna liberalitate donavit. Quis tale facinus au-  
divit unquam? ô benignitatem incomparabilem!  
dixit olim Poeta,

*Nulla fides, pietasque viris, qui castra sequuntur,*

At contrarium re ipsa ostendit Martinus egre-  
gius miles. Quippe, qui castra adhuc sequens, cla-  
rissimum suæ pietatis argumentum dedit. Onu- Onaphr.  
de viris  
Pontif.  
phrius scriptor insignis, de Alexandro Quinto  
Pontifice refert, quod ita in omnes, sed præcipuè  
in pauperes munificus fuit, ut prorsus nihil sibi re-  
liquerit, Quare per jocum interdum dicere sole-  
bat, se divitem Episcopum fuisse, pauperem Car-  
dinalem, mendicum Papam, ob profusas & in-  
gentes largitiones.

Carolus Borromæus nostris temporibus inter Falgos.  
li. 4. c. 8.  
Sanctos relatus, nonne vendidit Principatum, ut  
pauperibus subveniret? quem postea perpetuo  
duraturum invenit in cœlis, in manu Dei deposi-  
tum. Noverat quippe vir sanctus, Principem non  
esse dominum absolutum, sed dispensatorem bono-  
rum, quæ à Deo accepit. proinde non dissipanda  
pro

pro libito, sed prudenter dispensanda : nam quod pauperibus erogatur, non dissipatur, sed deponitur diu servandum, quod carmine satis eleganti expreſſit Martialis,

Martial.  
lib. 5.

*Callidus effractâ fur nummos auferet arcâ,*

*Proſternet patrios impia flamma lares.*

*Debitor uſuram pariter, ſortemque negabit,*

*Non reddet ſterilis ſemina jaçta ſeges.*

*Diſpensatorem fallax ſpoliabit amica.*

*Mercibus extructas obruet unda rates.*

*Extra fortunam eſt, quidquid donatur egenis,*

*Quas dederis, ſolas ſemper habebis opes.*

Hinc Marcus Antonius omnibus diuitiis diſtributis, frequenter dictitare ſolebat, Hoc ſolum habui, quod dedi. Huc facit appoſitè quod olim accidit Romæ. Cùm enim ſepulchrum quoddam aperiretur, inventus eſt in eo lapis, in quo verba hæc inſculpta erant, Expendi. donavi. ſervavi. habui. habeo. perdi. Convenerunt eruditiores viri, qui hoc modo interpretati ſunt, Quod expendi, habui. quod donavi, habeo. quod ſervavi, perdi. quaſi mortuus loqueretur dicens, Solum bonum, quod feci, illud habeo in manu Deï depositum. verum eſt enim ſacrum illud Joannis oraculum, Opera illorum ſequuntur illos. Hoc probè noverat optimus Princeps Amedæus, ut ſcribit Volaterranus. proinde facultates ſuas apud pauperes deposuit, quas deinde copioſè recepit. hiſtorici verba hæc ſunt, Amedæus Dux Sabaudia, cujus erat avuſille Amedæus, qui in Concilio Baſilienſi Pontifex factus eſt, rogatus quondam à quibuſdam Oratoribus, ſi quos haberet canes, offenderet. annuit Princeps, ut poſterâ die redirent. cùm verò aſſent, Amedæus in porticu regia, ingentem à latere ædium mendicorum multitudinem  
eis

Raphaël  
Volat. li.  
3. geo-  
graphiæ  
de Gal-  
lia Nar-  
bonenſi.



eis ostendit, unà discumbentium. Hi sunt, inquit, canes mei, quos alo quotidie, quibus cœlestem gloriam me spero venaturum. quasi alter Abrahamus, qui in ipso fervore diei, tanquam venandi, aucupandique gratiâ stabat. Hunc itaque ducem imitare (ô Princeps) tunc omnia feliciter cadent, & præ lætitia gestiens, exclamabis; Venerunt mihi omnia bona pariter cum illa. Adhuc fitis? Ecquid velles? bonorum multiplicationem? audi divinum verbum cœlitus emissum, Honora Dominum de tua substantia, & de primitiis frugum tuarum da pauperibus, & implebuntur frumento horrea tua, & vino torcularia redundabunt. & bene dicit de primitiis, quia Deo meliora sunt offerenda. hinc patet solutio illius quæsitæ, cur Dominus respexit ad Abel, & ad munera ejus, ad Cain autem non respexit? quia, ut scribit Cyrillus, Abel obtulit quæ inter gregem præstantiora erant; obtulit enim ex primogenitis ovium; at Cainus deteriora Deo maximo offerre non erubuit, & meliora sibi servavit. Respexit autem primo ad Abel, deinde ad munera, ad insinuandum, quod externæ oblationes non sunt Deo gratæ secundum seipsas, sed ratione offerentium placent, aut displicent. Verùm cum de externis loquor oblationibus, non est sermo de Augustissimo sacrificio legis Evangelicæ, quo Christus offertur. hoc enim Deo acceptum est, licet à sacrificante indigno offeratur Domino. Sed quo signo cognoscitur sacrificium Abelis magis acceptum? per ignem de cœlo missum, qui consumpsit sacrificium Abelis; Caini autem non consumpsit. ita refert Hieronymus lib. de traditionibus Hebraïcis in Genesin. hoc exemplo discant Principes meliora offerre Deo, & centuplum accipient etiam  
in hac

Prov.  
c. 3.

Gen. 4.

Cyrill.  
li. 2 in  
Gen.

Prov.  
c. 19.

Sotus 4  
senten.  
dist. 19.  
q. 1. a. 2.

D. Th. 4  
sent. dist.  
15. a. 2.

3 Reg.  
c. 17.

in hac vita. verum est enim illud oraculum, *Fœne-*  
ratur Domino, qui miseretur pauperi. hæc sponsio  
Dei est, qui mentiri non potest. Fidelis est Deus in  
omnibus verbis suis. spondit? datam fidem ser-  
vabit. licet enim quidquid Deo damus, ab ipso re-  
ceperimus, damus tamen ut nostrum, cujus ipse  
nos dominos fecit. Siquidem, ut ait Sotus, post-  
quam Rex dono dedit oppidum civi, potest post-  
modum civis, si aliquid debeat Regi, inde solve-  
re. Verissimum est, non inficior, quod quidquid  
boni habemus, à Deo habemus, sed immensa Prin-  
cipis benignitas, dum creavit hominem ad suam  
imaginem, ratione & libero arbitrio dotavit, qui  
esset dominus suarum actionum, ac subinde sua-  
rum rerum. Nec valet argumentum, Servus non  
potest pro aliquo debito satisfacere, quia totum  
quod habet, domini est, non valet: quoniam licet  
homo sit servus Dei, non tamen eo modo, quo  
servus emtitius; nam hujusmodi servus, non est  
sui juris, nec liberum habet suarum rerum domi-  
nium, sed omnia sunt domini: at homo, Dei cle-  
mentia, liberâ facultate decoratur, quâ possit do-  
na data Deo donare, & ab ipso longè majora re-  
cipere cumulatiore mensurâ. Quod multorum ex-  
emplorum auctoritate, haud erit difficile compro-  
bare. mulier quædam Sareptæ incola, ut Regum  
narrat historia, hac virtute insignita, Helix pro-  
phetæ semel eleemosynam impertivit. At quid  
hinc? nonne multiplicibus, variisque beneficiis  
remunerata fuit? illasiquidem audire meruit, Hæc  
autem dicit Dominus Deus Israël, hydria farinæ  
non deficiet, nec lecythus olei minuetur, usque ad  
diem, in qua Dominus daturus est pluviam super  
faciem terræ. nam qui facultatem tribuit pauperi,  
ipse est, ait Chrysostomus, qui beneficio fruitur,  
cen-

centupla nempe fœneratione recipiens. Sicut enim Chryf. hom. 27 in Gen. qui seminat, dum jacet granum, non perditum credit; sed multiplicandum expectat in messe; ita qui eleemosynam seminat, non amittit panem suum, sed multiplicat, etiam in hac vita. Huc facit opportunè, quod legitur in speculo exemplorum. Abbas quidam hospitalis erat, & circa pauperes pius, quântoque ampliùs opera charitatis exhibuit, tantò illi, ac domui ejus Dominus benedixit. Post ejus mortem successor ejus avaritiâ ductus, hospitalitatem exclusit, consuetaque erga pauperes subsidia subtraxit. charitate igitur exclusâ, proficere non potuit monasterii substantia, imò brevi temporis intervallo ad tantam inopiam devenit, ut vix haberent Monachi quod manducarent: die verò quâdam vir quidam venerandæ ætatis venit ad ostiarium, quæsitivique hospitium, quem quidem ille clam collegit, ac hospitalitatis officium illi impendit, hoc etiam adjiciens, Nulla te capiat admiratio bone vir, quod tam negligenter & parcè tibi procuro, quandoquidem magna rerum penuria in causa est: aliquando talem vidi monasterii statum, ut si advenisset Episcopus, cum maxima charitate & rerum omnium copia fuisset receptus. tunc respondit ille senex dicens; Duo fratres expulsi sunt de hoc monasterio; nisi illi reducantur, nunquam bonus monasterii status erit. horum fratrum unus vocatur, Date, alter verò, Dabitur, sicque statim ab oculis ejus recessit. Ostiarius autem Abbati, fratribusque audita recitavit. resumta est itaque hospitalitas, & cœpit monasterium, ut priùs reflorescere, benedicente illis Domino.

Nec est valde dissimile quod scribit Georgius Cedrenus, exemplum verè memorandum. Cum

Georg. Ced. in compendio hist.

quidam Episcopus, ait, prædicaret inter Sarracenos, quendam eorum convertit, & baptizavit; postea autem cum suaderet ei, ut faceret opera misericordiæ, dicente Domino in Euangelio; Centuplum accipietis, & vitam æternam possidebitis. ille mox venditis omnibus dedit pauperibus, & obdormivit in Domino. Cum autem filii ejus traherent Episcopum ad judicium Sarracenorum, litemque Episcopo intentarent, super hoc quod patri centuplum promississet, neque tamen promissis stetisset, quandoquidem eos exheredes reliquisset, Episcopum respondisse fertur, Deum in alia vita illud patri remunerasse. adductus itaque ad defuncti tumulum, mortuum adjuravit in nomine Domini Nostri Jesu Christi, ut diceret, utrum sibi bene fuerit de promisso persolutum, respondit cunctis audientibus defunctus; Centuplum accipi, & vitam æternam possideo. hoc audito omnes in admirationem rapti, laudabant Deum dicentes; Fidelis Deus in verbis suis.

Gregor.  
Taron.  
in hist.  
Franc.  
prov. c.  
19.

Hoc apprime intelligebat Tiberius Secundus Imperator. is enim ita copiosè bona pauperibus erogabat, ut Imperatrix eum sæpius objurgaret. cui ille, Ne turberis domina, Deus providebit fisco nostro; an nescis quod fœnoratur Domino, qui miseretur pauperi? accidit autem ut alterâ die deambulans per aulam regiam, viderit lapidem marmoreum, signo crucis insignitum, pedibus conculcari; Non est bonum, inquit, rem sacram pedibus conteri, & protinus præcepit illum erui. sed sub isto aliis denuo lapis eodem notatus signo apparuit, quem itidem sustulit. tertium deinde vidit penitus similem, & hunc jussit elevari, mox thesaurum inæstimabilem invenit. Quid dicis, ô Princeps, multiplicantur, non minuuntur opes pauperibus

Paul.  
diac. lib.  
6, cap. 3.  
histor.  
Longob.

ribus distributæ. Frumentum in horreïs reconditum non augetur, imò sæpe à vermibus corroditur, à muribus vastatur, à tineïs dissipatur, situ corrumpitur; at in terram projectum, uberrimum fructum affert. pecunia in arcula reposita sæpius direptioni committitur, at in pauperes collocata, fructum centies multiplicatum in hac vita producit, & postea vitam æternam ministrabit. unde jure optimo licebit tibi acclamare, Venerunt mihi omnia bona pariter cum illa.

• Sed quid ampliùs immoror? • quid adhuc velles? ab omni angustia eripi? ab omni periculo erui? ab omni malo liberari? conclude eleemosynam in sinu pauperis, & ipsa exorabit pro te ab omni malo. Græca lectio habet, & ipsa eximet te ab omni afflictione. quod quidem exemplo sanè insigni comprobatur. Mulier quædam, cujus filiam violaverat Zeno Imperator, orabat sæpe cum lachrymis ante B. Virginem, dicens: Vindica me de Zenone Imperatore. cùm ergo multis diebus hoc faceret, apparuit ei Beata Virgo dicens; Crede mihi mulier, ultionem tuam sæpe facere volui, sed manus ejus prohibuit me. erat enim pietatis amans. ita sentiebat Serenissimus Princeps & Vates, proinde dicebat: Beatus qui intelligit super egenum & pauperem. Divus Hieronymus legit; beatus qui cogitat de paupere. Euthymius ex Græco, beatus qui cogitat super inopem, non expectans, ut petat. Quemadmodum Sol non expectat preces, ut exoriat, sed illico sulget, & salutatur ab omnibus; ita nec Princeps expectet laudes, & preces, ut beneficiat; sed sponte conferat beneficia, & æquè ac Sol amabitur, & sic de ipso decantabitur, Etiam non poscentibus offert. Sed quid eveniet? In die mala liberabit

Ecclef. c. 29.

Prat. spirituale c. 175.

Psal. 40.

Arist. li. 5 Ethic.

eum Dñus. Symmachus legit, in die afflictionis. dic quæso, ô Princeps, quibus curis opprimitur cor tuum? quid angeris? imperium turbatur? deficiunt populi? ingruunt infortunia? manus munificas extende in pauperes, mox erit tranquillitas magna, & sedebit Regnum tuum in pulchritudine pacis. Ludovici Francorum Regis summa accedit auctoritas. Cùm enim orbis totus diris seditionibus esset perturbatus, ipse suum Regnum magnâ tranquillitate regebat. sed quo præsidio? noctis tempore mutata veste ipsemet elemosynam pauperibus erogabat, dicebatque servo, Ecce præsidium civitatis, hi sunt milites egregii, qui regnum meum summo fœdere, summaque pace fulciunt, & nunc stipendium eis solvo. omni quidem jure beatus iste Princeps hac pietate stipatus poterat dicere: Venerunt mihi omnia bona pariter cum illa. Quid adhuc quæris? vis in Regno similis esse Deo? audi Deum ipsum invitantem. sed qua comite? pietate, Estote misericordes sicut & Pater. vester misericors est. ac si diceret, Vos qui in terris vices meas geritis, imitamini pietatem meam in omnes creaturas sese diffundentem. Percurrite intellectu à summo cœlo usque ad abyssos, & videbitis, quod ad omnes diffusum est oleum misericordiæ meæ, nec est creatum, quod se abscondat à calore meo. tu quoque, ô Princeps, opera pietatis impertire, quandoquidem Princeps apud Hebræos sonat beneficus, & tunc mihi similis eris. quod si secus feceris, ad Regni cœlestis gloriam, ad quam aspiras, nunquam tibi patebit accessus. Cur putas voluisse Salomonem valvas Templi Mosaici olivæ construi tabulis? quoniam misericordiæ est symbolum, quasi vellet innuere, sicut per ostium patebat

bat introitus ad Sancta Sanctorum; sic per misericordiam ad cœlum semitâ rectâ. Quare Rex regum ex monte olivarum voluit in cœlum ascendere? ut ostenderet per misericordiam, quæ olivarum monte figuratur, ad Paradisi gloriam ingressum parari. quod apprime figuratur per columbam, quæ egressa tempore diluvii rediit rammum gestans olivæ virentibus foliis in ore suo. paradisi non ingreditur gaudium, nisi qui misericordiæ decoratur foliis. hinc Dominus enixè hortabatur potentes ad pietatem, quæ ducit ad vitam, quâ qui caret, ad salutis portum haud facillè perveniet. En oraculi testimonium, Facilius est camelum intrare per foramen acûs, quàm divitem intrare in Regnum cœlorum. Porro quia hic locus non est ita facilis, proinde duplicem expositionem adducemus. prima est Theophylacti, qui per camelum, funem nauticum intelligit, sicut enim iste funis integer, per foramen acûs ingredi non potest, divisus in singula fila facillè ingreditur; sic divitiis potens nisi pauperi subveniat necessitatem habenti, cœlum ingredi nequaquam poterit. Altera expositio est Cajetani, qui asserit, Hierosolymis portam quandam esse ita angustam, ut foramen acûs appellaretur. Per hanc portam camelus onustus, & collo erecto nullatenus ingredi poterat, nisi demisso prius capite, & sarcinâ depositâ; sic dives nisi prius caput inclinet per humilitatem, & sarcinam deponat per pietatem, nunquam in Civitatem sanctam introibit. Cæterum si divitias in fila pauperibus distribuat, ad cœlestem gloriam evolabit, ubi cum ingenti exultatione poterit cum Beatis canere, Venerunt mihi omnia bona pariter cum illa. Quid plura? hoc tantum dicam, quod est summa rerum,

Math. c.  
19.

rerum\*, exoptasne ô Princeps extremum diem claudere feliciter? audi Hieronymum dicentem,

Nunquam memini me legisse malâ morte mortuum, qui libenter opera pietatis exercuit: habet enim multos intercessores, quorum preces impossibile est non exaudiri. Sed plûs ultrâ, audi rem dictu incredibilem, veram tamen; velles post mortem, carnis tuæ incorruptionem? sit erga pauperes munifica manus tua, & quod cupis, succedet ex votis. Polydorus Virgilius de Osualdo Scotorum, & Anglorum Rege, ejusque eleemosynis scribit, in hunc modum: Osualdus bonus Princeps, miræ sanctitatis, ac pietatis, eo ipso die, quo Christus Jesus à morte vitam resumfit, dum prandebat, discumbente cum eo sancto viro, ac Episcopo Aidano, à ministris intellexit, frequentes pro foribus domûs circumflare pauperes cibum petentes. Tunc pius Princeps charitate motus, lancem argenteam cum cibariis, quæ ad manus prima aderat, pauperibus minutatim dividendam dedit. Aidanus ob hujusmodi præclarum liberalitatis facinus ad Regem conversus, & ejus dexteram apprehendens, inquit, Nunquam putrescat ista manus. quod vir utique sanctus divino afflatus spiritu cecinit, ut rei probavit eventus. nam illa manus, consumpto posthac corpore, integra semper mansit, quæ capsulâ decenti condita in urbe regia multa cum veneratione diu servata est. En sanctæ pietatis præmium, non solùm substantiæ multiplicatio, sed etiam carnis incorruptio. Ad hanc igitur concurrite Principes, ad hanc confugite, sub hac requiescite. est enim porta salutis, in qua inveniuntur omnia bona, proinde  
licebit



licebit dicere, Venerunt mihi omnia bona pariter cum illa.

*Ne sis ipse miser, miseris succurrere disce.*

*Dives opum est, inopi qui dare novit opem.*

## CAPUT XXVI.

*Cogitet quotidie Princeps se brevi moriturum, mox tumentes superbia fluctūs confringat.*



**Q**UOD R B I S totius Conditor, ac omnium dominantium Imperator, dum in admirabili Transfigurationis triumpho (Solis instar) gloriosus undique coruscaret, Moyse & Helia stipatus, præstantioribus Apostolis sociatus, choris Angelicis comitatus, in tam exæolso dignitatis culmine, constitutus, de quibus, quæso, agebat? an de triumphis? non ita quidem. sed de mortis memoria sermonem habuit, loquebantur de excessu quem completurus erat in Hierusalem. Quid hinc? ut edocerentur homines, & præsertim Principes, mortis memoriam gaudiis humanis esse intermiscendam. Cui instituto etiam Ethnici, solo naturæ lumine illustrati, obsequentissimi fuere. Siquidem, Divo Hieronymo teste, antiquitus apud Romanos, in more positum erat, ut Imperatorem Romæ triumphantem quispiam Senatûs nomine, præcederet inclamando, Respice ad eos, qui te præcesserunt, & memento te esse moriturum. nempe, ut hoc remedio temperarentur laudes humanæ, ne fortè Princeps, tantæ celsitudinis maiestate elatus, inani fastu intumesceret. Quin etiam

Luc. c 9.

Claudius paradinus, vir apprime eruditus, recenset in coronationibus Imperatorum, huiusmodi genus usitatum fuisse. nempe, ut eo ipso tempore, quo capiti corona, manibus verò imperiale sceptrum imponebatur, egregius sepulchrorum fabricator, tres diversos lapides, alabastrum, iaspidem, & porphyrum afferret, ut ex illis, habito delectu, sepulchrum construeretur, altâ vocè inclamans,

*Elige ab his saxis, ex quo Augustissime Caesar,*

*Ipse tibi tumulum, me fabricare velis.*

Ptolemæus Philadelphus Ægypti Rex, inter medias epulas tristem mortis imaginem, ac mortui cranium, semper ad latus habuisse fertur, atque hanc à ministris interdum vocem in mensa repeti iussisse, Inspice Rex, & cogita, talem te cito futurum. Egregium hoc Ptolemæi factum, veterem Ægyptiorum laudabilem consuetudinem mihi revocat in mentem. refert Herodotus magni nominis historicus, apud Ægyptios hunc fuisse morem, nimirum, in magnis conviviis mortui hominis caput ante oculos proponere; moxque inter pocula subjicere, Mementote, quò tandem redigendi sumus, eo sanè consilio, ut conditionis suæ memores, moderatiùs fruerentur voluptatibus. ob hanc causam sæpe admonebat Salomon dicens, Oculi sapientis in capite ejus. per caput intelligit Olympiodorus cœlestia. ille tenet oculos in capite, qui purgato intellectu, contemplatur superna, eò quòd caput, eminentia quædam sit, & totius corporis pars suprema; qui verò circa terrena occupatur, habere dicitur oculos in pedibus. qui sunt iusima pars, de quibus Vates dicebat; Oculos suos statuerunt declinare in terram. quando ergo dixit Salomon; Oculi sapientis in capite

Herod.  
lib. 3.

Eccl. c. 2.

capite ejus, vult insinuare, quod sapiens, oculos Lib. 2.  
 habet ad cœlum. Gregorius per caput intelligit moral.  
 Christum, dicente Paulo, Caput viri Christus. c. 4.  
 oculi ergo sapientis in capite ejus sunt, dum Re- i Cor. c.  
 demtoris sui opera, quæ imitari debet, contem- 11.  
 platur. In divinis litteris, caput significat princi-  
 pium, unde, ubi vulgata nostra legit; In princi-  
 pio creavit Deus cœlum, & terram; alii transfe-  
 runt, In capite, confirmatur per illud Psalmi; In  
 capite libri scriptum est de me. Titelmanus hîc  
 per caput intelligit principium libri Psalmorum.  
 dum dicit ergo Salomon; Oculi sapientis in capite  
 ejus, perinde est, ac si diceret; Oculi sapientis  
 in principio ejus. quod est principium ejus? re-  
 spice ad primum caput Genesios; Formavit Deus  
 hominem de limo terræ. hoc est principium, ad  
 quod respicit sapiens, nempe, ad lutum, ex quo  
 formatus est.

De Philippo Macedonum Rege, nonne pro-  
 dunt historiarum monumenta, ipsum in aula re- Stobæus  
 gia puerum habuisse, huic tantum muneri destina- serm. 19.  
 tum, ut quotidie ad eum ingressus, tale quid pro-  
 ferret? Memorare, ô Rex, te esse hominem. tunc  
 Rex, miseram conditionem considerans, tales è  
 pectore effundebat voces, Heu me miserum! ho-  
 mo sum, & proinde mortalis, & in cinerem redi- Ælian.  
 gendus, quasi diceret, lib. 5. c.  
15.

*Post hominem vermis, post vermem sætor, & horror,*

*Sic in non hominem, vertitur omnis homo.*

Utinam nostrorum temporum Principes, egre-  
 gium hunc Heroem, paganum licèt, imitarentur,  
 dicerentque inclamantes, En homo sum, &  
 mortalis, quod si mortalis, cur ita vivo, ac si nun-  
 quam moriturus? si moriturus, cur in me vitia  
 non commoriuntur? in vermes convertendus

sum, quomodo ergo me ipsum, ad meliorem frugem non converto? rationem exactè redditurus sum, quomodo ergo lachrymarum imbribus perfusus, toto corpore non contremisco?

*Quid sum miser tunc dicturus,*

*Quem patronum rogaturus*

*Dum vix justus sit securus?*

Hæc est memoria in Principe laudanda, non illa quidem Mithridatis, qui duarum & viginti nationum, quibus imperabat, linguas adeò callebat, ut singularum oratores palàm audiret, & redderet sine interprete responsum. non Cyri Persarum Regis, qui singulos sui exercitus milites, qui penè innumerabiles erant, propriis nominibus appellabat. non Themistoclis, qui recordabatur, etiam quæ nollet, quæ vellet, non poterat oblivisci. non Senecæ, qui in prodigium usque eò processit, ut duo millia nomina recitata, quo ordine erant dicta, referret. sed ejus in primis memoriam probò, qui sui nunquam capitur oblivione, oraculum Delphicum præ oculis habens, Nosce te ipsum. quod est dictum, Memento te esse hominem, & proinde moriturum. deberet enim Princeps, tria hæc habere verba in corde radicitus infixæ. Scio me ascendere, ut descendam; virere, ut arescam;adolescere, ut senescam, & demum vivere, ut moriar. cui concinnè adagium illud, Homo bulla. quo admonemur, humanâ vitâ nil esse inanius, est namque (instar bullæ) quæ apparet in aquis momento temporis enascens, simul & evanescens, sic homo, Divo Jacobo teste, est vapor ad modicum parens, qui deinceps exterminabitur. Hinc

Isa. c. 40. Isaïas vocat hominem, herbam; omnis caro fœnum, & omnis gloria ejus quasi flos agri. Siquidem herba primò virefcit, mox arescit, tandem

Iac. c. 4. sic homo, Divo Jacobo teste, est vapor ad modicum parens, qui deinceps exterminabitur. Hinc

Isa. c. 40. Isaïas vocat hominem, herbam; omnis caro fœnum, & omnis gloria ejus quasi flos agri. Siquidem herba primò virefcit, mox arescit, tandem

dem putrescit; homo virescit in flore juventæ, arefcit in senio, putrescit in morte. Adverte, quod dicitur, flos agri, non horti; quare hoc? quia flores horti, nempe, lilia, rosæ, hyacinthi, & id genus, per aliquos dies remanent florentes, at flores qui in agris crescunt, variis periculis sunt expositi, qui vel à prætereuntibus carpuntur, vel pedibus proteruntur, vel à bestiis depascuntur, ita ferme de homine, proinde dicebat Jobus; Qui Iob. c. quasi flos egreditur, & conteritur, & fugit velut 14. umbra. Porro ex omnibus floribus, qui in hortis, vel agris virent, nullus est qui duas sustineat brumas, aut bis nivofum gelu patiatur: rident quidem in Vere, folia explicant, venustatem ostentant, odorem spirant, & colorum varietate delectant, sed quàm primùm, ut aëris Hiems ingruit, & bruma rigere incipit, cervices demittunt, colorem amittunt, omnis decor evanescit, & sensim penitus emoriuntur. idem de hominibus dicendum. quis est inter tot hominum millia, qui ad ducentos annos pervenerit? imò. quis ad centum? quàm pauci ad sexaginta? Ad hanc rem facit appositè ænigma illud ab Oedipo declaratum, Quodnam est illud animal, quod dicitur quadrupes, bipes, & tripes? En homo, qui graditur in infantia quatuor pedibus, quia manibus quoque, pedum vice nititur, & reptat, deinde confirmato gradu, duobus pedibus se sustinet, donec decrepit ætas baculum, quasi tertium pedem addit. sed quia miser homo luteos habet pedes, proinde ad primum lapidis ictum, statua corporis citò corrui, in cinerem redigenda. inter mortuum & vivum differentia est in solo puncto. Hebræi enim, si credimus Eusebio, unico nomine significant hominem vivum & mortuum, nimirum, methim, sed cum scribi-

Euseb. li.  
10 de  
præpa-  
rat. E-  
uang. c.  
2.

scribitur, solo puncto distinguitur, quia si scribatur cum tſere, duobus punctis sic dispositis (...) significat mortuum, si autem scribatur cum ſchebā, punctis aliter dispositis, hoc modo, nimirum (:) significat vivum. itaque idem nomen diverſo modo ſcriptum, ſignificat vivum & mortuum. en vita brevis, quæ in ſolo puncto conſiſtit. ô miſeram Principum conditionem, quandoquidem Reſinæ morti ſcepra ligonibus æquanti, tributa ſolvere, & ipſi, vel inviti coguntur.

*Pallida mors æquo pulſat pede*

*Pauperum tabernæ, Regumque turres,*

Valer.  
Max.lib.  
8.

Quis unquam felicior Alexandro, qui ob res præclarè geſtas cognomen Magni adeptus eſt? mors tamen illum rapuit, vermibusque corrodendum tradidit; cujus acerbi caſûs famâ auditâ, plurimi ad ſepulchrum convenere philoſophi, quorum alter dixit, Heri ô Alexander multos poteras à morte liberare, hodie mortis jacula non potes evitare. alius verò ſic diſcurrebat, Heri, ô Alexander, ingenti Imperio tumebas, proinde ægētes timebant; hodie ſuper faciē tuam impune diſcurreunt vermes. Heri, ô Alexander, exclamabant alii, orbis totus non ſufficiebat tibi, audiens enim ab Anaxagora plures eſſe mundos, non ſine lachrymis dixiſti, Heu me miſerum, qui ne uno quidem adhuc ſum poſitus; ſed hodie nobile corpus exiguo tegitur lapillo. Quod perpendens Philoſophus moralis, in verba hæc aurea prorupit, Alexander orbi terrarum anguſtus eſt, orbis Alexandro anguſtus eſt. pulchre Poëta,

*Æſtuat infelix anguſto limite mundi.*

*Sarcophago contentus erit; Mors ſola ſatetur,*

*Quantula ſint hominum corpufcula.*

Hoc ſemper in corde fixum habebat Carolus,  
qui

qui rerum gestarum gloria insignis, Magni cognomentum obtinuit. Hinc cum in extremo mortis articulo constitutus, à suis rogaretur, quænam insignia sepulchro affigi vellet? respondit, Sola mortis insignia sculphantur, hæc est enim Regina illa potens, quæ omnes meas victorias in nihilum redegit, & de me ipso victore triumphum agit. Non petiit Ægypti pyramides, non mausolea Cariæ, non signa bello parata, non victrices Romani Imperii aquilas, non rerum gestarum memoriam, quæ apud posteros immortalis haberetur, sed solam mortis figuram, appositâ inscriptione, Sola mors omnia æquat. Nec minori admiratione dignum est, quod olim Saladinus Ægyptiorum Regum maximus fecit, hic cum totum Orientem subjugasset, Occidentem terruisset, Asiam domuisset, totum denique Orbem concussisset, ut morti se jam vicinum vidit, mandavit ut statim ac spiritum exhalasset, tunica interior per omnes civitatis vicos, in hasta circumduceretur, & à præcone altâ voce inclamaretur, Saladinus Orientis flagellum, Asiæ domitius, omnium populorum terror, ex omnibus suis victoriis in bello partis, tandem Reginæ morti cedens, nihil secum defert, nisi unicum hoc indusium, quo in sepulchro operitur. quasi & ipse diceret, Sola mors omnia æquat. hinc canit Poëta,

Gregor.  
Turon.  
lib. hist.

Anton.  
p. 1, tit.  
17. c. 9.

Falgor.  
li. 7. c. 2.

*Flaruit in toto qui Rex Oriente potenter,*

*Nunc jacet. ex tantis, quid tulit? ecce nihil.*

Vidit moriens illam vanitatem, quam vivens reputabat majestatem. Hinc Vates regius dicebat; *Psal. 48.*  
Cum interierit homo non sumet omnia. si non omnia, igitur aliquid. sed quid sumet, cum nudus jaceat? opera sola. Opera illorum sequuntur illos. De magno Cyro nonne tradunt historici verba

verba hæc aurea sepulchro affigi jussisse, ut ostenderet Reginae mortis Imperium,

*O vir quicumque es, & undecunque advenis,  
Ego sum Cyrus, qui Persis imperium constitui,  
Pusillum hoc terræ, quo meum tegitur corpus,  
Mibi ne inideas.*

Plutarc.  
in vita;  
Xerxis.

Factum planè memorabile, quod de Xerxe Rege veteres tradidere. cùm dux iste potentissimus innumerabiles militum copias collegisset, & eas in acie constitutas, videndi desiderio flagraret, in verticem montis se contulit, è quo cùm totum Hellespontum stratum navibus, & terram militibus coopertam cerneret, obortis lachrymis suspirabat. hoc spectaculo viso, mirabantur duces, & tam inusitati casus causam petentes, dixere; Unde hic ejulatus, ô Rex? anne jam animum contrahis; num ante tubam pavor occupat artus? hæctenus te strenuum ducem ostendisti, & modò in lachrymas ruis? quibus cum fletu ait, Non ita viri, non ita, nulla unquam me formido invasit, aliud quid mente revolve, quod mihi lachrymas excutiat. hinc video tot militum millia, quæ in acie produxi, & heu, centum ab hinc annis, nullus omnino superstes erit, omnes in cinerem redigentur, de omnibus Regina mors triumphumaget, quasi dictum illud, & ipse decantaret, Sola mors omnia æquat.

Philippus Macedonum Rex, cùm palæstram, in qua Græci luctabantur, ingressus esset, & inter luctandum, ad terram prolaberetur, jacentis sui corporis imaginem, in arena expressam videns, & quàm parum loci occuparet, considerans, jocando cœpit dicere, O quàm minimam terræ partem naturâ sortiti, orbem appetimus universum? Utinam corda Principum, quibus  
totus



totus orbis non sufficit, regia hæc verba penetra-  
rent, profecto superbæ vestem exuerent. Proin-  
de sapienter consulebat propheta; Vide vias tuas Hierem.  
c. 2  
in convalle. quæ verba Septuaginta interpretes,  
appositè transtulerunt, Vide vias tuas in sepulchro.  
quasi diceret; cogita, ô homo, quàm exiguum tibi  
post mortem paratum est domicilium, ut non nisi  
septem pedum spatium, tibi concedendum sit.  
Hoc fortasse Ethæi volebant innuere, dum sibi in Gen. 23.  
Regem Ephron elegerunt, qui apud Hebræos so-  
nat pulverem, quasi dicerent, Non superbè impe-  
rabit, qui pulverem se esse meminerit. Hoc appri-  
me noverat Severus Imperator, hic enim mortis Dion.  
Nic. in  
vita Se-  
ver.  
memoriam præ oculis habens, sibi adhuc viventi,  
loculum construï iussit, quem sæpe manibus con-  
trectans, his verbis alloquebatur, Tu virum capies,  
quem totus orbis terrarum non capit. ac si dice-  
ret; Sola mors omnia æquat.

Huic rei facit egregiè Epitaphium illud insigne,  
quod sibi ipsi descriplerat Poëtarum Princeps, is  
enim extremum vitæ præsentiens, quatuor carmi-  
na composuit, miro artificio elaborata. in quibus  
ostendit, se compilando tres libros, vehementer  
insudasse, librum nempe, de Bucolicis, in quo tra-  
didit artem pastoralis curæ; librum de Georgicis,  
in quo artem agri colendi descripsit; & librum  
Æneïdos, in quo scientiam militarem instituit.  
sed hinc quid mihi? ecce nudus egredior pusillo  
terræ claudendus,

*Pastor, arator, eques, pavi, colui, superavi,*

*Capras, rura, hostes, fronde, ligone, manu.*

*De capris pastis, de rure fato, hoste subacto,*

*Nec lac, nec segetes, spolia nulla tuli.*

Sed jam satis superque profanis historiis inhæsi-  
mus, rationi consonum est, ut & sacræ quædam  
pro-

Ciacon.  
in vita  
Lucii  
tertij.

producantur. primus itaque in campum prodeat magnus ille Basilius Cappadociæ Episcopus. hic namque in solemnitatibus præcipuis, quando ex officii sui præscripto, magnificam pompam præ se ferebat, ne fortasse intumesceret, uni ex domesticis mandabat, ut in medijs honoribus, in aurem mordicus diceret; Mortem cogita pater, & sepulchrum tuum perfici jube. Huic rei appositè facit Epitaphium pro Petro Comestore apud sanctum Victorem Parisiis, cum hac inscriptione,

*Petrus eram, quem petra tēgit, dictusque Comestor,  
Nunc comedor nimis, & docui, nec cesso docere  
Mortuus; ut discat qui me videt intumultum,  
Quod sumus, iste fuit, erimus quandoque quod hic est.*

Hanc sacram philosophiam toto cordis affectu, observavit Pius Quintus æternis elogiis celebrandus ex Dominicana familia ad Pontificatum assumptus. hic enim piam hanc inscriptionem in sepulchro adhuc vivens sibi paravit.

*Pius Papa Quintus Boschenfis, diem mortis præ oculis habens, monumentum istud erigi mandavit, pro cadavere suo reponendo, quando divinae clementiæ visum fuerit, ipsum ab hoc sæculo nequam eripere.*

Hinc in Summi Pontificis solemnī coronatione, ad memoriam mortis in mentem revocandam, pia inolevit consuetudo, ante ipsum quandam concremari stipulam, quæ brevitate suæ flammæ, vitæ etiam fugacitatem designat, inde protinus acclamatur, Sic transit gloria mundi Pater sancte. ac si diceretur,

*Vir bone, quid curas res viles? res perituras?  
Nil profuturas, damno quandoque futuras?  
Nemo diu mansit in culmine, sed citò transit.  
Est brevis, atque levis, in mundo gloria quævis.*

Quocirca Pater Augustinus, ut memoriam mortis

tis

ris in Principe excitaret, his verbis sæpe alloquebatur, Inspice sepulchra, & discerne si potes, victum à Rege, fortem à debili, pulchrum à deformi, tunc memorare naturæ tuæ, ne extollaris. quasi diceret,

*Cum tumultum cernis, cur non mortalia spernis?*

*Tali namque domo clauditur omnis homo.*

*Quid valet argentum? quidve annis vivere centum?*

*Post mortem sumus, pulvis, & umbra sumus.*

Rex iste sapientissimus, pro cuius elogio æternitati commendatur divinum illud oraculum, Inveni virum secundum cor meum, quoniam probè noverat mortis meditationem valde conducere ad clavum Imperii ritè tractandum, proinde illam præ oculis semper habebat, & plorans frequenter dicebat; Cinerem tanquam panem manducabam. perinde ac si diceret, sicut panis Ps. 101. est cibus ad vitam corporis sustentandam necessarius; ita mortalitatis humanæ recordatio, mirum in modum prodest, ad vitam animæ fovendam. Hac ratione adducti, egregiam hanc inscriptionem litteris aureis insignitam, sepulchro Palladii apposuerunt benevoli.

*Hic jacet Silvius Palladius, qui ut moriens viveret, vixit ut moriturus.*

Utinam Christianus Princeps quotidie viveret, ut cras moriturus. neminem quippe læderet, jus suum unicuique tribueret, personam patris ageret, communi commodo consuleret, non pro libidine potestatis moveretur, sed freno tantum rationis duceretur, ad summam rei administrandam, & tandem superbiæ fluctus comprimens, confusus, & tremens, exclamaret, Quid superbis terra, & cinis? hæc est via Eccl. c. 10. regia, ad ritè moderandas Imperii habenas. Proinde Pausanias Lacedæmoniorum Rex, cum Si-

Plat. e-  
pist. ad  
Trajan.

Sap. c. 7.

Psal. 88.

monidem philosophum rogasset, ut sibi dignum aliquod documentum traderet, ad potestatem Imperii rectè administrandam, respondit vir sapiens, Hominem te esse memento. ac si dixisset, nihil ad bonum regimen magis accommodatum, quàm cogitare se citò moriturum. Quam doctrinam planè auream olim comprobavit Plutarchus. Cùm enim Trajanum Imperatorem, ejus discipulum, missà quâdam epistolâ docuisset, quas virtutes sectari, quænam vitia evitare, & quibus rationibus, boni Principis officium implere oporteret, post varia, & quidem præclara monita, faciliè eum omnia impleturum dixit; si unica mortis, ad hæc omnia, accesserit memoria. Ego scio, inquit, quod hæc omnia feceris, si tui nunquam oblitus fueris. Quis non miretur, tanto Imperatori, ad tam amplum imperium prudenter administrandum, aliud præceptum non esse præscriptum, quàm unicam mortis meditationem? Salomon quoque, quo nullus unquam fuit sapientior, quoties eum mentis elatio extra rationis terminos abriperet, ut vanos impetûs retunderet, hoc ipso freno usus est. Sum quidem & ego mortalis homo, similis omnibus. quasi diceret; quis sum ego, nisi cibus vermium? terra ista, quâ gravatus incedo, mihi protestatur, quod neque Regni potentia, neque sapientiæ fama, neque sanguinis claritas, neque divitiarum gloria, à Reginæ mortis unguibus me eripient, quoniam sum homo mortalis, sicut & cæteri, & quis est homo qui vivit, & non videbit mortem? hinc supremus artifex, hominem de limo terræ formavit, ut terra ipsa, quæ inter omnia elementa infimum locum obtinet, & omnium pedibus conculcatur, suæ vilitatis illū admoneret. Hoc præclaro argumento utebatur etiam regius Vates,

tes, ad deprimendas mortalium elationes, dicens; Non apponat ultra magnificare se homo super terram. quod sic ex Hebræo vertit Divus Hieronymus linguarum peritissimus, Non apponat homo magnificare se de terra. doctè quidem, ac si diceret: Quid se magnificat homo de terra? si ex aliqua cœlesti materia compactus esset, non mirum, at cùm sit ex terra formatus, & citò in terram sit resolvendus, ad quid magnificare terram, vermibus corrodendam? Huc facit opportunè, quod de Brachmanis legitur. Cùm enim ab Alexandro petissent donum immortalitatis, ipse verò respondisset; Rem prorsus impossibilem postulatis filii, quia & ipse mortalis sum, tunc protinus adjecerunt, Cur ergo tam insanâ regnandi libidine flagras, ac si nunquam morti tributum soluturus? Celebrem statuam illam multiformentem mente revolvat Princeps, cujus quidem caput aureum, brachia argentea, pectus æneum, tibiæ ferreæ, ac luteos pedes habebat. Imperii majestate, divitiarum copiâ, potentiae magnitudine, gemmarum splendore, refulget Princeps (non inficior) at luteos pedes habet, quia & ipse moriturus, & relictis splendoribus, suspirans, & gemens exclamabit, Solum mihi superest sepulchrum. Proinde regius Vates Principes admonebat, Vos autem sicut homines moriemini. perinde ac si dixisset, Num vos æternos esse existimatis? num semper victuros, quia nunc sceptrâ aurea manu gestatis? toto cœlo aberratis. Nam statutum est omnibus hominibus semel mori. & mors sceptrâ ligonibus æquat. Ubi quæso, Cæsar ille, in curru eburneo triumphans, quem quadraginta elephantibus trahebant? Ubi Marcus Antonius à leonibus invehctus? ubi Aurelianus, carpento, quod à

Psal. 9.

Dan. c. 2.

Psal. 81.

Job c. i.

cervis trahebatur, insidens? mors sola triumphat; & unusquisque dicit, Solum mihi superest sepulchrum. Hinc pictores, ut mortis naturam exprimerent, illam proponunt oculis hominum, nudam, lumine cassam, auribus carentem, & falce armatam. nudam quidem, ut doceant mortales, quod hinc nudi exire debent, Nudus egressus sum, & nudus revertar. sed cur lumine captam? tria à Poëtis cœca describuntur, amor, justitia, mors. amor, quod omnes sine ullo personarum delectu feriat, vel potius ab effectu, quia amantes verè amantes, & cœcos efficiat. ut quidam experimento cognovit, proinde dicebat,

*Nabam per gelidas brumalis gurgitis undas,*

*Nec mihi solstitium, nec grave frigus erat.*

*Omnis amor cœcus, non est amor arbiter æquus,*

*Nam deforme pecus, judicat esse decus.*

Justitia, quia omnes æquali lance judicat. mors verò quòd obvia quæque ad terram prosternat. sed quorsum caret auribus? quia clamoribus non flectitur, lachrymis non movetur, & ad preces humanas veluti rigida rupes obsurdescit. hinc à Pericle Atheniensium duce, Atropos inexorabilis appellatur. Porro quid per falcem, quam feralis hæc Megæra manibus tenet, & vibrat? quoniam mors omnia solo æquat. Ubi nunc aurea tot Regum sceptrà? ubi tot purpuratorum galeri? ubi tot Pontificum insulæ, & throni? mors omnia æquat.

*Est commune mori, mors nulli parcit honori,*

*Debilis, & fortis, veniunt ad funera mortis.*

Diogenes Cynicus cùm sepulchra aliquando curiosius inspiceret, ubi defunctorum ossa cernebantur, Alexandrum Macedonem obvium habuit, & cùm ille percunctaretur, quid inter mortuos ageret? in hac ossium congerie, patris tui Philippi calva-

calvariam quæro, sed à cæteris dignoscere non valeo. hoc commento docens, in mundi hujus theatro, magnum quidem esse hominum discrimen: at in atra mortis aula, inter pauperes & Reges nullam prorsus differentiam. In densa silva, quamdiu ipsa viret, diversa arborum genera videmus, nodosâs quercûs, umbrosas fagos, frondosas abietes, aliasque arbores, & numero plurimas, & colore varias; quarum aliquæ, terræ adhærent; nonnullæ verò caput, & comas intra nubilâ condunt; aliquæ è floribus, aliæ è frondibus, & aliæ è fructibus dignoscuntur: sed mox ut securis ad radicem accedit, & illæ in ignem conjectæ, & in cinerem redactæ, quis tunc laurum à rubo discernet? Mundum hunc silvam quandam, & homines arbores, si appellamus, non erit absolum; quandoquidem etiam mundi hujus silva, quamdiu viret, variis coloribus distincta est, sed primùm ut mors falcem admovît, deinde in cineres redegit, nullum amplius apparet discrimen.

Ad hanc rem fortasse Daniel allusit, dum mortem comparat arieti duobus cornibus armato, quorum unum majus, alterum erat minus. nempe, ut discamus, nullam stirpem adeò nobilem reperiri, nec ullam originem adeò humilem, quam non feriat alterutro horum cornuum. cornu majorit angit Principes, & illustres heroës; minori verò pauperes, colonos, ac vilem plebeculam. currebat hic aries ab Oriente ad Occidentem, ab Aquilone ad Austrum, ut hinc manifestum fieret, mortem sine ullo ætatis intuitu, omnes invader. Ad Orientem tendit, cùm tenellos infantes, vix dum vivere incipientes, abripit. Ad Occidentem, cùm decoctos, & decrepitos senes de medio tollit. In Meridiem verò, cùm juvenes in

Dan. c. 8.

ætatis flore constitutos, in quibus calor, & humor viget, intercipit. ad Septentrionem autem, cùm frigescentes, & in senium vergentes prosternt. O mors verè parca, quia nemini parcis.

Quàm lepidè Apostolus ad memoriam excitandam invitabat, Statutum est omnibus hominibus semel mori; ac si diceret, respublicæ optimè constitutæ, præter jus civile commune, decreta quædam singularia præscribunt, quæ cæteras civitates non ligant. In universo hoc orbe tria sunt Regna, Regnum cæleste, inferorum, & terrenum. his tribus quædam leges peculiares sunt, & propria statuta. In cœlesti quippe Regno lex est, qua à morte omnes ejus incolæ præservantur. Præcipitabit Dominus mortem in sempiternum; & ideo dicitur terra viventium, Portio mea Domine sit in terra viventium. Regnum inferorum hanc legem habet, quâ omnes morti perpetuæ subjiciantur, Mors depascet eos. terrenum verò, hoc decretum habet, quod semel omnes moriuntur; Statutum est omnibus hominibus semel mori. statutum irrevocabile ab omnibus observandum, tributum universale ab omnibus solvendum, iter commune, ab omnibus calcandum.

Apud Cajetam in sepulchro marmoreo, æneaque urna, hæc inscripta reperiuntur Scipioni Africano,

*Devicto Annibale, captâ Carthagine, & aucto*

*Imperio, hos cineres marmore tectus habes.*

*Cui non Europa, non obstitit Africa quondam.*

*Respice res hominum, quàm brevis urna premit.*

● Hoc apprime cognovit Alexander Magnus. sic divina referunt monumenta, Postquam Alexander Macêdo percussit Darium Regem Persarum, post hæc cognovit, ut moreretur. Post triumphos, post victorias, post debellatum terrarum orbem. Quid super-



supereſt, ô Alexander? tandem, tandem tendimus in pulverem, ex quo formati ſumus, & ſolùm nobis ſupereſt ſepulchrum. Quid vano labore conſumeris, ô Trismegifte, in laudanda hominis natura? cur hominem, magnum miraculum auſus es appellare? magnum miraculum eſt homo. an ignoras hominem eſſe cinerem, & in cinerem redigendum? Cur tu Pythagora, hominem eſſe deum mortalem dixiſti? homo eſt deus in humano corpore latens. ſi ſubtiliùs naturam ejus indagaſſes, vidiffes utique fundamentum ejus eſſe pulverem, & proinde corruptioni obnoxium. Et tu Platô philoſophorum Princeps, quomodo auſus es hominem appellare divinum genus? divinum quoddam genus eſt hominibus. Quomodo audes, ô Plotine, hominem è luto formatum, univerſum quoddam vocitare? homo eſt quoddam omne. ſed majori etiam encomio, tu ô Gregori Pontifex, hominem decoraviſti, ſiquidem illum univerſam creaturam nominaviſti. explicans enim illud Euangelicum; Prædicare Euangelium omni creaturæ, per omnem creaturam ipſum hominem intellexiſti. eſſe namque habet commune cum lapidibus, vivere cum plantis, ſentire cum animalibus, intelligere cum Angelis. Porrò nullus veſtrum ſcopum attigit. Unus David pro rei dignitate, de homine locutus eſt, cùm ait, Homo tanquam pulvis, quem projicit ventus à facie terræ. ac ſi diceret, noli intumeſcere, ſed memento originem tuam à terra prodeuntem, in terram etiam tendentem: ex pulvere conditus eſ, ô homo, in pulverem etiam reverteris. Non ineptè hic ſubjiciam Agathoclis exemplum, is cùm eſſet figuli filius, ita illi arriviſit fortuna, ut Rex Sicilia crearetur, veritus autem, ne regiâ dignitate inſoleſceret,

Pſal. 1.

 Alex. ab  
 Alex. li.  
 3. c. 21.

ut semper paternæ obscuritatis memor esset, figulina vasa, unà cum aureis & argenteis ad mentiam quotidie voluit afferri. hanc vivendi rationem instituas, vellem, ô Princeps. tu enim figuli es filius, sic divinâ attestante Scripturâ; Manûs tuæ Domine fecerunt me. licet ad sceptrum te Deus evexerit, licet diadema capiti imposuerit, non superbiâ extollaris, sed pristinæ tuæ originis memor, inter aurum & gemmas, vas luteum ante oculos pone, & memento sceptrum Regale, olim fuisse arborem. Cur ergo superbis terra, & cinis?

Huc perbelle faciunt variæ illæ hominis descriptiones, quas scientiæ in unum congregatæ, ex præscripto Minervæ tradiderunt. Dialectica primo loco dixit; Homo est breve quoddam Enthymema; pro antecedenti, habet ortum; pro consequenti, interitum. Astrologia ita hominem descripsit, Homo quasi luna mutabilis, quia nunquam in eodem statu permanet, sed semper ad corruptionem tendit. non tamen ante peccatum fuisset homo corruptioni obnoxius, justitiæ originalis clypeo protectus; sed in ipso momento, quo peccatum intravit in mundum, statim morti janua patuit. per peccatum mors, ait Paulus, non quod peccatum fuerit causa per se hujus defectûs, sed quasi removens prohibens, quoniam per peccatum sublata fuit Justitia originalis, per quam non solum animæ vires continebantur sub ratione sine omni deordinatione, sed totum corpus animæ sine defectu. Physica ita respondit, Homo est animal rationale mortale. Mathematica ad rem nostram propiùs accedens, brevi compendio conclusit, Homo est veluti figura sphærica. Quæ quidem descriptio præ cæteris omnibus, placuit Minervæ. nec injuriâ. siquidem, sicut figura sphærica,

in idem punctum, quo incipit, terminatur; ita homo initium sumens ex terra, in terram tandem definit. Hæc est Academia, quæ ad meliorem frugem homines reducit. ita sentiebat Augustinus, Nihil sic revocat à peccato, quàm frequens cogitatio mortis. ita Hieronymus, Facile contemnit omnia, qui semper cogitat se esse moriturum. ita Gregorius, Non potest melius domari caro viva, quàm cogitando, qualis erit mortua.

Antæus luctans cum Hercule, dum terræ adhærebat, non poterat superari. habet mortis vexillum ante oculos, terram te esse cogita, & mundi illecebras conculcabis, hac duce victor eris. Hinc antiqui terram appellabant magnam matrem, proinde infantes recenter natos, in terra tanquam in sinu materno reclinabant, imò ter bonam etiam vocitabant, ob triplicem bonitatem, nempe, quia nascentes homines excepit, exceptos toto vitæ cursu sustentat, ac defunctos intra gremium suum recipit, sed à vermibus corrodendos. quod considerans Joannes ille magnus, qui ob sermonis suavitatem, os aureum nominatur, dicebat: Proficiscere, quæso, ad sepulchra, siquidem in illis cum dolore cernes naturam tuam dilapsam, corpora corrupta, ossa in pulverem redacta. considera tunc, quis sit sapiens, quis insipiens, quis Imperator, quis miles, quis dominus, quis servus. tunc dicas mihi, ubi sunt flores adolescentiæ in sepulchris? ubi serenitas frontis? ubi vultus lætitiæ? ubi orationis suavitas? ubi morum venustas? nonne omnia sunt cinis, vermis, & fœtor? Quid ergo superbis terra, & cinis? ô miser, solum tibi superest sepulchrum. O memoria salutaris, quæ adversus peccati insidias, insignem victoriam refert. potest quidem merito inclamare strenuus miles, Hac

duce victor ero. ô quàm appositè ad rem præsentem facit egregium insigne, quod gerebat in stemmate regio, Julianus Imperator, Aquila nempe à sagitta perculsa, quæ confecta fuit ex ejusdem plumis, additâ notulâ, Ex ipsa contra ipsam. mors ex peccato, at memoria mortis occidit peccatum, unde potest dicere, Ex ipso contra ipsum. Proinde Salomon exclamabat; Memorare novissima tua. sed quare? quia tunc occides peccatum, nam in æternum non peccabis. non enim ignorant sacrarum litterarum periti, quod ly, & sæpe sumitur pro quia, sic intelligitur illud; Benedicta tu in mulieribus, & benedictus. quare benedicta? quia benedictus fructus. ita illud, posuisti in nervo pedes meos, & observasti semitas meas. quare continui pedes meos? quia tu dinumeras gressus meos. iratus es, & peccavimus tibi. quare iratus? quia peccavimus. ita in hoc loco, memorare novissima tua. quamobrem? quia non peccabis. experimento enim comperies, quod omnia tanquam fumus evanescent, & rubore perfusus, exclamabis, Quid superbis terra, & cinis?

Pf. 145. Doctrinam hanc sanè auream, bene noverat David, Rex Serenissimus, proinde dicebat; Nolite confidere in Principibus, neque in filiis hominum, in quibus non est salus. At quare, ô David sancte? exhibit spiritus ejus, & revertetur in terram suam, in illa die peribunt omnes cogitationes eorum. Paraphrasis Chaldaïca legit; omnes machinationes eorum. Magne Deus, quænam dicendi copia sufficeret enarrare, varias ac immensas machinas, quas in mente sua erigunt potentes? arces quas fabricant? turres quas construunt? profectò, si tunc ad mentem potentis pateret accessus, utique labyrinthum Creticum erectum videremus.

mus, diversis machinationibus circumseptum, nempe, tale Regnum possidebo, talem civitatem expugnabo, totius Orbis dominatorem aliquando me constituam. & ecce repentè Regina mors ad radicem arboris admovet falcem, quæ omnes machinationes ad terram proster- nit. & in illa die pereunt omnes cogitationes ejus. Nonne sic contigit Pharaoni potentissimo Regi? ita quidem prorsus. dicebat enim, Per- Exod. c. 23. sequar inimicos, comprehendam, dividam spo- lia, implebitur anima mea, evaginabo gladium meum, interficiet eos manus mea. en insanæ cogitationes Regis. audiamus exitum. Flavuit spiritus, operuit eos mare, submersi sunt quasi plumbum in aquis vehementibus. Et ecce in illa die, dissipatæ cogitationes ejus. siquidem de cunctis mortalibus mors sola triumphat, divites & pauperes, populos & Principes, juvenes & senes, sagittis aculeatis omnes transfodiens. & hoc forte volebat innuere regius Vates, cùm de regno Reginae mortis loquens, dicebat; Gladium Psal. 7. suum vibravit, arcum suum tetendit. gladius cominus percutit, eminus transverberat arcus, mors jugulat vicinos, senes nimirum, sed & distantes, nempe juvenes celeri cursu invadens, ad terram prostermit. Proinde Salomon, omnium Regum sapientissimus, frequenter dicebat; Memor esto, quoniam mors non tardat. ac si dixisset, noli perpetuam tibi vitam polliceri, ô Princeps, noli tibi annos spondere Nestoreos, sed cogita, ubicunque degas, mortem tibi nocte, dieque instare, astare, citatoque gressu te insequi, ut te semel comprehendat, ubique te expectat, tu si sapiens eris quotidie expectabis eam, ita consulebat ille Poëta,

*Non est, crede mihi, Sapientis dñcere, Vivam,  
Sera nimis vita est crastina, vive hodie.*

In ipso mundi primordio inermis quodammo-  
do, & robore destituta videbatur, homines au-  
tem adeò validi, ut eì etiam insultarent, cùm vi-  
tam ad multas annorum centurias extenderent, &  
ad millenarium numerum quàm proximè acce-  
derent: sed paulatim tantam potentiam induit, ut  
omnes invadat, obruat, ac facili negotio proster-  
nat. Quis fuit ille lapillus, sublimi monte delapsus,  
qui pedibus statuæ advolutus, ipsam dissipavit. &  
in cinerem redegit? mox adeò excrevit, ut  
universum mundum replerit? statua illa humanæ  
naturæ imaginem referebat. caput aureum, justi-  
tia originaria est, lutei pedes, fragilitas morta-  
lium, lapillus, ipsa mors, mons ingens, peccatum,  
à quo lapillus ille delapsus, qui omnia in cinerem  
redegit. sed iste lapillus ad tantam magnitudinem  
se extulit; mors nimirum, adeò potens facta est,  
ut totus orbis terrarum sceptris ejus pareat; im-  
perat in Africa, dominatur in America, regnat  
in Asia, triumphat in Europa, adeò ut jure pos-  
sit dici, quod uterque Polus regni ejus limes est,  
& denique omnes nationes, ad illius imperium  
contremiscunt. Hic sanè non possum non admira-  
ri, quod inter illos purpuratos Principes, qui co-  
ram Dario Rege tam sapienter de fortitudine dis-  
ceptarunt, nullus omnino mortis meminerit. Qui  
enim mortem omnium rerum fortissimam dixisset;  
procul dubio veritatis scopum attigisset. ipsa,  
namque Reginas debellat, Regibus imperat, po-  
tentias omnes confringit. hinc meritò mulier illa  
Thecuitis, coram Davide Rege ait; Omnes mori-  
mur, & quasi aquæ dilabimur super terram. quasi  
diceret, cogites tecum velim generose Princeps,  
quod

quod sicut flumina , cùm varios agros rigarunt, ac variis anfractibus per varias provincias defluerunt, in mare tandem delabuntur; non secus etiam homines, postquam dudum in vitæ hujus stadio evagati sunt, in terram decidunt, & in sepulchrum, velut in Oceanum descendunt, è quo nunquam amplius egredientur; nisi ad tubæ sonitum, cùm acclamabunt Angeli; Surgite mortui, venite ad judicium. Sed cur ista mulier dicit, omnes? quia inexorabile fatum æquat omnia solo. Quis modò regnat in Persia, de prosapia Cyri? Quis in Media, de familia Darii? Quis in Græcia, de stemmate Alexandri? Quis Romæ de stirpe Cæsaris, Omnes, omnes morimur. sed cur dilabimur, sicut aquæ? quia mors concitato cursu nos apprehendere nititur. Cujus rei egregium sanè Emblemata nobis proponit Joannes, dum se vidisse testatur; equum pallidum, & equitem eï insidentem, cui nomen mors. Vidi equum pallidum, & qui sedebat super eum, nomen illi Mors.

Apoc.  
c.6.

Quorsum mortem equo insidentem? ut apertè exprimeret, quam citatis gressibus ad vitam hominibus eripiendam feratur mors. Quocirca vitam nostram cursui Solis persimilem dixere sapientes, & quidem appositè: lucidum namque illud æstrum videtur non moveri, cùm tamen interea tanto impetu feratur, ut ad singulos horæ quadrantes, centum viginti milliaria millia conficere, doceant philosophi. id ipsum de vita hominis dicere licet. videtur quidem loco quiescere, at cursoris instar celeberrimi, semper ad finem properat. hinc est quod naviganti nos comparabat Gregorius, hic namque opinatur, arbores, agros, scopulos moveri, se verò loco quiescere; at non sic res se habet. navis iter agit, cætera verò neutiquam moventur,

ventur , sic homo vix natus , currit ad corruptionem , licèt ipse non sentiat. siquidem calor naturalis consumit humidum radicale , in quo consistit vita , quod , vel non restauratur per nutrimentum , secundùm medicos , vel restauratur quidem , sed non secundùm æquivalentiam , ajunt Philosophi.

Arist. 2  
de ge-  
nerat.

& sic necessariò tandem sequitur corruptio , quia omne agens in agendo repatitur , limâ limando ferrum conficitur , gladius scindendo hebetatur , ita calor vitalis cibos decoquendo minuitur , & demum opprimitur. sicut vinum , cui imponitur modicum aquæ , convertit illam in se ipsum , efficitur tamen minùs validum , at si sæpius apponatur , tandem vinum corrumpitur , & efficitur aqua , sic nimirum , cùm virtus humana non omnino restauretur per sumtionem alimenti , proinde , ut mors sequatur , oportet , quæ licèt videatur moram trahere , alatis tamen pedibus volat. hinc dicebat Jo-

Job c. 7.

bus , Militia est vita hominis super terram. notandum , quod , ubi in vulgata editione dicitur , militia est vita hominis ; in Græco legitur , Piraterium est vita hominis , sicut namque piratæ nullibi consistunt , nec anchoram jaciunt , ut securi persistant , sic & vita nostra quasi Piraterium , quia nullam ferè securam habet consistentiam. quod ex alio loco magis dilucidè colligitur ; Dies mei , dicebat idem Jobus , transierunt quasi naves , poma portantes. Hebræus legit , transierunt cum Ebe ; est autem Ebe , si credimus Pagnino , fluvius rapidissimus Arabiæ , qui tanto impetu fluit , ut naves deferat velocissimè . sed quæso , cur portantes poma , non alias merces ? ut vitæ brevitatem ostendant , nam portantes poma , die , nocteque navigant , ne marcescant. Vatablus , & Pagninus ex Hebræo vertunt ; Sicut navis voluntaria , dicitur autem voluntaria , quasi volet ad  
libi-



libitum voluntatis. & nos pro exigua hac vita tantum laboramus? meritò exclamabat divus Hieronymus, O brevis nostra æternitas! quotidie morimur, quotidie immutamur, & tamen immortales nos esse putamus. Stultos Agrigentinos vocavit antiquitas, de quibus dicitur, Agrigentini epulantur, ut cras morituri, ædificant, ut semper victuri. hinc vita hominis comparatur vento; Memento Domine, quoniam ventus est vita mea; nam ventus invisibiliter, & sine mora transit, vita nostra nil aliud est, quàm cursus ad mortem, & quamvis homines laborent, ut diu vivant, currunt tamen ad terminum quem refugiunt. In ipso quidem mundi initio, mors non nisi pedibus incedebat, ac quodammodo claudicans, dudum morabatur, antequam homini appropinquaret, nongentos enim ac triginta annos vixit Adam. Noë nongentis quinquaginta annis. & ante diluvium, nongentis & sexaginta novem annis cucurrit, antequam Mathusalem comprehenderet. At nunc insidet equo, & ita ad cursum edocta est, tamque egregiè callet jaculandi artem, ut nos interdum in ipso etiam vitæ limine, transfigat. Quòd deplorans Franciscus Petrarcha, personam agens filioli sui, vix nati, mox ad interitum rapti, eleganti hoc carmine expressit,

*Vix mundi novus hospes eram, vitæque volantis*

*Attigeram tenero limina dura pede.*

*Franciscus genitor, genitrix Francisca, secutus*

*Hos, de fonte sacro nomen idem tenui.*

*Infans, formosus, solamen dulce parentum,*

*Hinc dolor, hoc uno fors mea leta minus.*

*Cetera sum felix, & veræ gaudia vitæ*

*Naclus, & æternæ tam citò, tam facile*

*Sol bis, Luna quater flexum peragraverat orbem,*

*Obvia mors, fallor, obvia vita fuit.*

Me

*Me Venetum terris dedit urbs, rapuitque Papia,  
Nec queror, hinc cælo restituendus eram.*

Aspasia Periclis Atheniensium ducis uxor, cum in hortulo collegisset botrum valde acerbum, dixit custos, Uvam habes hinc inde ipsa maturitate maturiorem, & acriorem colligis? tunc ipsa protinus respondit, Prægnantium hic mos est. ecce proprium mortis ingenium, uvam sæpe maturam non tangit, sed acerbior colligit. Et hoc fortasse volebat innuere Joannes dilectus, dum mortem equitantem describit; ecce equus pallidus, qui sedebat super eum nomen illi Mors. Quare sedet super equum? ob cursûs sane velocitatem. Sed advertendum, quod pro pallido, Græcè est verbum, quod sonat pallidum & viride. sedet igitur mors super equum pallidum & viridem, quia juvenes pariter, & senes ad terram prostermit: siquidem mors quasi mulier prægnans, fructûs libenter carpit immaturos. Hinc dicebat Jobus, Lædetur quasi vinea in primo flore. lectio Hebræa habet, Diripietur fructus immaturus. Septuaginta legunt, Vindemiatur quasi botrus ante horam. Ambrosius quoque huic doctrinæ subscribit, Non maturiores, hoc est, homines ætate confectos miratur mors, sed acerbiores suo gustui aptiores. Non confidas ergo, ô homo, quia adolescens, in primo flore juventæ, mors enim nullum respicit, sed acerbiores etiam tollit. Vis igitur de morte victoriam referre? mortem quotidie ante oculos propone. ita consulebat Musonius philosophus: interrogatus enim, quânam aptior modus ad diem ultimum feliciter claudendum? respondit, Vive, ut cras moriturus.

*Dic homo, vas cinerum, quid confert flos facierum?*

*Copia quid rerum? mors ultima meta dierum.*

*Flos*

*Flos es? mæresces. candelæ? in morte nigresces.*

*Audis? surdesces. formidas nulla? pavesces.*

*Hæc lege, læta tene, lachrymis laxentur habenæ,*

*Ne pateat pœnæ tibi janua, tempore cœnæ.*

## CAPUT XXVII.

*Divini numinis timor, ac pietas in corde Principis, & semen ejus benedicetur à Domino.*



IRMAMENTUM Regni timor Domini. usque eò Imperia floruerunt, quousque sacras leges fideliter coluerunt. Deus enim piorum amator, conatus illorum prosperare solet, eventusque felici illorum consilia claudere. Proinde Salomon Rex potentissimus, dum coluit Deum, quid mirum, si cuncta pro votis habuit? ut à cultu Dei defecit, mox & Regnum ruere coepit. sic divina referunt monimenta, Quia præcepta mea non custodisti, quæ mandavi tibi, disrumpens, scindam regnum tuum, & dabo illud servo tuo. Quoniam ad firmitatem Imperii, dux pietas, probitasque; ad imbecillitatem impietas, & improbitas semper fuit. Hinc omnium calamis, & vocibus laudanda Severi Imperatoris morientis verba, Firmum Imperium meis relinquo, si boni erunt; si mali, imbecillum. Noverat hoc & Theodosius, qui (Nicephoro teste) unicum verbum pro testamento filiis reliquit, sed gravissimum, nempe, Pietatem colerent, nec aliud. quasi in illa sola, universa imperii moles verteretur. Sciebat enim prudentissimus Princeps, quod timentes Deum, Deus ipse defendit; imò ad eorum tutelam, quasi scutum se opponit. nonnè ad

Gen. c.  
15.Iosue c.  
10.

Abraham servum suum fidelem dixit: Ego protector tuus sum? at textus Hebræus quomodo legit? Ego scutum tuum. Percurramus quæso divina oracula, tunc dicite, ô Principes, quomodo Abrahamus trecentis tantum decem & octo vernaculis, quatuor Reges simul prostravit? non arma hos, non miles, pietas fudit. Moyse manus in oratione protendente, Amalechitas vincit Israël; lassas remittente, vincit Amalech, Israël nullum stravit hostem. pro ferro, Moysis fuerunt preces. audiamus verba magni ducis Iosue, fiducia plena, Sol contra Gabaon, ne movearis, & Luna contra vallem Ajalon; steteruntque Sol, & Luna, donec ulcisceretur se gens de inimicis suis, quis non miretur? obaudit cælum homini. stant sidera, lapides pluunt, ut pro milite, lapis de cælo Israël esset in vindictam. Quorsum tot portenta? toto corde colebat Deum, & Deus voluntatem timentium se facit. Quid de Gedeone? nonne trecentis tantum militibus stipatus, Reges Zebee, & Salmana cum quindecim armatorum millibus funditus delevit? quodnam prodigium huic simile? de cælo, non de trecentis victoria venit. proinde dicitur, Gladius Domini, & Gedeonis. Quid de Samsone, qui in asini fortuita mandibula, cum reliqua deessent arma, mille Philistæos prostravit? cæli, non mandibulæ victoria fuit. Quid de Machabæis, qui quot prælia gesserunt, tot portenta visa fuere? qui nullâ propè manu tot Regum victores fuerunt? pietatis fuere cultores, ideo protegente manu Dei, semper victores.

Nec pigeat annales Imperatorum, & Regum evolvere, & videbitis victricem manum Dei super timentes eum. Quomodo Constantinus de Maxentio

xentio tot nobiles retulit victorias? Crux illi; aquilæ fuerunt, quâ unâ, hostibus animos ademit, suis dedit. O militem verè pium! proinde in bello cœlitus prosperatum, de illo enim memoriæ proditum est, quod cùm juxta Danubium debellare deberet adversus hostes acerrimos, copiosè congregatos, pericula sui exercitûs cogitans, timensque plurimam sanguinis effusionem, oculos ad cœlum levavit, & in somnis vidit, ad orientalem partem, signum crucis in cœlo, Angelosque adstare sibi dicentes: Constantine in hoc signo vinces; qui tali visione confortatus, similitudinem ipsius ex auro fecit, additâ inscriptione; Jesus Christus vincit; & ante exercitum ferri jussit, moxque irruens in hostes, ipsos in fugam convertit, & multitudinem maximam interfecit. Quomodo de Licinio Gallicanus triumphavit? qui Ioanne & Paulo monitoribus, cùm se voto, Deo obstrinxisset, hostem mox fregit, victoriam retulit, Imperium Constantino firmavit? non fregerunt Licinium arma, fregerunt vota, omnibus armis validiora. Quomodo Eugenium robore exercitûs adeò potentem vicit Theodosius? quia martyrum monumenta imperatoris stagnantia lachrymis, orationibus pulsata, viro pio pro armis fuerunt. Cùm enim in duro hostium procursu suos inferiores sensisset, projectis armis, invalido planè munimento, flere purpuram docuit, terram verere, inde supplici ad Deum dexterâ, ventos evocavit, qui hostilia in jaculatores suos retorserunt tela. stationem Solis olim Josuë imperavit, & impetravit. Theodosius novo prodigio ventos in subsidium evocavit, quorum famulatu, eadem quâ venerunt viâ, tela redirent. hinc armatus Eugenius in exarmati Imperatoris manum venit.

Euseb.  
de vita  
Constantini lib.  
I c. 11.

Niceph.  
li. 8 hist.  
eccles. c.  
12.

pro lorica & armis, cilicia, preces, & lachrymæ Theodosio fuerunt; pro milite, Deus. Vitreum (crede mihi) ô Princeps, est omne armorum munimentum, & Martius ardor eluditur, nisi timoris divini clypeo hostilia rejiciantur hastilia: testis sit idem Theodosius Imperator, qui Maximi tyrannidem armis debellaturus, legatis per Ægyptum dimissis, sacrosarenosæ regionis Anachoritas summis precibus exoravit, ut se pugnante, Moyſis exemplo, ad cœlum manûs, oraque attollerent, tum sanctissimi Eremicolæ Sinuphii super humerali sibi pro lorica imposito, & senili ejusdem baculo, quasi lancea dexteram adarmans, pius ac strenuus Imperator, inter ferream telorum grandinem, universo cum exercitu, ita illæsus evasit, ut incruento milite, hostilia agmina victor cruentarit. Sed quid profana loquor imperia? sacrum Ecclesiæ Regnum, nonne aliqua ex parte labefactari videretur, nisi heroïcis Religiosorum laboribus, quasi validissimis columnis solidaretur? testis Innocentius eo nomine tertius Pontifex Maximus, cui in quiete Lateranensis Basilicæ moles ruitura videbatur, nisi opportuno Divi Francisci Atlanteos humeros suggerentis auxilio, suffulciretur. Catacalus Michaëlis exercitûs ductor, quomodo Sarracenos Siciliâ expulit, qui nobilissimum Regnum miserâ premebant servitute? quia sacro Christi corpore se suosque firmavit. armis firmatam gentem frangere desperaverat Catucalus, fregit sacratissimâ Dominici corporis sumptione, quâ hosti exitio, sibi, suisque pro ferro, & milite fuit. Ladislaus Poloniæ Rex, quomodo Russos, populos potentes, profligavit? oratione duce, comite pietate. adesse Rex debuerat, ac exemplo ad audendum præire, præivit pietate.

tate. nam templum ingressus alliditur terræ, lachrymis pugnat, & expugnat absens hostem, sicque regiæ lachrymæ exercitum ducebant, Polonos tutabantur, hostem prosternebant. plùs proinde absentis preces, & lachrymæ, quàm præsentis arma potuerunt. Quomodo Hungaros acerrimos fidei hostes Henricus auceps Imperator debellavit? non telis, sed inclamante ante pugnam universo exercitu Kyrie eleison; inde consueta hostibus pendì vectigalia, vertit in pauperes, quo testatius Orbi esset, cujus dexterâ victoria stetisset. Egregium nec ullis retro sæculis auditum facinus Venceslaj Bohemiæ ducis quis non admiratur? arma in hunc Radislaüs Gunienfium Princeps moverat, & utrinque exercitus stabat. at Bohemiæ dux infontem utrinque populum miseratus, Radislaum ad singulare provocat certamen, lætus ille conditionem accipit, prodit Venceslaüs cilicio tectus, cui loricam injecerat, dexteram gladius armaverat, magis etiam crux, cujus signo se muniverat. Radislaüs autem cataphractus, animis, viribusque fidens, prævalidam hastam cominus toto corpore intorquebat, cùm subito cælo vox data, Ne ferias. Stetit attonitus Radislaüs, inde arma projicit, pedibus denique Venceslaj provolvitur, victorem agnoscit, audaciæ veniam deprecatur. tunc Venceslaüs cum ingenti utriusque exercitus gaudio, irruit in supplicis, ex hoste amici, amplexus. Quid in hac pugna egit triumphum? an arma? an miles? an robur? plus hic cilicium, quam arma valuerunt. Scite admodum scripsit sapientissimus Rex Salomon, O quàm magnus, qui convenit sapientiam, & scientiam: sed non est super timentem Dominum. quoniam nihil deest timentibus eum. Hunc florentissima Gallia

Greg. II.  
7. epist.

sub Clodovei, Childeberti, Pipini, Ludovici, & aliorum Regum temporibus, qui proinde Christianissimi cognomen adepti sunt, quia Sedis Apostolicæ acerrimi defensores, divini numinis cultores, & veræ pietatis exempla. Clarissima Germania sub Carolo Magno, & aliis fidei Catholicæ propugnatoribus. Felicissima Austria, sub Leopoldis Christianæ pietatis amatoribus. Fortunatissima Anglia, sub Eduardis Romanæ Ecclesiæ egregiis protectoribus. At inter cæteros orbi dominantes, felices Hispaniarum Reges, quibus feliciter omnia cadunt, quia semper timorem Dei præ oculis habuere. Prodeat in primis Rex Sissebutus, scientiis eruditus, belli potens, moribus sanctus, quem Divus Gregorius religiosissimum appellat. hic ardenti æstuans siti à Judaicæ perfidiæ labe totam Hispaniam emundari, ab ea omnes Judæos primus relegare cœpit: cujus pietatis æmulator extitit successor ejus Suinthilla; extremam deinde manum apposuere Reges verè Catholici, Ferdinandus, & Isabella, qui nihil pendentes magni momenti tributa, Mauros ab Hispania conati sunt pro viribus expellere; maluerunt ærarium minui pii Reges, quàm perfidæ gentis vectigalibus crescere. Sed hæc pietatis dona in illis ac posteris divite dexterâ abundè compensavit Deus, quo munere? novi orbis incremento. ignorabant alterum orbem arma, pietas invenit, & dedit. Nec ardens zelus præcorum Regum, vel tantillum tepuit in novissimis eorum successoribus. siquidem Carolus Quintus perpetuis encomiis celebrandus, Austriaci seminis nobile germen, cùm in Saxonica pugna Christi de cruce pendentis effigiem, impio ab hoste glande tractam vidisset, in hæc verba prorupit Princeps verè  
pius,



pius, Ulcisci hanc injuriam Chrifte potes, protendensque dexteram lachrymis madentem, ait, Hac vincere Chrifte potes. & mox secuta victoria est, hostiumque duces in Cæsaris potestatem venerunt. Quid? nonne Solimanum strenuum in bello ducem, ad turpem fugam coëgit? nonne Tunisium viriliter expugnavit? nonne Algerii potentiam generosè compressit? sed quibus ducibus? pietate & fide. Philippus Secundus in tractando imperii clavo nulli secundus, Regni & gloriæ paternæ hæres, nonne draconem orientalem marinis fluctibus gloriosè submersit? Philippus itidem Tertius Hispaniarum Rex inclytus, nonne omnes Agarenos tanquam Catholicæ fidei hostes, ab omnibus suis Regnis tam prudenter, quàm religiosè, hac nostrâ tempestate exturbavit? quid? nonne ferunt multoties dixisse, Mallem regnis omnibus privari, quàm Deum semel injuriâ afficere. ô heroës inclyti æternâ memoriâ digni! Quæ unquam natio, ut ingenuè fatear, tot Regna, & Provincias incognitas invenit, ut Hispania? Quæ gens vexillum Crucis, & Christi gloriam nuntiavit insulis, & remotissimis regionibus, ut Hispania? hæc in Indias fidem deduxit. hæc in fines Orientis, & Occidentis sanctæ fidei nomen coram Regibus, & gentibus portavit. hæc in remotissimos Japonios, & Sinas penetravit, & gloriam Christi inter illos posuit. Sed quid? nonne annis proximè elapsis, tres Principes legati venere ad urbem usque Romam, ut obedientiam Christi Vicario præstarent? Venerunt autem ex Japone, insula maxima, & remotissima, quæ ab Hispania distat sex mille leucas, quos summâ gratulatione Gregorius XIII, Pont. Max. suscepit, & Xystus Quintus humanissimè tractavit, & pluribus decoravit muneribus. Porro tantum,

& tam insigne opus, à quibus perpetratum? Patres Hispani hoc perfecerunt. Patres, nimirum, è Societate Jesu, qui in insula Japonia Christi fidem prædicantes, Principes, Reges, Provincias, Christianæ fidei fideliter subjugarunt. ô Societas planè singularis, verè admirabilis, quæ tam brevi temporis intervallo, universum mundum peragravit, in dies ubique crescit, & in vinea Domini fructum affert uberrimum. De hac jure quidem potest dici, quod de Ecclesia dixit Augustinus, Aut miraculis crevit, aut sine miraculis si miraculis, utpote à Deo factis, opus Dei esse comprobatur, sancta ergo est, si sine miraculis; hoc est maximum miraculorum, quod tempore misero, quando charitas friget, & iniquitas abundat, hæc sancta Societas tam feliciter, & tam copiosè creverit. hujus Societatis præclaros viros Jo. Federicus appellat cœlestes nuntios. Explicans enim verba illa Isaïæ; *Ite Angeli veloces ad gentem convulsam, & dilaceratam, ad populum terribilem, post quem non est alius; monet instare jam finem mundi, quia omni nationi prædicatum est Euangelium, dicit etiam hos veloces Angelos, quos Deus mittit, esse Patres Societatis Jesu, qui ad extrema Africæ penetraverunt, & usque ad Orbis fines pervenerunt. dicuntur Angeli, hoc est nuntii, cò quod*

*Jo. Federic. Lumen de extremo judicio & Indorum vocatione li. 2, c. 6.*

*Isa. c. 18.* maximarum rerum legatione funguntur. veloces autem sunt, quia & devotione, & spiritu alacres, per vastissimi maris pericula, in alium amplissimum Orbem convolarunt. de quibus etiam explicat illud Isaïæ; *Qui sunt isti, qui ut nubes volant, & quasi columbæ ad fenestras suas? nubes vocat, propter celerem obedientiam, & propter contemplationem, quâ in altum elevantur; columbas autem, quia fellis acerbitate caret hæc pacifica*

Societ-

Societas Jesu, quo nihil mirabilius. isti tanquam  
 nubes volarunt in omnes fines terræ, quorum stil-  
 licidiis inebriatur Germania, salutiferæ doctrinæ  
 pinguedine repletur Anglia, floret Gallia, trium-  
 phat Hispania. sed qua institutione, tam præclara  
 facinora perfecerunt? quia in timore Domini al-  
 tissimum posuere refugium, Regum Hispanorum  
 benignâ adjuvante clementiâ. Proinde non mi-  
 rum, si Deus omnium moderator, tot beneficiis,  
 & in pace, & in bello eos cumulavit, ac in dies cu-  
 mulat, eorumque dominia extendit, ab ortu Solis  
 usque ad occalum. Quapropter divinum numen  
 colat, & timeat Princeps, non eo tantum nomi-  
 ne, quia Christianus, sed etiam ratione statûs con-  
 servandi. Populi namque seditiones non audent  
 excitare: existimant enim, Deum sibi propitium  
 fore, ut clarè constat Ægyptiorum testimonio;  
 qui cum viderent, potentiâ cœlitus demissâ, se de-  
 mergi in profundum maris, dixerunt ad invicem,  
 Fugiamus Israël. Dominus enim pugnat pro  
 eis contra nos. hinc Philosophus docebat, Prin-  
 cipem debere esse deicolam, quia tunc homines  
 solent timere Regem, quando vident ipsum time-  
 re Deum. Est enim formidabilis miles, in cujus  
 dextera pugnat Deus; ideo inimici David excla-  
 mabant: Deus dereliquit eum, persequimini, &  
 comprehendite, quia non est qui eripiat. hinc per-  
 spicue colligas, nihil esse imbecillius homine, à  
 quo recedit Deus. proinde reprobis Caim time-  
 bat dicens; Ecce projicis me hodie à facie tua,  
 omnis qui viderit me, occidet me. quem times?  
 quis te occidet? an pater Adam? an mater tua  
 Eva? nullus alius est in toto orbe terrarum, qui  
 te possit occidere? timebat Caim duram illam  
 Dei desertionem. nam quando alii deficerent, vel

Eod. c.

14.  
Arist. lib.

1 polit.

c. 11.

Psal. 70.

Gen. c. 4.

ipsi lapides in eum insurgerent : at contrà , nihil  
 fortius homine , in quo Deus est , divino præcone  
 acclamante : Omnia possum in eo , qui me confor-  
 tat. si Deus tibi adest , omnia habes. dixit Ange-  
 lus Gedeoni ; Dominus tecum virorum fortissime :  
 mox ipse respondit ; Si Deus nobiscum , quomodo  
 tot mala ? quasi innueret , ubi Dominus , omnia bo-  
 na. hinc confidenter exclamabat David : Non ti-  
 mebo mala , quoniam tu mecum es. quare Bea-  
 tissima Virgo gratiâ plena ? quia Dominus tecum.  
 Huc appositè facit quod Lucanus memoriæ præ-  
 didit , nimirum , Cæsarem dixisse nautæ , qui dice-  
 batur Amiclas , timenti & expallescenti , quia ma-  
 re intumescerebat. Quid times ? Cæsarem defers , &  
 fortunam ejus , & times ? pone , pone timorem ,  
 quoniam fortuna Cæsaris tecum est. hoc idem &  
 potiori jure dicendum est homini justo. Quid ti-  
 mes ? nihil tibi deerit , quia Dominus tecum. at si  
 quispiam diceret ; nonne Deus in omnibus rebus ?  
 hoc est enim placitum theologicum ab omnibus  
 receptum , quod Deus est ubique per essentiam ,  
 præsentiam , & potentiam. per potentiam quidem ,  
 quia omnia subduntur Deo. per præsentiam , quia  
 omnia nuda sunt oculis ejus. per essentiam , quate-  
 nus adest omnibus rebus , ut causa essendi. Respon-  
 sio in promptu est , quoniam est quidem in omni-  
 bus , sed dicitur præcipuè in justis per gratiam , quâ  
 privatur homo ob peccatum mortale , quâ priva-  
 tione nihil infelicius. quod experimento pro-  
 bans David , lachrymarum imbres sine intermis-  
 sione fundebat. & interroganti , cur ploras Da-  
 vid ? confestim respondebat ; Quia dicitur mihi  
 quotidie , ubi est Deus tuus ? Petrus egressus foras  
 flevit amarè. quamobrem ? quia negavit Domi-  
 num suum. Magdalena plorabat juxta sepul-  
 chrum ,

Judic. c.  
6.Philip. c.  
4.

Psal. 22.

Sueton.  
in Cæsa-  
re.Psal. 42.  
Matth. c.  
26.

chrum. dicit Angelus; Mulier quid ploras? Tulerunt Dominum meum, & tu dicis quid ploras? & quænam major flendi occasio, quàm sine Deo esse: à quo omnia bona, & sine quo omnia mala. Proinde mentis omnino expers existimandus est, qui præsidio Dei destitutus, prosperum rerum suarum sperat eventum. Hoc apprimè intelligebat Theodosius, quem paulò antè commemoravimus, qui, referente Cedreno, morti jam proximus, filiis suis lugentibus dicebat; In primis, ô filii, religionem, & pietatem excolite, per quam & pax servari, & bella confici, & hostes fundi, & tropæa statui, & denique victoriæ obtineri poterunt. Quocircà Gregorius Magnus in epistola ad Reginam Galliæ, aureum hoc conscripsit apophthegma, Facite quod Dei est, & Deus faciet quod vestrûm est. quid enim tam arduum, quod non obtineat Princeps, si timeat Deum, quando ipse Deus animæ timenti non dedignatur obedire, canente Regio vate, Voluntatem timentium se faciet. Pulchre Livius, Omnia prospera eveniunt colentibus Deum, adversa spernentibus. quod sanè oraculum Pauli testimonio comprobatur. Diligentibus Deum omnia cooperantur in bonum. Sed quid pluribus immoror? si Principes omnes recensere vellem, qui divini timoris clypeo muniti, in victoriis floruerunt, nec sermo explicaret, nec scribendi esset finis: nonnullos tamen, & quidem insignes nefas esset silentio premere.

Joannes Comnenus Imperator, cùm adverteret suos milites graviter à Scythiis urgeri, ac fortiter premi, ad imaginem Dei genitricis, quam præsentem habebat, cum gemitibus sese convertit, copiosasque lachrymas fudit: statim verò cœlesti robore armatus, Scythicam aciem profligavit, &

Joan. c.  
20.Psalm.  
144.Rom.  
c. 8.

& eorum turmas facile dissipavit. ob hanc victoriam partam, vota Virgini persolvit, vicit & Persas, indeque triumphum egit, in quo magnifice quadriga est apparatus, & à quatuor equis candidissimis ducta, Imperator verò non conscendit, sed Dei genitricis imaginem in ea collocavit, habenas quadrigæ viris potentissimis moderandas, & cognatis suis currum dedit curandum, ipse crucem manibus gestans, pedibus incessit. de hoc Principe jure potest acclamari, Ecce sic benedictur homo, qui timet Dominum.

Clodoveüs primus Galliarum Rex Christianissimus, felix, & invictus in victoriis fuit. sed quamobrem? quia in divino numine spem omnem reponiebat, quod vel ex hoc conjici potest; cum enim Arrianos ex Gallia eliminaturus, exercitum comparasset, nuntios ad beati Martini basilicam direxit, dicens; Ite, & forsan aliquod victoriæ auspiciū ab æde sancta suscipietis. Tunc datis muneribus, quæ loco sancto exhiberent, ait; Si tu Domine adjutor mihi es, & gentem hanc incredulam meis manibus tradere decrevisti; in ingressu basilicæ sancti Martini dignare propitius revelare, ut cognoscam, quia propitius dignaberis esse famulo tuo. mox accedentibus pueris ad locum juxta imperium Regis, dum sanctam ingrederentur basilicam, hanc antiphonam ex improvviso Primicerius incepit, Præcinxisti me domine virtute tuâ ad bellum; supplantasti insurgentes in me subtus me, & inimicorum meorum dedisti mihi dorsum, & odio habentes me disperdidisti. Quod milites audientes, & Domino gratias agentes, vota que beato Confessori promittentes, læti nuntiaverunt Regi. hoc signo gavissus, fretusque Clodoveüs, victoriâ, Deo cœlitus mirabiliter adjuvante, potitus est. de hoc

Gregor.  
Turon.  
lib. 2. c.  
37. hist.  
Franco-  
rum.

Psal. 17.

hoc Principe verè pio, Vates regius exclamavit spiritu prophetico, Hic accipiet benedictionem à Domino.

De Othone Imperatore, nonne litteris traditum est, eum in suis eventibus ferè semper prosperatum? ita planè. sed non in curribus, & in equis, sed quia nomen Domini supplex invocabat. Comes quidam, referente Luitprando, tunc prædices, & potens, erat cum eo. hic autem videns quàm plurimos ex regis acie transfugas fieri, apud se cogitabat, quidquid à Rege in hac tribulatione posito, petiero, sine dubio impetrabo, cùm acre bellum nobis immineat, & ne se deseram, timeat. supplicat ergo, ut Abbatiam quandam ditissimam sibi concedat, ut ex ejus redditibus milites aleret, eisque stipendia suppeditaret. Rex coram circumstantibus viriliter respondit: Obedire oportet Deo, magis quàm hominibus: scriptum est enim, nolite sanctum dare canibus. darem autem sanctum canibus, si monasteriorum prædia, quæ religiosis viris, Deo militantibus, sunt tradita, tulero, & sæculo militantibus dederò. si tibi cordi est, cum cæteris infidelibus avolare, quantò citiùs, tantò meliùs. tunc erubescens Comes, & ad Regis pedes corruens, se graviter deliquisse confessus est. hoc autem fecisse sui fratris intuitu, qui eï Regnum auferre moliebatur. at quia Rex sanctus constanter in suo proposito permansit, idcirco Deus ita ejus victoriam prosperavit, ut etiam frater nudis pedibus supplex misericordiam imploraret.

Nec minùs mirandum, quod scribit Jacobus de Vitriaco ex Canonicis Regularibus ad Cardinalatum assumptus, refert enim pro muris Antiochiæ paucos Christianos contra innumerabiles barbaros pugnasse, & expugnasse: sed quâ arte instructa

Luitprandus  
Ticinen-  
sis hist. li.  
4. c. 15.

Ad. c. 5.

Iacob. à  
Viuriaco  
Cardin.  
in histor.  
Orient.  
lib. 2. c.  
19.  
Paul. E.  
milios  
lib 4.

instructa erat acies? Lanceâ Salvatoris pro vexillo præcedente, vix nostris ab urbe egressis non in humana virtute, nec in pugnantium multitudine, sed tantum in Domino confidentibus, ecce ros de supernis infusus consolatione mirabili ipsorum animos exhilarans, equos debiles, & jam ferè deficientes, subito robore suscepto, miraculosè confortavit. ex quo factum est, ut nostrorum exercitus innumeram infidelium multitudinem audacter aggrediens, & brachio forti pugnans, divino protectus adiutorio, gloriosè de hostibus triumpharit, aliis gladio trucidatis, aliis terga vertentibus, & equorum velocium præsidio fugâ elapsis.

Sed quid? non veritatem istam, præclaro testimonio satis superque comprobavit pugna illa navalis adversus Turcas apud Naupactum memoratu digna, & auditu jucundissima? Cùm Selimus Turcarum Imperator, Cyprio Regno paucis ante diebus expugnato, universum Ionium, atque ipsum Adriaticum sinum ingenti classe infestaret, omnium ferè Principum Christianorum classes, qui ad communis hostis bellum reprimendum, in unum conspirarant, Joanne Austriaco, Marco Antonio Columna, & Sebastiano Veniero ducibus, tandem Nonis Octobris, Turcis occurrunt. Tunc barbarus, & recenti victoriâ terrestri ferox, & quòd fideles, numero militum longè superaret, se invictum existimans, classem summo manè educit, & aspirante vento dat pugnae signum. præstant idem, & quidem strenuè Christiani duces, quippe, qui majorem in Deo, quàm in viribus, spem collocatam haberent. Itaque ingenti clamore, & tormentorum fragore, undique concurritur. sub ipso verò pugnae initio, tanta ventorum



rum mutatio consecuta est, ut jam fidelibus aspi-  
rarent, qui ante reslarant venti. Quare eodem die  
paucis horis dejiciuntur. Turcæ de spe totius orbis  
Imperii, quam antea temere conceperant, & uni-  
versa classis, præter quindecim triremes, quæ duce  
Occhialivo turpiter in principio pugnae fugam ar-  
ripuerant, partim capitur, partim obruitur, exten-  
dente manus ad cælum, quasi altero Moyse, Pio  
Quinto, tunc Cymbam Petri feliciter gubernante,  
& universo populo Christiano acclamante, Dex-  
tera Domini fecit virtutem. O beati omnes, qui  
timent Dominum. timenti enim Deum, quid deest?  
Vis, ô Princeps, sapientiam, ad Regnum rite ad-  
ministrandum, ut postulabat Salomon; Da mihi Sap. c. 5.  
Domine sedium tuarum assistricem sapientiam, ut  
mecum sit, & mecum laboret? time Deum, & ob-  
tinebis. Initium sapientiæ timor Domini. Vis diu-  
turnam vitam in Regno protrahere? time Deum,  
& voti compos eris. teste Regio vate, Vis vitam,  
& dies videre bonos? diverte à malo, & fac bo-  
num. Quapropter si longa, & jucunda vitæ tempo-  
ra exoptas, desine peccare, & feliciter vives. ita  
pulchre consuluit Poëta,

*Cur multum peccas, si multum vivere curas?*

Hinc interrogatus olim Thales, quodnam rarum  
vidisset? Senem tyrannum, respondit. Vix enim  
quenquam illorum canescere, aut ad extremam  
senectutem pervenire videmus. idem mihi de pec-  
catore fas sit dicere, unum esse de rarò contingen-  
tibus, hominem improbum ad decrepitam ætatem  
pertingere, cum peccata plerumque filum vitæ  
præcédant, sic attestante oraculo Regio, Viri san- Psal. 5.  
guinum & dolosi, non dimidiabunt dies suos. Quod  
quidem provenit, tum ex justitia, ne alios pravo  
exemplo inficiant, Succide arborem, ut quid ter- Luc. c.  
13.  
ram

- ram occupat? tum etiam ex misericordia, nè addendo peccata peccatis, gravius in inferno puniantur. cui veritati multæ accedunt auctoritates.
- Job c. 15. primo loco se offert Jobus Rex orientalis, qui interrogatus, quid illi eveniet, qui delicta delictis annectendo, diu perdurat? Antequam, ait, dies ejus impleantur, peribit, manus ejus arefcet, & lædetur quasi vinea in primo flore. secundo loco accedit Rex Salomon, qui, patris ad instar, monet, & obsecrat, dicens; ne impiè agas multum, ne moriaris in tempore non tuo. Nec deest gravissimum sacrae historiae testimonium. Moyses historicus Regius describens tempus, quo duraturus
- Ecclef. c. 9. erat mundus, habet hæc verba; Erunt dies illius centum viginti annorum. quæ verba explanans Strabo, inquit, ante diluvium centum & viginti anni concessi fuerunt homini ad agendam poenitentiam, sed quia in malitia perstiterunt, omnis quippe caro corruperat viam suam, ante præscriptum terminum centesimo anno deleri sunt. sed quid? nonne idem historicus refert Cham filium Noë à patre appellatum secundò-genitum? Porro cum surrexit à somno, & advertit se derisum à filio, non amplius appellat eum secundò-genitum, sed
- Gen. c. 9. tantum dixit: Cum vidisset Noë, quæ fecit filius suus minor. sed quomodo minor? si duo tantum fratres fuissent, nulla utique difficultas esset; secundus enim proculdubio esset minor, sed cum tres fuerint, quomodo poterit esse secundò-genitus, & minor? dum absque delicto vitam degit, vocatur secundò-genitus; sic enim exigit jus naturæ: at vix in peccatum prolabitur, quod statim confurgit minor, hoc est, paucorum annorum. Nec silentio prætereundum memorabile factum, huic instituto valde accommodatum, quod refert
- Bernar-

Bernardinus. Senensis, & contigit tempore suo in Regno Cataloniæ. Adoleſcens quidam, ait, adhuc imberbis duo & viginti annorum, parentum non parens monitis, tandem ob latrocinia patibulo ſuſpenſus eſt. ibi mox ei ſuccrevit, populo inſpectante, barba, ac ſenſim cum capillo incanuit, ipſaque facies decrepitum ſenem exhibuit nonagenarium. ſtupent omnes, intenti ora tenent, alternis vocibus clamant, Quid eſt hoc? quoddam portentum? Porro Episcopuſ loci, oratione præmiſſa declaravit malefactorem illum uſque ad ſenium pervenire debuiſſe, ſed in flore juventutis fuit ſublatus, quia in paterna obedientia non ſe continuit, & nefandis facinoribus deditus erat; quæ ſtimulum morti præbuere, ut curreret ante præſcriptum tempus. ſic enim ait Paulus; ſtimulus mortis peccatum. ſimile de Anaſtaſio Imperatore narrat divus Antoninus, apparuiſſe illi horribili ſpecie virum cum libro, in quo ſcriptum erat, En ob tuam improbitatem quatuordecim annos vitæ tibi delebo. Eia igitur, Princeps, qui vitam diuturnam exoptas, vide, ne impiè agas multum, ne moriaris in tempore non tuo.

Vis populum obſequentem, & ad nutum tuiſ legibus obtemperantem? divinus timor ſit comes individuus, quia timentem Deum omnia timent, at ſi deficiſ à Deo, à te quoque omnia deficient. Quorſum creaturæ homini obedire detrectant? quia ipſe Creatori obſequi repugnavit. olim juſtiſ originalis auxilio omnia inferiora ſubjecta erant, & ſemper fuiſſent homini. Cæterum Adamo peccante, & appetente propriam excellentiam & dominium, quod non habebat, perdidit dominium quod habebat, rebellando enim ſuo ſuperiori, omnia inferiora rebellaverunt ſibi. terra ince-

D. Bernardin.  
Sen. to. 3  
in Quadrag.

Egid. 2.  
diſt. 22.  
q. 1. 2. 2.

pit deficere, spinas & tribulos germinando. caro incepit rebellare, quia statim sensit in membris suis aliam legem repugnantem legi mentis suæ. animalia omnia inceperunt repugnare, quia facta sunt sicut silvestria; & dum vident hominem, non solum ei non obediunt, sed quantum possunt ab eo fugiunt; & si ad eum aliquando veniunt, hoc faciunt, magis ad nocendum, quam ad proficiendum. & licet habeamus aliqua domestica, hoc est, ex quadam assuetudine, domando ea, sic enim sæpe faciendo, adgeneratur in eis quadam consuetudo, quæ est altera natura. Quod si aliquis insurgat dicens, si creaturæ irrationales potestatem habent nocendi rationalibus, igitur creatura rationalis non præest, sed subest; quod enim nocet, potestatem habet super alterum, cui nocet; huic objectioni ita satisfaciam. verum est, quod creaturæ irrationales potestatem habent nocendi rationalibus, & in hoc præferuntur eis: hoc autem non est ex prima institutione, quia dictum est de homine, ut præsit volatilibus cœli, & bestiis terræ; sed est, ratione pœnæ peccati, ut quia non servavit homo voluntariam & debitam subjectionem respectu sui superioris, nec debita subiectio servaretur à suo inferiori. Si cupis itaque, Princeps, populum tibi fideliter subiectum, subijce te Deo, & voti compos eris. Filiorum tuorum felicem exitum videre desideras? in Deï timore tibi vivendum est, ne filii perdantur iniquitate patris: sic enim divina testantur oracula, Ego sum Deus zelotes, visitans peccata patrum usque in tertiam & quartam generationem eorum, qui oderunt me. Si autem aliquis objiceret, filius non portabit iniquitatem patris. talis responsio satisfaciet. hoc quidem verum, si loquamur de bonis spiritualibus,

Alex. A.  
lenfis 2.  
P. 9. 17.  
m. 2.

Gen. c. 1.

Exod.  
c. 20.

bus, quoniam scelera parentum non efficiunt filiis; non enim filius damnabitur pro peccato patris, sed pœnas dabit in bonis temporalibus. in pœnam patris, quatenus filius, est quædam res ejus. Vis denique, ô Princeps, exitu felici diem claudere extremum? ad Dei timorem; tanquam ad tutissimum asylum confugito, & omnia succedent ex votis, sic divino acclamante oraculo, Timenti Deum bene erit in extremis. Siquidem Deus sic morientem; tanquam unice dilectum osculatur. mortuus est Moyses in osculo Domini. Verum est enim illud adagium, Bona vita, bona mors. Huc perbelle faciunt nobilis Thecivitis aurea verba, Omnes morimur, & quasi aqua dilabimur super terram: Cur quæso, sicut aqua, non sicut oleum? Si vas olei effunditur, sedulo colligis, at si aquam spargis, nihili facies: proinde Vates ille dicebat; Effusus sum sicut aqua. dilabitur ergo homo, sicut aqua, quia mortuus à cunctis derelinquitur, non enim ejus odor sustineri potest.

D. Th. 1.  
2. q. 87.

Eccl. c. 1.

Psal. 21.

*Non redolet, sed olet, quod redolere solet.*

Sed aliam hujus loci explicationem afferunt Doctores, præsentī instituto magis consonam. aqua, juxta placitum philosophicum, neque dulcis neque amara; sumit verò qualitatem à meatibus, per quos transit. hinc aqua Ticini limpida, quia per terram arenosam transit; aqua Padi turbida, quia per terram luteam transitum agit. ita plane, si vitam recte institutam mors reperit, optima mors erit; Pretiosa in conspectu Domini mors sanctorum ejus. si vita male acta, misera mors, Mors peccatorum pessima.

Ps. 115.  
Psal. 33.

Hoc bene noverat perditissimus Nero, Nam moriens exclamavit; Turpiter vixi, turpiter moriar.

Iob. c. 9. riar. Huc allusit oraculum Jobi ; Dies mei transi-  
runt sicut naves poma portantes. bene navis, vita  
hominis, quoniam celeri cursu fugit, & quasi ven-  
tus volat ; Memento Domine, quoniam ventus est  
Iob. c. 7. vita mea. sed quare sicut navis portans poma ? cur  
non aurum ? cur non sericum ? hæc merces facile  
putrescit, proinde mercator sollicitat nautas, ut  
remis, velisque contendant ad portum, quasi di-  
cat, periculum est in mora. Porro vix navis appel-  
lit, vix fimbriis alligatur, vix jaciuntur anchoræ,  
& confestim navis exoneratur. Quid autem rema-  
net ? solus odor, præterea nihil. Si fructus sani,  
fragrans odor ; si jam putruerunt, foetidus & in-  
suavis. sic nobis prorsus continget. si bene vixeri-  
mus, in Domino moriemur. O magna Regni fe-  
licitas, cujus Princeps in corde radicitus imprimit  
divini numinis timorem ; nam vivens quotidianam  
accipiet benedictionem à Domino, & moriens ac-  
cipiet coronam vitæ nunquam morituræ. Quomo-  
do Ambrosius ille Spinola, Catholici exercitus  
apud Belgas generalis Præfectus, & Mediolani Mo-  
derator integerrimus, cujus magnum robur in ar-  
mis, & in pace probata fides, quomodo, inquam,  
tot celebres victorias retulisset, nisi divino numi-  
ne invocato, comite judicio ? O dux invictissime,  
ætatis nostræ decus eximium, tu per virtutis semi-  
tam incedens, facilem tibi aditum aperuisti ad per-  
petuam tui nominis celebritatem. de te jure opti-  
mo liceat mihi dicere,

*Hic est Ambrosius, quo non præstantior alter,  
Spinola bellipotens, cetera fama canit.*

Claud.  
Parad.

Ad hunc scopum dirigebat cogitationes suas,  
tanquam sagittas, insignis illa Navarræ Regina  
Margarita, proinde pro stemmate gerebat helio-  
tropium, additâ inscriptione, Non inferiora sequor.  
quod

quod perinde fuit, ac si dixisset, Quemadmodum herba solaris, Sole oriente folia pandit, occidente claudit, & quò Sol convertitur, ipsa quoque gyrum agit; ita Christianus Princeps, in Solem iustitiæ oculos assidue defigat, ne freno divini timoris destitutus, prolabatur in præceps, sic admonente regio Vate, Contritio & infelicitas in viis eorum, Psal. 13. viam pacis non cognoverunt. at quorsum tot mala? non est timor Dei ante oculos eorum. Hinc scitè admodum scripsit Augustinus Catholicæ Ecclesiæ decus & ornamentum. Nos non ideo felices dicimus Christianos quondam Imperatores, quia diutius imperarunt, vel imperantes filios placidâ morte reliquerunt, vel hostes reipublicæ domuerunt, vel inimicos cives contra se insurgentes, & cavere, & opprimere valuerunt: hæc enim, & alia id genus ærumnosæ vitæ, vel munera, vel solatia quædam, etiam cultores dæmonum accipere meruerunt: sed eos re verâ felices dicimus, si iusta imperant, si se homines esse meminerint, si potestatem suam ad Dei cultum dilatandum dirigunt, si Deum timent, diligunt, colunt; si plus amant Regnum illud, ubi non timent habere consortes. Optime noverat quantum profit, & conveniat Principi, timere Deum, Ludovici Galliæ Regis Blanca Regina parens, idcirco frequentius verbum illud repetebat: Mallem, fili charissime, mortem te subire corporalem, quàm ut unico peccato mortali tuum offenderes Creatorem. Quod piæ matris verbum, usque adeò infixit animo filius optimus, ut præservante illum divinâ gratiâ, per totum vitæ suæ curriculum, ne ullum quidem mortiferum criminis contagium contraxisse dicatur. sed quo duce? divini timoris præsidio munitus; Timor enim Domini, ait Sapiens, expellit peccatum.

August.  
de Civ.  
Dei lib.  
5. c. 24.

Clitho-  
vus  
serm. 1.  
de S.  
Ludov.

D.Th. 2.  
2. q. 19.  
a. 1.

2. 2. q.  
34.

Pfal. 73.

nec dicatur, objectum timoris est malum, quomodo igitur timetur Deus, cum ipse sit summum bonum? quoniam huic difficultati egregiè satisfacit Angelicus doctor, distinctione planè aureà, duplex objectum potest habere timor, quorum unum est ipsum malum, quod homo naturaliter abhorret; alterum verò est illud, à quo malum provenire potest. primo modo Deus, cum sit summa bonitas, nequit timeri. nam objectum timoris est malum, Deus autem summum bonum: Deus igitur immediatè timeri non potest, quod sic intelligitur, quia motivum nullum est in Deo quare timeatur, aut odio habeatur, sed omne motivum est, quia infligit nobis pœnam; ex quo nobis displicet, ita explicat Cajetanus. Verùm secundo modo potest esse objectum timoris, quatenus ab ipso potest nobis imminere malum pœnæ, & hoc in bonum nostrum, malum enim pœnæ non avertit nos ab ultimo fine, quin potius ad ipsum nos ducit. eodem ferè modo dicimus Deum timeri, quo dicimus odio haberi, at constat Deum, secundum sui essentiam, ab homine apprehensum, non posse odio haberi, quia Deus est ipsa bonitas, quæ semper amabilis; si autem Deus apprehendatur ab homine per effectus, qui voluntati humanæ possunt esse contrarii, sicut inflictio pœnarum, quantum ad hos effectus, Deus potest odio haberi, & sic intelligitur illud

Regii vatis dictum; Superbia eorum, qui te oderunt adscendit semper. eodem prorsus modo; Deus immediatè, ait Divus Thomas, non potest timeri, timetur autem, ut causa mali, quatenus (ut bene advertit Cajetanus) est potens infligere malum.

Majestatem itaque Dei omnipotentis timeat Princeps, legi ejus subjiciatur, supremo legislatori obediat, tunc omnia feliciter evenient, cum in manu



manu Dei sint omnium jura Regnorum, & nullus unquam imperare sciat, qui non novit obedire. hinc divinus Vates assiduis precibus enixè rogabat, Emitte agnum Domine dominatorem terræ. Isa. c. 26. sed quis unquam audivit agnum orbi terræ dominantem? imperare cum leone, nemo est qui nesciat; at obedire cum agno, nullus omnino. Emitte ergo, ô Domine, inquit Propheta, filium tuum unigenitum, verum, & pium legislatorem, qui simul & dominari, & obedire sciat, ut Principes edoceantur, quomodo divinis legibus parère debeant. Ad hanc rem egregiè facit Serenissimi regis oraculum, Et nunc reges intelligite; erudimini, qui judicatis terram. servite Domino in timore, & exultate eî cum tremore. apprehendite disciplinam, ne quando irascatur Dominus, & percat de via justæ. hîc autem advertas, quod ubi nos dicimus, Apprehendite disciplinam, Felix legit, Osculamini filium. Apud viros primarios, hoc est in more positum, quando Regni successor excipitur, in signum subjectionis manum ejus osculari. hunc planè morem insinuans divinus Vates, inquit, osculamini filium, Jesum nempe, cœlorum terrarumque Regem timete, obsequium illi & corde & opere præstantes. Psal. 2.

Utinam Principes nostri temporis, ex hoc veritatis fonte aliquando potarent, non enim ita vitam traducerent, quasi existimantes omnia sibi licere, Dionysii tyranni filium imitantes, qui cùm à patre corriperetur, quòd Syracusani cujusdam uxori vim intulisset, diceretque indignatione furens, Audisti unquam hujusmodi facinus à me perpetratum? cui statim filius, Sed nunquam patrem Regem habuisti. quasi innuere vellet improbus ille Princeps, quod omnia sibi licerent, quia filius

Fulgos.  
li. 7. c. 3.

Regis, Cùm tamen in maxima potentia, minima licentia esse debeat.

*Principis ante oculos adsit diuina potestas,  
Sic firmum Imperium, sic erit alma quies.*

## C A P U T XXVIII.

*Sub potenti manu Dei humiliet se Princeps, & exaltabitur Regnum ejus. At si erecto collo incens, tanquam Deus adorari voluerit, descendet in profundum, quasi lapis.*



UAM gravi supplicio afficiantur Principes, qui humanæ conditionis obliti, divinos honores sibi temere adscribunt, impiorum Principum series hæc demonstrabit. Erexìt se Angelus adversùs Deum, à cœlo empyreo est præcipitatus. exaltavit se primus parens, à terrestri Paradiso fuit expulsus. nimia elatione permoti filii hominum, tanquam gigantes adversùs Deum pugnare contenderunt, sed Deus divisis linguis dissipavit eos. Exaltavit se Pharaò, ausu temerario dicens; Nescio Dominum. sed quid? Submersus est in mari rubro, quasi lapis. Exaltavit se impius Philistæus, à pastore inermi proprio jugulatur gladio. Exaltavit se parricida Absalon, è quercu pendens tribus lanceis confoditur. Erexìt se Adonias Regnum ambiens, vitâ pariter & Regno privatur. Intumuit Roboam hæres Salomonis, scissum est ab eo Regnum patris sui. Exaltavit se Rex Chaldæus, dicens, Quis est Deus? cum belluis tamdiu conversatus est, donec resipiscens, verum Deum agnosceret. Exaltavit se ambitiosus

bitiosus Aman, adeò, ut ab universis adorari curaverit. sed in patibulo, quod Mardocheo paraverat, ipse tandem suspensus occubuit. Exaltavit se Antiochus, nimiam superbiâ elatus, intestinis putrefactis, vivus à vermibus corroditur. Exaltavit se Herodes Agrippa Galilææ Rex, seu potius tyrannus, permittens se à populo acclamari Deum, confestim percussit eum Angelus Domini, eò quòd non dedisset honorem Deo; & consumtus à vermibus, expiravit. Erexit se monstrum illud horrendum Domitianus, ad tantam insaniam deveniens, ut divinum sibi honorem attribueret. hinc in primordiis litterarum se Deum, & Dominum jussit appellari. Deus, & Dominus noster Domitianus ita mandat; unde in epistolis conscribendis, hæc erat formula: Dominus, & Deus noster sic fieri jubet. inde postea institutum est, ut ne scripto quidem, ac sermone appellaretur unquam aliter. unde quidam assentator dixit, Edictum domini, deique nostri. sed audiamus abominationem majorem. Nonne dici voluit filius Palladis? quod si quis facere detrectasset, tanquam magni criminis reus detrudebatur in carcerem. sed quid? à suis per insidias interfectus est.

Philo-  
strat. in  
Tyaneo  
lib. 7.

Sueton.  
in Do-  
mitiano  
c. 13.

Cajus Imperator contendebat ab omnibus coli, ut Deus, sed ob tam nefandum crimen, gladiis confossus, cum uxore & filia occubuit. Sed quid de Cosdroa Rege Persarum? hic volens ab omnibus coli ut Deus, turrim ex auro, argento, & pretiosis lapillis construi fecit, & ibidem Solis, Lunæ, Stellarum imagines collocavit, per subtiles etiam & occultos ductus; quasi Deus aquam desuper infundebat, & in subterraneo specu, equi quadrigas trahentes, in circuitu ibant, ut quasi terram moverent, & tonitru simularent, dum au-

Sueton.  
de Cajo  
c. 22.

tem tumens in throno aureo, sic resideret, tanquam Deus adorari cupiens, tunc Heraclius Imperator exercitum copiosum collegit. Signa cum hoste contulit, ac tres duces Cosdroë cum tribus exercitibus superavit. quibus cladibus fractus Cosdroas, in fuga, quâ trajicere Tigrim parabat, Medarsen filium socium Regni designat: sed eam contumeliam cum Syroës major natu filius ferret atrociter, patri simul & fratri ex fuga retracto necem attulit, Regnum ab Heraclio impetravit. ecce quàm misere obiit, qui ut Deus adorari ambiebat.

Nec silentio involvendus Caligula ille, ad sævitiam natus. hic omnium deorum simulachra decapitari jussit, & singulis singula capita, vultum ipsius Caligulæ referentia, inferebat, ut solus adoraretur. sed tale flagitium an impunitum reliquit cælum? omnibus infensus, proinde & omnibus invisus, turpiter occubuit homo perditissimus. Contra quorum insaniam Joannes Gerson quondam Cancellarius Parisiensis pulchre cecinit hoc carmine,

*Vidi ego vesicam modico turgescere statu,*

*Quæ pisis sonuit quatuor impositis;*

*At puer unus acu pupugit, displosa repente,*

*Vilis, & absque sono, flaccida detumuit.*

O verè amentes, nimium se ipsos amantes, qui cum essent vilissima figmenta, citò vermibus tradenda, adeò insolenter cornua erexere, ut sacros honores ambirent, qui divinis tantum numinibus conveniunt. Nonne amens Sophon Carthaginensis, qui domi suæ plurimas aves humanam vocem referentes alebat, instruebatque non sine magna temporis jactura, ut suo modo proferrent, Sophon est Deus. cumque illas volucres rite instruetas cerneret, ad bene pronuntiandum. quod ambiebat,

biebat, è cavea dimittens, deitatis illius præcones  
fuere, unde quotquot illas audiebant in admiratio-  
nem rapti, mutuo colloquētes, dicebant; Sanè So-  
phon est Deus, quandoquidem volucres cœli di-  
fertâ voce deitatem illius proclamant. Nonne in-  
fana Semiramis Assyriorum Regina? hæc enim  
scuto suo columbam, & gladium pro stemmate  
insculpebat; gladio potentiam portendebat, co-  
lumba vero insinuabat, se tanquam deam ab Assy-  
riis in columbæ figura adorandam. Quid de arro-  
gantia Maximini, qui Romanis Senatoribus suos  
pedes osculandos præbebat? Quid de Rege Chal-  
dæo, qui in aurea statua effigiem suam populo  
proponebat adorandam? Pharaon regiâ dignitate  
elatus, nonne dicebat, Quis est dominus, ut au-  
diam eum, & dimittam Israël? nescio dominum,  
& Israël non dimittam.

Thales Milesius jam fenex admirandum quod-  
dam naturæ secretum Madritæ philosopho Sire-  
nensi communicavit, qui cùm hoc nomine ingen-  
tes ageret gratias, rogaretque, quam mercedem  
pro tanto documento vellet? Satis, inquit Tha-  
les, mihi erit, si id quod à me didicisti, cùm pro-  
ferre volueris, tibi non adscripseris, sed me ejus  
repertorem prædicaveris. quantò magis & ple-  
niori jure, hoc à nobis exigit Deus, ut omnia quæ  
habemus, non nobis, sed illi accepta refefamus? à  
quo enim accepimus esse? à Deo, Ipse fecit nos.  
à quo scientiam? à Deo, Omne dōnum desursum  
est. à quo Regna? à Deo, Per me Reges regnant.  
Deus namque dicitur à dando, quod omnia det. si  
igitur omnia à Deo, cur divinos honores affectas?  
cur tibi adscribis, quod pleno jure competit Deo?  
cur non clamas? Non nobis Domine, non nobis,  
sed nomini tuo da gloriam.

O magna

*Pfal.* 13. O magna hominis insania, qui corruptioni obnoxius, putat tamen se deum esse. Toto quidem cœlo aberrabant, qui jumentis dementiores, nulum deum asseriebant, de quibus Vates regius; Dixit insipiens in corde suo, non est Deus. nec abs re, dixit in corde suo: si enim voce proferre ausus fuisset, omnes creaturæ contra eum insurrexissent, per universa mundi climata exclamantes, Ipse fecit nos, & non ipsi nos. Quot quippe creaturas videmus, tot linguas mente concipe, quæ prædicant ore pleno, unum esse Deum, qui mare, qui terras, qui cœlum numine complet. huic rei satis appositè facit Salomonis oraculum, Spiritus Domini replevit orbem terrarum, & hoc quod continet omnia; nempe cœlum, cujus amplexu omnia continentur, scientiam habet vocis, hoc est, habet librum apertum ad narrandum mirabilia Dei. Quid splendor Solis & Lunæ? Quid Stellarum aureus fulgor? Quid immutabilis orbium cœlestium motus? sunt voces, Dei potentiam prædicantes. Cœli enarrant gloriam Dei. Quid est aër, tot avium species recipiens, tantis diversarum vocum accensibus undequaque resonans? est vox, quæ prædicat Creatoris gloriam. Quid est mare, tam amplum, tota aquarum, atque piscium multitudine refertum? Quid terra tot floribus ornata? Quid tanta diversitas animalium? Quid denique omnes creaturæ in hoc mundi Theatro degentes? vivæ voces, quæ resonant Deum esse unum moderatorem omnium. Longè à veritatis scopo deviant & ipsi, qui plures deos posuere. Inter quos Manichæi omnium stultissimi, & jure dicuntur Manichæi à mania, quod verbum idiomate Græco significat ineptiam. isti statuebant duo principia, bonorum & malorum. pro bonis Deum, pro malis Diabolum

lum constituebant. Porro, quia hoc deliramentum nituntur probare nonnullis sacræ Scripturæ locis, perperam tamen intellectis, proinde juxta Catholicum sensum explicare non erit inutile. Arguunt primo ex Joanne, Vos ex patre diabolo estis. Ioan. c. 8. diabolus ergo pater malorum, non igitur unus Deus omnium opifex. Pro vera explicatione advertas, quod pater alterius dicitur aliquis dupliciter, vel quia ab eo habet substantiam, vel quia ab eo habet mores, doctrinam ejus suscipiendo per imitationem. hoc modo diabolus erat pater Phariseorum. moventur præterea ex aliquo loco Joannis, Ioan. c. 19. Regnum meum non est de hoc mundo. Christus ergo non est Rex hujus mundi. Porro non concludunt, quia Regnum Christi sunt fideles, qui non sunt de hoc mundo. sunt quidem in mundo, sed quasi exulantes, & ad Regnum cœleste anhelantes. Conantur insuper suam sententiam confirmare ex Paulo, Deus hujus sæculi excœcavit mentes infidelium. diabolus igitur est deus hujus sæculi. 2 Cor. c. 4. sed hoc non urget, quia diabolus non dicitur deus assertivè, sed nuncupativè, eo modo, quo venter dicitur deus. & tamen quis ignorat ventrem non esse creatorem? est ergo Deus unus omnium rerum creator, gubernator, & rector. In unitate quippe omnis natura consentit, Romanos geminos unum non capit Regnum. Rex unus est apibus, dux unus est gregibus, & in armentis rector unus. multo magis totius mundi unus est moderator. hoc idem docuit philosophus, Rerum natura malè administrari non vult, & multorum principatus non est utilis, unus ergo fit Princeps. idem prorsus confirmat in libris de cœlo, In causis non datur progressus in infinitum, sed ad supremam quandam causam perveniendum, à nulla alia Arist. 12 metaph. c. ult. depen-

Cyprianus de idol. & unitate.

**Arist.** li. 1 de cœlo. **Lib.** 1 de nat. deorum. **Nic. Cusanus** li. 3. de conc. catholica. dependentem, sed à qua cætera dépendeant. idem ferè **Marcus Tullius**. Prima lectio, ait, quam sensus communis, & naturæ lex docet, est, unum esse Deum, à quo condita sunt omnia. Oportet, inquit **Cusanus**, unum esse Principem, alioquin magna oriretur confusio, quando in imperando plures concurrerent. Quando enim unquam Regni societas, aut cum fide cœpit, aut sine cruore deluit? Nonne Romanos fratres unum non capit Regnum, quos unum uteri cœpit hospitium? Nonne **Antonius** **Getam** morti tradidit? Quis **Germanicum** interfecit? **Nero** frater. Quis **Titum**? **Domitianus**. **Pompejus**, & **Cæsar** nonne affines fuerunt? non tamen amicitiae foedus in æmula potestate tenuerunt. hinc Poëta,

*Nulla fides Regni sociis, omnisque potestas  
Impatiens consortis erit.*

**Lucan.**  
lib. 2.

In unum igitur conferendum est Imperium, quod humana gubernatio divinæ sit quam simillima. Est itaque unus Deus omnium rerum causa universalis. Unus quidem, sed cum pluralitate personarum. Fuit quidem Deus, est, & erit semper unus: sed nunquam Deus fuit solus, quia quamvis ab æterno non fuerit essentia alia, quàm divina; tamen in illa essentia, est, & fuit ab æterno personarum pluralitas, quæ à Deo solitudinem excludit, adeò ut ista propositio sit falsa; Deus ab æterno fuit solus. ista vera, Solus Deus fuit ab æterno. & hic obiter notandum, quod si in divinis non essent plures personæ, Deus posset dici solus, hoc est, solitarius, licet sit cum Angelis, & animabus sanctis. non enim tollitur solitudo per associationem alicujus, quod est extraneæ naturæ, nam dicitur aliquis esse solus in horto, quamvis sint ibi multæ plantæ, & animalia. pari ratione diceretur Deus solus,

**Ric.** 1.  
sent. dist.  
21. q. 1.

**D. Th.** 1.  
p. q. 30.  
a. 3.



solus, Angelis & hominibus cum eo existentibus, si non essent in divinis plures personæ. stultos igitur optimo jure appellamus, qui non cognoscunt unum esse Deum, qui regit universa. Cæterum longè dementiores illos esse judico, qui eò insanix devenerunt, ut velut divina quædam numina, & nominari & adorari ambirent, quasi Luciferi Hierem. c. 14. superbiam imitantes, qui erectâ cervice blaterabat, Ascendam ad Aquilonem, & ero similis Altissimo. Sed, quid ais, ô insane? nonne cognoscis te creaturam esse, non creatorem? nonne mente percipis, te effectum, non causam? Quorsum ergo illud, Ero similis Altissimo? Pro hujus loci explicatione advertendum, quod duplex assignatur à Theologis similitudo, una quæ dicitur omnimodæ æquiparantiæ; sed hanc nec Lucifer, nec primi parentes appetiere: quia talis similitudo non cadit in apprehensione sapientis, qualis est diabolus, cujus naturalis cognitio non est diminuta, ita attestante Dionysio, cujus verba Dionys. de div. nom. c. 4. sunt hæc, Divo Thomâ referente; Data sunt demonibus aliqua dona, quæ nequaquam mutata esse dicimus, sed sunt integra, & splendidissima, D. Th. 1. P. q. 64. a. 1. & hoc ideo quia simplices sunt, & propter simplicitatem suæ substantiæ, à natura eorum aliquid subtrahi non potest; unde naturalis cognitio in eis non est diminuta: potest tamen tenebrosa vocari, & nocturna, quatenus in Deum non refertur. Naturalia igitur etiam in malis Angelis remanserunt integra. hinc naturaliter cognovit se non esse similem Deo, quantum ad æquiparantiam. Siquidem nulla relatio æquiparantiæ, potest esse inter Argent. 3 sent. dist. 5. a. 4. Deum, & creaturam; nam talis relatio requirit extremorum mutuam, & æqualem dependentiam: Deus autem non dependet ab aliqua creatura.

tura. Unde licet similitudo reperta inter duas creaturas, sit relatio æquiparantiæ, non tamen, ut est inter Deum & creaturam. Alia dicitur similitudo imitationis, & hæc possibilis est creaturæ ad Deum, in quantum participat aliquid de similitudine ipsius, secundum suum modum: quodlibet enim bonum, in creatura existens, est quædam participata similitudo primi boni. Potest tamen dici, quod quantum ad aliquid, Deo æquiparari appetiit, quatenus sibi inniti voluit, contempto divinæ regulæ ordine. Proinde Augustinus dicebat; Diabolus magis voluit suâ potentiâ frui, quàm Dei. Quid enim est dicere; Similis ero Altissimo? nisi, quemadmodum Deus suâ propriâ naturâ beatus est, non habens superiorem; ita ego beatus esse volo propriis bonis naturæ, nec me subjiciam ordini à superiore præscripto.

August.  
de vera  
relig.

D. Th. 1.  
p. q. 63.  
a. 3.

In hoc Lucifer appetiit esse similis Deo, quia appetiit, ut finem ultimum beatitudinis, id, ad quod virtute suæ naturæ poterat pervenire, avertens suum appetitum à beatitudine supernaturali, quæ est ex gratia Dei. Sunt igitur diabolo similes nefarii homines, qui variis illusionibus illecti, divinos sibi honores præscribunt. Non sic Antiochus, qui tandem morti proximus, parvitatem suam cognoscens, dixit: Justum est, subditum esse Deo, & mortalem non paria Deo sentire. Non sic Rex Israël, nam cum Rex Syriæ Benadab, unum ex optimatibus suis Naaman nomine, leprâ cooperatum, ad Regem Israël mitteret, rogans, ut salutem ejus procuraret, Rex Israël lectis litteris, & audito nuntio, iratus nimis scidit vestimenta sua dicens: Nunquid deus ego sum? ac si diceret, licet ego sim Rex, homo tamen sum, & quidem miser.

4 Reg.  
c. 5.

Cum

Cùm Sisanni Persarum Regi, quidam adulantes, pocula tantùm mellita propinantes, dicerent, se mirari, cur omnia, quæ tantus monarcha concepisset animo, non quàm primùm opere completeret, tunc modestiâ singulari, quamvis barbarus, ait; Ego Dominus verborum tantùm, & non rerum. perinde, ac si dixisset, multa quidem animo volvo, at solius Dei est, eadem in opus cogere, & exequi. Non sic Herodes Agrippa, qui improvise dolore percussus, dum sui eum deserebant, non valentem per se incedere, suspirans, & gemens dicebat; En ego vester deus, ducor ad mortem. Non sic Philippus Macedonum Rex, qui humanæ conditionis memor, non se deum, sed hominem mortalem appellabat, frequentibus suspiriis inclamando, Memento Philippe, te esse mortalem. Non sic Alexander filius, qui accepto lethali vulnere, ad Principes Regni lumina mœsta convertens, dixit: Vos appellatis me Jovis filium, at vulnus hoc proclamat, me esse mortalem. Non sic Tiberius, monarcha secundus post Augustum, hic enim vetuit, se Dominum appellari, neque unquam permisit, ullum templum sibi proprium extrui, quin & nomen patris patriæ à Senatu sibi oblatum, recusavit. Non sic Octavianus Imperator, qui divinos honores sibi à Romanis tributos, quantum potuit, respuit. Romani enim gravissimis bellis affluenti, tunc autem temporis, universi Imperii quietem admirantes, id Octaviani Imperatoris prudentiæ, in Imperio gerendo, attribuebant; ideoque tanto beneficio grati, illum tanquam Deum colere, ac venerari decreverunt. ille verò non minùs pius, quàm prudens, illorum votis repugnabat, quibus tamen urgentibus satisfactorius, Sibyllam, eâ tempestate in oraculis reddendis nobilem, quid sibi faciendum

Sueton.  
in vita  
Tiberii  
c. 27.

Diodor.  
histor.  
Rom. c.  
57.

Cornel.  
Tac. lib.  
1 annal.

ciendum foret, consulit. illa pollicita responsum, cum intra Imperatoris ædes, tempore quo Christus nascebatur, moraretur, quod Imperator quæsierat attentè contemplans, sublati repente in cœlum oculis, vidit prope Solem, aureum circum, in cujus medio intuita quoque est pulcherrimam Virginem, intra brachia foventem Infantulum. tunc accersito Imperatore, quod viderat in cœlo miraculum, indicavit, & puerum illum omnino futurum Dominum, cui Reges omnes parerent, prophetico spiritu afflata, prædixit, auditaque de cœlo protinus vox fuit, Hæc est arca cœli. mox Octavianus audito Sibyllæ responso, mandavit, ut eum nemo ampliùs vocaret Dominum, quandoquidem jam, qui omnium erat verus & legitimus Dominus, natus aderat.

Anton. 1  
p. histor.  
tit. 4.

Quid de Carolo Quinto Imperatore invicto? hic cum in castris audiret Turcarum Regis legatum, de suo Rege magnalia prædicantem, illumque Dominum dominorum vocitantem, iusto furore percitus, exclamavit, dicens; Mentiris barbare, quoniam non est dominus, nisi solus Deus; quasi Ecclesiasticum decantans oraculum, Tu solus Sanctus, tu solus Dominus. O piam Principis sententiam aureis litteris inscribendam! Nam re verâ solus Deus est Dominus, qui jure creationis dominium gerit; ac principatum omnium rerum, quas condidit. Fuit ab æterno semper Dominus, at potestate tantum, quoniam ante creationem nullæ res erant, quæ illi obtemperarent, ut subditæ, nefas est enim inter divinas personas, dominium nominari, cum nihil sit in Deo, eo ipso inferius; sed quidquid in illo est, infinitum est. At post orbem conditum, Deus est Dominus omnium, & usu, & actu. Domini est terra & plenitudo ejus.

Florian.  
Nap. E-  
piscop.  
Stalen-  
sis in  
Cat. arg.  
super  
Gen.  
conclus.  
23.

ejus. Nullus quippe titulus est major, nam verus Dominus duas conditiones fortitur; quæ nulli creaturæ conveniunt; soli autem Deo competent, quarum una est, ut possit pro libito uti re, cujus est Dominus, & eam augere, minuere, ad nihilum redigere; altera verò, ut nullâ re indigeat. Ante creationem, non dicebatur Dominus, quia non erant subditi, quibus imperaret, relativa enim dicuntur ad convertentiam; pater, ergo filius; dominus, ergo servus. sunt quoque simul naturâ, adeò ut posito uno ponatur & alterum, non potest enim intellectu percipi, quod ponatur dominus, & non ponatur servus, aliter non diceretur ad convertentiam. nec illud debet urgere, pater est ante filium, ergo non simul naturâ, quoniam in relativis duo sunt. unum est ipsa forma relationis, secundum quam ad aliud sunt; alterum est ipsum fundamentum, & substantia, cui inest talis relatio. hoc prænotato, dicimus quod secundum formam relationis, nullum relativum antecedit suum correlativum, quoniam non est prior relatio paternitatis, quàm relatio filiationis; nam in patre non potest esse relatio paternitatis, nisi in filio sit filiatio. porrò secundum fundamentum, nihil prohibet, quod unum sit prius altero, ille enim homo qui dicitur pater, antecessit hominem, qui est filius; non tamen prior fuit pater, quàm fuerit filius, quoniam statim & simul, quod quis est pater, statim quoque est filius. ante creationem itaque non dicebatur dominus, quia non aderat servus. nunc autem omni jure dominus & solus dominus. quoniam dominium creatoris, relationem dicit ad creaturam; inde est, quod licet ab æterno omnium rerum potestate dominus sit, actu tamen, ab initio solum creationis, rerum dominus est.

Ecce 2

Porro

Polyd.  
Virg. An-  
gli. hist.  
lib. 7.

Porro magnum discrimen est, inter dominium Dei & hominum, quod homo non est dominus naturæ rerum, sed usus tantum, Deus autem, & naturæ & usus. qua de causa dicitur solus Dominus, non tantum, quia antonomasticè Dominus est, sed quia dominium creaturarum est à Deo, juxta illud: Per me Reges regnant; & quia homo rerum naturas nequit mutare, Deus autem potest naturas mutare, alterare, imò etiam ad nihilum redigere. proinde Deus solus est Dominus. Lepidam sanè historiam scribit Polydorus Virgilius de Canuto Rege. hic cum juxta littus maris assedisset, dixissetque, Unda tibi jubeo, ne pedes meos tangas. nihilominus unda insurgens, totum eum madefecit. tum ille suos Principes alloquens, En, inquit, vocatis me Regem, qui mari, qui terræ, latè imperem, cum tamen hanc parvulam undam meo imperio cohibere nequeo. Est Rex unus Jesus Christus Dei filius, cujus nutu cuncta reguntur, & Vintoniam profectus, statim coronam, quam gestabat, capiti imaginis Christi crucifixi suis manibus imposuit, nunquam posthac ejusmodi ornamento capitis usus insigni.

Non sic denique Rex ille inclytus, qui sedens in throno regio, coronam in capite & sceptrum in manu gerens, fuit à quodam philosopho adoratus, tanquam Deus: at subinde ad Regis solium conscendit, eidemque Regi assedit, quem cum Rex objurgasset, respondit philosophus, vel tu deus, vel tu homo. si deus es, jam te adoravi genufluxus; si homo, non facio injuriam, tibi assistens; nec enim terra erubescit, quod alia terra prope ipsam sit, & pulvis pulveri adhæret. tunc Rex argutè dilemma dilemmate solvit, argumentum philosophi contra ipsum retorquens. Vel ego

ego sum homo, vel deus; si homo, non leviter peccasti, me adorans; si deus, assidere non debebas, cum nulla sit inter Deum, & homines, æqualitas. O quàm turpe igitur, & indecorum, hominem citò vermibus tradendum, velle adorari, ut Deum.

Humiliamini itaque, ô Principes, sub potenti manu Dei, per quem Reges regnant; nolite loqui sublimia gloriantes, sed servite ei, cum timore, mente recolentes, vos esse homines, non deos; & omnes Reges Deo comparatos, vilissimos esse vermiculos, totamque terram cœlo comparatam, nihil esse. At nemo magnus in pusillo.

*Regi calicolum, vos flectite colla, potentes.*

*Tunc dabit omnipotens, regia sceptrum divi.*

## CAPUT XXIX.

*Sacros Dei ministros piâ veneratione complectatur Princeps, In primis autem Summo Sacerdoti Pont. Max. omnium fidelium capiti, Imperiales fasces humiliter submittat, & Regnum ejus germinabit sicut lilium.*



UANTA veneratione digni semper fuerint Sacerdotes, vicem Dei gerentes, supremi Monarchæ nuntii cœlestes, olim præclarissimi Principes, & virtute, & sanctitate insignes, abunde satis docuere.

Proinde generationes illorum, divinis omnitempore benedictionibus repletas fuisse, historiarum tradunt monimenta.

Constantinum in primis Romanorum Imperatorem,

torem, tanquam præclarissimum speculum propo-  
 nendo, ad quod lumina Principum convertantur.  
 is enim quandiu vixit, sanctos sacerdotes, utpote,  
 angelos humanos, deos terrenos, viros cœlestes,  
 divino cultui dedicatos, maximis honoribus, &  
 muneribus cumulavit. Quod præclaro Ecclesiasti-  
 cæ historiæ testimonio comprobatur. In Concilio  
 enim Nicæno, cum esset inter Episcopos magna  
 dissensio, summam rei ad imperatorem Constan-  
 tinum detulerunt, ipse autem à singulis suscepit  
 libellos, quos simul omnes in sinu suo continens,  
 ait ad Episcopos, Deus vos constituit sacerdotes,  
 & potestatem vobis dedit de nobis quoque judi-  
 candi: idcirco nos à vobis rectè judicamur, vos  
 autem non potestis ab hominibus judicari, propter  
 quod, divinum expectate iudicium, non enim est  
 conveniens, ut homo iudicet deos. Cùmque hoc  
 dixisset, omnes querimoniarum libellos iussit ex-  
 uri. Nec silentio involvam, quàm benignè ipse-  
 met Imperator tractaverit sacerdotes in Nicæna  
 Synodo congregatos. Nam Patribus regiam do-  
 mum præparavit, sedes, & subsellia in ea poni præ-  
 cipiens qui sufficerent ordini sacerdotum; rebus  
 itaque honorificè dispositis, invitavit ingredi, &  
 de præsentibus habere Consilium. Introivit autem  
 & ipse Princeps ultimus cum paucis; minori verò  
 sede, quàm aliis posita, in medio eorum sedit, pri-  
 mo tamen petens, sibi hoc Episcoporum iussione  
 concedi, tanti apud eum semper valuit auctoritas  
 sacerdotii. Quid hinc? à manu Dei munifica, in-  
 gentibus honoribus, & beneficiis semper cumula-  
 tus fuit. Siquidem Imperii habenas diu & felici-  
 ter tractavit. Condidit Civitatem Romæ æmu-  
 latricem. in bellis gerendis semper invictus, sem-  
 per Augustus triumphavit. In tyrannis oppri-  
 mendis

Euseb. li.  
8 c. 2.

Hist. tri-  
par. lib.  
2, c. 5.



mendis potentissimus, & tandem cuncta prospere agens, plenus dierum, è vita emigravit. cujus memoria semper in benedictione.

Valentinianus hujus nominis primus Imperator, Christianum Constantini animum secutus est. Auxentio namque defuncto, qui Mediolanensem præsulatum tenuerat, evocans Episcopos Imperator, hujusmodi apud eos habuit concionem, Nostis apertè, eruditi utique divinis eloquiis, qualem oporteat esse Pontificem, & quod non deceat eum verbo solùm, sed etiam vitâ gubernare subjectos. Talem itaque in pontificali constituite sede, cui & nos, qui gubernamus Imperium, sincerè capita nostra submittamus, & ejus monita, dum tanquam homines deliquerimus, veluti curantis medicamenta suscipiamus.

Histor.  
tripar.  
li. 7. c. 8.

His dictis communi consensu pastor gregis ordinatur Ambrosius, cui tunc præsidualis cura fuerat commissa. Quo facto, hunc hymnum optimus Imperator Salvatori Domino obtulisse fertur. Gratias ago tibi Demine, omnipotens, & Salvator noster, quoniam huic viro ego quidem commisi corpora, tu autem animas. verba planè aurea, tanto viro digna.

Quis non admiretur Theodosii Imperatoris obedientiam Ambrosio sacerdoti humiliter præstitam? Apud Thessalonicam civitatem quidam iudices lapidati fuere. Tunc Theodosius indignatus, delicti auctores interfici iussit, ubi septem millia gladio periere, non præcedente iudicio. Hujusmodi autem cladem plenam gemitibus, audiens beatus Ambrosius, cùm Princeps venisset Mediolanum, & solemni pompâ in sacram vellet intrare basilicam, occurrit sanctus Episcopus

Histor.  
tripar.  
lib. 9.

Falgor.  
lib. 1.

Theod.  
li. 5. hist.  
eccles.  
c. 17.

Sev. Sal-  
pit. in vi-  
ta S.  
Mart. li.  
6.

pus foris ad januam, & ingredientem his sermo-  
nibus à sacri liminis ingressu prohibuit, Nescis, ô  
Imperator perpetratae à te necis, quanta sit ma-  
gnitudo? an fortè recognitionem peccati prohibet  
potestas Imperii? docet tamen, ut vincat ratio po-  
testatem. Coæqualium hominum Princeps est, ô  
Imperator, & conservus, unus est dominus Rex  
omnium, & creator. Quibus igitur oculis aspicias  
communis Domini templum? Quibus calcabis pe-  
dibus sanctum Domini pavementum? Quomodo  
manus extends, de quibus adhuc stillat sanguis  
innocuus? recede ergo, recede, ne secundo pec-  
cato priorem nequitiam augere contendas. Sus-  
cipe vinculum, quo nunc omnipotens Deus teli-  
gavit. Mox obtemperavit Imperator. Noverat  
enim quæ sunt propria sacerdotum, & quæ Re-  
gum, gemens, & plorans, ad regalia remeavit.  
Post multos dies transactos, permissu Ambrosii,  
sacra limina ingreditur Theodosius, ibique pro-  
nus in pavimento jacens, Davidicam emisit vo-  
cem, Adhæsit pavimento anima mea, vivifica me  
secundum verbum tuum. O verum Christiani  
Principis exemplum, aureis litteris inscribendum.  
Ad hanc rem optimè facit Maximi Imperatoris re-  
verentia erga Episcopum Martinum observata.  
Cum enim ad Imperatorem Maximum, ferocis  
ingenii virum, & bellorum civilium victoriâ ela-  
tum, plures ex diversis partibus Episcopi conve-  
nissent, & fœda circa Principem, omnium adula-  
tio notaretur, seque turpi inconstantia regiae clien-  
telæ sacerdotalis dignitas subdidisset, in solo Mar-  
tino apostolica auctoritas permanebat. Nam etsi,  
pro aliquibus supplicavit Regi, ita tamen pruden-  
ter egit, ut potius imperaret, quàm rogaret, & à  
convivio Principis, frequentur rogatus, abstinuit;  
dicens,

dicens, se mensæ ejus participem esse non posse, qui Imperatores, unum Regno, alterum vitâ expulisset. tandem victus præfati Maximi precibus, ad convivium venit, mirum in modum gaudente Rege, quod id impetrasset. Convivæ autem aderant, veluti ad diem festum evocati, summi atque illustres viri, nempe, Comites duo, magnâ potestate præditi, frater Regis, & patruus, medius inter hos, Martini presbyter accubuerat, ipse autem sellulâ juxta Regem positâ confederat. Ad medium ferè convivium, ut mos est, pincerna primum calicem Regi, ut omnium nobilissimò obtulit, ille sancto Episcopo potius dari jubet, expectans, atque ambiens, ut ab illius dextera, poculum sumeret. Episcopus non recusavit, sed ubi ebibit; calicem, non Imperatori, sed presbytero suo tradidit, nullum nempe existimans digniorem, qui possit prior bibere; nec integrum sibi fore, si aut Regem ipsum, aut eos, qui à Rege erant proximi, presbytero prætulisset. Quod factum Imperator, omnesque, qui tunc aderant, ita admirati sunt, ut hoc ipsum eis, in quo contemti fuerant, placeret, celeberrimumque per omne palatium fuit, fecisse Martinum in regis prandio, quod in infimorum judicum conviviis, nemo Episcoporum fecisset. O regia dignitas sacerdotis! à summis Imperatoribus in tanto pretio habita, utpote, qui sciant, istos, non homines, sed angelos, & deos, à divinis oraculis appellari. Hinc in divinis litteris nomine regio decoramini; Vos estis regale sacerdotium, quia vos regibus, non Reges vobis præstant, & supra vos nihil erit in terra, sed ipsi vos eritis præsides orbis, duces hominum, custodes legum, & patres omnium. audiant sacerdotes, titulos insignes, quibus decorantur. Matthæus

Lucem appellat. Lucas, salem terræ. Hieronymus, generales Apostolorum vicarios. Gregorius, stellas mundi. Basilius, ardentes faces. Theodoretus, Dei coadjutores. Exodus, Deos. Malachias, Angelos. Hieremias, Reges. David, Principes. Michæas, duces. Et quæ dignitas, quæso, aut major, aut præstantior reperiri potest, dignitate Ducali, Principali, Regali, Angelicâ, Divinâ? Hinc servus Dei Franciscus frequenter dictabat, Si Angelus, & sacerdos mihi eodem tempore occurrerent, prius sacerdoti, deinde Angelo honorem exhiberem. Sanctus quoque Antonius Abbas, quoties sacerdotem obvium habebat, caput aperiebat, & in genua coram eo provolutus, benedictionem humiliter postulabat, eamque tanti faciebat, ut singulari se honore crederet affectum, si quando eandem obtinuisset. Nec immerito tot honoribus, & titulis cumulantur sacerdotes, utpote, qui peccata remittunt, abyssos claudunt, diabolos fugant, mortuos ad vitam revocant, miracula patrant. Proinde Vates regius divino afflatus spiritu canebat, Nimis honorati sunt amici tui Deus. Istos itaque tanquam Dei ministros venerare, ô Princeps, & copiosam recipies benedictionem à Domino. Sed in primis sacerdotem maximum, Pontificem summum, successorum Petri, Vicarium Christi, Romanæ Ecclesiæ caput visibile, in supremo dignitatis culmine, supra homines, citra Deum solum constitutum, cui Principes, Reges, Imperatores, fasces suos Imperiales submitunt, majestatem Pontificiam adorantes. ita factum fuisse legimus ab Attila Hunnorum Rege, qui ob suam feritatem Italiæ terror, & flagellum Dei dicebatur. is cum in conspectu Leonis Papæ, totiusque Cleri Romani, qui

qui ei occurrit, venisset, tacitâ quadam in viro sancto majestate perterritus, arma deposuit, & suas copias, ab indicto urbis excidio continuit, affirmans se clarâ luce vidisse, dum loquentis Pontificis verba exciperet, duos præstantes viros, Petrum, nimirum, & Paulum, strictis gladiis ejus capiti atrociter minitantes, ni sacerdotis Dei dictis acquiesceret.

Quod itidem ferè de Mauritio Constantino-politano Imperatore legitur, qui statim ab impia in Pontificem Maximum, Gregorium Magnum, tyrannide abstinuit, superbâ dominatione, in Sanctissimi Pontificis obsequium commutatâ, ubi intellexit quendam inaudito, & prodigioso spectaculo, monachali habitu indutum, cujus nomen, adventus, & discessus omnes latuit, minaci ense in foro Constantinopolitano, spectante populo, clamantem, dixisse, Imperatorem citò hoc gladio perituum, nisi sanctissimis monitis obtemperaret.

Albertus  
Kranth.  
li. 6 hist.  
Saxon.  
c. 16.

Federicus primus Imperator, Romanæ Ecclesiæ majestatem, & Summi Pontificis auctoritatem, & verbis, & rebus egregiè confessus est. Nam cum in Italiam venisset, Adrianum Quartum Pontificem, ita humiliter veneratus est, ut ad ejus pedes primùm venerabundus accederet, deinde descendenti ex equo stapedem teneret.

Quid de humili erga Pontifices Romanos obsequio, Ludovici Imperatoris Germaniæ Regis? is cum Romam adiisset, & consiliis cum Benedicto Pontifice maturè compositis, inde profectus esset, ejus è vita transitum in itinere cognoscens, mox mœstus urbem repetiit. Non multò post Nicolæus Romanus ex diacono eligitur, Cæsare præsentē consecratur, rursusque in Patriarchium Lateranensē deductus, coronatur, inde paucis inter-

interpositis diebus , cum Ludovicum de professione cogitare audisset , officij causâ ad eum in castra venit. Quod ubi Ludovicus sensit , obviam aliquanto viâ spatio prodiit , & defiliens ex equo , frenum , per integrum sagittæ ictum , tenuit , & convivio , sub militari tabernaculo excepit , quo suavissimis sermonibus celebrato , donis ipsum magnificis coluit , & in urbem reverenter profectus , destinato in loco iterum ad frenum accessit , osculoque sancto pedi oblato , in tabernaculum se recepit ; atque inde in Lombardiam perrexit. O memorandum exemplum ante fores Principum aureis litteris inscribendum ! Sed quid de multis Galliæ Regibus ? nonne illorum præcipuum munus fuit , Catholicam Ecclesiam tueri ? Apostolicæ Sedis dignitatem defendere ? turbulentorum hominum audaciam perfringere ? Proinde optimo jure inter omnes Christianos Reges , miro omnium populorum consensu , atque applausu , Christianissimi dicti sunt. In primis autem Pipinus , & Carolus Pipini filius , qui ob res præclare gestas , Magni cognomen obtinuit , ambo Romanam sedem usque adeo coluere , ut non modò sacerdotium ab omni vi hostili semper tutati sint , sed etiam summis sacerdotibus occurrere , illorum pedes osculari , & pedestres ipsi à frenis equorum , quibus sacerdotes vehebantur , illos in urbes suas introducere in magna gloria , atque in summa sui nominis , & diadematis claritate posuerint. Hoc autem fiebat , tum supremæ dignitatis veneratione , tum etiam grati animi ergò , in memoriam revocantes , quod quidquid præclari , atque præstantis habent , sive imperatoriâ munera , sive regios titulos spectaverimus , à sacerdotali munificentia acceperunt. Siquidem , quod Reges Galliæ occidentali

dentali imperio primi potiti sunt, quodque tam celebri, & insigni elogio præ omnibus Principibus Christianis, Christianissimi dicantur, id certè totum sacerdotibus acceptum referre debent. Quod & libenter faciunt, sese viriliter opponentes, pro Sanctæ Romanæ Ecclesiæ dignitate tuendâ. probè namque norunt, regiam illis potestatem, non solùm ad mundi regimen, sed maxime ad ecclesiæ præsidium, esse collatam, ut ausus nefarios comprimendo, & quæ bene sunt statuta, defendant; & veram pacem his, quæ sunt turbata, restituant, & Romano Pontifici totius orbis Pastori, obedientiam præstent.

Non negamus, ait Innocentius Tertius, scribens Constantinopolitano Imperatori, quin præcellat Imperator in temporibus, illis dumtaxat, qui ab eo suscipiunt temporalia, sed Pontifex in spiritualibus antecellit, quæ tantò sunt temporalibus digniora, quanto animâ præfertur corpori. Nolle debet Imperatoria celsitudo, quod fecit Deus duo magna luminaria in firmamento cœli, luminare majus, ut præesset diei, & luminare minus, ut præesset nocti. Utrumque magnum, sed alterum majus. Ad firmamentum cœli, hoc est, universalis Ecclesiæ, fecit Deus duo magna luminaria, id est, duas instituit dignitates, quæ sunt Pontificalis auctoritas, & Regalis potestas, sed illa quæ præest diebus, id est spiritualis, major est; quæ verò carnalibus, minor, ut quanta est inter Solem & Lunam, tanta inter Pontifices & Reges, cognoscatur. Quam planè prærogativam ex eo intelligere potes, quod dictum est, non à quolibet, sed à Deo; non Regi, sed sacerdoti, non de Regia stirpe, sed de sacerdotali prosapia descendenti, Ecce constitui te super gentes, & super Regna, ut Innoc. de major. & obed. can. foliz. Hierem. c. I. evellas,

3. Reg. c.  
19.

evellas, dissipes, ædifices, & plantes. Siquidem Summi Pontifices super Cathedram Petri sedentes, supremum imperium in toto orbe, super omnes potestates semper habuere. Isti enim tantæ Sedis auctoritate, Principes, Reges, Imperatores consecrant, coronant, deponunt. ô verè thronus Regius, ô cathedra salutis, ô sedes planè admiranda. de te quidem pleno jure dici potest, Non est factum tale opus in universis Regnis. Tu es enim navis illa singularis, ut ait beatus Clemens, in qua Apostoli tempestate quatiuntur, navis semper invicta, diris tyrannorum procellis sæpius oppugnata, nunquam tamen expugnata, fluctibus hæreticorum undique concussa, nunquam tamen excussa. quia portæ inferi non prævalebunt adversus eam. licet enim potentia tyrannorum, & hæreticorum deceptiones aliquando infestent, & multos fideles à fide, & charitate avertant, totam tamen Ecclesiam non desolabunt. Dicit autem quispiam, quomodo portæ inferi non prævalebunt, cum hodie videamus magna ex parte prævaluisse? nonne videmus totam Asiam, Africamque à Mauris occupatam? Quid? nonne, & Europam multis in locis hæresis labe inquinatam? quomodo igitur portæ inferi non prævalebunt? non prævalebunt adversus Ecclesiam, quia fundata supra firmam petram, quia Ecclesiastica hierarchia usque ad consummationem sæculi perdurabit, quia Regni ejus non erit finis. proinde licet ventis Aquilonaribus huc, illuc jactetur, nunquam tamen submergitur,

*Fluctuat, at nunquam mergitur illa ratio.*

Hinc Lunæ comparatur, pulchra ut Luna, quia Ecclesia aliquando plenior, aliquando minùs plena; obscuratur hac parte Luna, illà clarescit; obscu-



obscuratur Germania & Anglia, clarescit Iapon,  
 & China; & sicut Luna deficit, non Solis de-  
 fectu, sed quia ipsa non respicit ex diametro  
 Solem, sic obscuratur aliqua natio Catholica er-  
 rorum tenebris, non propter Christum, cujus  
 vocatio & dona sunt sine pœnitentia, sed quia  
 à Sole cœlesti oculos averterunt, propterea eos  
 Deus dereliquit. Gaudeamus igitur, quoniam  
 Ecclesia perpetuò durabit; timeamus verò, quia  
 Luna est, ne in nobis deficiat, nunquam tamen  
 deficiet tota simul, inconcusso manente oraculo;  
 Ego rogavi pro te Petre, ut non deficiat fides  
 tua. Si autem aliquis objiciat, quomodo non  
 defecit fides, si Petrus Christum negavit? tunc  
 talis responsio est adhibenda, De fide Petri pos-  
 sumus loqui duobus modis, vel in quantum  
 ipse Petrus erat persona particularis, vel quate-  
 nus universalis Ecclesiæ personam gerebat: pri-  
 mo modo defecit fides Petri ad tempus, non ta-  
 men finaliter, quia per pœnitentiam ad Christum  
 rediit. Egressus foras flevit amarè. Scio tamen  
 aliquos doctores asseruisse, in Petro non defe-  
 cisse fidem, sed ejus tantum exteriorem confessio-  
 nem. Porro secundo modo non defecit fides Pe-  
 tri, nam tridui tempore, salvata fuit fides in beata  
 Virgine, quamvis tunc temporis in Apostolis de-  
 fecerit fides, semper tamen remansit in Virgine. de  
 qua dici potuit, Mens immota manet. in cujus si-  
 gnum tempore passionis omnes cerei extinguun-  
 tur, præter unum, qui viget accensus. Incon-  
 cussa igitur manet ista veritas, Ecclesiæ navem  
 adversis ventis agitari, sed nunquam obrui; à  
 diris hostibus impugnabitur, sed nunquam  
 peribit; in mediis tyrannorum flammis versa-  
 bitur, sed flamma non nocebit ei ad interitum.  
 hæc

Rom. c.  
2.Luc. c.  
22.August.  
li. contra  
menda-  
cium, c.  
7.Leo Pa-  
pa serm.  
9 de  
pass. Do-  
min.

hæc illa visio planè mirabilis, quam vidit Moyses. vidit enim rubum; qui licèt arderet, non tamen comburebatur, proinde admirans ait; Vadam, & videbo visionem hanc magnam, quare non comburatur rubus? Quid obsecro per rubum? quid per ignem? Philo Hebræus per rubum ardentem, intelligit populum Hebræum injuriâ oppressum; per ignem, Ægyptios oppressores, sed rubus non comburebatur, quia illa tribulatio in bonum illorum convertenda erat, & ipsi incolumes evasuri.

Gregorius per rubum, legem Mosaïcam intelligit. sicut enim ignis illuminabat rubum, sed rubi spinas non comburebat; ita lex Mosaïca demonstrabat peccata, sed peccati spinas non auferebat.

Bernardus per rubum ardentem, qui non consumebatur, intelligit miraculum, quod futurum erat in Beata Virgine, de qua canit Ecclesia; Rubum quem viderat Moyses incombustum, conservatam agnovimus tuam laudabilem virginitatem. rubus quidem ardebat, quia peperit Filium, sed non comburebatur, quia Virgo permanfit.

At Hieronymus per flammam inhærentem rubo, sed rubum non comburentem, figurat Ecclesiam, quæ flammis tot persecutionum non sumitur. cui appositè accommodatur urbis Parisiensis insigne, Salamandra nimirum in medio flammarum, appositâ hâc notâ; Circumdor, sed non uror. Huc egregiè spectat, quod refert Plinius, ait enim, reperiri arborem quandam nomine larix, quæ igne non comburitur; quin potius, si in ignem projiciatur, ac si esset lapis, ejus flammis resistit, quod experimento probavit Cæsar, circa civitatem Gezgobiam, ibi namque erat turris ex hoc ligno confecta, cui ignem apponi jussit, & cum flammis

Plin. lib.  
16. naturalis  
histor.

Celius  
Rodigin.  
lib. 6 lect.  
antiq.

flammis undequaque circumdaretur, nullum detrimentum passa est. En typus Ecclesiæ, quæ flammis hæreticorum undequaque opprimitur, sed nunquam deprimitur; imò sicut vinea, ait Ambrosius, dum ligatur, erigitur; & recisa non minuitur, sed augetur: ita Ecclesia sancta dum humiliatur, attollitur; & dum reciditur, coronatur. ita respondet Ecclesia Frederico Imperatori, qui carmine quodam adversus Ecclesiam temere blaterabat.

Ambr. l.  
9. cap.  
10. in  
Lucam.

*Roma diu titubans variis erroribus acta*

*Corruet, & mundi desinet esse caput.*

At Ecclesia egregiè respondit,

*Niteris incassum navem submergere Petri,*

*Fluctuat, at nunquam mergitur illa ratis.*

Replicavit Imperator,

*Fata volunt, stellaque docent, aviumque volatus,*

*Quod Fredericus ego malleus Urbis ero.*

Audaciam retundit Ecclesia dicens,

*Fata volunt, Scriptura docet, peccata loquuntur,*

*Quod tibi vita brevis, sæna perennis erit.*

Hinc etiam malo punico comparatur: nam in cortice amarum, asperum, & durum, interiùs autem suavi constat dulcedine. habet etiam magnam granorum multitudinem, miro artificio dispositam, quæ quidem grana oculis intuentium se obijciunt, quasi lapides pretiosi, quapropter inter alios fructus, à natura coronâ donatur. En symbolum Ecclesiæ, quæ licet interiùs maximâ dulcedine gaudeat, propter spem Regni cœlestis, exteriùs tamen, innumeras patitur amaritudines; & sicut malum punicum multis granis decoratur, ita Ecclesia meritorum copiâ abundat. coronatur malum punicum, semper regnat Ecclesia, imò quò magis oppugnatur, tantò magis dilatatur, & ma-

jores vires acquirit eundo, quasi vitis, quæ quò magis reciditur, eò magis abundat, cæsa uberior. oppugnari quidem potest, sed non expugnari.

*Qui tibi bella movet, Genitrix sanctissima, non te*

*Lædit, at ipse suum trajicit ense caput.*

*Calce ferit stimulum, nam se miser ipse cruentat,*

*Quique putat stimulos se dare, damna capit.*

*Fortior es cælo, cælumque & terra peribunt,*

*At tu sponsa Dei, tempus in omne manes.*

O navis divina, validis præfidiis undique stipata. Quos enim Remiges habet? Apostolos. quæ arma? Sacramenta. quos milites? Fideles. quæ vela? virtutes. quem ventum? qui per varios gurgites ad portum dirigat. Ecce Spiritus sanctus, qui semper assistit, de quo Vates in persona Ecclesiæ; Spiritus tuus bonus deducet me in terram rectam. quam arborem? Salvatoris crucem, arbor se extollit, usque ad sidera. Crucis vexillum, & imperium, usque ad Empyreum.

O navis prodigiola, in qua novum celebratur certaminis genus, hîc enim milites truncato capite cadunt, sed cadendo vincunt, sed patiando regnant, sed moriendo triumphant. at quibus armis? non hastis ferreis, non acutis gladiis, non globis bellicis, sed patientiæ clypeo protecti. Cæduntur gladiis, more bidentium, non murmur resonat, non querimonia, sed corde tacito, mens bene conscia, conservat patientiam. Proinde non ab re, illam turri Davidicæ compararunt expositores, ex qua mille clypei pendent, omnis armatura fortium. nulla quippe armatura fortior adversus persecutionum aculeos, quàm viri fortis patientia: nam cùm injuria non fiat, nisi nolenti; qui non ægre fert injuriam, vim omnem retundit injuriæ. Verùm quomodo arcet hostes sine gladiis, sine jaculis,

culis, sine globis? en novus pugnandi modus, quem prædixit nobilis illa mulier, Nova bella elegit Dominus. triumphos enim agit Ecclesia, non pugnando, sed patiando, non gladios vibrando, sed proprium sanguinem effundendo. idcirco Tertullianus tormenta Martyrum appellabat vestes palmatas. hic est habitus victoriæ nostræ, hæc palmata vestis, tali curru triumphamus. hinc strenui milites in Ecclesiis, cum palmis pinguntur, palmas habent in manibus, quia vinculis ferreis, quibus obstringebantur, oscula dulcia imprimebant, benedicentes Dominum. ideo Paulus omiſſis titulis; Ego sum Apostolus, ego vas electionis, ego doctor gentium, solo hoc titulo gloriatur, ego vinc-tus in Domino. Palmas in ore, acclamabant enim coram Regibus, Obedire oportet Deo magis, quàm hominibus. Palmas in oculis, ibant gauden-tes ad carceres, ad vincula, quasi ad epulas, quo-niam digni habiti sunt pro nomine Jesu contume-liam pati. Palmas in pedibus, hinc Tiburtius cal-cato igne exultabat, Carbones isti mihi flores videntur. Palmas in corde, Credimus Jesum Chri-stum, & hunc crucifixum. Palmas denique in omni loco, in omni tempore, coram omnibus. quia hæc erat vox omnium, Lætatur pro Christo graviora pati. Moyses dicebat, Vadam, & vide-bo visionem hanc magnam, quare rubus ardeat, & non comburatur. hoc idem de Martyribus di-cendum, magna hæc visio, tot ictibus tormento-rum, quasi malleis concutiuntur, & nihil moven-tur, quasi dicerent,

*Etiamsi fractus illabatur orbis,*

*Impavidos ferient ruine.*

Hinc meritò Ecclesia assimilatur palmæ; Statura tua assimilata est palmæ, quia sicut palma ponderi

non succumbit, sed contrà nititur ; ita Ecclesia potest quidem oppugnari, nunquam tamen expugnari. Mirum planè est, quod de templo Junonis Laciniae, scribit Plinius : In Laciniae Junonis ara sub dio sita, cineres manent immobiles, perflantibus undique procellis, notâ deinde appositâ, Flatus irritus omnis. hoc idem decantant Martyres, veniant procellæ, insurgant venti, irruant infortunia, semper cum Domino erimus. Ecquid nos separabit à charitate Christi ? an gladius ? flatus ? flatus irritus omnis. Sanctus Cyprianus martyr, acceptâ mortis sententiâ, an timuit ? exultans, & gaudens respondit ; Amen, amen. Deo gratias. Sanctus Sebastianus, dum ad martyrium ducebatur, in pectore gerebat chirographum ita scriptum, Quia Christianus sum. Edmundus Campianus Societatis Jesu Theologus, acceptâ in Anglia, pro fidei confessione mortis sententiâ, statim oculis ad cœlum erectis, cecinit, Te Deum laudamus. omnes Sancti ibant gaudentes, quasi ore pleno acclamarent, Lætamur graviora pati ; frangimur, non flectimur ; secatur corpus in frustra, at mens immota manens, sollicitatur frustra. urit flamma foris, sed vis ardentior intus. isti erant viri, hoc est, victores, nam ubi vulgata habet, confortare, & esto robustus, exemplar Hebræum legit ; Confortare, & esto vir. hinc Gregorius dicebat ; virum dici à virtute, sed nostrâ ætate, homines permulti, viri perpauca. Proinde Diogenes Cynicus in meridie, per forum civitatis facem ardentem manu gerens, quærebat hominem, & dicentibus : Ecce quamplurimi adsunt, respondit ; Isti non sunt homines, quia non ratione, sed libidine ducuntur. Porrò in primitiva Ecclesia erant viri fortes, qui nullo metu frangebantur. Hinc Eccle-

Ecclesia dicitur signum magnum, quia magnum miraculum à Deo effectum. Nonne magnum miraculum, contra tam diras tyrannorum persecutiones, Ecclesiæ non solum fundatio, sed (ut ita dicam) prodigiosa progressio? præcipue si spectentur illi, per quos fundata est, pauci numero, humiles genere, absque ullo mundanæ potentiae præsidio. O felix navis tantorum Principum pretioso sanguine purpurata, sed præcipue Petri, & Pauli, qui sunt Catholicæ fidei propugnatores acerrimi, & urbis Romæ vigilantissimi custodes, de quibus egregie cecinit Venantius, Poëta Christianus,

Venantius Fortunat. li. 3 carminum.

*Cælorum portæ, lati duo lumina mundi*

*Ore tonat Paulus, fulgurat arce Petrus.*

*Inter Apostolicas radianti luce coronas*

*Doctior hic monitu, celsior ille gradu.*

*Corda per hunc hominum reserantur, & astra per illum,*

*Quæ docet ipse stylo, suscipit ille polo.*

*Pandit iter cælis hic dogmate, clavibus alter,*

*Est via cui Paulus, janua fida Petrus.*

*A facie hostili duo propugnacula præsunt,*

*Quos fidei turres, Urbs caput orbis habet.*

O navis divinis elogiis celebranda, quæ multis quidem titulis, quasi rutilantibus gemmis decoratur, sed imprimis quinque privilegiis gaudet insigniri: dicitur enim Una, Sancta, Catholica, Apostolica, Visibilis. dicitur una, ratione communionis fidelium, quam confitemur in symbolo, Credo Sanctorum communionem. est enim Ecclesia, collectio multorum, ad unius Dei cultum. hinc explodendus Henrici Octavi error, Anglorum Regis, qui eò insaniam devenit, ut diceret, tot esse Ecclesias Christi, quot sunt Regna. ô virum perditissimum, immundæ libidinis causâ, in miseriam

adeò turpem redactum. Eia igitur Christiani Principes, hujus Regis periculo sapite, Christi Vicario Romano Pontifici, in his quæ ad Christianam Religionem pertinent, humiliter obedite, & demum ante oculos vestros proponite Regem regum, Judicem universalem, qui venturus est judicare eos, qui sub prætextu temporalis & politici regiminis, Ecclesiasticam Summi Pontificis auctoritatem à Deo datam coarctare, non sine fidelium scandalo, & magno fidei detrimento præsumunt. hæc lubens dixerim Anglici regni calamitatem misertus. Nam quod olim totius Christianæ religionis exemplar extitit, jam nostris temporibus omnium hæresium officinam non sine lachrymis videmus. Unde non ampliùs Anglia, seu Angelica terra, sed diabolica, ab omnibus ore pleno decantatur. Verùm redeamus, unde digressi sumus; nempe, ad Sanctæ Ecclesiæ unitatem, quæ satis superque probatur symboli Nicæni testimonio. Credo unam sanctam Catholicam, & Apostolicam Ecclesiam. Et jure quidem dicitur una, siquidem Ecclesia est corpus Christi, sed unius capitis, unum tantum est corpus, ut bene colligit Paulus, divisum est Christus? quasi diceret, ubi unum caput Christus, una tantum est Ecclesia, quæ est ejus corpus. Nec propterea Ecclesia biceps, quod in ea sint duo capita, visibile & invisibile, quoniam etsi sint duæ personæ, Christus & Papa, Papa tamen est Ecclesiæ caput, ex Christo instituyente, & habet vices capitis, ex supremo capite; ac demum Papæ potestas est derivata à Christo, qui propriâ virtute gubernat Ecclesiam. nec hinc sequitur, Ecclesiam esse bicipitem, quia hæc capita subordinata sunt, est enim Christus caput in cœlis, habens Vicarium in terris.

Titulo

D.Th. in  
3 P. 9. 8.  
a. 6.



Titulo etiam sanctitatis decoratur Ecclesia, divino attestante oraculo, Tota pulchra es amica mea, & macula non est in te. nec obstat axioma illud ab omnibus receptum, Bonum confurgit ex integra causa, malum ex particulari defectu. Cum igitur in Ecclesia sint multi peccatores, & proinde non ex omni parte habeat sanctitatem, non debet dici sancta; præsertim cum denominatio fiat à majori parte. plures autem sunt peccatores, quam justi, quomodo ergo tota pulchra? Pro explicatione hujus difficultatis notare debes, quod signa distributiva in sacris litteris, non uno tantum modo accipiuntur, sed aliquando pro omnibus, sine aliqua exceptione, hoc est, pro singulis generum, ut illud, In Adam omnes moriuntur. aliquando sumuntur pro aliquo tantum genere, hoc est, pro generibus singulorum, ut illud, In Christo omnes vivificabuntur. quod tantum intelligitur pro genere salvandorum, ita quod illud signum significat, quod vel omnes quotquot salvantur, per Christum salvantur, vel quod ex omni genere gentium vivificantur aliqui. quando ergo dicimus, Tota pulchra es, intelligimus, ut distribuat pro generibus singulorum, hoc est, in quolibet statu, & gradu Ecclesiasticæ Hierarchiæ sunt amici Dei, sine macula peccati mortalis. Nec denominatio fit à majori, sed à nobiliori parte; à Sanctis nimirum, qui vivunt sine macula mortali, licet à peccatis venialibus non sint omnino liberi, quoniam venialia peccata non destruunt gratiam, & charitatem, in quibus sanctitas formaliter consistit.

Dicimus etiam Ecclesiam Catholicam, hoc est universalem, ratione loci, temporis, doctrinæ, & materiæ. ratione quidem loci, quia ubique

regnat Ecclesia. Dominabitur à mari usque ad mare, & à flumine usque ad terminos orbis terrarum; à polo arctico, usque ad antarcticum, fama fidei Christianæ evolavit. ab Oriente quippe ad Indias usque enavigavit, ab Occidente usque in Americam, à Septentrione usque ad Iapones, à Meridie usque ad Brasiliam. sed quid pluribus immoror? per omnia mundi climata, ad ipsos usque Antipodes protendit. siquidem in omni loco prædicatur Euangelium, vel prædicabitur.

Nec illud multum urget, nunquam in universo mundo prædicatum est Euangelium; sed satis est, quod omnes obliget, & saltem successivè, omnes illud suscipiant, ejusque fama totum peragraverit orbem. Hinc malo punico comparatur, coronam gestans in capite, quia Ecclesia regnat ab ortu Solis usque ad occasum. Unde plenissimo jure Romanus Pontifex caput Ecclesiæ dicitur, & est Monarcha spiritualis in toto orbe, non quod præsit omnibus hominibus, qui sunt in toto orbe; sed quòd præsit omnibus Christianis, toto orbo diffusis.

Augst.  
de Civ.  
Dei lib.  
15.

Ratione temporis Ecclesia dicitur universalis, quia ab initio mundi perseverabit usque in finem. de qua Angelus Gabriël, Regnabit in domo Jacob in æternum, & regni ejus non erit finis. omnes Monarchiæ finem jam dudum acceperunt, at supremum Christi Imperium, in Ecclesia, nunquam cessabit. Ex parte doctrinæ fidei, Catholica est, quia universaliter est vera, nullumque errorem admixtum continet, aut continere potest. denique ratione materiæ, quia omnes indifferenter vocat, omnesque, nullo excepto, suis præceptis obligat, & demum quia ante mundi finem nulla erit natio, quæ ad fidem non sit convertenda; non quia actualiter ad omnes se extendat, vel tempore præterito

Turrec.  
li. 1 suæ  
sum. c.  
13:

terito ad omnes simul se extenderit, vel in futuro ad cunctos pro eodem tempore se extendere debeat. Quoniam Ecclesia non sic dicitur Catholica, quia omnem hominem in singulari ad fidem actu recipiat. videmus namque multos in sua infidelitate mori; sed quia omnes nationes, & provincias recipit, ex eis aliquos convertendo.

Quarto loco dicitur Apostolica, quia succedit Ecclesiæ, quam moderati sunt Apostoli: nostra enim Ecclesia succedit illi, quam Petrus gubernavit, & hac ratione successor Petri vocatur Apostolicus, ut constat in publicis Ecclesiæ obsecrationibus, Ut dominum Apostolicum, & omnes Ecclesiasticos ordines in sancta religione conservare digneris, hoc est, Summum Pontificem, qui ideo Apostolicus dicitur, quoniam doctrinæ Apostolicæ custos est, & doctor infallibilis. Et jure quidem Apostolicus, quia continuâ successionē à Petro usque ad nostra tempora hæc successio duravit. à divo autem Petro usque ad Pontificem nostrum **URBANUM VIII**, successerunt sibi continuâ successionē Summi Pontifices, ducenti quadraginta tres. Et tanti valuit apud Augustinum hæc successio, ut dixerit, Multa sunt quæ me justè in gremio Ecclesiæ detinent: inter quæ numerat, tanquam quid potissimum, continuam Pontificum successionem, & tamen tempore Augustini non præcesserunt nisi triginta novem Pontifices à Divo Petro usque ad Anastasium, qui Sedem Apostolicam tunc temporis tenebat.

Postremò Ecclesia dicitur visibilis, quod ex multis Sacræ Scripturæ oraculis, posset probari, sed (instar omnium) locus Matthæi satis abunde convincit, ubi docetur, fratrum delicta ad Ecclesiam fore referenda; at si Ecclesia non esset visibilis,

lis, quomodo ei denunciaretur incorrigibilis? Nec obstat argumentum Lutheri, omnes fideles credunt Sanctam Ecclesiam, sed fides est de non visis, ergo si credimus Ecclesiam, non videmus, & per consequens non est visibilis; aliàs diceremus, video Sanctam Ecclesiam, & non credo. non urget, inquam, hæc obiectio, seu deliramentum, siquidem hæc duo simul verè consistunt, respectu diversarum rationum, nempe, quod omnes fideles credimus Sanctam Ecclesiam, & quod videmus Sanctam Ecclesiam. aliud enim est quod videmus, & aliud quod credimus. in quo sensu dixit

Joan. 20. Dominus Thomæ; Quia vidisti me, Thoma credidisti. aliud vidit, & aliud credidit, ut doctè advertit Gregorius, vidit hominem verum, sed eundem credidit esse Deum. ita & nos dicimus de corpore Christi mystico, quod est Ecclesia. Nam aliquid videmus, nimirum, collectionem hominum qui adunantur in confessione fidei, sub uno Christi Vicario in terris; & aliquid invisibile est in Ecclesia, quod credimus, nempe, fides, charitas, potestas spiritualis. hæc sunt, quæ credimus in Ecclesia, cum dicimus, Credo sanctam Ecclesiam.

O igitur Cathedra benedictionis, ter quaterque beata, in qua post Petrum Apostolorum Principem, usque ad nostra tempora, quibus URBANUS OCTAVUS Romanæ Ecclesiæ clavum feliciter moderatur, ducenti quadraginta tres Pontifices federunt, & præfederunt. Cathedra, inquam, triginta trium Pontificum, qui eam initio nascentis Ecclesiæ tenuerunt, pretioso purpurata sanguine.

O Cathedra veritatis, extra quam nihil sanctum, nihil validum; nam velut Phoenix unica avis, non per omnes aëris regiones volitat, sed in  
folis

folis Arabiæ petris reperitur , ita quoque veritas , quæ instar Phœnicis unica est , nusquam nisi in petra Ecclesiæ apparet , utpote , quæ nunquam in doctrina fidei errare potest , divino acclamante oraculo ; Super hanc petram ædificabo Ecclesiam meam , & portæ inferi non prævalebunt adversus eam : si enim Ecclesia circa fidem errare posset , utique non esset fundata supra firmum & certum fundamentum. sed quid ? nonne dixit Dominus Ecclesiæ ? Desponsabo te mihi in fide ? at hujusmodi matrimonium est indissolubile. Ecclesia ergo non potest errare circa fidem.

Matt. 16.

Osæ 2.  
Cano  
de locis  
theol. li.  
4. c. 4.

O Cathedra sanctitatis , tu es illa , quæ sub Silvestro Pontifice in Concilio Nicæno Arrianam hæresim , Jesum Christum solum esse hominem , non verò simul Deum , asserentem , condemnasti.

Tu es illa , quæ sub Damaso in Concilio Constantinopolitano , Macedonium , & Eunomium in Spiritum Sanctum blasphemos , profligasti.

O Cathedra Apostolica , nonne tu es illa , quæ sub Cœlestino in Concilio Ephesino Nestorii impietatem , duas in Christo personas ponentem , confutasti.

O Cathedra salutis , nonne es illa , quæ sub Leone Primo in Concilio Chalcedonensi , Eutychetem unicam in Christo naturam promulgantem confregisti ?

O navis verè regia , tu pro fide Christi gloriosè decertans semper triumphos agis , tu manu invictâ hostes tuos debellans , vexillum Crucis extollis ad sidera , tu instar armati exercitus instructa , in tres acies divisa , superbiorum colla prosterne per totum orbem inclamans , Christus vincit , Christus regnat , Christus imperat. In prima acie pugnatur & quidem strenuè sub duce Summo Pontifice ,  
qui

qui Episcopos veluti tribunos militares pro salute omnium sibi creditarum , ad pugnam summâ charitate incendit. in secunda turma, ecce Nobiles & Primarii unâ cum plebe admixti , qui in hac navi militantes , manûs movent viriliter ad prælia. omnes enim in Baptismo nomina dederunt, omnes in Confirmatione arma acceperunt , & omnes pro laborioso certamine gloriosa stipendia expectant. In tertia verò acie sele. offerunt Religiosi diversis officiis destinati ; horum aliqui , in vallis vigiliis agunt, & in propugnaculis veluti in specula excubant, ut sedulò explorent, ne quid respublica Christiana detrimenti patiatur, idque perficiunt in Monasteriis , & Collegiis. Ex his alii extra castra se subripiunt , hostes invadunt , ingentia damna inferentes. & hi sunt præcones Ecclesiastici , quorum sonus in toto orbe ferè intonuit ; alii in montibus excubant , in desertis tentoria figunt , insidias hostiles detegunt , & aperto Marte aggrediuntur ; hi sunt sancti Patres eremum incolentes. en navis egregiè instructa , ut castrorum acies ordinata.

O Sedes verè divina , in qua sedet, & præsidet Episcopus universalis , totius orbis Pastor , Vicarius Christi in terris , Petri Apostoli verus successor. & meritò quidem hisce elogiis decoratur. quoniam Vicarius is propriè dicitur , qui absentis vices gerit ; successor verò , qui in defuncti locum substituitur. Cùm igitur Christus Dominus absens sit, secundum præsentiam visibilem, Petrus autem mortuus sit, idcirco URBANUS OCTAVUS, Christi Vicarius, & Petri successor nuncupatur. Nec propterea Ecclesia dicenda biceps , quoniam hæc duo capita ita se habent , ut alterum alteri subordinetur , siquidem Christus est caput in cœlis habens Vicarium in terris, ad quem omnia judicia refe-

referuntur, & à quo omnes principatus pendent. Tres enim sunt regiminis formæ, Monarchia, quæ unius est principatus. Aristocratia, quæ paucorum, Arist.lib. sed optimatum. Democratia, quæ penès populum 3 polit. gubernationis summam ponit, quam vocant po- c. 5. pularem; ubi ad magistratus populus sine discrimine admittitur. illa tamen Reipublicæ forma censetur optima, quæ unius est dominatio. Porro quia præstantissimum regimen est monarchia, & certum est, Ecclesiam Dei à sapientissimo Principe Christo institutam, optimè gubernari, quis inficiari potest, ejus regimen debere esse monarchicum? regitur enim ab uno visibili summo Judice, cui cæteri omnes Principes subjiciuntur. hinc in persona Petri & successorum decantatur hoc distichon:

*Ecclesiam pro nave rego, mihi climata mundi*

*Sunt mare, Scripturæ retia, piscis homo.*

Scio quidem Imperatorem, mundi Principem nominari, super omnes nationes, provincias, & regna constitutum, in cujus signum triplici corona decoratur; argenteâ, in Aquisgranis, quam accipit ab Archiepiscopo Colonienſi, & significat puritatem; Ferreâ quam accipit ab Archiepiscopo Mediolanenſi Modætæ, & significat fortitudinem; Aureâ, quam dat Romanus Pontifex in Ecclesia sancti Petri ad altare sancti Mauriti, & significat excellentiam super omnes Reges, Principes, & nationes; est nihilominus sub potestate Papæ constitutus, quia Imperatorem tam electum & confirmatum deponere potest, & de facto deposuit, ut egregiè fecit Innocentius Quartus, qui deposuit Fredericum Romanum Imperatorem, & Regem Siciliæ, nam petiit ab eo, ut daret pacem Ecclesiæ, & mundo universo; at ipse pertinax, veluti alter Pharaon, audire renuit, quare cum fuisset per-

Euseb. li.  
6 hist.  
eccles.  
c. 25.

ut patet  
c. Vene-  
rabilem.

Ut dici-  
tur 96.  
d. c. Con-  
stanti-  
nus.

perjurus, sacrilegus, & de hæresi suspectus, Papa deposuit eum. Nonne Fabianus Pontifex inter ipsas etiam Ecclesiæ angustias, Philippum ecclesiasticis suppliciis punivit? Nunquam tamen nisi causâ fidei, Regna per Pontificem mutata sunt, hac enim de causa Stephanus Papa transtulit Imperium à Græcis, in Germanos, & Innocentius Quartus, Regi Portugalliæ, Regni administrationem interdixit.

Nec objiatur, quod Constantinus Imperator imposuit coronam Silvestro Papæ, quia hoc fecit, non sicut dominium, & auctoritatem præbens, sed sicut minister obsequens, ejus signum fuit, quod tenens equum, famulatûs, & obsequii officium exhibuit.

D. Th. in  
tra&. cont. im-  
pugn. re-  
lig. c. 3.

Licet autem ad tanti culminis sublimitatem sit evectus Romanus Pontifex, ut habeat jurisdictionem immediatam in omnes Christianos, ut sit super Reges, & omnes Principes, ut sit Christi Vicarius in terris, ut sit Petri in prælatione successor, ut sit Ecclesiæ universalis Episcopus, & totius orbis Pastor, ad imitationem tamen capitis, qui non venit ministrari, sed ministrare, Servus servorum Dei non dedignatur nominari. Hinc distichon graphicè elaboratum,

*Servierant tibi, Roma, prius domini dominorum,  
Servorum servi, nunc tibi sunt domini.*

Cedren.  
in vita  
León.

O præclara Sedes, in qua sedens Gregorius Secundus, Leonem Imperatorem, Iconoclastarum hæresi faventem, atque eam in Italiam inducere molientem, non solum excommunicavit, sed etiam prohibuit ab Italia solvi vectigalia, & proinde multavit eum parte Imperii.

Fulgof.

li. 6. c. 3. In hac Sede sedens Innocentius Primus, Arcadium Imperatorem, atque ejus conjugem Eudoxiam,



doxiam, à communi fidelium grege separavit, quia, Chrysoftomo Patriarchatus sui honore depulso, Theophilum Alexandrinum Patriarcham iuffecerant.

In hac Sede fedens Innocentius Tertius, Otho- Blond.  
Decade  
2. lib. 6.  
nem Quartum Imperatorem, anathemate innodavit, & Imperatoris titulo privavit.

In hac Sede fedens Innocentius Quartus in Concilio generali Lugdunensi, consentientibus universis Patribus, deposuit Fredericum Secundum, & dedit etiam Regi Lusitaniæ coadjutorem quendam, qui Regnum administraret, quandoquidem Regis negligentia, & respublica, & religio in Lusitania detrimentum patiebatur.

In hac sede fedens Gregorius Septimus, Henricum Quartum Imperatorem deposuit, & alium eligi iussit, quod & factum est.

In hac Sede fedens Clemens Sextus, Ludovicum Quartum Imperatorem à Joanne Vigesimo- Pighius  
li. Hie-  
rarch.  
Eccle-  
siast. 5.  
c. 14.  
secundo, & Benedicto Duodecimo excommunicatum deposuit.

In hac potestate fedens Leo Tertius, cum cerneret Christianæ Reipublicæ curam, à Græcis Imperatoribus negligi, transtulit Romani Imperii jura à Constantino Irenes filio, ad Carolum Magnum Francorum Regem, eique Augusti titulum, & Imperatoris insignia contulit.

In hac Sede summæ potestatis fedens Zacharias, deposuit Kildericum à Regno, quod ejus Paul.  
Diac. lib.  
6, c. 5. de  
gestis  
Longo-  
bard.  
cordiâ Catholica Religio in Galliis non modicum detrimentum pateretur, & transtulit Regnum in Pipinum Caroli Magni patrem, quam translationem justam fuisse, nemo sanæ mentis negabit, præsertim, cum eventus docuerit, mutationem illam felicissimam fuisse, nunquam enim Regnum Francorum

corum potentius, aut Religio in Gallia florentior fuit, quàm tempore Pipini, & Caroli.

Blond.  
Flavius  
lib.3 de-  
cadis 1.

In hac tandem supremæ auctoritatis Sede, sedens Gregorius Quintus, Sanctionem edidit, ut penès solos Germaniæ Principes jus esset eligendi Regem, qui post diadema à Romano Pontifice acceptum, Imperator & Augustus appellaretur. Electores verò Imperii septem constituit, nempe, tres Cancellarios, Maguntinum, Trevirenses, Coloniensem Archiepiscopos: Marchionem Brandenburgensem Camerarium, Comitem Palatinum Rheni dapiferum, Ducem Saxoniae, qui enses portat, Regem Bohemiae, qui pincernam agit. quod eleganti carmine descripsit Poëta,

Bellar-  
min.de  
translat.  
Imp.  
Rom.  
li.3.c.1.

*Maguntinus, Trevirensis, Coloniensis,*

*Quilibet Imperii fit Cancellarius horum.*

*Est Palatinus Dapifer, Dux, Portitor ensis.*

*Marchio, Præpositus Camera; Pincerna, Bohemus.*

*Hi statuunt Dominum cunctis per secula summum.*

Hanc itaque Unam, Sanctam, Catholicam, Apostolicam, Romanam Sedem venerare, ô Princeps, Imperiales fasces, & sceptrum, humiliter submitte, pro hac tuenda te ipsum, resque tuas expose, Constantinum, Theodosium, Carolum, Principes ingenuos, Sanctæ Romanæ Ecclesiæ acerrimos defensores, tibi magistros constitue. & Regnum tuum accipiet benedictionem à Domino in æternum.

*Principis æterni sacros venerare ministros,*

*Tunc tibi perpetuum celitus auxilium.*

## CAPUT XXX.

*Qui sacram religionem coluere, diu & feliciter, ferè omnes regnauere. At qui in eam insurrexere, turpiter quoque occubuerunt.*



RO constanti habeant Principes, eos, qui ab Ecclesia Catholica defecerunt, in maximas calamitates ferè omnes incidisse. Quod longo rerum usu compertum, & plurimorum exemplis comprobatum.

Si enim Julianus, magni Constantini nepos, sed auitæ pietatis immemor, calamum & gladium, Gregor. Nazian. orat. 2. in Iulianum. adversus Romanam Ecclesiam, perfidus sumsit, nonne etiam dignas dedit tanti flagitii pœnas? Si quidem in bello cadens, diuinitus sagittâ transfixus, & manu cruore repletâ, Christum blasphemans, in aëremque sanguinem projiciens, dixit, inclamando; Vicisti tandem Galilæe, vicisti. Et vacuatus paulatim sanguine circa noctis medium, infelicem animam exhalavit.

Si Valens Valentiniani frater Arrianæ factionis studiosus, Deo dicatos viros, & veræ religionis cultores, crudeliter afflixit, quomodo extremum clausit diem? amisso exercitu saucius, ac trepidus fugiens, ab hostibus in vili tugurio circumseptus, vivus à flammis absumtus est. Amian. Marc. li. 21 hist.

Si Anastasius Primus impio & turbulentissimo, Ruffin. lib. 12. histor. c. 13. Eutychetis errori favit, Christianum nomen detestans, quid hinc? in suorum procerum conspectu, Zonaras lib. 4 annalium. de coelo tactus ictu fulminis concidit.

Si Rex Theodoricus, in sanctissimos Romanos Pontifices, & in omnes Catholicos diram tyrannidem

videm exercuit, ob tantæ impietatis flagitium quid ei accidit? apoplexi correptus, in sua impietate animam egit, & , ut scribit Divus Gregorius,

Greg. in in ignem Lyparitanum submersus est,

4 li. dia-  
log. c. 30.

Si Justinianus Primus, Eutychiani delirii *sectator*, aliquando à Catholica pietate defecit: quid hinc? nonne inops consilii, & mentis, amentissimus ex hac vita decessit?

Si Rex Desiderius, nec Deum timens, nec homines metuens, in Adrianum Christi Vicarium insurgens, quàm plurimas urbes Ecclesiasticæ ditionis invadere, & occupare ausus est, ex hac impietate, quem eventum fortitus? non multò post Caroli Magni copiis, Regno pulsus, funestissimam suæ temeritatis memoriam Longobardis omnibus reliquit.

Blond.  
lib. 3. de-  
cade 1.

Si Mauritius Imperator Divum Gregorium, & Romanam Ecclesiam perturbavit adeò crudeliter, ut aliquando ad eum Gregorius ita scripserit: Etsi

Greg. li.  
4 epist.

peccata Gregorii tanta sunt, ut pati talia debeat, Petri Apostoli peccata nulla sunt, ut vestris temporibus pati ista mereatur. Quid inde? in suorum odium prolapsus, conspiratione militum in eum factâ, à Phoca cum uxore & liberis contruncatur.

Io. Zonaras in  
sua hist.

Si Heraclius pristinae suæ pietatis oblitus, quâ sibi tot victorias paraverat, sancta Romanorum Pontificum monita contemnens, Monothelitarum impietatem secutus est, quem finem fortitus? infelix hydropisi decessit, miserrimo illo morbi genere cruciatus.

Paul.  
diac. lib.  
21.

Si Constans Imperator universa almæ urbis Romæ ornamenta diripuit, Christique Vicario Martino Primo, sceleratas manus ausu temerario injecit, an divinam ultionem effugit? non ita. in Siculis balneis turpiter à suis occiditur.

Si

Si Constantius Arrianis favens, S. Dionysium Marlianum, Mediolani Archiepiscopum, in Catholica fide constantem permanentem, in Cappadociam insulam relegavit, an divinam evasit ultionem? obscuro loco, & maximo cum animi mœnore, vitam finivit.

Ruffinus  
lib. 10. c.  
20.

Si Valentinianus Junior, Divum Ambrosium Episcopum Mediolanensem, multis modis vexavit; imperavit enim, ut basilicam hæreticis traderet, ut in Palatio suo coram ipso de fide disputaret, exilium, ni obsequeretur, comminatus, quid ei accidit, divinâ sic permittente justitiâ? infami suspendio necatus est.

Ambros.  
lib. 5. e-  
pist. 32.

Si Michaël Imperator Theophili filius, in Nicolaum Primum Romanum Pontificem, superbe nimis se gessit, & Ignatium Patriarcham Constantinopolitanum summâ injuriâ deposuit, quo fine diem extremum clausit? cum ebrius cubitum iret, stans juxta lectum à suis domesticis trucidatur.

Zonaras  
tom. 3  
annal.

Si Fredericus Ænobarbus, Sedem Apostolicam multis annis infestavit, erigens cervicem contra Summos Pontifices, nonne divina ultio eum corripuit? cum in fluvio, animi causâ, sese ablueret, repentè submersus interiit.

Sabell.  
li. 5. en-  
nead. 9.

Si Philippus, repugnante Sede Apostolicâ, ad Imperium evehitur, nonne ulticem Dei manum sensit? in oppido Bambergâ, dum à prandio quiesceret, à Comite Palatino occiditur.

Si Fredericus Secundus Imperator, non tantum Sedis Apostolicæ, sed & universi Cleri, per totum Imperium hostis acerrimus, ab Innocentio Quarto excommunicatus, non resipuit, imò crudelior indies effectus, quid ei contigit? à spurio suo Manfredò in Apulia interficitur.

Si Manfredus Apuliæ, & Siciliæ Regna occu-  
pans,

Sabell.  
lib. 7. en-  
nead. 9.

pans, Ecclesiæque persecutor acerbus fuit, proinde ab Alexandro Quarto excommunicatus, quo fine terminavit? à Carolo Regis Gallorum fratre, quem Urbanus Quartus Siciliae & Apuliae Regem declaravit, debellatur, & in acie occiditur.

Si Ludovicus Quartus Imperator à Sede Apostolica bis excommunicatus, primum à Joanne Vigesimo secundo, postea à Clemente Sexto, & indies in Ecclesiam acerbior, an manum Dei omnipotentis evasit? cum in venatione esset, subitâ paralyfi omnium membrorum correptus, ex equo decidens moritur.

Si Justinianus Secundus, Heraclianæ stirpis ultimus, impiam synodum reluctante Romano Pontifice, indicare, & celebrare præsumsit, quid hinc? abscissis naribus Cherfonam relegatur, & licet opera Bulgarorum restitutus, iterum imperio deturbatus est, & cum Tiberio filio unico contrucidatus.

Si Constantinus Quintus, piorum omnium hostis, duos Constantinopolitanos Antistites, omni supplicio excruciatos, capite mulctavit; non multò post divina ultio sublecuta est. Nam exiguo temporis intervallo, insanabili elephantia consumtus est.

Fulgos.  
lib. 1. c. 2.

Si Leo Quartus Imperator, avaritiâ, impellente, per joci speciem, veluti alter Siculus tyrannus, templa diripiens, ex sanctæ Sophiae capite, coronam auream, pretiosis gemmis onustam, sustulit, & eam sacrilego suo capiti imposuit, nonne Deus eam impietatem ultus est? ita quidem. nam pro gemmis, venenati carbunculi Leonis caput obsederunt, & coactus diadema deponere, impium spiritum exhalavit.

Blond.  
lib. 1. de-  
cade 2.

Si Constantinus Sextus, legitimâ uxore spretâ, concu-

concubinam superinducens, sacrosancta matrimo-  
nii fœdera violavit, ab Irene matre Regno expul-  
sus, excæcatur.

Si Leo Armenius hujus nominis Quintus, divo-  
rum veneranda simulachra, & sacras reliquias ex-  
secrans, conculcavit, merito ab adversariis in æde  
sacra multis vulneribus confoditur.

Si Henricus Quartus sacerdoti insultans, ad-  
versus Summos Pontifices arma sumsit, permit-  
tente Deo, ab Henrico Quinto ejus filio, Regno  
privatus, & carcere, & miseriis pressus, vitâ ex-  
cessit.

Naucle-  
rus vo-  
lum. 3.

Si Vitiza Gothorum Rex, contra sanctorum  
Conciliorum sanctiones, in ditione sua sacerdoti-  
bus non conjuges modò ducere, sed multas quo-  
que habere permisit, nonne divinam ultionem  
sensit? prælio victus captusque, lumina, Regnum-  
que simul amisit, & in tetro carcere decessit.

Fulgof.  
li. x. c. 2.

Si Honoricus Vandalorum Rex, cùm Arrianâ  
hæresi laboraret, complures Catholicos Episco-  
pos ab Africa exilio mulctavit, & multos etiam  
morte affecit, an tantum scelus semper impune  
fuit? non. post multum temporis, in dirum mor-  
bum incidit, & scaturientibus è corpore ejus un-  
dique pediculis, hoc supplicii genere, sceleris sui  
pœnas luit, & experimēto didicit, quàm horren-  
dum sit incidere in manus Dei offensi. Omnes,  
omnes, qui à tramite pietatis deviantes, Sanctissi-  
mæ Matris Ecclesiæ decreta neglexerunt, exitiales  
exitûs habuere, ut eleganter cecinit Poëta,

Victor  
lib. 3.

*Ad generum Cereris sine cæde, & vulnere pauci  
Descendunt Reges, & siccâ morte Tyranni.*

Juven.  
sat. 10.

Domitius Nero, crudelitatis exemplum, sævitiae  
portentum, horrendum naturæ monstrum, quan-  
tam Christiano nomini cladem intulerit, vix po-  
test

Ioan.  
Bapt. E-  
gnat. lib.

test explicari. attendamus exitum. Diis, hominibusque invisus, ab omnibus derelictus, in miseram fugam compulsus, ut effugii locum inveniret, latibula omnia exquirebat; cum autem intelligeret, nullum spei locum relictum, & timeret, ne graviora ei in morte contingerent, sibi ipsi tortor existens, ferrum jugulo adegit, adjuvantetrepidam manum eunucho Sporo. de cujus infelici exitu circumfertur, Nero, ne moriatur, moritur. ut evadat conjuratos, ipsemet adversus seipsum conjuravit.

Euseb. li. 2. c. 17  
histor.  
eccles. Domitianus ab omnibus contemptus, amicorum conspiratione trucidatus est.

Diocletianus ne in manus hostium deveniret, venenum sibi propinans, animam exhalavit.

Decius à Gothis superatus, & castris exutus, misere in undis suffocatus est.

Euseb. li. 8  
histor.  
c. ult. Maximinus tam horrendis doloribus correptus est, ut medici etiam ethnici dicerent, divinam esse plagam.

Maxentius in Christianos nonne omnè genus crudelitatis exercuit? sed quis exitus? eò miseriæ devenit, ut deletis copiis fugiens, in Tyberim insilierit, ibique gurgitibus absorptus est.

Valerianus à Rege Persarum in captivitatem ductus, Ephippiarii munus exercuit, stapedem tenens, barbaro Rege equum conscendente.

Euagrius lib. 4. c. 16. Justinianus senior donec Catholicus fuit, felicissimè imperavit, ita ut Italiam, Africam, aliasque multas provincias Romano Imperio restituerit. at ubi hæreticus factus est, & edictum proponere voluit de sua hæresi recipienda, mox repentina morte sublatus est. O divinam ultionem meritò illatam, non solum Principibus Ecclesiam persequentibus, sed etiam hæresiarchis ipsam dilaceran-



lacerantibus. audiamus & istorum tragicum finem.

Arrius dysenteria vexatus, & internis cruciatus torminibus, in latrinis animam exhalavit.

Manichæus fuit excoriatus vivus à Rege Persarum, cujus corpus pelle exutum, dilaniandum bestiis traditum, cutis autem tanquam uter, in signum tantæ iniquitatis, ante portas suspenditur. ad tantum enim dementiæ prevenit, ut se Paracletum vocitaret.

Nestorii impii linguam vermes, blasphemiae vindices, corroderent, mori coegerunt.

Lutherus sacrilegus, vitam clausit multò suavius, nam bene potus, & cibo distentus, absque ullo externo pietatis signo, cubitum secedens, apud inferos pernoctavit.

Zuinglius armatus adversus Catholicos, agmen ducens, in acie interfectus est.

Carlostadius ministrorum Basileensium relatione, à diabolo suffocatus interiit.

Priscillianus hæresiarcha, cum sociis, à Maximo Christiano Imperatore, necatus est.

Joannes Hus, & Hieronymus de Praga, in Constantiensis concilio, ab Imperatore Sigismundo exusti fuere.

Simon Magus, cum volare vellet, orationibus B. Petri dejectus, tibus fregit, & paulò post, cum summa ignominia obiit.

Montanus, & Theodotus, laqueis seipsos necaverunt.

Oecolampadius, cum vesperi sanus cubitum ivisset, manè inventus est ab uxore, mortuus in lecto.

Donatistæ quidam, cum canibus Eucharistiam projicerent, ab iisdem canibus lacerati sunt.

Michaël Servetus in media Genevensium urbe igni traditus, tam iniquo, atque impatienti

G g 4 animo,

Ruffin.  
lib. 10.

histor. c.  
13.

Epiphani.  
hæres.

66. Cyril.  
Hierosoly-

mit. cate-

chese

6. Euagrius  
lib. 1.

hist. c. 7.

Cochlæus  
in vita Lu-

theri.

Hieron.  
li. de vi-

ris illu-

stris.

Ægesip.  
li. 1. c. 2.

Euseb. li.  
5 hist. c.

16.

Cochlæus  
in a-

ctis Lu-

theri.

Opratus  
li. 2. con-

tra Par-

menia-

num.

animo, supplicium pertulit, ut magnis clamoribus, five, ut Calvinus ait, qui historiam mortis ejus conscripsit, magno boatu gladium flagitaret; sed cum in iudices planè inexorabiles incidisset, tandem aliquando est longissimo illo, acerbissimoque dolore consumtus.

Hieron.  
Bolle-  
cus in  
ejus vi-  
ta.

Calvinus denique scelestissimus, infelicissimo exitu vitam terminavit. quoniam à vermibus sexipedibus, veluti Herodes, veluti Antiochus, & tanquam Maximinus, fuit consumtus. quin; & invocatis dæmonibus, furibundus, & desperans, miserabili cruciatu animam emisit. ecce tragicus finis. en infelix exitus. ecce miseranda calamitas impiorum, non quærentium Dominum, à quo bona cuncta procedunt, & sine quo nihil validum, nihil sanctum.

Hinc igitur alieno periculo sapientes, omnes ediscant Principes, divinum Numen colere, sacros Ecclesiæ ministros venerari, Sanctam Romanam Sedem humiliter adorare, in qua nunc singulari Omnipotentis Dei providentiâ, & communi omnium fidelium applausu, sedet Sanctissimus D. N. URBANUS Octavus, Pontifex Maximus, quem divina benignitas incolumem diu, & feliciter conservet, ut orbis terrarum totus, sub aureo regimine triumphans, præ lætitia gestiens, decantare valeat, Jam feliciter omnia.

*Qui colit Ecclesiam, felici navigat aurâ,  
At qui contemnit, tendit ad exitium.*

# EXPLICANTUR

Propositiones notabiliores quæ in  
hoc opere continentur.



**D**EUS vult omnes homines sal-  
vos fieri. 282

Nunquid Deo cura est de ho-  
minibus? 285

Aqualiter est Deo cura de  
omnibus. 286

Princeps Regni Persarum restitit mihi viginti &  
uno diebus. 289

Orabat scelestus Dominum à quo non erat miseri-  
cordiam consecuturus. 282

In Angelis suis reperit pravitatem. 287

Ecce equus pallidus, qui sedebat super eum no-  
men illi mors. 400

Dies mei transierunt quasi naves poma portan-  
tes. 398

Majus est justificare peccatorem; quam creare  
celum, & terram. 284

Quidquid potest Deus mediante causa secunda,  
potest & immediate. 284

Deus non videt quot pulices quotidie nascan-  
tur. 285

Sancti merentur vitam aeternam de condigno. 290

Non sunt condigne passionibus huius temporis ad fu-  
turam gloriam. 290

Index Propositionum, quæ explicantur.

<i>Deus punit damnatos citra condignum.</i>	291
<i>Facti forma gregis, pascite qui in vobis est gregem Dei.</i>	112
<i>Virgam vigilantem ego video.</i>	118
<i>Cur timebo in die mala? iniquitas calcanei mei circumdabit me.</i>	126
<i>Ego Dominus creans malum.</i>	134
<i>Melior est iniquitas viri, quàm mulier beneficiens.</i>	140
<i>Avaritia idolorum servitus.</i>	161
<i>Quoniam non cognovi litteraturam introibo in potentias Domini.</i>	162
<i>Sic currite, ut comprehendatis.</i>	307
<i>Visitans speciem tuam non peccabis.</i>	308
<i>Militia est vita hominis super terram.</i>	398
<i>Per peccatum mors.</i>	392
<i>Gladium suum vibravit, arcum suum tenebat.</i>	395
<i>Statutum est omnibus hominibus semel mori.</i>	390
<i>Vide vias tuas in convalle.</i>	383
<i>Oculi sapientis in capite ejus.</i>	376
<i>Cinerem tanquam panem manducabam.</i>	385
<i>Beatus qui intelligit super egenum &amp; pauperem, in die mala liberabit eum Dominus.</i>	371
<i>Facilius est camelum intrare per foramen acus, quàm divitem intrare regnum cœlorum.</i>	373
<i>Ecce projicis me hodie à facie tua.</i>	409
<i>Non sum medicus, &amp; in domo mea non est panis.</i>	90
	Acne-

# Index Propositionum, quæ explicantur.

<i>Acuerunt linguas sicut serpentes.</i>	318
<i>Cor sapientis in dextera, cor fatui in sinistra.</i>	319
<i>Sagitta potentis acuta cum carbonibus desolatoriis.</i>	318
<i>Inclinato capite emisit spiritum.</i>	100
<i>Sta super me, quia tenent me angustie.</i>	101
<i>Factus est principatus super humerum ejus.</i>	95
<i>Voluntati ejus quis resistet?</i>	281
<i>In Christo omnes vivificabuntur.</i>	282
<i>Videbit omnis caro salutare Dei.</i>	282
<i>In domo Patris mei mansiones multe sunt.</i>	292
<i>Dominus regit me, &amp; nihil mihi deerit.</i>	299
<i>Ego flos campi.</i>	299
<i>Qui edunt me, adhuc esurient.</i>	299
<i>In quem desiderant Angeli prospicere.</i>	300
<i>Statura tua assimilata est palma.</i>	451
<i>Confortare &amp; esto robustus.</i>	452
<i>Superbia eorum qui te oderunt ascendit semper.</i>	422
<i>Spiritus Domini replevit orbem terrarum.</i>	428
<i>Vos ex patre diabolo estis.</i>	429
<i>Regnum meum non est de hoc mundo.</i>	429
<i>Vadam &amp; videbo visionem hanc magnam, quare non comburatur rubus.</i>	448
<i>Posuerunt me custodem in vineis.</i>	272
<i>Percussit Dominus Ozam.</i>	272
<i>Sicut qui mittit lapidem in acervum Mercurii, ita qui tribuit insipienti honorem.</i>	268
<i>Factum</i>	

Index Propositionum , quæ explicantur.

<i>Factum est prælium magnum in calo.</i>	229
<i>Iusto non est lex posita.</i>	217
<i>Tibi soli peccavi , &amp; malum coram te feci.</i>	218
<i>Reddite quæ sunt Caesaris , Caesari.</i>	207
<i>In fenestra per quam dimisisti nos.</i>	204
<i>Dabo clavum David super humerum ejus.</i>	211
<i>Dixit insipiens in corde suo , non est Deus.</i>	186
<i>Magnificat anima mea Dominum.</i>	188
<i>Dabis servo tuo cor docile.</i>	174
<i>Perfecto odio oderam illos.</i>	53
<i>Descendam &amp; videbo.</i>	36
<i>Emitte agnum Domine dominatorem terræ.</i>	52
<i>Secundum mensuram delicti , erit etiam plagarum modus.</i>	27
<i>Peccata populi comedetis.</i>	17
<i>Fuerunt mihi lachryma mea panes.</i>	19
<i>Ascendam ad Aquilonem , &amp; ero similis Altis- simo.</i>	431
<i>Ego rogavi pro te Petre , ut non deficiat fides tua.</i>	347
<i>Ambula coram me , &amp; esto perfectus.</i>	186

# I N D E X

## RERUM NOTABILIVM,

Quæ in hoc theatro continentur

### A



**BELIS** sacrificium cur Deus respexit. 367

Accedendum ad Principem sicut ad ignem. 192

Achæus Lydiæ Rex cur præcipitatus in flumen aureum. 209

Adam vixit nongentis & triginta annis. 399

Adulatio appellatur oleum veneni. 333

Adulator comparatur chamæleonti. 331

Adulatorum descriptio. 332

Adulatores comparantur Sirenibus. 327

Adulatores similes locustis. 331

Adulator in prosperis tantum servit. 331

Adulatores regni proditores. 189

Adriani Imperatoris dictum Principe dignum. 26

Aëris pulchra descriptio. 281

Agathocles Rex Siciliae cur vasis figuleis utebatur. 391

Agrippinae ambitio, & dementia. 228

Alexander Magnus veneno sublatu. 351

Alexander Magnus diligebat Aristotelem. 260

Alexandri Magni regium responsum. 30

Alexander Magnus exemplo suo milites accendebat. 15

Alexandri Magni vigilantia singularis. 208

Alexander Quintus Pontifex in pauperes munificus. 365

Alexander Magnus unam aurem servabat reo. 320

Alexandri desiderium insatiabile. 302

Alexandri Severi in eligendis ministris diligentia. 159

Alexandri Magni continentia laudatur. 136

Alexandri

# Index rerum notabilium.

<i>Alexandri Farnesii Ducis laudes.</i>	178, 179
<i>Alexander Magnus cur occidit Clytū.</i>	195
<i>Alexander Magnus litteratos fovebat.</i>	260
<i>Amaranthi natura mirabilis.</i>	20
<i>Amedeus Dux Sabaudie in pauperes pius.</i>	366
<i>Amici figura apud antiquos.</i>	334
<i>Amicus verus dignoscitur in adversis.</i>	337
<i>Amicorum omnia communia.</i>	336
<i>Amici veri Phitiās &amp; Damon.</i>	338
<i>Amici veri Pylades &amp; Orestēs.</i>	339
<i>Amici falsi fortunam, non personam sequuntur.</i>	340
<i>Amans est amens, &amp; cæcus.</i>	300
<i>Amoris etymologiæ variæ.</i>	69
<i>Amoris causa est bonum.</i>	70
<i>Amoris causa est cognitio.</i>	70
<i>Amoris causa est similitudo.</i>	70
<i>Amoris propria causa est amor.</i>	70
<i>Amor potest nasci solus, non autem crescere.</i>	71
<i>Amorem armatum &amp; dormientem, cur pinxerunt anti-</i>	
<i>qui.</i>	44
<i>Angeli superiores illuminant inferiores.</i>	288
<i>Anglia omnium hæresium officina.</i>	15
<i>Anima hominis ad imaginem deitatis</i>	281
<i>Antæi luctantis cum Hercule victoria.</i>	360
<i>Antigoni Regis dictum memorabile.</i>	213
<i>Antoninus Caracallus novercam duxit in uxorem.</i>	213
<i>Apelles fortunam sedentem cur pinxit.</i>	342
<i>Apelles donum Regis Agefilai cur appellavit furtum.</i>	204
<i>Apes humano usui mellificæ.</i>	19
<i>Apes eligunt regem qui non habet aculeum.</i>	67
<i>Apum rex sine aculeo, &amp; si habet, non ad vindictam.</i>	41
<i>Ars regendi curis &amp; periculis obnoxia.</i>	103
<i>Arrogantia Maximini Imperatoris.</i>	427
<i>Aspasie uxoris Periclis responsum.</i>	400
<i>Attila territus Leonem Papam veneratur.</i>	442

Augu-



## Index rerum notabilium.

<i>Augustini dictum celebre pro Ecclesia.</i>	408
<i>Augusti clementia Cinnam conciliavit.</i>	51
<i>Augusti Caesaris laudabile dictum.</i>	26
<i>Austriaca familia cur ad tantum potentiae culmen.</i>	406
<i>Augustini distichon contra inurmuratores.</i>	320
<i>Aurum omnia expugnat.</i>	155

## B

<i>Bajazetus rex Turcarum captivus.</i>	347
<i>Baculus in aqua cur videtur fractus.</i>	35
<i>Barberina familia, more apis, pro bono communi laborat.</i>	19
<i>Basilii Imperatoris egregium dictum.</i>	12
<i>Beati possident Deum totum, sed non totaliter.</i>	298
<i>Belisarius ludibrium fortunæ.</i>	348
<i>Beneficia sunt compedes aurei.</i>	204
<i>Beneficia non omnibus equaliter distribuenda.</i>	267
<i>Bernardi dictum de conditionibus Prælati.</i>	13
<i>Bernardi fratris minoris pulchra responsio.</i>	296
<i>Blancæ Reginæ Galliæ verba aurea.</i>	421
<i>Bonitas Dei in creatione.</i>	283

## C

<i>Cæsar Imperator volebat coli ut Deus.</i>	425
<i>Caligula crudelitas.</i>	228
<i>Caligula humanum sanguinem sitiebat.</i>	83
<i>Caligula ambitio.</i>	228
<i>Calisthenes cur ab Alexandro occisus.</i>	193
<i>Cambysis regis temeraria crudelitas.</i>	194
<i>Cambyses cur excoriavit judicem.</i>	153
<i>Canuti regis pulchra historia.</i>	463
<i>Carolo Quinto elogium insigne adscriptum.</i>	128
<i>Carolus Magnus in bellis cur victor.</i>	78

Caro-

## Index rerum notabiliuꝝ.

<i>Carolus Borromæus vendidit principatum, ut aleret pauperes.</i>	365
<i>Carolus Quintus cur objurgavit legatum barbarum.</i>	324
<i>Carolus Quintus Solimanum superavit.</i>	407
<i>Caroli Quinti pietas mirabilis.</i>	407
<i>Carnalia peccata minoris culpe, majoris infamie.</i>	131
<i>Carnis voluptas ignis devorans.</i>	130
<i>Carnis voluptas vincitur fuga.</i>	138
<i>Catonis senioris dictum.</i>	54
<i>Cæcus ferens claudum quid adumbrat.</i>	169
<i>Certamen inter Zeuxim &amp; Parrhasium.</i>	35
<i>Cæsar cur tam infelicitè occubuit.</i>	182
<i>Cæsar's verba superbiæ plena.</i>	351
<i>Christus cur tantum tres Apostolos duxit ad montem.</i>	272
<i>Christo nascente tres Soles in cælo apparuerunt.</i>	278
<i>Christi anima apprehendit Deum, sed non comprehendit.</i>	286
<i>Christus cur inter Moysen &amp; Heliam.</i>	55
<i>Christus in cruce pendens cur caput inclinavit.</i>	99
<i>Christus cognoscit omnia quæ cognoscit Deus scientia visionis.</i>	306
<i>Christus quare moriens dixit, sitio.</i>	303
<i>Cyprianus acceptam mortis sententiam, respondit, amen.</i>	452
<i>Cyri caput in utro sanguine pleno.</i>	239
<i>Cyri continentia admirabilis.</i>	138
<i>Cyri memoria incredibilis.</i>	378
<i>Clementia Principis severitate miscenda.</i>	53
<i>Clementia Principis firmat Regnum.</i>	44
<i>Clodoveus baptizatur à B. Remigio.</i>	15
<i>Constantinus Imperator cur prosperatus.</i>	78
<i>Constantinus jubebat ante exercitum crucem ferri.</i>	407
<i>Constantinus sacerdotes venerabatur.</i>	438
<i>Consilii templum apud antiquos subterraneum.</i>	124
<i>Consiliarii quales esse debeant.</i>	196
<i>Cosdrosus amiciebat adorari ut Deus.</i>	425

Corona,

## Index rerum notabilium.

Corona, & angustia apud Hebræos sunt idem.	101
Correctio quomodo fieri debet.	59
Contentio inter Solem, & Aquilonem.	50
Cor hominis cur superius latum, inferius angustum.	297
Creationis opus præstantissimum.	283
Creationis opus nulli creaturæ communicabile.	284
Culpa temporalis quomodo punitur pœna æterna.	28
Cupressus symbolum justitiæ.	29

## D

<b>D</b> avid quare quotidie plorabat.	20
David cur plorabat in omni loco.	21
David quare non satiabatur lachrymas effundere.	21
David cur magis pestem elegit, quàm famem, aut bellum.	105
Damocles cognovit pericula Principum.	88
Delphinus anchoræ alligatus quid significet.	34
Delatoribus non facile credendum.	316
Delatores comparantur serpentibus.	318
Democratia vocatur popularis.	325
Deus cur habet stellas in manu, & gladium in ore.	49
Deus cur gestat gladium in femore.	58
Deus quomodo malum creat.	124
Deus voluntate antecedente omnes ordinat ad gloriam.	61
Deus est scutum timentium se.	401
Deus est sphaera intelligibilis.	278
Deus nulli denegat auxilium sufficiens.	282
Deo meliora sunt offerenda.	367
Diadema regium spinosum.	103
Dies naturalis quis dicatur.	207
Dignitates sunt spinis circumseptæ.	100
Dives cur difficile salvatur.	373
Dionysius tyrannus sibi adurebat capillum.	77
Dionis dictum Alexandro Magno.	127

H h

Diony-

## Index rerum notabilium.

*Diomysius Marlianus Mediolani Archiepiscopus à Constantio Imperatore ob fidei constantiam relegatus.*

<i>Domini nomen cur non ante creationem?</i>	<u>467</u>
<i>Dominandi libido nulli parcat.</i>	<u>297</u>
<i>Domitianus in epistolis se nominabat Deum.</i>	<u>224</u>
<i>Dominus quasi do minus.</i>	<u>425</u>
	<u>50</u>

## E

<i><b>E</b>cclesia comparatur Lune.</i>	<u>446</u>
<i>Ecclesia dicitur una.</i>	<u>454</u>
<i>Ecclesia dicitur sancta.</i>	<u>455</u>
<i>Ecclesia comparatur Phœnici.</i>	<u>459</u>
<i>Ecclesia cathedra sanctitatis.</i>	<u>459</u>
<i>Ecclesia comparatur navi.</i>	<u>459</u>
<i>Ecclesia Romana est universalis.</i>	<u>456</u>
<i>Ecclesia dicitur Apostolica.</i>	<u>357</u>
<i>Ecclesia dicitur visibilis.</i>	<u>357</u>
<i><b>Ecclesia</b> comparatur rubo qui non comburebatur.</i>	<u>448</u>
<i>Ecclesia cur comparatur malo punico.</i>	<u>449</u>
<i>Ecclesia cur assimilatur palmæ.</i>	<u>451</u>
<i>Ecclesiæ fundatio &amp; progressio magnum miraculum.</i>	<u>453</u>
<i>Ecclesia quinque privilegiis decoratur.</i>	<u>453</u>
<i>Ecclesia validis præfidiis armata.</i>	<u>450</u>
<i>Echinus cur symbolum sapientis.</i>	<u>360</u>
<i>Edmundus Campianus Societatis Jesu Theologus, acceptâ pro fide mortis sententiâ canebat, Te Deum laudamus.</i>	<u>452</u>
<i>Eleemosyna liberat ab omni malo.</i>	<u>371</u>
<i>Eleemosyna multiplicat facultates.</i>	<u>370</u>
<i>Elephantes suis stridore territi fugiunt.</i>	<u>356</u>
<i>Eligens indignos affert magnum damnum.</i>	<u>272</u>
<i>Epitaphium Pii Quinti Pontificis.</i>	<u>384</u>
	<i>Epi-</i>

## Index rerum notabilium.

<i>Epitaphium Scipioni Africano adscriptum.</i>	<u>390</u>
<i>Epitaphium Silvii Palladii.</i>	<u>385</u>
<i>Epitaphium Cyri Regis.</i>	<u>382</u>
<i>Exempla Principum timentium Dominum.</i>	<u>404</u>
<i>Exemplum notabile pro eleemosyna.</i>	<u>366</u>

### F

<b>F</b> <i>Abius Maximus in regendo prudentissimus.</i>	<u>85</u>
<i>Fabritii Romani fides admirabilis.</i>	<u>237</u>
<i>Fidem servare etiam hosti debet Princeps.</i>	<u>233</u>
<i>Finis productionis creaturarum quis fuit.</i>	<u>26</u>
<i>Formicæ descriptio subtilis.</i>	<u>279</u>
<i>Fortuna quare appellatur vitrea.</i>	<u>342</u>
<i>Fortuna cur pingitur rotæ insidens.</i>	<u>344</u>
<i>Fortune inconstantis descriptio.</i>	<u>354</u>
<i>Fortune vera etymologia.</i>	<u>346</u>
<i>Franciscus majorem reverentiam Sacerdoti, quàm Angelo exhibuisset.</i>	<u>442</u>
<i>Franciscus Lateranensem Basilicam humeris sustinebat.</i>	<u>404</u>

### G

<b>G</b> <i>Alliæ Reges Ecclesiæ defensores.</i>	<u>406</u>
<i>Gallus albus suo buccinatu leones fugat.</i>	<u>356</u>
<i>Germania floruit in fide sub Carolo Magno.</i>	<u>406</u>
<i>Gloria cælestis satiat desiderium hominis.</i>	<u>300</u>
<i>Gloriæ cælestis magnitudo.</i>	<u>293</u>
<i>Gloria Paradisi superat omne desiderium.</i>	<u>287</u>
<i>Gregorius XIII legatos Japonios honorifice excepit.</i>	<u>407</u>
<i>Gregorius Magnus Cathedram spinosam appellabat.</i>	<u>98</u>

# Index rerum notabilium.

## H

<b>H</b> eliotropium Solis cursum imitatur.	9
Henricus Octavus Angliæ Rex tur à fide defecit.	271
Henricus Quartus Rex Gallie pro insigni gerebat malum granatum.	56
Henrici Octavi error detestandus.	453
Herodias qua morte occubuerit.	75
Hercules occidit hydram non gladio, sed igne.	61
Hieronymi opinio de gloria Paradisi.	293
Hispania fidem deduxit in Indias.	407
Hippomenes superavit Atalantam, qua industria?	152
Hispani Reges à suis regnis expellunt Mauros, & Judeos.	406
Homo est arbor inversa, cur?	296
Homo quomodo dicitur ad imaginem Dei.	297
Homo comparatur naviganti.	397
Hominis vita similis cursori.	397
Hominis vita cur dicitur piraterium.	398
Hominis vita cur comparatur militia.	346
Hominem cur Deus formavit de limo terræ.	386
Homo in morte quid secum sumit.	381
Hominis vita cur comparatur herbæ agri.	378
Hominis in productione cur dicitur faciamus.	309
Homo inter omnia animalia crudelior.	104

## I

<b>I</b> esuitæ appellantur nuncii cœlestes, nubes, & columbæ.	408
Iesuitæ appellantur Angeli veloces.	408
Imperatores sint benigni in audiendo subditos.	322
Imperatores qui adulatores abhorrebant.	323
Imperatoris verum hieroglyphicum.	116
Impe-	

## Index rerum notabilium.

<i>Imperium mundi cur pilæ comparetur.</i>	345
<i>Imperium maximum imperare sibi.</i>	126
<i>Imperare res <u>periculosa</u>.</i>	105
<i>Imperium tamdiu floret, quamdiu in timore Dei.</i>	401
<i>Imperia crudelia non diuturna.</i>	50
<i>Imperatoris barbari in fratres crudelitas.</i>	223
<i>Imperator triplici corona decoratur.</i>	461
<i>In aula mortis nullum discrimen.</i>	389
<i>Joannes Picus appellatur phœnix.</i>	295
<i>Isaias petit agnum, cur non leonem, &amp; taurum.</i>	52
<i>Juliani Imperatoris stemma.</i>	394
<i>Juliani Imperatoris vigilantia.</i>	108
<i>Iustitia bonum alienum.</i>	26
<i>Iustitia comparatur Soli.</i>	24
<i>Iustitia quomodo Sole splendidior.</i>	24
<i>Iustitiæ mirabilis pictura.</i>	34
<i>Iustitia in Principe accidens inseparabile.</i>	40
<i>Iustitia servanda non geometrica, sed arithmetica.</i>	27
<i>Iustitia cur dicitur cingulum lumborum.</i>	154
<i>Iustitia nostri temporis comparatur statuæ multiformi.</i>	154
<i>Iustitia sine clementia crudelitas est.</i>	62
<i>Iusto non est lex posita.</i>	217

## L

<b>L</b> <i>Abor improbus omnia vincit.</i>	254
<i>Laconicus sermo laudatur.</i>	185
<i>Lachrymæ cur appellantur panes.</i>	19
<i>Lacedæmonii ad bellum ituri cur amoris sacrificabant.</i>	68
<i>Laurus semper viridis.</i>	359
<i>Leges aranearum telis comparantur.</i>	43
<i>Leo Decimus litteratorum Mæcenæ.</i>	267
<i>Leo Decimus pro metris mitras dabat.</i>	267
<i>Leo symbolum vigilantie.</i>	107

# Index rerum notabilium.

Leo rex animalium à puero ligatur , & ducitur.	307
Lechus Poloniae Rex ab aratro ad regnum.	355
Libri sunt optimi consilarii.	176
Lingua serpentis quinque habet conditiones.	318
Liviae Augusti uxoris consilium sapiens.	51
Lothi uxor cur in statuam salis conversa.	303
Lucifer quomodo appetiit esse similis Deo.	432
Ludovici Regis Germaniae obsequium factum Pontifici.	443
Ludovicus Rex Galliae suis manibus eleemosynam erogabat.	372
Ludovicus Rex Galliae vocabat pauperes , milites sui regni.	372
Ludovicus Rex potius mori cupiebat , quàm peccare.	157
Luna inter planetas cur magis influit.	110
Luxuria regnorum perniciēs.	125

## M

M Artinus praeposuit sacerdotem Maximo Imperatori.	441
Martini in pauperes benignitas.	365
Mauritius Imperator à Phoca occiditur.	363
Mahumetus cur prohibuit philosophiae studium.	271
Mathusalem vixit nongentis & septuaginta novem annis.	399
Memoria mortis utilissima.	328
Melaniae in adversis constantia.	363
Mercurii statua cur in biviis collocatur.	268
Meritum de rigore justitiae , de condigno , de congruo.	234
Metus est malus custos regni.	63
Minerva ab antiquis pingebatur armata.	254
Mitridatis memoria insignis.	378
Mi-	



## Index rerum notabilium.

<i>Misericordia Dei attributum principale.</i>	<u>59</u>
<i>Mors in mundi initio claudicabat , nunc equitat.</i>	<u>399</u>
<i>Mors more prægnantium carpit acerba.</i>	<u>400</u>
<i>Mors sedet super equum velociter currentem.</i>	<u>400</u>
<i>Mors cur sedet super equum pallidum. &amp; viridem.</i>	<u>400</u>
<i>Mortis memoria sit ante oculos , &amp; victor eris.</i>	<u>395</u>
<i>Mors inexorabilis omnia æquat.</i>	<u>397</u>
<i>Mors cur equo insidet.</i>	<u>397</u>
<i>Mors cur pingitur cæca , surda , nuda , armata.</i>	<u>388</u>
<i>Mors cur comparatur arieti.</i>	<u>389</u>
<i>Mors ubique dominatur.</i>	<u>395</u>
<i>Mors omnium rerum fortissima.</i>	<u>396</u>
<i>Mors cur gerit gladium , &amp; arcum.</i>	<u>395</u>
<i>Mors laudabilis in coronationibus Imperatorum.</i>	<u>375</u>
<i>Monarchia est principatus unius.</i>	<u>461</u>
<i>Mulieris impudicæ descriptio.</i>	<u>133</u>
<i>Mulier præcipitat etiam sapientes.</i>	<u>133</u>
<i>Mundi fallacia.</i>	<u>329</u>
<i>Musonii consilium salubre.</i>	<u>400</u>

## N

<b>N</b> <i>Ero in primordio Imperii mitissimus fuit .</i>	<u>65</u>
<i>Nero Imperator matrem Agrippinam necavit.</i>	<u>82</u>
<i>Nero fratrem Britannicum veneno necavit.</i>	<u>82</u>
<i>Nero Senecam mortis condemnavit.</i>	<u>82</u>
<i>Neronis finis miserabilis.</i>	<u>82</u>
<i>Nicolaus Quintus Pontifex , doctos fovebat.</i>	<u>267</u>
<i>Nobilitas vera propriis meritis immititur.</i>	<u>266</u>
<i>Noë vixit nongentis &amp; quinquaginta annis.</i>	<u>399</u>
<i>Nomen Dei quomodo exprimitur Chaldaicè.</i>	<u>277</u>

# Index rerum notabilium.

## O

<b>O</b> Beliscus cui antiquitus erigebatur.	26
Octavius Farnesius appellabatur dux Gratiarum.	40
Oliva misericordiae symbolum.	373
Orationis virtus mirabilis.	402
Osualdus Rex Scotorum in pauperes pius.	374
Osualdi dextera in pauperes munifica <i>remansit</i> incorrupta.	374
<i>Oza</i> cur à Deo percussus.	272

## P

<b>P</b> Anis est cibus omnibus communis.	20
Pastor comparatur animæ, grex corpore.	114
Pastoris officium est tondere pecus, non deglubere.	203
Parasiti acutum dictum.	344
Pauli Æmiliæ Romani dictum.	94
Paulus videns divinam essentiam non fuit comprehensor.	307
Pauperum causæ negliguntur.	158
Pecuniæ cur dicuntur opes.	153
Pecuniæ cur dicuntur facultates.	153
Pelopidas Imperator vigilabat pro salute populi.	26
Pericles cur imperio se abdicavit.	90
Periclis aurea verba.	115
Petrus & Paulus Romæ custodes.	453
Philippus quare nato Alexandro exultabat.	254
Philippus Macedo timebat fortunam prosperam.	342
Philippus Secundus draconem orientalem submersit.	407
Philippi Tertii Hispaniæ Regis pia mens.	407
Philippus Quartus Hispaniarum Rex Ecclesiæ militantis clypeus.	17
Philippi Macedonum Regis prudentia.	85
	Pine

## Index rerum notabilium.

<i>Pius in pauperes bene moritur.</i>	<u>374</u>
<i>Pipinus &amp; Carolus Romana Ecclesie defensores.</i>	<u>445</u>
<i>Pylades &amp; Orestes veri amici.</i>	<u>339</u>
<i>Pythagora sapiens responsum.</i>	<u>132</u>
<i>Pyrrhi Regis finis miserabilis.</i>	<u>349</u>
<i>Plato vocabat hominem, Genus divinum.</i>	<u>391</u>
<i>Plato deridebat Dionysium custodibus septum.</i>	<u>90</u>
<i>Platonis consilium laudabile.</i>	<u>10</u>
<i>Plotinus vocabat hominem, quoddam omne.</i>	<u>391</u>
<i>Polycratis felicitas portentosa.</i>	<u>348</u>
<i>Populus timet Principem quando videt ipsum timere Deum.</i>	<u>409</u>
<i>Praelati non residentes quibus comparantur.</i>	<u>110</u>
<i>Praelatus cur appellatur forma gregis.</i>	<u>112</u>
<i>Praelati absentia quantum noceat populis.</i>	<u>110</u>
<i>Prelaturas cur multi recusarunt.</i>	<u>98</u>
<i>Primum mobile omnes sphaeras secum trahit.</i>	<u>9</u>
<i>Principi nihil licet nisi honestum.</i>	<u>213</u>
<i>Principes qui fuerunt iustitie amatores.</i>	<u>214</u>
<i>Principes qui fuerunt litterarum amatores.</i>	<u>253</u>
<i>Princeps debet esse litteris ornatus.</i>	<u>253</u>
<i>Princeps sine litteris, quid sit.</i>	<u>253</u>
<i>Principes qui litteratos beneficiis fovebant.</i>	<u>260</u>
<i>Principum vitia non possunt abscondi.</i>	<u>23</u>
<i>Principes superbi, à Deo humiliati.</i>	<u>425</u>
<i>Principes qui Ecclesiam persecuti, sunt mala morte occubue- re.</i>	<u>465</u> & seqq.
<i>Principes cum amicis usque ad aras.</i>	<u>31</u>
<i>Princeps timens Deum victoriis decoratur.</i>	<u>409</u>
<i>Princeps debet aliquando latere Solis &amp; imbris instar.</i>	<u>151</u>
<i>Principes cur olim pingebantur sine oculis.</i>	<u>155</u>
<i>Principis malum exemplum populum inficit.</i>	<u>16</u>
<i>Principes cur comparantur stellis.</i>	<u>12</u>
<i>Principum errata magis notantur.</i>	<u>10</u>

## Index rerum notabilium.

<i>Princeps per clementiam fit similis Deo.</i>	46
<i>Princeps bonus mansuetudine agni regit.</i>	52
<i>Principis munus est prodesse, non obesse.</i>	52
<i>Principes sunt specula orbis theatro exposita.</i>	23
<i>*Princeps cur comparatur centro.</i>	29
<i><u>Princeps sit</u> alienus ab omni affectu.</i>	29
<i>Principum actiones imitantur populi.</i>	13
<i>Princeps in ferenda sententia maturè procedat.</i>	34
<i>Princeps non debet statim credere, sed prius vide.</i>	34
<i>Principes qui sine consilio regunt, malum exitum habent.</i>	178
<i>Principes debent vitare onerosa tributa.</i>	208
<i>Princeps an teneatur parere legibus.</i>	210
<i>Princeps non subditur legibus, quantum ad vim coactivam.</i>	218
<i>Principes multi ludibrio fortune <u>expositi</u>.</i>	350
<i>Princeps debet esse facilis omnibus.</i>	312
<i>Princeps dicitur cor populi.</i>	208
<i>Princeps debet imperare subditis sicut pater liberis.</i>	65
<i>Princeps ad puniendum tardus, ad præmiandum velox.</i>	67
<i>Princeps malus semper timet.</i>	76
<i>Princeps deberet semper vigilare.</i>	107
<i>Principis nimius rigor excitat seditiones.</i>	85
<i>Princeps debet esse instar solis.</i>	267
<i>Princeps in magistratibus debet præponere digniores.</i>	274
<i>Princeps comparatur pictori.</i>	267
<i>Princeps cur comparatur centro.</i>	268
<i>Princeps dando officia indignis, restitutioni est obnoxius.</i>	270

# Index rerum notabilium.

## R

<b>R</b> anutii Farnesii dictum notabile.	40
Ranutius Farnesius custos justitiæ.	40
Ranutii Farnesii Gymnasium Pythagoricum.	122
Ranutii Farnesii ducis laudes.	149
Reges Gallie Ecclesiæ defensores.	406
Regis nomen cur scriptum in semore.	206
Rex quomodo distinguitur à tyranno.	65
Rex erga populos, sicut pastor erga greges.	114
Rex multis laboribus & periculis est obnoxius.	97
Regnum sine justitia, latrocinium.	43
Regni custodia amor populorum.	49
Regia Principis qualis esse debeat.	23
Regni onus à Carolo Quinto bene cognitum.	99
Regnandi libido sevit etiam in fratres.	222
Rex bonus pastori comparatur.	199
Reges Gallie cur appellati Christianissimi.	406
Relativa sunt simul naturà.	435
Relativa dicuntur ad convertentiam.	435
Responsio aurea Ecclesiæ, Frederico Imperatori.	449
Respublica Christiana jubilat sub Urbano Octavo.	19
Reus punitur loco delicti.	20
Rudolphus Austriacus facile omnes audiebat.	150
Rudolphus Imperator Austriacus laudatur.	314

## S

<b>S</b> acerdotum laudes & tituli.	438
Sacerdotes quibus titulis decorantur.	441
Salamandra typus Ecclesiæ.	448
Salamandra in medio flammarum non uritur.	448
Sapiens non frangitur adversis.	361
	Saul

# Index rerum notabilium.

<i>Saul Regi cur appositus armus ad manducandum.</i>	95
<i>Saul regnavit annis quadraginta, cur scriptura dicit, duobus tantum annis.</i>	40
<i>Sceptrum regium cur dicitur virga vigilans.</i>	118
<i>Scipio major continentissimus.</i>	136
<i>Senatores apud Thebanos pingebantur sine manibus.</i>	155
<i>Senecæ memoria portentosa.</i>	378
<i>Seneca cur Neronis jussu moritur.</i>	193
<i>Sejani malitia mirabilis.</i>	144
<i>Seleuci Locrensiū regis exemplum.</i>	214
<i>Xenophontis consilium optimum.</i>	11
<i>Sejani finis miserabilis.</i>	345
<i>Semiramis columbam &amp; gladium cur gerebat in stemmate.</i>	427
<i>Silentii virtus laudatur.</i>	124
<i>Silentium est principis ornamentum.</i>	119
<i>Silentium à Philosophis laudatum &amp; observatum.</i>	120
<i>Simon dormis? cur non dicit Petre?</i>	117
<i>Sissebutus Rex Hispaniarum Judæos expulit.</i>	406
<i>Sixtus Quintus Japonios muneribus decoravit.</i>	407
<i>Sigismundus Imperator adulatorem colapho percussit.</i>	333
<i>Socrates constans in utraque fortuna.</i>	361
<i>Societas Jesu opus Dei mirabile.</i>	408
<i>Soli comparatur Justitia.</i>	24
<i>Sol obedivit Josue imperanti.</i>	402
<i>Sophonis Carthaginensis dementia.</i>	426
<i>Speculum symbolum Justitiæ.</i>	27
<i>Stellæ cur videntur parvæ, cum sint majores terra.</i>	35
<i>Struthio non incubando, sed intueno animat ova.</i>	209

## T

<i>T Amberlanus in obsidione quid observabat.</i>	57
<i>Terræ pulchra descriptio.</i>	280
<i>Testudo caret corde inter alia animantia.</i>	133
<i>Theo.</i>	

# Index rerum notabilium.

<i>Theodosius orando, &amp; flendo victorias reportavit.</i>	<u>404</u>
<i>Theodosius Imperator quodnam testamentum reliquit filiis.</i>	<u>401</u>
<i>Themistoclis memoria singularis.</i>	<u>378</u>
<i>Themistoclis aureum dictum.</i>	<u>32</u>
<i>Theodosius Imperator quomodo obedivit Ambrosio.</i>	<u>439</u>
<i>Taletis Milefii dictum.</i>	<u>427</u>
<i>Tiberius Imperator invenit thesaurum.</i>	<u>370</u>
<i>Tiberii inaudita crudelitas.</i>	<u>83</u>
<i>Tiberius interdixit mortuos deflere.</i>	<u>83</u>
<i>Tiberius indignos eligebat ad magistratus.</i>	<u>271</u>
<i>Tiberius ministros non removebat.</i>	<u>145</u>
<i>Timentes Deum prosperantur.</i>	<u>401</u>
<i>Timoris objectum quodnam sit.</i>	<u>288</u>
<i>Thoma Cantuariensis Episcopi responsum egregium.</i>	<u>157</u>
<i>Traiani Imperatoris egregium dictum.</i>	<u>32</u>
<i>Traiani anima an à pœnis inferni erepta.</i>	<u>290</u>
<i>Trinitatis mysterium describitur.</i>	<u>278</u>
<i>Tyrannus raro senex.</i>	<u>86</u>
<i>Tyrannorum conditio.</i>	<u>25</u>

## V

<i>Venus cur pede premit testudinem.</i>	<u>133</u>
<i>Venus componitur ex ve, &amp; nus.</i>	<u>132</u>
<i>Veritas cur molesta principibus.</i>	<u>191</u>
<i>Veritatis duplex effectus.</i>	<u>191</u>
<i>Veritas filia temporis &amp; memoriæ.</i>	<u>22</u>
<i>Vespasianus pro insigni gerebat delphinum Ancora alligatum.</i>	<u>200</u>
<i>Vigilantia prodest populis.</i>	<u>109</u>
<i>Virtutes morales sunt connexæ.</i>	<u>42</u>
<i>Vir fortis semper idem.</i>	<u>359</u>
<i>Visus sæpe decipitur.</i>	<u>35</u>
<i>Vita solitaria quietis amica.</i>	<u>92</u>
<i>Vita</i>	

# Index rerum notabilium.

<i>Vita hominis cur comparatur vento.</i>	399
<i>Vita hominis cur dicitur navis voluntaria.</i>	398
<i>Vita hominis cur comparatur navi poma portant.</i>	398
<i>Vlysses cur malo navis adherebat.</i>	129
<i>Voluntas antecedens &amp; consequens quanam fit.</i>	281
<i>Urbanus Octavus Vicarius Christi Petri successor.</i>	460
<i>Vrfa parit catulos informes, quos lambendo format.</i>	48



Aφ 1 1455239

















Handwritten text on a small label:  
K. 12  
C. 19